


॥ श्री ॥

श्री गोंपीजनवल्लभो विजयतेतराम्

श्रीआचार्यजी महाप्रभुनके सेवक

चौराशी वैष्णवनकीवार्ता.



अनुक्रमणिकासहित ।

यह पुस्तक

पुष्टिमार्गीय श्रीवल्लभ-संप्रदायी वैष्णवनके

नित्य नैमित्तिक पठनार्थ

उसीकों

गंगाविष्णु श्रीकृष्णदासजीने

अपने " लक्ष्मीवेंकटेश्वर " छापेखानेमें

छापकर प्रसिद्ध किया ।

संवत् १९८५, शके १८९०.

कल्याण-मुंबई.

सब हक यन्त्राधिकारीने स्वाधीन रखे हैं.

संश्लेषी वैष्णवयोगी पुस्तकें ।

नाम.	कि.	र.आ.	नाम.	कि.	र.आ.
रामस्तवराज भाषाटीका	०-९		अष्टावक्रगीता अत्युत्तम सान्वय भाषाटीका	१-०	
रामस्तवराज, रामरक्षा, बड़ा अक्षर			गीता रामनुजभाष्य टीका	१-८	
रेशमीगुटका.	०-७		भगवद्गीता भाष्यप्रकाश टीका....	३-०	
आलंकारस्तोत्र भाषाटीका....	०-६		मनुस्मृति सटीक कुल्लूकभट्टकृत संक्षेप	१-०	
राममहिम्न, स्तोत्र बड़ा अक्षरोंमें	०-१		मनुस्मृतिसन्वयभाषाटीका	३-८	
विष्णुसहस्रनाम भाषाटीका	०-८		व्रतराजअतिउत्तमटिप्पणी सहित जिसमें वर्षभरकी सब तिथियोंके व्रतउद्यापन निर्णय किये हैं.	६-०	
विष्णुसहस्रनाम सन्धि बड़ा अक्षर, रेशमी गुटका.	०-७		सृष्टिरत्नाकर (धर्मशास्त्रका प्रामाणिकग्रन्थ)	२-०	
गीता चिन्मयानन्दरामिकृत सार्यटीका सल अन्वय जयचन्दरी सहित भाषाटीका	८-०		य ज्ञानलक्ष्यस्मृति भिताक्षरा पं० मिहिरचन्द्रकृत पद, योजना, भावार्थ और तात्पर्यार्थ टिप्पणी तथा भाषाटीकासहित	६-०	
श्रीमद्भगवद्गीता सान्वयव्रजभाषाटीका दोहासहित	१-८		धर्मसिंधु टिप्पणी सहित	३-०	
गीतामृततरंगिणी भाषाटीका (रघुनाथ प्रसादकृत) लक्षरपड़ा	१-३		धर्मसिंधु भाषाटीका समेत	७-०	
गीतामृततरंगिणी भाषाटीका पाविट हल छोटा गुटका	०-१४		निर्णयसिंधु टिप्पणी सहित अत्युत्तम....	३-८	
श्रीरामगीता भाषाटीका	०-१०		निर्णयसिंधु भाषाटीका समेत....	८-०	
पञ्चरत्नगीताअक्षरभोटागुटका रेशमी पंचरत्न अक्षरपड़ा ...	१-०		अष्टादशस्मृति शुद्ध मोटा अक्षर	२-०	
पञ्चरत्न भाषाटीका गुटका	१-८		बृहत्पाराशरस्मृति. (धर्मशास्त्र)	१-८	
गीता श्रीधरटीका सहित	१-०		दयानन्दतिमिरमास्कर भाषाटीका पं० ज्वालाप्रसादनीकृत	४-०	
गीता बड़े अक्षरोंकी रेशमी गुटका	१-०		आशीर्चननिर्णय भाषाटीका	०-४	
गीतापंचरत्न हल दशरत्न रेशमी गुटका	१-०		ज्ञानप्रकाश (समन्वक अनेक प्रकारकी शांतिपद्धतियाँ एकत्रित हैं)	३-०	
गीतापंचरत्न नवरात पाविट हल	१-२				
गीता गुटका पाविट हल रेशमी गुटका	८-०				
पञ्चमहाविद्योगदर्शन-भाषाटीका	१-०				

पुस्तकें मिलनेका ठिकाना-गंगाविष्णु श्रीकृष्णदास,
" लक्ष्मीविकटेश्वर " छापाखाना, कल्याण-मुंबई.

अथ चौरासीवैष्णवनके वार्ताकी अनुक्रमणिका.



अ. आ.	नाम.	पृष्ठ.	अ. आ.	नाम.	पृष्ठ.
१	दामोदरदास हरसानीकी वार्ता	१		कडामें रहते तिनकी वार्ता	७१
२	कृष्णदास मेघनछत्रीकी वार्ता	९	१४	वेणीदासमाधोदासदोऊ भाई तिनकी वार्ता	 ७३
३	दामोदरदास सम्बलवारेखत्री- कन्नौजकेवासी तिनकी वार्ता	१९	१५	हरिवंशपाठकसारस्वतब्राह्मण बनारसमें रहते तिनकी वार्ता	७६
४	पद्मनाभदासकन्नौजिया ब्रा- ह्मणकन्नौजमें रहते तिनकी वा	३३	१६	गोविन्ददासभल्लाताकी वार्ता	७८
५	पद्मनाभदासकीबेटीतुलसा- तिनकी वार्ता	 ४६	१७	अम्माक्षत्राणीजोकडामे रह- तीतिनकीवार्ता	 ८२
६	पद्मनाभदासकोबेटाताकीबहू- पार्वतीकीवार्ता	 ४९	१८	गज्जनधावनक्षत्रीआगरेके- वासी तिनकी वार्ता	 ८४
७	पद्मनाभदासकौनातीपार्वती- कोबेटा रघुनाथ दासकीवार्ता	५०	१९	नारायणदासब्रह्मचारी सार- स्वतब्राह्मणमहावनमें रहते तिनकीवार्ता	 ८७
८	रजोक्षत्राणी अडेलमें रहती ताकी वार्ता	 ५२	२०	एक क्षत्राणी महावनमें रहती ताकी वार्ता	 ९३
९	पुरुषोत्तमदासक्षत्रीबनारसमें रहतेतिनकी वार्ता	 ५५	२१	जीवनदास क्षत्रीसूर तिनकी	९४
१०	पुरुषोत्तमदासकी बेटी रुक्मि- नीकी वार्ता	 ६३	२२	देवाक्षत्री कपूर तिनकीवार्ता	९५
११	पुरुषोत्तमदासकोबेटागोपाल- दासकी वार्ता	 ६५	२३	दिनकरदाससेठ तिनकीवार्ता	९६
१२	रामदाससारस्वतब्राह्मणताकी- वार्ता	 ६६	२४	मुकुन्ददासकायस्थातिनकी- वार्ता	 ९८
१३	गदाधरदास सारस्वतब्राह्मण-		२५	प्रभूदासजलोटा क्षत्री सीह- नन्दकेवासी तिनकी वार्ता	९९
			२६	प्रभूदासभाट सीहनन्दके तिनकी वार्ता	 १०६

अ. आ.	नाम.	पृष्ठ.	अ. आ.	नाम.	पृष्ठ.
२७	पुरुषोत्तमदासआगरेमें रहते तिनकी वार्ता	१०८	४२	राजा दुबे माधो दुबे दोऊ भाई साचौराब्राह्मण ति०	१६५
२८	त्रिपुरदास कायस्थ शेरगढके वासी तिनकीवार्ता	११०	४३	श्लोकदाससाचौराब्राह्मण तिनकी वार्ता	१७४
२९	पूरनमल्ल क्षत्री तिनकीवार्ता	११६	४४	ईश्वर दुबे साचौरा ब्राह्मण तिनकी वार्ता	१७५
३०	यादवेन्द्रदासकुम्हार तिनकी वार्ता	११८	४५	वासुदेवदासछकडासारस्व- तब्राह्मणसीहनंदके तिनकी वार्ता	१७६
३१	गुसाईदाससारस्वतब्राह्मण तिनकीवार्ता	१२०	४६	वावावेणुदास और कृष्ण- दासघघरियातथायादव- दासतिनकी वार्ता	१८४
३२	माधोदासभट्टकाश्मीरके वासी तिनकीवार्ता	१२२	४७	जगतानंदसारस्वतब्राह्म- णथानेश्वरकेवासी तिनकी वार्ता	१८८
३३	गोपालदासतिनकीवार्ता	१२१	४८	आनंददास विश्वंभरदास दोऊभाईक्षत्री तिनकी०	१९०
३४	पद्मरावल साचौराब्राह्मण- उज्जैनकेवासी तिनकीवार्ता	१३५	४९	एकब्राह्मणीहुती तिनकी वार्ता	१९१
३५	पुरुषोत्तमजोसी साचौरा- ब्राह्मण तिनकीवार्ता	१३९	५०	एक क्षत्राणी तिनकी वार्ता	१९४
३६	जगन्नाथजोसी तिनकी वार्ता	१४१	५१	सासबहूदोऊ क्षत्राणीसास कोनामगोरजा बहूको नाम समराई सीहनंदकेवासीकी वार्ता	१९६
३७	जगन्नाथजोसीकी माता तिनकी वार्ता	१४६	५२	कृष्णदासीरुक्मनीबहू- जीकी दासी ताकी वार्ता	२०३
३८	नरहरजोसीजगन्नाथजोसीके बडेभाई तिनकी वार्ता....	१४९	५३	बूलामिश्रपंडित तिनकी वार्ता	२०५
३९	राणाव्याससाचौराब्राह्मण- गोधराकेवासीकीवार्ता	१५४			
४०	रामदाससारस्वतब्राह्मण राज नगरमें रहते तिनकी वा०	१५९			
४१	गोविंद दुबे साचौराब्रा- ह्मणतिनकी वार्ता	१६१			

चौरासीवैष्णवनकेवार्ताकी अनुक्रमणिका.

(३)

अ. आ.	नाम.	पृष्ठ.	अ. आ.	नाम.	पृष्ठ.
५४	मीरांबाईके पुरोहित राम- दास तिनकी वार्ता	२०७	६८	दामोदरदास कायस्थ सेर- गढके वासी तिनकी वार्ता	२३३
५५	रामदास चोहान तिनकी वार्ता	२०८	६९	स्त्री पुरुष दोऊ क्षत्री हुते तिनकी वार्ता	२३४
५६	रामानंदपंडित सारस्वत ब्राह्मण तिनकी वार्ता	२०९	७०	सूतार कारीगर अडेलमें रहते तिनकी वार्ता	२३५
५७	विष्णुदास छीपी तिनकी वार्ता	२१२	७१	एक क्षत्री हुते मार्गीयकौ स्नेह हुतौ ताकी वार्ता	२३६
५८	जीवनदास क्षत्री कपूर सीह- नंदके वासी तिनकी वार्ता	२१५	७२	लघुपुरुषोत्तमदास क्षत्री तिनकी वार्ता	२३८
५९	भगवानदास सारस्वत ब्राह्मण तिनकी वार्ता	२१६	७३	कविराजभाट तिनकी	२३९
६०	भगवानदास श्रीनाथजीके भीतरिया तिनकी वार्ता....	२१७	७४	गोपालदास ठोराके वासी तिनकी वार्ता	”
६१	अच्युतदास सनाढ्य ब्राह्मण तिनकी वार्ता	२१९	७५	जनार्दनदास चौपडा क्षत्री तिनकी वार्ता	२४०
६२	अच्युतदास गौड ब्राह्मण तिनकी वार्ता	२२०	७६	गडु स्वामी सनाढ्य ब्राह्मण तिनकी वार्ता	२४१
६३	अच्युतदास सारस्वत ब्राह्मण तिनकी वार्ता	२२१	७७	कन्हैयालाल क्षत्री तिनकी वार्ता	२४२
६४	नारायणदास अंबालेके वासी तिनकी वार्ता	२२३	७८	नरहरदास गोडिया तिनकी वार्ता	”
६५	नारायणदास भट्ट मथुरामें रहते तिनकी वार्ता	२२४	७९	बादरायणदास तिनकी वार्ता	२४३
६६	नारायणदास चोहान ठठेके वासी तिनकी वार्ता	२२५	८०	सहूपांडे मानिकचंदपांडे इनकी स्त्री तथा नरो बेटी आन्योरमें रहते तिनकी वार्ता	२४५
६७	एक क्षत्राणी अकेली सीहनन्दमें रहती तिनकी वार्ता	२३०	८१	नरहरदास संन्यासी तिनकी वार्ता	२५०

अ. आं.	नाम.	पृष्ठ.	अ. आं.	नाम.	पृष्ठ.
८२	गोपालदास जटाधारी			स्त्री विरजो तिनकी वार्ता	२६५
	श्रीनाथजीकी खवासी करते		८७	गोपालदास नरौडामें रहते	
	तिनकी वार्ता	२५१		तिनकी वार्ता	२६८
८३	कृष्णदास ब्राह्मण तिनकी		८८	सूरदासजी गऊ घाट ऊपर	
	वार्ता	२५४		रहते तिनकी वार्ता	२७२
८४	संतदास चौपडा क्षत्री		८९	परमानन्ददास कनौजिया	
	आगरेके तिनकी वार्ता	२५८		ब्राह्मण तिनकी वार्ता	२९०
८५	सुन्दरदास श्रीजगन्नाथ		९०	कुंभनदास गोरवा तिनकी	३१६
	रायजीके दसकोस परे एक		९१	कृष्णदासकी वार्ता	३३८
	गांवमें रहते तिनकी वार्ता	२६१	९२	कृष्णदास अधिकारी	
८६	मावजी पटेल तथा इनकी-			तिनकी वार्ता	३४२

इति चौरासीवैष्णवनके वार्ताकी अनुक्रमणिका
समाप्त.

पुस्तक मिलनेका ठिकाना.

गङ्गाविष्णु श्रीकृष्णदास,

“ लक्ष्मीवेङ्कटेश्वर ” छापाखाना,

कल्याण-मुंबई.

श्रीकृष्णायनमोनमः ।

श्रीगोपीजनवल्लभायनमोनमः ।

अथ श्रीआचार्यजीमहाप्रभून्के सेवक
चौरासी वैष्णवकी वार्ता लिख्यते ॥



अथ दामोदरदास हरसानीकी वार्ता ॥

एक समय श्रीआचार्यजी महाप्रभू पृथ्वीपरि-
क्रमाकों पधारे हुते तब तहां दामोदरदास श्रीआ-
र्यजी महाप्रभून्के साथ है सो श्रीआचार्यजी महा
प्रभू आप दामोदरदाससों अपने श्रीमुखसों द्रमला
कहते और कहते जो यह माग तेरेलिये प्रगट
कीनों है सो श्रीआचार्यजी महाप्रभू सो पृथ्वी-
परिक्रमा करते श्री गोकुल पधारे सो श्री गोकुलमें
एक चौतरा श्रीगोविंदघाट ऊपर हुतो तहां श्रीआ-
चार्यजी महाप्रभू आय विश्राम करते ताठोर ऊपर
श्रीआचार्यजी महाप्रभून्की बैठक है और श्रीद्वार-
कानाथजीको मन्दिर है तहां श्रीआचार्यजी महा-
प्रभू बैठे हुते ता समय श्रीआचार्यजी महाप्रभून्को
महाचिंता उपजी जो श्रीठाकुरजीने तो आज्ञा
दीनी है जो तुम जीवनकों ब्रह्मसंबन्ध करावो तब

श्रीआचार्यजी महाप्रभू अपने मनमें विचारें जो जीवितो दोषवंत है और श्रीपुरुषोत्तमजीतो गुण-निधान हैं तातें एसें केसें संबंध होय तातें चिंता उपजी सो अत्यंत आतुर भए तासमय श्रीठाकुरजी आप तत्काल प्रगट होयके श्रीआचार्यजी महाप्रभूनसों पूछें जो तुम चिंता आतुर क्यों हों तब श्रीआचार्यजी महाप्रभू आप कहै जो जीविको स्वरूपतौ तुम जानतही हो दोषवंत है सो तुमसों संबंध केसें होय तब श्रीठाकुरजी आप कहें जो तुम जीवनकों ब्रह्मसंबंध करावोगे तिनको हों अंगीकार करुंगो तुम जीवनकों नाम देउगे तिनके सकल दोष निवर्त होयगे ये बातें श्रावणशुदि ११ के दिन अर्द्धरात्रिकों भई प्रातकाल पवित्राद्वादशी हुती ताते पवित्रा सूतकों करिराख्यो हुतो सो पवित्रा श्रीपूरनपुरुषोत्तमजीकों पहरायौ मिश्री भोग धरी ता समयके ये अक्षरहुते ताकों श्रीआचार्यजी महाप्रभू आप सिद्धांतरहस्य ग्रंथ कीये हैं ॥ ॥

सो श्लोक ॥ श्रावणस्यामले पक्षे एकादश्यां महानिशि ॥

साक्षाद्भगवताप्रोक्तमेतदक्षरमुच्यते ॥ १ ॥

ता समय श्रीआचार्यजी महाप्रभुनने पूछो जो दमलातें कुछ सुन्या तब दामोदरदासने बानती

कीनी जो महाराज श्रीठाकुरजीके बचन सुनतौसही परन्तु कुछ समझो नहीं तब श्रीआचार्यजी महाप्रभूनने कही जो माको श्रीठाकुरजीने आज्ञा कीनी है जो तुम जीवनको ब्रह्मसंबंध करावोगे तिनको हों अंगिकार करुंगो तिनके सकल दोष निवृत्त होयगे ताते ब्रह्मसंबंध अवश्य करना ॥ प्रसंग ॥ १ ॥

बहुर श्रीआचार्यजी महाप्रभूनने श्रीठाकुरजीके पास यह मांग्यो जो मेरे आगे दामोदरदासकी देह न छूटे और श्रीआचार्यजी महाप्रभू दामोदरदाससों कछू गोप्य न राखते और श्रीआचार्यजी महाप्रभू श्रीभागवत अहर्निश देखते कथा कहते और मार्गको सिद्धांत भगवतलीला रहस्य श्रीआचार्यजी महाप्रभू आप दामोदरदासके हृदयमें स्थापन कीयो ॥ प्रसंग ॥ २ ॥

और एकसमय दामोदरदास और श्रीगुसाईजी एकान्तमें बैठे हुते तब श्रीगुसाईजीने दामोदरदाससों पूछौ जो तुम श्रीआचार्यजी महाप्रभूनको कहाकरि जानतहौ तब दामोदरदासने कही जो हम तौ श्रीआचार्यजी महाप्रभूनको जगदीश जो श्रीठाकुरजी तिनहूँते अधिककरि जानत हैं तब श्रीगुसाईजी दामोदरदाससोंकहैं जो तुम ऐसे क्यों

कहत हौ जो श्रीठाकुरजीतें श्रीआचार्यजी बडे हैं तब दामोदरदासनें कही जो महाराज दान बडौके दाता बडौ काहुके पास धन बहुत होय तौ राज कहाकरे जो देय ताको जानिये और श्रीआचार्यजी महाप्रभूनकौ सर्वस्व धन श्रीठाकुरजी हैं सो हम जीवनकी दान किये तातें हम श्रीआचार्यजी महाप्रभूनकौ सबते बडे करि जानत हैं ॥ प्रसंग ॥ ३॥

और एकसमय श्रीआचार्यजीमहाप्रभू तथा श्रीगुसांईजी अपनी बेठकमें बैठे हुते पास द्वैचार वैष्णव हंसिवे खेलवैके बेठे हुते आप उनसौं हंसते खेलते मसखरी करते बहुत प्रसन्नतामें उनसौं खेलवैकी वार्ता करतहुते ता समय दामोदरदास आये ता समय श्रीगुसांईजीनें बहुत आदर सन्मान कियौ पाछै दामोदरदास बैठे तब श्रीगुसांईजीसों दामोदरदासने कही जो महाराज अपनो मार्ग निश्चयताको नाहीं यह मार्ग अत्यंत कष्ट आतुरताको है तब श्रीगुसांईजीने कही जो तुम आछी बात कहतहौ परिं हमकौ जब श्रीआचार्यजी महाप्रभूनकी कृपा होयगी तब कष्ट आतुरता होयगी यह मार्गता श्रीआचार्यजी महाप्रभूनका कृपाते न होय तब दामोदरदास साष्टांग दंडवत करिके बीनती

की जो हमको तो एकवार राजसों बीनती करनीहै पाछें आप प्रभूहो भली जानोगे सो करोगे पर यह मार्गतो या भांतिको है तब श्रीगुसांईजी बहुत प्रसन्न भए और कहें जो हमको यह वार्ता श्रीआचार्यजीद्वारा है और कहें जो तुम न कहौ तौ कौन कहै हम तुमको देखतहैं तब अतिप्रसन्न होतहैं आप श्रीआचार्यजी महाप्रभूनके सेवक जानिकें दामोदरदासकी शिक्षा मानत भये ताते बडेसो-बडे ॥ प्रसंग ॥ ४ ॥

और प्रथम श्रीआचार्यजीमहाप्रभू श्रीठाकुर-जिके पास यह मांग्यौ जो मेरे आगे दामोदरदासकी देह न छूटे ताको हेतु यह जो श्रीआचार्यजी महाप्रभू संन्यास ग्रहण करिवेकौ विचार मनमें करें तासमय श्रीगोपीनाथजी श्रीगुसांईजी यह दोऊ भाई बालक हुते तातें मार्गको सिद्धांत वार्ता श्रीआचार्यजी महाप्रभू संन्यास ग्रहणकीए तब कितनेक दिना पीछै श्रीगुसांईजीने अक्काजीसों पूछौ सो श्रीआचार्यजी महाप्रभूने मार्ग प्रगट कीनाहै सो उच्छवकौ कहा प्रकार है हमतो कछू जानत नाही तब श्रीअक्काजीने कह्यौ जो मार्ग तथा उच्छवकौ प्रकार सब दामोदरदाससों कहेहै

सो तुम उनसों पूछौ तुमसों दामोदरदास कहैगौ
 तब श्रीगुसांईजी दामोदरदासने बहुत सन्मानकरि
 भक्तिभावसों घरमें पधराये पाछें उच्छवकौ प्रकार
 श्रीगुसांईजीनें पूछौ सो दामोदरदासने सब कह्यौ
 ॥ प्रसंग ॥ ५ ॥

और एक समय दामोदरदासके पिताकौ श्राद्ध
 दिनहुतौ वा दिन श्रीगुसांईजी दामोदरदासके घर
 पधारे और दामोदरदासकौ श्राद्धकरवायौ पाछे
 उत्थापनकै समय दामोदरदास दर्शनकौ आये
 तब श्रीगुसांईजीनें कही जो मोकौ श्राद्धकरवायेकी
 दक्षिणादेउ तब दामोदरदास कहें जो दक्षिणामें
 एकवात कहंगो सो सिद्धांतरहस्यके डेढ श्लोककौ
 व्याख्यान कहै यह ऐसी बात है तब श्रीगुसांईजी
 नें कही जो आगे कहौ तब दामोदरदासने कही
 जो मैंने तौ इतनौही संकल्प कीयौहै तब श्रीगुसां
 ईजी चुपकर रहे पाछें दामोदरदासने मार्गके प्रना
 लिका श्रीगुसांईजीके आगे कही श्रीभागवतकी
 सुबोधिनी श्रीआचार्यजी महा प्रभूनके ग्रन्थकी
 टीका और रहस्यवार्ता श्रीआचार्यजी महाप्रभूक-
 हैहैं सो सब कही ता पाछें श्रीगुसांईजी दामोदर-
 दासको नमस्कार करन न देते याते जो श्रीगुसां-

ईजी अपने मनमें विचारे जा श्रीआचार्यजी महा-
प्रभूनको स्वरूप दामोदरदासके हृदयविषे सदा-
सर्वदा बिराजमानहै तो इन पास दंडौत नमस्कार
न करावनी याते नमस्कार न करन देते पाछे
श्रीआचार्यजी महाप्रभूनने दामोदरदासको दर्श-
नदीयो और आज्ञादी जा अबते तू श्रीगुसाईजीको
चरणोदक नित्य लीज्योकर तब प्रातःकाल दामो-
दरदास श्रीगुसाईजीके पास आये और चरणोदक
मांग्यो तब श्रीगुसाईजीने चरणोदककी नाही कीनी
तब दामोदरदासने श्रीगुसाईजीसो कही जो मोको
श्रीआचार्यजी महाप्रभूनकी आज्ञा भई है और
दर्शन भए हैं और कह्यो जो तू श्रीगुसाईजीको
चरणोदक नित्य लीज्यो तब श्रीगुसाईजी न चर-
णोदक दियो और दामोदर दासको श्रीआचार्यजी
महाप्रभू तीसरे दिन दर्शन देते मार्गकी रहस्य
वार्ता कहते ऐसी कृपा करते और कदाचित तीसरे
दिन दर्शन न हो तो तादिन दामोदरदासके पेटमें
पीडा होती अत्यंत कष्ट पावते पाछे जब दर्शन
होतौ तब तत्कालकष्ट निवर्त हो जातो ऐसे करत
कितने वर्षपर्यंत दामोदरदासको श्रीगुसाईजीने
दर्शनदीनो तथा श्रीआचार्यजी महाप्रभूनने द-

शर्न दीनो ऐसी कृपा करते जो बात होती सो दामो-
 दरदास श्रीगुसांईजीके आगे कहते और मार्गके
 प्रकारकी वार्ता अहर्निश कहते जो दामोदरदा-
 सके हृदयमें श्रीआचार्यजीमहाप्रभू आप विराज-
 मान हैं ताते दामोदरदासको दंडौत न करन देते
 और कहते जो दामोदरदासकी वार्ताको पार नाही
 ऐसे मार्गके टेकके कृपापात्रहैं ॥ प्रसंग ॥ ६ ॥

तब श्रीआचार्यजी महाप्रभू दामोदरदासको
 पूछें जो दामोदरदास तू श्रीगुसांईजीको कहाकरि
 जानतहौ तब दामोदरदासने कही जो महाराज
 हमतो तुम्हारे पुत्रकरि जानतहैं तब श्रीआचार्यजी
 महाप्रभूने दामोदरदासको आज्ञा दीनी जो ऐसे
 तुमको जानतहो तैसे इनको स्वरूप जानियौ
 और श्रीआचार्यजी महाप्रभूने शृंगाररस मंड-
 नग्रन्थ कीयौहैं तामें लिखे हैं ताते ये दामोदरदास
 ऐसे कृपापात्र भगवदीय है ॥ प्रसंग ॥ ७ ॥

और प्रथम श्री आचार्यजी महाप्रभू दामोदर-
 दाससों कह्यौ जो यह मार्ग तेरे लिये प्रगट कियौ
 है ताको हेत यह जो जहांलगे श्रीआचार्यजी
 महाप्रभूके मार्गकी स्थित है तहांताई दामोदर-
 दासकी स्थित गोप्य है पाछे दामोदरदासने

कह्यौ जा मैं श्रीठाकुरजीके बचनतो सुने पर कुछ समझ्यौ नाहीं ता समय श्रीआचार्यजी महाप्रभूनने कह्यौ जो आजहं दशजन्मको अंतरायहै ताको हेतु यह जो जबलग श्रीआचार्यजी महाप्रभूनके मार्गकी स्थित है तहांताई दामोदरदासके प्रागट्य फेर फेरहै मार्गके स्थंभ प्रथम यातें कहैं श्रीआचार्यजी महाप्रभूनने दामोदरदासके हृदयमें भगवदलीला स्थापी संपूर्ण सृष्टिकौ सम्बोधन करिवेकौ ताकों यह हेत जो जब लगि श्रीआचार्यजी महाप्रभूनके मार्गकी स्थितहै तबलगि दामोदरदासकी हूँ स्थित है सो वे दामोदरदास ऐसे टेकके कृपापात्र भगवदीयहैं ताते इनकी वार्ताको पार नाहीं ताते इनकी वार्ता कहाँ ताई लिखिये ॥ प्रसंग ॥ ८ ॥ वैष्णव ॥ १ ॥

॥ कृष्णदासमेघनछत्रीकी वार्ता ॥

एक समय श्री आचार्यजी महाप्रभूनने पृथ्वी-परिक्रमा करी तब कृष्णदासमेघन साथ है सो बंदी नारायणके परली ओर किरनीनाम पर्वत है सो तहांते एक बडी शिलागिरी सो कृष्णदासने हाथसो थांभी तब श्रीआचार्यजी महाप्रभू प्रसन्न भये तब कृष्णदाससों कह्यौ जो मांगि कहा मांगतहै तब

तीन वस्तु मांगी एकतो मुखरताको दोष जाय दूसरे मार्गको सिद्धांत समझों तीसरे मेरे गुरुके घर पधारो तामें दोय वस्तु दीनी गुरुके घर पधारवेकी नाहीं कीनी बहुर बद्रिकाश्रमते आगे पधारें जहां जीवकी गम्य नाहीं है तहां वेदव्यासजीको स्थान है तहां पधारें तब कृष्णदाससों कह्यौ जो तू ठाडौ रहियौ तब श्री आचार्यजी महाप्रभू आगें पधारें तब वेदव्यासजी साम्हें आये सो श्रीआचार्यजी महाप्रभूनको अपने धाममें ले आये पाछें वेदव्यासजीने श्रीआचार्यजी महाप्रभूनसों कह्यौ जो तुमने श्रीभागवतजीकी टीका कीनी है सो मोको सुनावो तब श्रीआचार्यजी महाप्रभूनने जुगलगीतके अध्यायको एक श्लोक कह्यौ ॥

सो श्लोक—वामबाहुकृतवामकपोलोवलितरभूधरार्पितवेणुं॥

कोमलांगुलिनिराश्रितमार्गगोप्यईरयतियत्रमुकुन्दः ॥१॥

या श्लोकको व्याख्यान कह्यौ सो तीन दिनमें सम्पूर्णभयौ तब वेदव्यासजीने बीनती करी जो मैं या भागवतके व्याख्यानकी अब धारना करि सकत नाहीं तातें अब क्षमा करौ पाछें श्रीआचार्यजी महाप्रभूनने वेदव्यासजीसों कह्यौ जो तुम वेदांतके ऐसे सूत्र कहा कीयै जो मायावादपर

अर्थ लाग्यो तब व्यासजीने कह्यो जो मैं कहा करूं मोको आशाही ऐसी हुती जो ऐसे अर्थकरियो तब श्रीआचार्यजा महाप्रभूने कही जो मैं ब्रह्म-वादपर अथ कियो है सो व्यासजीको सुनायो सो व्यासजी सुनकर बहुत प्रसन्न भये ता पाछे वेद-व्यासजीसों बिदा होयके तीसरे दिन पधारे तब कृष्णदाससों कह्यो जो तू गयो नहीं सो काहेते तब कृष्णदासने कही जो महाराज हों कहां जाऊं मोकों तुम्हारे चरणारविन्द बिना और आश्रयनाहीहै तब यह सुनके श्रीआचार्यजी महा प्रभू बहुत प्रसन्न भये तब कह्यो जो मांगि तब वेही तीन वस्तु मांगी एक तो मुखरताको दोष जाय दूसरे मार्गको सिद्धांत समझो तीसरे मेरे गुरुके घर पावधारौ सो तामें दोय वस्तु दीनी गुरुके घर पधारवेकी नहीं कीनी ॥ प्रसंग ॥ १ ॥

बहुर एकसमय श्रीआचार्यजी महाप्रभू गंगा-सागर पधारे तहां श्रीआचार्यजी महाप्रभू पोढे-हुते तहां कृष्णदास पाव दाबत हुते तब श्रीआचा-र्यजी महाप्रभू मनमें बिचारू जो धानके मुरमुरा होय तो लीजियै तब श्रीआचार्यजी महाप्रभू-नके अंतःकरनकी कृष्णदास मेघनने जानी इत-

नेम श्रीआचार्यजी महाप्रभूनको निद्रा आई तब
 श्रीकृष्णदास उठिकें गंगासागर ऊपर आये तब
 देखेंतौ पार एकदीया बरतहै ताकी अटकरतै पैरके
 गंगाजीपार आये तहां गांव है सो खेतमेंते गीले-
 धान कटवाये तहां गांवमें जायकें भरभूजाकौ
 टकाकी जगह चारटका देके मुरमुरा सिद्ध करवाये
 तब लेके आये तब श्रीआचार्यजी महाप्रभूनके
 चरणारविन्द दाबके जगाये और मुरमुरा आगें
 राखै तब कह्यो राजआरोगो तब श्रीआचार्यजी
 महाप्रभूनने पूछो जो तू कहाँते लायो तब समा-
 चार कहै जो महाराज मैं पारते लायौ तब
 श्रीआचार्यजी महाप्रभू बहुत प्रसन्न भये तब कह्यो
 जो मांगि तब वेही तीन वस्तु मांगी मुखरताको
 दोषजाय मागको सिद्धांत मेरे हृदयमें आवै तीसरे
 मेरे गुरुके घर पावधारौ तब श्रीआचार्यजी महा-
 प्रभूनने कह्यो जो जीव कहाँ मांगि जानें यास-
 मय जो मांगि तौ सोई देतौ जो कहतौ तौ श्रीठाकुर-
 जीको स्वरूप दिखाव तौ तहांते श्रीआचार्यजी
 महाप्रभू सोरों पधारे तब कृष्णदासने बिनती
 करिकें कह्यो जो महाराज मेरे गुरु हैं सो बुलाय
 लाऊं तब श्रीआचार्यजी महाप्रभूनने कह्यो जो तू

खेद पावैगौ पाछे कृष्ण दास अकेलो गुरुके पास आयौ तब कृष्णदासकौ गुरुने देख्यौ तब कृष्ण-दाससौं गुरुने कह्यौ जो अरे तैने और गुरु कीयौ तब कृष्णदासने कह्यौ जो मेनें तौ और गुरु नाहीं कीयौ मेरे गुरु तो तुमहीं हो पर तुम्हारी कृपाते मेने पूरणपुरुषोत्तम पाये हैं तब गुरुने कही जो पुरुषोत्तम क्यौ जानियै तब गुरुके आगे अग्निकी अंगीठी धक धकाती हुती तामेंते कृष्णदासने दोऊ हाथकी अंजुली भरिके अंगार हाथमें लियै और कह्यौ जो श्रीआचार्यजी महाप्रभुजी पूरणपुरुषोत्तम होय तो मेरे हाथ मति जरियौ और जो और भांति होयतो मेरे हाथ भस्म होय जइयों सो एक मुहूर्तलो अग्नि हाथमें राखी तब गुरुने भय खाई और कह्यौ जो अग्निडार देउ पाछें उन गुरुनने कृष्णदासके हाथमेंसौं अपने हाथसो पकरिके अग्नि डरवाय दीनी तब कृष्ण दास उहांते खेद पायके उठि आयौ यह प्रसंग सब श्रीबल्लभाष्टककी टीकामें श्रीगोकुलनाथजीने बिस्तार करिके लिखाहै ॥ प्रसंग ॥ २ ॥

बहुर मार्ग हृदयारूढ भयौ पाछें कदाचित गोप्य वार्ता होय सो सबनके आगे कहै पाछ काहूवैष्ण-

वने श्रीआचार्यजी महाप्रभूनसों कह्यो जो कृष्ण-
दास सबनके आगे गोप्यवार्ता कहतहै तब श्रीआ-
चार्यजी महाप्रभूनने कृष्णदाससो कह्यो जो क्यौं रे
तू सबनके आगे गोप्यवार्ता कहतहै तब कृष्णदा-
सने कह्यो जो महाराज आप उनहींसों पूछिये जो
मेने कहाकह्योहै तब उन वैष्णवनसो श्रीआचार्यजी
महाप्रभूनने पूछो जो तुमसो कृष्णदासने कहा
वार्ता कहीहै तब वैष्णवनने कही जो महाराज
हमको तो सुधिरही नाहीं तब श्रीआचार्यजी महा-
प्रभू मुसिक्यायके चुपकरिरहे ॥ प्रसंग ॥ ३ ॥

और एकसमय श्रीठाकुरजीकी इच्छाते श्रीआ-
चार्यजी महाप्रभूसों कृष्णदासने प्रश्न पूछो जो
महाराज श्रीठाकुरजीको प्रियवस्तु कहाहै सो मो-
सों कहौ सो ताको प्रतिउत्तर श्रीआचार्यजी महा-
प्रभूकहैं जो श्रीठाकुरजी उत्तम वस्तुके भोगता हैं
परंतु गोर शब्देन बानी कहीयतु है गोरसअति
प्रियहै ताके भाव अनिर्वचनीय है और सबनते
भक्तिको स्नेह प्रभाव अतिप्रिय है ताते भक्तवत्सल
कहावतहैं तब कृष्णदासन फिर प्रश्न पूछौ जो महा-
राज श्रीठाकुरजीको अप्रियवस्तु कहाहै तब श्री-
आचार्यजी महाप्रभूनने कह्यो जो श्रीठाकुरजीको

धूआं समान अप्रिय वस्तु कछू नाहीं और तातें अप्रिय भक्तनके द्वेषी है फिर कृष्णदासनें प्रश्न पूछौ जो महाराज श्रीरघुनाथजी संपूण सृष्टिको लेकें स्वधाममें पधारैहैं और राजा दशरथको स्वर्ग दीयो सो काहेते ताको प्रतिउत्तर श्रीआचार्यजी महाप्रभूननें कह्यौ श्रीरघुनाथजी परमदयालहैं ताते स्वर्ग दीयो नातर दशरथको स्वर्गकी योग्यता न हुती यातें अपनो वचन सत्य करिवेकों बनवास पठादिये ऐसो कर्म कायो ॥ प्रसंग ॥ ४ ॥

और एक समय श्रीआचार्यजी महाप्रभूनसों कृष्णदासनें प्रश्न पूछौ जो महाराज भक्त होयके श्रीठाकुरजीकी लीलाको भेद नाहीं जानत सो काहेते तब श्रीआचार्यजी महाप्रभूननें कह्यौ जो एविधिपूर्वक समर्पण जो कह्योहै सो नाहीं करत अनुभव क्यों जानें और भगवद्भक्तको संग करे तो श्रीठाकुरजीकी लीलाको भेदजाने सो तो आपको योग्यता मान काहूका संग नाहीं करत और कछू करतहै सो अन्तःकरन पूर्वक नाहीं करत है मोते श्रीठाकुरजीके स्वरूपको तथा लीलाको भेद नाहीं जानत उत्तमभक्तनको संगकर श्रीभागवत श्रीसुबोधिनी ग्रंथनको अहर्निश अवगाहनकरे तब भाग

वद्भाव उत्पन्न होय श्रीठाकुरजी भक्तनके हृदयविषे
 सदैव रहते हैं तथा सेवाकरिके बंधे हैं तहां एक अन्य
 मार्गी वैष्णव जाके हृदयमें श्रीठाकुरजी विराज-
 तहैं ताको संग करना तहां गजन धावन वैष्णवको
 दृष्टान्त दिये हैं जिनजिन भावपूर्वक सेवा करी तिनके
 सकल निवर्तभये तातें लीलास्थ ब्रजभक्तनके
 भावको विचार करना जे वैष्णव श्रीठाकुरजीको
 स्वरूप जानतहैं तिनको स्वरूप अलौकिक दृष्टिसों
 जानो जाय जो आज्ञा होय सो जानो जे वैष्णव
 श्रीठाकुरजीको जानतहैं सो जो कुछ कारज करत
 हैं और श्रीठाकुरजीसों विरह भावताप करतहैं
 अपनो स्वदोषभाव विचार करतहैं अपनो स्वरूप
 जाने जो हों कोनहों पहले कहा हुतो भगवत्संबंध
 कियेते कहाभयो अब मोकों कहा करतव्य रात्रदि
 वस ऐसो विचार करत रहै तब अपनो स्वरूप जाने
 एप्रागट्य ब्रजभक्तनके अर्थ तथा एतन्मार्गीयके
 अर्थ तातें उत्तम संग होयतो एतन्मार्गके एठाकुर
 जाने और शास्त्रपुराण अनेकसिद्धांत इतिहासहैं
 तातें ब्रजराजके घर प्रगटे सो श्रीठाकुरजी न जाने
 जाय ए श्रीठाकुरजीको तबहीजाने तातें भगवद्भ-
 क्तको संग करना सेवाको प्रकार एतन्मार्गी वैष्णव

जानतहैं तिनसों मिलि तिनको भाव पूछीकैं सेवा करनी तब भगवद्भाव उत्पन्न होय श्रीठाकुरजीकी स्नेहयुक्ति सेवा करि जो श्रीठाकुरजी वाको सब जतावै ॥ प्रसंग ॥ ५ ॥

और एक समय श्रीआचार्यजी महाप्रभू श्रीबद्रीनाथजीके मन्दिरमें पधारे तब वेदव्यासजी साथहैं तब श्रीआचार्यजी महाप्रभूननैं वेदव्यासजीसों पूछो जो भ्रमरगीतको अध्याय तामें उद्धवजीको ब्रज-भक्तनके पास पठाए है ता प्रसंगमें श्लोक आधो घटतहै तब वेदव्यासजीने श्लोक आधो कह्यो ॥

श्लोक ॥ आत्मत्वाद्भक्तवत्सलात्सतवक्तात्स्वभावतः ॥

याकी टीका श्रीआचार्यजी महाप्रभूननैं पह-लेही कीनी हैं सो सुनिके वेदव्यासजी बहुत प्रसन्न भये ता पाछे श्रीआचार्यजी महाप्रभू बद्रीनाथजीके मन्दिरमें पधारे ता दिन वामनद्रादशीको दिन हुतो सो ता दिन श्रीआचार्यजी महाप्रभूनको विचार मनमें व्रत करिवेको हुतो तब श्रीबद्रीनाथजीनैं श्रीआचार्यजी महाप्रभूनसों कह्यो जो मैंने फलाहारको सर्वत्र योजन कीनो परि पाइयत नाही ताते तुम रसोई करि श्रीठाकुरजीको भोग धारि भोजन करौ श्रीठाकुरजीकी इच्छा ऐसी दीखत है इतनेमें श्रीकृ-

(१८) चरित्र । तृतीय सर्ग ।
कृष्णदासनें आयकें कह्यो जो महाराज यहाँ तो कछू
पावत नहीं पाछें ता दिनते वामनद्वादशीके दिन
वृत्त न करते 'उत्सवांते च पारणं' एसो बचन है पाछें
श्रीआचार्यजी महाप्रभू बद्रीनाथजीते बिदाभये तब
कृष्णदास साथही है ॥ प्रसंग ॥ ६ ॥

प्रथम श्रीआचार्यजी महाप्रभू वेदव्यासजीके
मंदिरमें पधारे तब कृष्णदाससों कह्यो जो तू ठाढो
रहियो तब कृष्णदास ठाढे रहे पाछे आप तीसरे
दिन पधारे तब कह्यो जो तू गयो नहीं सो काहेते
तब कृष्णदासने कह्यो जो महाराज तुम्हारी आज्ञा
न मानों तौ सेवक काहेको? सेवकको आज्ञामें चलनो
सो कृष्णदास ऐसे कृपापात्र भगवदीय प्रभूनकी
आज्ञा मानते ताते श्रीआचार्यजी महाप्रभू कृष्ण-
दासके ऊपर सदा प्रसन्न रहते पाछें मुखरताको
दोष मनमें न लावते ऐसे आप उदारराय जीवनकी
और न देखते दया राखते और अपनी ओरते दया
राखी जीवनको अंगीकार करते जीवनकी ओरको
विचार न करते कृष्णदास मार्ग तथा घरमें सदैव
रहते सो वे कृष्णदास श्रीआचार्यजी महाप्रभूनके
ऐसे कृपापात्र भगवदीय हैं ताते इनकी वार्ताको
पार नहीं सो अब कहाँताई लिखय ॥ प्रसंग ॥ ७ ॥
वैष्णव ॥ २ ॥

अथ दामोदरदास सम्बलवार खन्नी कन्नौजके वासीकी वार्ता।

सो दामोदरदासको एक पत्र तामेको पायौ और स्वप्नमें वासैं कह्यौ जो जा पत्रको वांचे ताकी तू सरण जैयो सो वह पत्र काहूंसों वांच्यौ न जाय सो कितेक दिन पाछें श्रीआचार्यजी महाप्रभू कन्नौज पधारे तहां गांवके बाहिर आय उतरे और कृष्णदास मेघनको गांवमें पठायो और कह्यो जो सीधोसामग्री ले आउ परि काहूसों कहियो मती जो श्रीआचार्यजी महाप्रभू यहां पधारे हैं तब कृष्णदास गांवमें जाय सीधो सामग्री सब लीनो सो लेके जब चलन लागे तब दामोदर दास ताही समय राजद्वारसे आवत हुते सो मार्ग जात कृष्णदासको देख्यो तब दामोदरदास घोडातें उतरके कृष्णदासके पास आये और दण्डवत कीये पाछे पूछो जो तुम कहांत आये और श्रीआचार्यजी महाप्रभू पधारे हैं तब कृष्णदासने कह्यो जो आज्ञा नार्ही तब दामोदरदासने कह्यो जो यह श्रीआचार्यजी महाप्रभून बिना काहेको आवैं सो जब कृष्णदास चले तब पाछें २ दामोदरदास आये और घोडा हो सो पठाय दीयौ सो

कृष्णदासकों दूरते आवत श्री आचार्यजी महा-
 प्रभूननें देख्यो पाछे दामोदरदासकों देख्यो
 तब दामोदरदासने दण्डवत कीनी तब कृष्ण
 दाससों श्रीआचार्यजी महाप्रभूननें पूछो जो तैनें
 यासों क्यों कहीं तब कृष्णदासने कह्यो जो महा-
 राज मैनें तो इनसों नाहीं कही तब दामोदरदासने
 बीनती कीनी जो महाराज इन मोसों नाहीं कह्यो
 हुंतो इनके पाछें २ चलयो आयो हूं और श्रीआ-
 चार्यजी महाप्रभू नाहींकी एसो याते कन्नौज पधा-
 रेंगे तब पावन करने हैं तब श्रीआचार्यजी महा-
 प्रभू मनमें विचारे जो आज्ञा भई है सो आपही
 होयगी ताके लिये नाहीं कही हुती पाछे श्रीआचा-
 र्यजी महाप्रभूननें दामोदरदाससों पूछो जो पत्र
 लायो है तब दामोदरदासने बीनती कीनी जो महा-
 राज पत्रको कहा काम है मोकों शरण लीजियै तब
 श्रीआचार्यजी महाप्रभूननें कही जो तोकों आज्ञा
 भई है जो यह पत्र बांचे ताकी तू शरण जइयो तातें
 तू पत्र लाउ तब पत्र मँगायो तब श्रीआचार्यजी
 महाप्रभूननें पत्र बांच्यो पाछें वा पत्रको अभि-
 प्राय दामोदरदाससों कहो दामोदरदासकों पाछें
 नाम सुनायो पाछें श्रीआचार्यजी महाप्रभू-

नको दामोदरदासने अपने घर पधराये पाछें दामोदरदास तथा दामोदरदासकी स्त्री दोउ जने स्नान करिकें श्रीआचार्यजी महाप्रभूकी शरण आये तब दामोदरदासको समर्पण करावायो और दामोदरदासकी स्त्रीकों प्रथम नाम सुनायो पाछें श्रीआचार्यजी महाप्रभूनने समर्पण करवायो तब दामोदरदासने बीनती कीनी जो महाराज अब हमको कहा आज्ञाहै अब हम कहा करें तब श्रीआचार्यजी महाप्रभूनने आज्ञा करी जो अब तुम सेवा करौ तब दामोदरदासने कहो जो महाराज सेवा कौन भांते करे तब श्रीआचार्यजी महाप्रभूनने कही जो कहूं श्रीठाकुरजीको स्वरूप देखो सो एक दरजीके घरमें श्रीठाकुरजीको स्वरूप हुतो सो ताको दामोदरदास द्रव्य देकें लेआये पाछे सब घर पोतोपात्र सब बदलाये पाछे श्रीआचार्यजी महाप्रभूनने वा स्वरूपको पंचामृतमें स्नान करवायो श्रीद्वारकानाथजी नाम धर्यौ पाछें सिंहासन बैठाये तब दामोदरदासके मांथे सेवा पधरायकें पाछें भोग समर्थ्यो समयानुसार भोग सराय बीडा समर्पन लागे तब देखेंतो पान हरे हैं तब श्रीमहाप्रभूनने कह्यौ जो दामोदरदास हरे पान कबहूं नहीं समर्पिये उत्तम सामग्री

होय सो श्रीठाकुरजीको समर्पिये श्रीठाकुरजी तो उत्तम वस्तुके भोक्ता हैं पाछें स्त्री पुरुष भलीभांति-सों सेवा करन लागे तब श्रीद्वारकानाथजीकी सेवा भलीभांतिसों होन लागी और श्रीआचार्यजी महा-प्रभूनने आज्ञा दीनी जो उतरचौ परकालौ होय सो श्रीठाकुरजीकूं कबहुं न समर्पिये वह काम न आवै सारे परकालेमेंते प्रथम श्रीठाकुरजीको लीजिये और उत्तम कोमल वस्त्र होय सो श्रीठाकुरजीके काम आवैं पाछें श्रीआचार्यजी महाप्रभूनने और आज्ञा दीनी जो उत्तम सामग्री होय सो श्रीठाकुरजीके लिये अपने घर लेआइयै श्रीठाकुरजीकी सामग्री-मेंते और ठोर खर्च न करियै तब दामोदरदास स्त्रीपुरुष दोऊजने भलीभांतिसों सेवा करने लागे और सामग्री उज्वल होती जो रूपानके कटोरानमें अपरस राखते सो ऐसी उज्वल कोई जानतो नाही जो यामें सामग्री है या भांतिसों सेवा करन लागे॥ प्रसंग ॥ १ ॥

और दामोदरदास श्रीठाकुरजीकों जल आप भरते सो एकदिन वाको सुसर दामोदरदासके घर आयकें दामोदरदाससों कहन लाग्यौ जो तुम जल भारे लावतहो सो हमको जातिमें लज्जा आवत है

तातें तुम जल मतिभरो लौंडीके हाथ जल भरावो तब दामोदरदासने एक घडातो आप लीयौ और एक घडा स्त्रीके हाथमें दियौ तब दोऊजने घडा लेके बाकी हाटके आगें होयके निकसे तब जल भरिकें घर आये पाछें दामोदरदासकौ सुसर आयौ सो आयके दामोदरदासके पावन परचौ और वीनती करिके कह्यौ जो में चूकौ अबते तुमही जल भरौ पारि स्त्री पास जल मति भरावो आज पाछें हम कछू न कहेंगे तब आपही जल भरन लागे जो चाहिये सो श्रीद्वारकानाथजी दामोदरदाससे मांग लेते बातें करते सेवा करिके श्रीठाकुरजीको ऐसे प्रसन्न किये तब श्रीआचार्यजी महाप्रभू अपने श्रीमुखते कहें जो जिननें राजा अंबरीष न देख्यौ होय सो दामोदरदासकौ देखें राजा अंबरीष तो मर्यादामार्गीय हुते और यह पुष्टिमार्गीय है इनमें इतनी अधिकता है ॥ प्रसंग ॥ २ ॥

और एक दिन उष्णकालके दिन हुते तब श्रीद्वारकानाथजीको पौढाये आप दामोदरदास जायके चौवारेमें सोये सो वा दिन गरमी बहुत भयी तब श्रीद्वारकानाथजीने लौंडीको आज्ञा दीनी जो किवाड खोल मोकों गरमी बहुत लागत है

तब लोंडीने किवाड खोले तब श्रीद्वारकानाथजीने लोंडीसों कह्यो जो पंखा करि तब लोंडीने पखा कियो सो घडी एकली पंखा कियो पाछ लोंडीसों कह्यो जो तू अब जायके सोय रहि तब लोंडी किवाड खुले छोडके सो रही तब सवारो भयो तब दामोदरदास देखे तो किवाड खुले पडे हैं तब पूछो किवाड किन खोले तब लोंडीने कही जो मोंको श्रीठाकुरजीने किवाड खोलनेकी आज्ञा करी है तब किवाड खोले है तब दामोदरदास लोंडीते बहुत खीजे और कह्यो जो तेने किवाड क्यों खोले जो मोंको श्रीठाकुरजीने किवाड खोलनकी आज्ञा क्यों न करी आप क्यों न खोले और लोंडीसों क्यों कही पर प्रभू बडदयालु हैं ता विषय स्नेह होय ताही सों संभाषण करें श्रीआचार्यजी महाप्रभूनके अंगीकारमें सब समान हैं लौकिकमें कोऊ ऊंच नीच कहलेउ श्रीठाकुरजीतो स्नेहके बस हैं पाछें श्रीठाकुरजीने कह्यो जो मेने किवाड खुलाए हैं तब इन खोले हैं तूतो चोवारेमें जाय सोयौ और मोंको भीतर सुवायो मोंको गरमी बहुत लगी ताते खुलायै हैं तू लोंडीसों क्यों खीजत हैं यों कहिके बहुत खीजे तब दामोदरदासने कह्यो जो प्रसाद तब लेउ जब

मंदिर सम्हराऊं तब स्त्रीने कह्यो जो प्रसाद न लेउ
तौ ऐसो क्यों बन यह तो पांच सात दिनको काम
नाहीं प्रसाद लीयेबिना क्यों चले तब कह्यो जो
प्रसाद तो नाहीं लेउ फलाहार करूंगो तब ऐसे
करत करत मन्दिर सिद्धभयौ तब श्रीद्वारकानाथ-
जीके मन्दिरमें पाठ बैठाये तब उत्सव कीयौ वैष्ण-
वको प्रसाद लिवायौ ता पाछें आपने प्रसाद लियो॥
प्रसंग ॥ ३ ॥

और एक दिन दामोदरदास श्रीठाकुरजीको
राजभोग समर्पिके सइयामंदिरमें समारनगये तब
देखें तो दुलीचाऊपर बिल्लीने बिगार दियौ है तब
दामोदरदासने कही जो श्रीठाकुरजी अपनी सैयाह
राखसकत नाहीं ऐसैं कह्यौ तब श्रीठाकुरजीने थार
चौकी ऊपरसों लात मारिके डारदीनी और दामोद-
रदाससों श्रीठाकुरजीने कह्यौ जो तू कैसो सेवक है
सेवक होयकें या भांति कहत है ऐसे बहुत खीजै
पाछें दामोदरदासने बीनती कीनी मनुहार बहुत
करी सामग्री सिद्ध करवायके श्रीठाकुरजीको भोग
समर्पियो तब श्रीठाकुरजी आरोगे पर तोहु मास
दोयलों बोले नाहीं तब दामोदरदासने बीनती बहुत
कीनी तब फेर बोलन लागे ॥ प्रसंग ॥ ४ ॥

बहुत एक समय दामोदरदास हरसानी इनके पर पाउने आए सो दामोदरदास संबलवारेके घर पांच सात दिन रहे तब इनने भलीभांतिसो समाधान कीयौ पाछे दामोदरदास हरसानी इनसों विदा होयके अडेल आये तब श्रीआचार्यजी महाप्रभूनने दामोदरदास सो कह्यौ जो दमला तू कहां उतरचौ है और कहां प्रसाद लीयो है तब दामोदरदास हरसानीने श्रीआचार्यजी महाप्रभूनसों बीनती कीनी जो महाराज कन्नोजमें दामोदरदास संबलवारेके घर उतरचोहौ पर अनसखड़ी महाप्रसाद लेतो सखड़ी न लेतौ तब श्रीआचार्यजी महाप्रभू दामोदरदाससंबलवारेके ऊपर अप्रसन्न भये और कह्यौ जो यह मेरौ अंतरंग सेवक याकों सखड़ी महाप्रसाद क्यों न लिवायौ सो यह बात श्रीआचार्यजी महाप्रभूनके अंतःकरनकी दामोदरदास संबलवारेने घर बैठे जानी जो श्रीआचार्यजी महाप्रभू आप अप्रसन्न भये मेरे ऊपर तब स्त्रीसों कह्यौ जो तू श्रीठाकुरजीकी सेवा नीकीभांतिसों करियौ और मेतो श्रीआचार्यजी महाप्रभूनके चरन देखवेको अडेल जातहौं सो तब तहांते चले सो अडेल जाय पहुंचे तब श्रीआचा-

र्यजी महाप्रभूनके दर्शन करिकें साष्टांग दण्डवत कीनी तब श्रीआचार्यजी महाप्रभू पीठि दै बैठे तब दामोदरदास संबलवारेने श्रीआचार्यजी महाप्रभू-नसों बीनती कीनी जो महाराज मेरो अपराध कहाहै और जीवतो अपराध करतही आयो है परिअपराध जानियै तो भलौ है तब श्रीआचार्यजी महाप्रभूनने कह्यो जो तेने दामोदरदास हरसा-नीको अपने घर महाप्रसाद अनसखडी क्यों लिवायौ सखडी क्यों न लिवायौ तब दामोदरदास संबलवारेने बीनती कीनी जो महाराज दामोदर-दाससों आप पूछियै जो सखडी क्यों न लीनी तब श्रीआचार्यजी महाप्रभूनने दामोदरदासहरसानी सों कह्यो जो तेने सखडी महाप्रसाद क्यों न लीनो तब दामोदरदासने कह्यो जो महाराज श्रीठाकुरजी प्रातःकाल बालभोग आरोगते पाछें पकवान मिठाई दूधपाक बहुत लेतो सो सखडीकी रुचि रहती नाहीं ताते न लेतो तब श्रीआचार्यजी महाप्रभूनने कह्यो जो तूतो अपनी इच्छाते न लेतो परि मोकों तो याके ऊपर बडी खुन्स भई हुती सो भक्तनके अंतः-करनकी वृत्ति देखवेकों प्रभूनको प्रागट्य है काहेते जो दामोदरदाससंबलवारेने अपने घर कन्नौजमें श्रीआचार्यजी महाप्रभूनके अन्तःकरनकी जानी

तो श्रीआचार्यजी महाप्रभू तो भक्तनके हृदयमें सदा स्थिति हैं तो भक्तनके हृदयकी बात क्यों न जाने परि भक्तनकी परीक्षार्थ यह प्रागट्यको प्रागट्य है पाछें दामोदरदास संबलवारने बहुत सन्मान करिके श्रीआचार्यजी महाप्रभूनने वाको अपने घरको पठायौ तब दामोदरदास अपने घर कन्नौजमें आए तब दोऊ स्त्री पुरुष भली भांतिसों सेवा करन लागे ॥ प्रसंग ॥ ५ ॥

और सिंहनन्दनके वैष्णव श्रीआचार्यजी महाप्रभूनके पास जाते सों सब कन्नौजमें दामोदरदासको मिलिकें जाते जो वैष्णव आवते तिन सबनको कन्नौजमें अपने घर आदर सन्मान करिकें उतारते सबनको महाप्रसाद लिवावते पाछें जब अडेल बिदा होते तब तिन वैष्णवप्रति एक एक मौहर एक एक श्रीफल श्रीआचार्यजी महाप्रभूनकी भेंट पठावते काहेते जो मेरी दंडोत खाली हाथन कैसे करेंगे ऐसे श्रीआचार्यजी महाप्रभू इनपर सदा प्रसन्न रहते ॥ प्रसंग ॥ ६ ॥

बहुर दामोदरदासको सुसर बहुत प्रसन्न हुतो तिनने सौ लौंडी बेटीके दायजेमें दीनी जो मेरी बेटी बैठी रहेगी काम काज सब लौंडी करेगी परि

ऐसे न करती सेवासम्बन्धी काय सब आपु करती
सो वह ऐसी भगवदीय ही प्रसंग ॥ ७ ॥

बहुर एक समय श्रीआचार्यजी महाप्रभू आप
दामोदरदासके घर पोटे हुते और दामोदरदास
पांव दाबत हुतो तब श्रीआचार्यजी महाप्रभूननें
दामोदरदास सों पूछो जो दामोदरदास तेरे मनमें
काहु बातको मनोरथ है तब दामोदरदासने कह्यो
जो महाराज मोकों तो काहु बातको मनोरथ
आपके अनुग्रहते रह्यो नाहीं तब श्रीआचार्यजी
महाप्रभूननें कह्यो जो तू अपनी स्त्रीसों पूछ आऊ
जो तोंको काहु बातको मनोरथ है तब दामोदर
दास जायके अपनी स्त्रीसों पूछो जो तेरे काहु
बातको मनोरथ है तब स्त्रीने कह्यो जो कोई बात
को मनोरथ रहां नाहीं एक पुत्रको मनोरथ है
एक पुत्र होय तौ भलो तब यह बात दामोदरदा-
सने जायके श्रीआचार्यजी महाप्रभूनसों कह्यो
जो महाराज स्त्रीको मनोरथ है जो एक पुत्र होय
तो भली है तब श्रीआचार्यजी महाप्रभू आप कहें
जो हां होयगौ पाछें श्रीआचार्यजी महाप्रभू आप
तौ श्रीनाथजीद्वार पधारे पाछें जब वाके समय
भयौ तब स्त्री गर्भस्थित भइ पाछें वा वाखरमें

कितनेक दिनमें एक डाकौतिया आयौ तब वाकों
 सब साथकी स्त्री पूछन लागी तब तामेंते काहूने
 दामोदरदासकी स्त्रीसों कही जो अमुकी तूहू पूछि
 देखी जो कहा होयगौ बेटा होयगो के बेटा होयगी
 पाछें वाकी लौंडीने जायके वा डाकौतियासों पूछी
 जो दामोदरदासकी स्त्रीके कहा होयगो बेटा होयगो
 के बेटा होयगी तब वा डाकौतियाने कही जो
 बेटा होयगो पाछें श्रीआचार्यजी महाप्रभू कितनेक
 दिनमें कन्नौजमें पधारे तब दामोदरदास चरण
 छूवन लागे तब श्रीआचार्यजी महाप्रभूनने कह्यौ
 जो मोकों छूवे मति तोकों अनाश्रय भयौहै तब
 दामोदरदासने कह्यौ जो महाराज में तो कछू
 जानत नाही हौ तब श्रीआचार्यजी महाप्रभूनने
 कह्यौ जो तू अपनी स्त्रीसों पूछि आउ तब दामो-
 दरदासने स्त्रीसों पूछौ जो तेने कछू अनाश्रय
 कीनोहै सो स्त्रीने जो प्रकार भयौ हुतो सो सब कह्यौ
 सो बात श्रीआचार्यजी महाप्रभूनसों कहो तब
 श्रीआचार्यजी महाप्रभूनने कही जो याके पेटमें
 म्लेछ होयगो पाछें श्रीआचार्यजी महाप्रभू आप
 तो अडेल पधारे पाछें यह बात दामोदरदासकी
 स्त्रीने सुनी तबते श्रीठाकुरजीके पात्रादिक सेवा

सम्बन्धी प्रसूत स्पर्श न करती और कहती जो मेरे
पदमें मूँह छे हाताते श्रीठाकुरजीके पात्र तथा सामग्री
कैसे छूँ या भांतिसों कहती पाछें जब प्रसूतके
दिन आए तब दामोदरदासकी स्त्रीने अपनी मह-
तारीसों कहवाय पठाई जो मेरे पुत्र होयगो सो
होत मात्र तू अपने घर लेजैयौ हम वाको मुख न
देखेंगे जो हम वाको मुख देखेंगे तौ हमारो धर्म
नष्ट होयगो तातें हम वाको मुख न देखेंगे सो
उपाय तू करियौ पाछ वाकी महतारीने ऐसैं ही
कीयौ प्रसूत मात्रहोत अपने घर लगई पाछें धायको
देके बडौ कीयौ ॥ प्रसंग ॥ ८ ॥ ॥

बहुर कितनेक दिन पाछें दामोदरदासकी देह
छूटी तब वाकी स्त्रीने छिपाय राख्यो पाछें वा स्त्रीने
एक वैष्णवसों कही जो तुम अडेलको एक नाव
भाडे करि ल्यावौ सो वह वैष्णव भाडे करि ल्यायौ
ता नावमें श्रीद्वारकानाथजी और घरमेंकी सामग्री
तिनूका पर्यंत कछू घरमें राख्यो नाहीं घरमें जो
हुतां सा सब नावमें भरयो तब वा वैष्णवसों कह्यो
जा यह नाव अडेलको लेजाउ श्रीआचार्यजी महा-
प्रभूनक मन्दिरमें पहुँचाय आवो सो वह वैष्णव
नाव लेके चलयौ सो कोस तीस पर नाव गई ता

पाछें स्त्रीने प्रगट करी जो दामोदरदासकी देह छूटि गई है तब वैष्णव जुरि आये दामोदरदासको नमस्कार कीयौ पाछें दामोदरदासको बेटा तुरक भयौ हुतौ सो आयौ आयके घरमें देखे तो कछू नहीं जलको भर्यौ करवा घरमें धर्यौ है सो देखिके मूंड पीट रह्यौ पाछें दामोदरदासको सुसर आयौ तिनने अपनी बेटियों कह्यौ जो बेटि तुमने घरमें कछू राख्यौ नहीं सो तू अब कहा खायगी तब वाने कही जो तुम देउगे सो मैं खाऊंगी क्षत्री लोगनके पासमें सगे सौंदरे कछू देत हैं एसी ग्यातीकी रीति है तब दामोदरदासकी स्त्रीने अन्न जलको त्याग कीयौ सो थोरेसे दिनमें वाकीहू देह छूटी तब कृत्य दोउनको साथही भयौ वह ऐसो भगवदीय ही सो यह बात कितनेक दिन पाछें काहू वैष्णवने श्रीआचार्यजी महाप्रभूनके आगे आय कही तब श्रीआचार्यजी महाप्रभूने कही इनको यौही चाहिये वे दोउ जने ऐसे भगवदीय हैं उनकी सराहना श्रीआचार्यजी महाप्रभू श्रीमुखते करते तातें इनकी वार्ता अनिर्वचनीय है इनकी वार्ता कहां ताँई लिखियै प्रसंग ॥ ९ ॥ वै ० ॥ ३ ॥

अथ पद्मनाभदासकन्नौजिया ब्राह्मण

कन्नौजमें रहते तिनकी वार्ता ।

सो एक समय श्रीआचार्यजी महाप्रभू कन्नौज पधारे तब पद्मनाभदास श्रीआचार्यजी महाप्रभू-नके दर्शनको आए तब पद्मनाभदासने श्रीआचार्यजी महाप्रभूनके श्रीमुखते भगवद्वात्ताको प्रसंग सुन्यो तब जानी जो एतो साक्षात् ईश्वर हैं एसे श्रीआचार्यजी महाप्रभूनके दर्शन भये प्रथम पद्मनाभदास व्यास आसन बैठते सो कन्नौजमें अपने घर कथा कहते उंचे आसन बैठते श्रोता बहुत कथा सुनिवेकों आवते काहुको घर जानो न पड़तौ वृत्त घरबैठे चली आवती या भांतिसों रहते सो पद्मनाभदास श्रीआचार्यजी महाप्रभूनके श्रीमुखते भगवत् प्रसंग सुन्यो तबते जानों जो ए साक्षात् पूरन पुरुषोत्तम हैं सो पूरन पुरुषोत्तम जानिके पद्मनाभदास श्रीआचार्यजी महाप्रभूनकी शरण आये नाम पाथौपाछें समर्पण करवायौ तब उत्थापनके समय श्रीआचार्यजी महाप्रभूनने पोथी खोली तहां दामोदरदास संबल वारेके घर बैठे हुते ता समय पद्मनाभदास अपने घर ते आये श्रीआचार्यजी

महाप्रभूनकों दंडवत् करिके बैठे तब श्रीआचार्यजी महाप्रभूनने पोथी खोली और श्लोक निबंधनको कही—

श्लोक ॥ पठनीयं प्रयत्नेन सर्वहेतुविवर्जितम् ॥ वृत्यर्थे नैव गुंजीत प्राणैः कण्ठगतैरपि ॥ तदभावे तथैव स्यात्तथानिर्वाहमाचरेत् ॥

यह श्लोक पढ़े सो पद्मनाभदासनें सुन्यो पाछें दशमस्कन्धकी कथा कही सो सुनी तब श्रीआचार्यजी महाप्रभू कथा कहि रहे तब पद्मनाभदासनें जलकी अञ्जली भरिके संकल्प कियौ जो अबते कथा कहिवे कौ वृत न करुंगे ऐसे श्रीआचार्यजी महाप्रभूनके आगे संकल्प कियौ तब श्रीआचार्यजी महाप्रभूननें श्रीमुखते कही जो श्रीभागवत वृत्तार्थ न कहनौ और तो तुम्हारी वृत हैं तुम ब्राह्मण हो और पुराण महाभारत तो इत्यादिक कहनौ तब पद्मनाभदासने कही जो महाराज हमने अबतौ संकल्प कियौ सो तो कियौ यातें कछू न कहनौ तब श्रीआचार्यजी महाप्रभू कहें जो तुम गृहस्थ हो सो कौन भांति निर्वाह करोगे तब पद्मनाभदासने कही जो महाराज भिक्षा मांगिके निर्वाह करुंगो पाछें एक जिजमानके घर वृत्तथ गए तिन तब बहुत आदर सन्मान कियौ तब पद्मनाभदासके

मनमें बहुत ग्लानि आई जो कबहूँ पहले तो भिक्षा-
वृत्त्य करी नहीं और अब वैष्णव भये ताको तो यह
भिक्षाहूँ उचित नहीं तब फेर संकल्प कीयौ जो
अबतो भिक्षा कबहूँ न करूंगो तब फेर श्रीआचा-
र्यजी महाप्रभूनने कह्यौ जो अब निर्वाह कौन भांति
करोगे तब पद्मनाभदासने कही जो अब वैष्णव-
कृत्य करि निर्वाह करूंगो पाछें कौड़ी बेचते लकड़ी
ले आवते पर और बात न विचारी या भांति देहादि
निर्वाह कीनो ऐसे टेकके कृपापात्र भगवदीय है ॥
प्रसंग ॥ १ ॥

अब श्रीआचार्यजी महाप्रभू प्रयागमें पधारे हैं
तब पद्मनाभदास साथ है रात्री पहर एक गई ही
तब श्रीआचार्यजी महाप्रभूनने पद्मनाभदाससों
कही जो श्रीअक्काजीकों पारते पधराय लावो सो
सुनतही पद्मनाभदास उठि चले तब पांच सात
वैष्णव तहां बैठे हुते सो कहन लागे जो यह ब्राह्मण
बावरो भयौ है या बेर कहां जायगो नाव सब बंधी
है घटवार सब घरगये हैं ताते यह बिरियां जाइवेकी
नहीं परि याकोतो श्रीआचार्यजी महाप्रभूनकी
आज्ञा है ताको बिस्वास जो यह काम अधिक
अवश्य होयगो सो घाट ऊपर आये तब इत उत

देखन लागे इतनेमें देखेंतो अकस्मात् एक लरिका
वर्ष दसको एक ढोंगी लेकर आयौ सो वानें पद्मना-
भदासको पूछौ जो तू पार जायगो तब पद्मनाभदा-
सने कह्यौ हां हां जाऊंगो तब उन पार उतार दीनो
पाछें फेर पूछौ जो तू फेर आवेगो तब पद्मनाभदासने
कह्यौ जो घडी दाय पाछें आउंगो तब लरिकानें कह्यौ
जो ढोंगी राखत हों तू वेगी आईयो पाछें अडेलमें
जायके श्रीअक्काजीको पधराय लाये तब वाही
ढोंगीमें बैठार पार उतारै तब फिर देखेतो वहां
ढोंगीहु नाहीं और लरिकाहुनाहीं पाछें श्रीअक्का-
जीको पधरायकें घर आये पाछें श्रीआचार्यजी
महाप्रभूनने पद्मनाभदासको आज्ञा दीनी जो जाउ
सोय रहो जब जहां वैष्णव सोये हुते तहां आये तब
वैष्णव सब पूछन लागे जो तुम कहा करि आये तब
पद्मनाभदासने सब समाचार कहै तब वैष्णवनने
कह्यौ जो तेनें श्रीठाकुरजीको श्रम बहुत करवायौ
पाछें वैष्णवनने श्रीआचार्यजी महाप्रभूनसों पूछौ
जो महाराज पद्मनाभदासने श्रीठाकुरजीको श्रम
बहुत करवायौ तब श्रीआचार्यजी महाप्रभूनने
कह्यौ जो यह जो भयो है कछु सो मेरी इच्छातें
भयो है ताते तुम पद्मनाभदाससों कछु मति कहौ ॥
प्रसंग ॥ २ ॥

बहुर एक समय श्रीआचार्यजी महाप्रभू श्रीगो-
कुलते अडेलको जात हुते तब एक ब्यौपारी कछु
वस्तु लेके साथमें चलयो और श्रीआचार्यजी महा-
प्रभू कन्नौजके बीच पधारे तब ब्यौपारी पीछें रह्यो
ताके ऊपर चोर आय पडे सो वस्तु सब लूट लीनी
और श्रीआचार्यजी महाप्रभू आप तौ दामोदर-
दास संबलबारेके घर पधारे सो वहां उतरे रसोई
करि श्रीठाकुरजीकों भोग समप्यो इतनेमें बहु
ब्यौपारी रोवत पीटत आयो तब पूछो जो श्रीआ-
चार्यजी महाप्रभू कहा करत हैं तब पद्मनाभदासनें
कह्यो जो भोजन करत होयंगे तब वा ब्यौपारीने
कह्यो जो हमारो माल सब लुटि गयो है और
श्रीआचार्यजी महाप्रभू भोजन करत हैं तब पद्म-
नाभदासने अपने मनमें विचार्यो जो श्रीआचा-
र्यजी महाप्रभू सुनेंगे तो भोजन न करेंगे घडी
दोयकी अवार होयगी तातें पद्मनाभदास वा ब्यौपा-
रीकी बांह पकरिके एक साहकी दुकानपर लगये
ता साहने पद्मनाभदासको बहुत आदरसनमान
कीयो तब वाने कह्यो जो आज्ञा करो कैसे पधारे
हो तब पद्मनाभदासने वा साहसों कह्यो जो या
ब्यौपारीकों इतनो द्रव्य दियो चाहियो या द्रव्यको

पाछें स्त्रीने प्रगट करी जो दामोदरदासकी देह छूटि गई है तब वैष्णव जुरि आये दामोदरदासको नमस्कार कीयौ पाछें दामोदरदासको बेटा तुरक भयो हुतौ सो आयौ आयके घरमें देखे तो कछू नहीं जलको भरचौ करवा घरमें धरचौ है सो देखिके मूंड पीट रह्यौ पाछें दामोदरदासको सुसर आयौ तिनने अपनी बेटासों कह्यौ जो बेटा तुमने घरमें कछू राख्यौ नहीं सो तू अब कहा खायगी तब वाने कही जो तुम देउगे सो मैं खाऊंगी क्षत्री लोगनके पासमें सगे सौंदरे कछू देत हैं एसी ग्यातीकी रीति है तब दामोदरदासकी स्त्रीने अन्न जलको त्याग कीयौ सो थोरेसे दिनमें वाकीहू देह छूटी तब कृत्य दोउनको साथही भयो वह ऐसो भगवदीय ही सो यह बात कितनेक दिन पाछें काहू वैष्णवने श्रीआचार्यजी महाप्रभूनके आगे आय कही तब श्रीआचार्यजी महाप्रभूनने कही इनको यौही चाहिये वे दोउ जने ऐसे भगवदीय हैं उनकी सराहना श्रीआचार्यजी महाप्रभू श्रीमुखते करते तातें इनकी वार्ता अनिर्वचनीय है इनकी वार्ता कहां ताँई लिखियै प्रसंग ॥ ९ ॥ वै ० ॥ ३ ॥

अथ पद्मनाभदासकन्नौजिया ब्राह्मण

कन्नौजमें रहते तिनकी वार्ता ।

सो एक समय श्रीआचार्यजी महाप्रभू कन्नौज पधारे तब पद्मनाभदास श्रीआचार्यजी महाप्रभू-नके दर्शनको आए तब पद्मनाभदासने श्रीआचार्यजी महाप्रभूनके श्रीमुखते भगवद्वात्ताको प्रसंग सुन्यो तब जानी जो एतो साक्षात् ईश्वर हैं एसे श्रीआचार्यजी महाप्रभूनके दर्शन भये प्रथम पद्मनाभदास व्यास आसन बैठते सो कन्नौजमें अपने घर कथा कहते उंचे आसन बैठते श्रोता बहुत कथा सुनिवेकों आवते काहुको घर जानो न पड़तौ वृत्त घरबैठे चली आवती या भांतिसों रहते सो पद्मनाभदास श्रीआचार्यजी महाप्रभूनके श्रीमुखते भगवत् प्रसंग सुन्यो तबते जानों जो ए साक्षात् पूरन पुरुषोत्तम हैं सो पूरन पुरुषोत्तम जानिके पद्मनाभदास श्रीआचार्यजी महाप्रभूनकी शरण आये नाम पायौपाछें समर्पण करवायौ तब उत्थापनके समय श्रीआचार्यजी महाप्रभूनने पोथी खोली तहां दामोदरदास संबल वारेके घर बैठे हुते ता समय पद्मनाभदास अपने घर ते आये श्रीआचार्यजी

महाप्रभूनकों दंडवत् करिके बैठे तब श्रीआचार्यजी महाप्रभूनने पोथी खोली और श्लोक निबंधनको कही—

श्लोक ॥ पठनीयं प्रयत्नेन सर्वहेतुविवर्जितम् ॥ वृत्यर्थे नैव युंजीत प्राणैः कण्ठगतैरपि ॥ तदभावे तथैव स्यात्तथानिर्वाहमाचरेत् ॥

यह श्लोक पढ़े सो पद्मनाभदासने सुन्यो पाछे दशमस्कन्धकी कथा कही सो सुनी तब श्रीआचार्यजी महाप्रभू कथा कहि रहे तब पद्मनाभदासने जलकी अञ्जली भरिके संकल्प कियौ जो अबते कथा कहिवे कौ वृत न करूंगे ऐसे श्रीआचार्यजी महाप्रभूनके आगे संकल्प कियौ तब श्रीआचार्यजी महाप्रभूनने श्रीमुखते कही जो श्रीभागवत वृत्तार्थ न कहनौ और तो तुम्हारी वृत हैं तुम ब्राह्मण हो और पुराण महाभारत तो इत्यादिक कहनौ तब पद्मनाभदासने कही जो महाराज हमने अबतौ संकल्प कियौ सो तो कियौ यातें कछू न कहनौ तब श्रीआचार्यजी महाप्रभू कहें जो तुम गृहस्थ हो सो कौन भांति निर्वाह करोगे तब पद्मनाभदासने कही जो महाराज भिक्षा मांगिके निर्वाह करूंगो पाछे एक जिजमानके घर वृत्तथ गए तिन तब बहुत आदर सन्मान कियौ तब पद्मनाभदासके

मनमें बहुत ग्लानि आई जो कबहूँ पहले तो भिक्षा-
वृत्त्य करी नहीं और अब वैष्णव भये ताको तो यह
भिक्षाहूँ उचित नहीं तब फेर संकल्प कीयौ जो
अबतो भिक्षा कबहूँ न करूंगो तब फेर श्रीआचा-
र्यजी महाप्रभूनने कह्यौ जो अब निर्वाह कौन भांति
करोगे तब पद्मनाभदासने कही जो अब वैष्णव-
कृत्य करि निर्वाह करूंगो पाछें कौड़ी बेचते लकड़ी
ले आवते पर और बात न विचारी या भांति देहादि
निर्वाह कीनो ऐसे टेकके कृपापात्र भगवदीय है ॥
प्रसंग ॥ १ ॥

अब श्रीआचार्यजी महाप्रभू प्रयागमें पधारे हैं
तब पद्मनाभदास साथ है रात्री पहर एक गई ही
तब श्रीआचार्यजी महाप्रभूनने पद्मनाभदाससों
कही जो श्रीअक्काजीकों पारते पधराय लावो सो
सुनतही पद्मनाभदास उठि चले तब पांच सात
वैष्णव तहां बैठे हुते सो कहन लागे जो यह ब्राह्मण
बावरो भयौ है या बेर कहां जायगो नाव सब बंधी
है घटवार सब घरगये हैं ताते यह विरियां जाइवेकी
नहीं परि याकोंतो श्रीआचार्यजी महाप्रभूनकी
आज्ञा है ताको बिस्वास जो यह काम अधिक
अवश्य होयगो सो घाट ऊपर आये तब इत उत

पाछें स्त्रीने प्रगट करी जो दामोदरदासकी देह छूटि गई है तब वैष्णव जुरि आये दामोदरदासको नमस्कार कीयौ पाछें दामोदरदासकों बेटा तुरक भयौ हुतौ सो आयौ आयके घरमें देखे तो कछू नहीं जलको भर्यौ करवा घरमें धर्यौ है सो देखिके मूंड पीट रह्यौ पाछें दामोदरदासकौ सुसर आयौ तिनने अपनी बेटीसों कह्यौ जो बेटी तुमने घरमें कछू राख्यौ नहीं सो तू अब कहा खायगी तब वाने कही जो तुम देउगे सो मैं खाऊंगी क्षत्री लोगनके पासमें सगे सौंदरे कछू देत हैं एसी ग्यातीकी रीति है तब दामोदरदासकी स्त्रीने अन्न जलको त्याग कीयौ सो थोरेसे दिनमें वाकीहू देह छूटी तब कृत्य दोउनकौ साथही भयौ वह ऐसो भगवदीय ही सो यह बात कितनेक दिन पाछें काहू वैष्णवने श्रीआचार्यजी महाप्रभूनके आगे आय कही तब श्रीआचार्यजी महाप्रभूनने कही इनकौ यौही चाहिये वे दोउ जने ऐसे भगवदीय हैं उनकी सराहना श्रीआचार्यजी महाप्रभू श्रीमुखते करते तातें इनकी वार्ता अनिर्वचनीय है इनकी वार्ता कहां ताँई लिखियै प्रसंग ॥ ९ ॥ वै ० ॥ ३ ॥

अथ पद्मनाभदासकन्नौजिया ब्राह्मण

कन्नौजमें रहते तिनकी वार्ता ।

सो एक समय श्रीआचार्यजी महाप्रभू कन्नौज पधारे तब पद्मनाभदास श्रीआचार्यजी महाप्रभू-नके दर्शनको आए तब पद्मनाभदासने श्रीआचार्यजी महाप्रभू-नके श्रीमुखते भगवद्वात्ताको प्रसंग सुन्यो तब जानी जो एतो साक्षात् ईश्वर हैं एसे श्रीआचार्यजी महाप्रभू-नके दर्शन भये प्रथम पद्मनाभदास व्यास आसन बैठते सो कन्नौजमें अपने घर कथा कहते उंचे आसन बैठते श्रोता बहुत कथा सुनिवेकों आवते काहुको घर जानो न पड़तौ वृत्त घरबैठे चली आवती या भांतिसों रहते सो पद्मनाभदास श्रीआचार्यजी महाप्रभू-नके श्रीमुखते भगवत् प्रसंग सुन्यो तबते जानों जो ए साक्षात् पूरन पुरुषोत्तम हैं सो पूरन पुरुषोत्तम जानिके पद्मनाभदास श्रीआचार्यजी महाप्रभू-नकी शरण आये नाम पायौ पाछें समर्पण करवायौ तब उत्थापनके समय श्रीआचार्यजी महाप्रभू-नने पोथी खोली तहां दामोदरदास संबल वारेके घर बैठे हुते ता समय पद्मनाभदास अपने घर ते आये श्रीआचार्यजी

महाप्रभूनकों दंडवत् करिके बैठे तब श्रीआचार्यजी महाप्रभूनने पोथी खोली और श्लोक निबंधनको कही-

श्लोक ॥ पठनीयं प्रयत्नेन सर्वहेतुविवर्जितम् ॥ वृत्यर्थे नैव गुंजीत प्राणैः कण्ठगतैरपि ॥ तदभावे तथैव स्यात्तथानिर्वाहमाचरेत् ॥

यह श्लोक पढ़े सो पद्मनाभदासनें सुन्यौ पाछें दशमस्कन्धकी कथा कही सो सुनी तब श्रीआचार्यजी महाप्रभू कथा कहि रहे तब पद्मनाभदासनें जलकी अञ्जली भरिके संकल्प कीयौ जो अबते कथा कहिवे कौ वृत न करुंगे ऐसे श्रीआचार्यजी महाप्रभूनके आगे संकल्प कीयौ तब श्रीआचार्यजी महाप्रभूननें श्रीमुखते कही जो श्रीभागवत वृत्तार्थ न कहनौ और तो तुम्हारी वृत हैं तुम ब्राह्मण हो और पुराण महाभारत तो इत्यादिक कहनौ तब पद्मनाभदासने कही जो महाराज हमने अबतौ संकल्प कीयौ सो तो कीयौ यातें कछू न कहनौ तब श्रीआचार्यजी महाप्रभू कहें जो तुम गृहस्थ हो सो कौन भांति निर्वाह करोगे तब पद्मनाभदासने कही जो महाराज भिक्षा मांगिके निर्वाह करुंगो पाछें एक जिजमानके घर वृत्तथ गए तिन तब बहुत आदर सन्मान कीयौ तब पद्मनाभदासके

मनमें बहुत ग्लानि आई जो कबहूँ पहले तो भिक्षा-
वृत्त्य करी नाहीं और अब वैष्णव भये ताको तो यह
भिक्षाहू उचित नाहीं तब फेर संकल्प कीयौ जो
अबतो भिक्षा कबहूँ न करूंगो तब फेर श्रीआचा-
र्यजी महाप्रभू नने कह्यौ जो अब निर्वाह कौन भांति
करोगे तब पद्मनाभदासने कही जो अब वैष्णव-
कृत्य करि निर्वाह करूंगो पाछें कौडी बेचते लकड़ी
ले आवते पर और बात न विचारी या भांति देहादि
निर्वाह कीनो ऐसे टेकके कृपापात्र भगवदीय हैं ॥
प्रसंग ॥ १ ॥

अब श्रीआचार्यजी महाप्रभू प्रयागमें पधारे हैं
तब पद्मनाभदास साथ है रात्री पहर एक गई ही
तब श्रीआचार्यजी महाप्रभू नने पद्मनाभदाससों
कही जो श्रीअक्काजीकों पारते पधराय लावो सो
सुनतही पद्मनाभदास उठि चले तब पांच सात
वैष्णव तहां बैठे हुते सो कहन लागे जो यह ब्राह्मण
बावरो भयौ है या वेर कहां जायगो नाव सब बंधी
हैं घटवार सब घरगये हैं ताते यह बिरियां जाइवेकी
नहीं परि याकोतो श्रीआचार्यजी महाप्रभू नकी
आज्ञा है ताको बिस्वास जो यह काम अधिक
अवश्य होयगो सो घाट ऊपर आये तब इत उत

देखन लागे इतनेमें देखेंतो अकस्मात् एक लरिका वर्ष दसको एक डौंगी लेकर आयौ सो वानें पद्मनाभदासको पूछौ जो तू पार जायगो तब पद्मनाभदासने कह्यौ हां हां जाऊंगो तब उन पार उतार दीनो पाछें फेर पूछौ जो तू फेर आवेगो तब पद्मनाभदासने कह्यौ जो घडी दौय पाछें आउंगो तब लरिकानें कह्यौ जो डौंगी राखत हों तू वेगी आईयो पाछें अडेलमें जायके श्रीअक्काजीको पधराय लाये तब वाही डौंगीमें बैठार पार उतारे तब फिर देखेतो वहां डौंगीहु नाही और लरिकाहुनाहीं पाछें श्रीअक्काजीको पधरायके घर आये पाछें श्रीआचार्यजी महाप्रभूनने पद्मनाभदासको आज्ञा दीनी जो जाउ सोय रहो जब जहां वैष्णव सोये हुते तहां आये तब वैष्णव सब पूछन लागे जो तुम कहा करि आये तब पद्मनाभदासने सब समाचार कहै तब वैष्णवनने कह्यौ जो तेनें श्रीठाकुरजीको श्रम बहुत करवायौ पाछें वैष्णवनने श्रीआचार्यजी महाप्रभूनसों पूछौ जो महाराज पद्मनाभदासने श्रीठाकुरजीको श्रम बहुत करवायौ तब श्रीआचार्यजी महाप्रभूनने कह्यौ जो यह जो भयो है कछु सो मेरी इच्छातें भयो है ताते तुम पद्मनाभदाससों कछु मति कहौ ॥ प्रसंग ॥ २ ॥

बहुत एक समय श्रीआचार्यजी महाप्रभू श्रीगोकुलते अडेलको जात हुते तब एक ब्यौपारी कछु वस्तु लेके साथमें चलयो और श्रीआचार्यजी महाप्रभू कन्नौजके बीच पधारे तब ब्यौपारी पीछें रह्यो ताके ऊपर चोर आय पडे सो वस्तु सब लूट लीनी और श्रीआचार्यजी महाप्रभू आप तौ दामोदरदास संबलवारके घर पधारे सो वहां उतरे रसोई करि श्रीठाकुरजीकों भोग समप्यो इतनेमें बहु ब्यौपारी रोवत पीटत आयो तब पूछो जो श्रीआचार्यजी महाप्रभू कहा करत हैं तब पद्मनाभदासने कह्यो जो भोजन करत होयंगे तब वा ब्यौपारीने कह्यो जो हमारो माल सब लुटि गयो है और श्रीआचार्यजी महाप्रभू भोजन करत हैं तब पद्मनाभदासने अपने मनमें विचार्यो जो श्रीआचार्यजी महाप्रभू सुनेंगे तो भोजन न करेंगे घडी दोयकी अवार होयगी तातें पद्मनाभदास वा ब्यौपारीकी बांह पकरिके एक साहकी दुकानपर लेगये ता साहने पद्मनाभदासको बहुत आदरसनमान कीयो तब वाने कह्यो जो आज्ञा करो कैसे पधारे हो तब पद्मनाभदासने वा साहसों कह्यो जो या ब्यौपारीकों इतनो द्रव्य दियो चाहियो या द्रव्यको

खत पत्र व्याज हम लिख देयंगे तब साहने कह्यौ
 जो पद्मनाभदासजी तुमको जितनों द्रव्य चाहिये
 तितनों लेउ खत पत्रकी कहा बात है तब पद्मनाभ-
 दासने कह्यौ जो पहले तो खत पत्र लिखोंगो पीछे
 द्रव्य लेउंगो बिना खत लिखे तो लेउंगो नहीं तब
 साहने कही जो तुम्हारी इच्छा पाछे पद्मनाभदा-
 सने खत लिख दीनों तब साहने वा ब्यौपारीको
 द्रव्य दीयो तब वह ब्यौपारी तो अपनो द्रव्य लेके
 अपने घर गयौ तब पद्मनाभदास अपने घर आये
 तब पद्मनाभदाससों श्रीआचार्यजी महाप्रभूननें
 पूछौ जो पद्मनाभदास तू कहां गयौ हौ तब पद्म-
 नाभदासनें कह्यौ जो महाराज एक काम गयौ हौ
 सो श्रीआचार्यजी महाप्रभू आप तौ साक्षात् ईश्वर
 सो तत्काल जानि गये तब पद्मनाभदाससों श्रीआ-
 चार्यजी महाप्रभूननें कह्यौ जो हम वा ब्यौपारीको
 संग तौ लीनों न हतौ जो वाकों माल देनों वह
 पीछे रह्यौ हम कहा करे परि तेने बहुत बुरी करी
 सो ऋण काढिके पैसा दीनों तब पद्मनाभदासने
 कही जो महाराज सो तो सांच परि वह ब्यौपारी
 पुकार तो तौ राज भोजनमें दोय घडीकी अवार
 होती तो मेरो जन्म सब बृथा जातौ और ऋण

मोकलि देउंगो यह कितनीक बात है तब श्रीआ-
 चार्यजी महाप्रभूननें कह्यौ जो तेने धर्म गहने लिख
 दीनो सो काहेते तब पद्मनाभदासनें कह्यौ जो
 महाराज ऐसौ गाढौ लिख दीयो जो बिना दिये न
 जाय पाछें श्रीआचार्यजी महाप्रभू तौ अडेल
 पधारे पाछें पद्मनाभदास एक राजा हुतौ ताके पास
 गये तब पद्मनाभदासको वा राजाने बहुत आदर
 सनमान कीयौ पाछें राजाने कह्यौ जो मोको कृपा
 करिकें कछु सुनावो तब पद्मनाभदासनें कह्यौ जो
 राजा श्रीभागवत तौ नाहीं सुनाऊं कहौ तौ महा-
 भारत सुनाऊ सो राजाने कह्यौ जो महाभारतही
 सुनावौ सो महाभारतही कहन लागै सो जब युद्धको
 प्रसंग आयौ तब सबनके हथियार छुडाय धरे तब
 आगे कहन लागै सो कथा कहतमें कोई वीररस
 ऐसौ उपज्यौ सो आपसमें सब लात मुक्कीनसों
 लरन लागे पाछें कितेक दिनमें महाभारत सम्पूरण
 भयौ तब राजा बहुत दक्षिणा देन लाग्यौ तब पद्म-
 नाभदासनें कह्यौ जो इतनो तौ मैं नाहीं लेउंगो मेरे
 मांथे ऋणि है तितनों लेउंगो पाछें वा साहको मूल-
 ब्याज देनो हुतो तितनों लीनो बाकीको फेर दीनो
 पाछें साहको द्रव्य देके खत फारि डारौ॥प्रसंग॥३॥

और पद्मनाभदासकें एक बेटी कुमारी हुती ताकेनिमित्त एक बर श्रीआचार्यजी महाप्रभूनको सेवक चाहित हुतौ सो वैष्णवन सों पूछन लागे तब वैष्णवनें कह्यौ जो एक बर श्रीआचार्यजी महाप्रभूनको सेवक है परि सनौडिया ब्राह्मण है सों पद्मनाभदासको लोकिक त्यागमें विवहारकी सुधि रही नाहीं वैष्णवनने कह्यौ जो भलो वैष्णव है सो याको बेटी दीजियौ तब पद्मनाभदासने कह्यौ जो भलो सो पद्मनाभदासने वा वैष्णवको तिलक कीयौ विवाह सही करिके अपने घर आये तब तुलसा बड़ी बेटी हुती तासों कह्यौ जो अपनी बेटीकी विवाह अमुकै वैष्णव सों सही कर आयौ हूं तब तुलसाने कही जो वह तौ सनौडिया ब्राह्मण है और आपुन कनौजिया ब्राह्मण हैं सो ऐसे कैसे होय तब पद्मनाभदासने कही जो अब तो भई सो भई तब तुलसाने कह्यौ जो सगाई फेरो तब पद्मनाभदासने कही जो सगाई कैसें फेरी जाय पाछे पद्मनाभदासने कही छुरी लावौ मेरो अंगूठा काटौ तब तुलसाने कह्यौ जो अंगूठा कैसे काट्यौ जाय तब पद्मनाभदासने कह्यौ जो सगाई कैसे फेरी जाय जा अंगूठा काटे तो सगाई फेरी जाय पाछे

पद्मनाभदासनें विवाह कर दीनो जातके सब झक-
मार रहै वैष्णवके कहैको बिस्वास तात सगाई
नफेरी ॥ प्रसंग ॥ ४ ॥

और एक क्षत्राणि पद्मनाभदासके घर नित्य
आवती तब एक दिन तुलसाने कह्यौ जो क्षत्राणि
जो तू नित्य क्यों आवत है तब वा क्षत्राणीने कही
जे पद्मनाभदास बडे भगवदीय है और महापुरुष
है और मेरे संतती नाहीं होत है ताते आवत हौ
ताते तुम पद्मनाभदाससों मेरी बीनती करौ तब
पद्मनाभदाससों एक दिन तुलसाने कह्यौ जो पद्म-
नाभदास एक क्षत्राणीके संतति नाहीं होत है ताके-
लिये तुमसों बीनती करत हौ तब पद्मनाभदासने
कह्यौ जो तुलसा जल लाउ तब तुलसाने जल लायके
आगे धरौ तब जल लेके अंगूठाको चरणोदक
करिके पद्मनाभनादासने वा क्षत्राणीको चरणोदक
दियौ और कह्यौ जो जा तेरे पुत्र हो यगौ ताको
तू मथुरादास नाम धरियौ पाछे वाके पुत्र भयौ
॥ प्रसंग ॥ ५ ॥

और एक समय बडे रामदासजी अपने सेव्य
ठाकुरजीको पद्मनाभदासके घर पधरायके आप
श्रीनाथजीकी सेवा करन लागे श्रीनाथजीके भीत-

रिया भये तब पद्मनाभदास श्रीठाकुरजीकी सेवा करन लागे सो कितेक दिवस पाछें मुगलकी फौज आई ताने गांव लूट्यौ सो श्रीठाकुरजीको मुगल लेग्यौ तब पद्मनाभदास वा मुगलके पीछे सात दिनलौ रहै जल पान न कर्यो तब वा मुगल सों वाकी मुगलानीने कह्यौ जो यह ब्राह्मण जल पान हूं नाहीं करत याको सात दिन भये हैं अन्न जल छोडे सो जो यह ब्राह्मण मरेगो तो तेरे माथे हत्या चढेगी तौ तेरौ संग छोड देउंगी नातर देव याके तेरे पास है सो तुम देव याके देउ तब वा मुगलनें पद्मनाभदासको श्रीठाकुरजी दीये सो लेके पद्मनाभदास अति आनन्द पायकें अपने घर आये पाछें आय स्नान करि श्रीठाकुरजीको पंचामृतसों स्नान कराये अंग वस्त्र करि शृंगार कियौ रसोई करि भोग समप्यौ पाछें समयानुसार भोग उसराय अनोसार करि पाछें महाप्रसाद आपु लीनौ और जा दिन ते वा कन्नौजमें श्रीठाकुरजी मुगलके हाथ परे सो तादिन रामदासनें हूं यह बात जानी सो ता दिन ते बडे रामदासने हूं सात दिनताई महाप्रसाद लीनों नाहीं परि श्रीनाथजीकी सेवा सावधानीसों करत रहे यह बात पद्मनाभदासनें घर बैठे जानी जो रामदासहूं या

बातके ऊपर बहुत दुख पायौ सात दिनलौ जलपान हूं नाहीं लीयौ यह जानि पद्मनाभदास श्रीनाथजीके दर्शन तथा रामदासजीकों मिलिवेको श्रीनाथजी-द्वार आये तब श्रीनाथजीके दर्शन कीयौ पाछें रामदासजीसों मिले तब रामदासजीने पद्मनाभदाससों कह्यौ जो तुमने बहुत दुख पायौ तब पद्मनाभदासने कह्यौ जो हुंतौ दुख पायौ सो तौ न्याव है परि तुम मेरे माथे सेवा पधराय आये और तुमने सात दिनलो महाप्रसाद नाहीं लीयौ सो काहेते तब रामदासने कह्यौ जो तुम कहत हो सो तो सांच है परि मेहं तौ बहुत दिनलों सेवा कीनी है तातें इतनों तो संबन्ध चाहिये पाछें कितनेक दिनलों उहां रहिकें पद्मनाभदास श्रीनाथजीसों तथा रामदासजीसों बिदा होयकें अपने घर आए पाछें सेवा करन लागे ॥ प्रसंग ॥ ६ ॥

और एक समय पद्मनाभदास अपने सेव्य श्रीठाकुरजी श्रीमथुरानाथजी तथा अपने कुटुंब लेकर अडेल आय रहै परन्तु द्रव्यको संकोच बहुत हुतो तातें श्रीठाकुरजीकों भोग समर्पते सो छोला तिलके समर्पते सो छोला आछी रीति सो बीनके पहिले दिन भिजोय राखते दूसरे दिन नीकी भांतिसों तलिके

परोसते एक मुट्ठी भरिकें कहें जो यह दारि एक मुट्ठी
 भरिकें धरें और कहै जो यह रोटी है या भांति जि-
 तने साल न होय तितनेनको नाम लेके एक २ मुट्ठी
 समर्पते या भांतिसों नित्य करते सो श्रीठाकुरजी
 सोई आरोगते पाछें एक वैष्णवनें श्रीआचार्यजी
 महाप्रभूनके आगे कह्यौ जो महाराज पद्मनाभदास
 श्रीठाकुरजीकों या भांति समर्पत है सो एक दिन
 श्रीआचार्यजी महाप्रभू भोग समर्पिबेकी विरियां
 आप पद्मनाभदासके घर पधारे सो जैसे नित्य भोग
 समर्पते तैसेहीं पद्मनाभदासने भोग समर्प्यो हो सो
 जब भोग उसरायो तब पद्मनाभदासने कह्यौ जो
 महाराज यह खीरहै यह भातहै यह दारिहै यह साक
 है यह सिखरनहै यह रोटी है यह बराहै ऐसैं कहिकें
 सब सामग्रीनके नाम लेकै छौलानकी ढेरी बताई तब
 श्रीआचार्यजी महाप्रभूनको हृदय भरि आयौ
 और कह्यौ जो द्रव्यकौ संकोच है ताके लिये ऐसे
 करतहै पाछें श्रीआचार्यजी महाप्रभू आपतौ घरको
 पधारे तब श्रीअक्काजीसे कह्यौ जो पद्मनाभदासके
 घर नित रसोईकी सामग्री पठावति रहियौ तब
 दूसरे दिन श्रीआचार्यजी महाप्रभूननें पद्मनाभदा-
 सके घर सीधो सामग्री पठायौ तब पद्मनाभदासने

तुलसासों कह्यौ जो इहांते प्रभू काढन हार भये हैं तब पद्मनाभदासने दिन द्वै चारिकौ सामान करि पाछें अपने सेव्य श्रीठाकुरजी श्रीमथुरानाथजीसों कही जो महाराजकौ मन होय तो श्रीआचार्यजी महाप्रभूनके पास पधराय आऊं तहां सकल सामग्री सिद्ध है तब श्रीमथुरानाथजीने कह्यौ जो मोकों तेरोहो कीयौ भावत है ताते तेरे यहां बहुत प्रसन्नहों तू कछू संकोच मति करै ऐसे श्रीमथुरानाथजी आप कहै तब पद्मनाभदासने नाव भाडे कीनी तामें श्रीठाकुरजी पधराये और सब कुटुम्ब नावमें बैठायकें आप श्रीआचार्यजी महाप्रभूनसों विदा होन गये और सीधो सामग्री दिन द्वै चारिकौ आयौ हतौ सो भंडारीकों फेर देके आप श्रीआचार्यजी महाप्रभूनके पास विदा होयकें दर्शन करिके दंडौत करिकें कह्यौ जो महाराज हम तो चलत हैं तब श्रीआचार्यजी महाप्रभूनने पूछौ जो श्रीमथुरानाथजी कहां है तब पद्मनाभदासने कह्यौ जो महाराज श्रीठाकुरजी तो नावमें विराजत हैं श्रीठाकुरजीकों नावमें पधरायकें हों महाराजके पास दर्शन करिवेको तथा विदा होयवेको आयौ हूं तब श्रीआचार्यजी महाप्रभूनने पद्मनाभदासको

बिदा कियो पाछें भंडारीने श्रीआचार्यजी महाप्रभूनसों आयकें कह्यौ जो महाराज पद्मनाभदासके घर सीधो सामग्री दिन द्वै चारकी पठाई हुती सो पद्मनाभदास फेर दे गएहैं तब श्रीआचार्यजी महाप्रभूनने कह्यौ जो सीधो सामग्री पठाई तातें पद्मनाभदास गयो नातर न जातो यह बात आप श्रीमुखते कही सो पद्मनाभदासकी वार्ता श्रीगोकुलनाथजी श्रीसर्वोत्तमकी टीकामें लिखे हैं सो पद्मनाभदाससों बिरला कोटिस्वपि दुर्लभ हैं सो वे पद्मनाभदास श्रीआचार्यजी महाप्रभूनके सेवक ऐसे परम कृपापात्र भगवदीय हैं तातें इनकी वार्ताकौ पार नाहीं पद्मनाभदासकी ऐसी २ कितनीक वार्ता हैं ॥ प्रसंग ॥ ७ ॥ वैष्णव ॥ ४ ॥

पद्मनाभदासकी बेटी तुलसाकी वार्ता ।

सो एक समय एक वैष्णव श्रीआचार्यजी महाप्रभूनकौ सेवक तुलसाके घर आयौ सो श्रीठाकुरजीको दर्शन कीयौ तब राजभोग समप्यौं हौ तब तुलसाने वा वैष्णव सों कह्यौ जो उठो स्नान करो महाप्रसाद लेउ तब वा वैष्णवने कह्यौ जो हुं तो घर जायकें महाप्रसाद लेउंगो तब स्नान करुंगो तब तुलसा चुपहै रहा पाछें वह वैष्णव उठिकें अपने

घर गयी तब तुलसाके मनमें बहुत खेद भयो जो देखौ मेरे घर ते वैष्णव भूखौ गयो बहुरि मनमें आई जो ग्याति व्यवहारके लियै सखडी न लीनी होगी पर भलौ सकारे पूरी करी महाप्रसाद लिवा-उगी पाछें मेदा छानि सिद्ध करवाई तब सोई पाछें रात्रिको मथुरानाथजी पद्मनाभदासके सेव्य ठाकुरजी तिनने स्वप्नमें तुलसासों जतायौ जो सकारें वा वैष्णवको सखडी महाप्रसाद लिवाइयौ वह वैष्णव अपने घर प्रासाद नाहीं लेइगो पाछें वा वैष्णव स्वप्नमें कही जो सकारे तू सखडी महाप्रसाद तुलसाके घर लीजियौ पाछें प्रातः काल स्नान करि तुलसाने पूरी करी श्रीठाकुरजीकौ जगाय सेवा करन लागी इतनेमें वह वैष्णव आयौ श्रीठाकुरजीके दर्शन करि बैठे रह्यौ तब तुलसा भोग समर्पिकें बाहर आइ तब वा वैष्णवसों कह्यौ जो भलौ तब वा वैष्णवने स्नान करि तिलक मुद्रा करिकें स्मरन की-यौ इतनेमें राजभोग सन्धो तब वा वैष्णवने दर्शन कीयौ पाछें तुलसाने श्रीठाकुरजीकौ अनोसरि करि तुलसा बाहर आई तब पूरी बूरो सधानों वा वैष्णवके आगें राख्यौ और कह्यौ जो महाप्रसाद लेउ तब वा वैष्णवने कह्यौ जो यहतौ नाहा लेउंगो हूंतो

सखडी महाप्रसाद लेउंगो तब तुलसाने कह्यौ जो कछू संकोच मति करौ यहतौ जाति व्यवहारहै तब वा वैष्णवने कह्यौ जो सो तो सांच पहिले तौ ऐसे-ही मनमें आई हुती परि अबतो आज्ञा भई है पाछें वा वैष्णवने सखडी महाप्रसाद लीयौ तब दोउजने परस्पर प्रसन्न भये ॥ प्रसंग ॥ १ ॥

बहुर एकदिन तुलसाके घर श्रीगुसांईजी पधारे तब तुलसाने भली भांतिसे सेवा कीनी ताते श्रीगुसांईजी बहुत प्रसन्न भये और एकदिन श्रीगुसांईजी भोजन करिके पोढ़ेहुते तब तुलसाने भगवद्वातां करी अति प्रसन्नतामें श्रीगुसांईजी कही जो पन्नना-भदासकी संतति ऐसीही चाहियै पाछें श्रीगुसांईजीने तुलसासों पूछौ जो श्रीठाकुरजी सानुभावता जतावत हैं तब तुलसाने कह्यौ जो महाराज अबतौ पेटभरि खाइयत है और नींदभरी सोइयत है और श्रीआचार्यजी महाप्रभूनके पंथनको पाठ करियतहै तब श्रीगुसांईजी बहुत प्रसन्न भये वह तुलसा ऐसी भगवदीय हुती ताते श्रीठाकुरजी अति सहिनसके ताते वा तुलसाके ऊपर श्रीगुसांईजी बहुत प्रसन्न रहते ताते इनकी वार्ता कहां ताई लिखिये ॥ प्रसंग ॥ ॥ २ ॥ वैष्णव ॥ ५ ॥

अथ पद्मनाभदासको बेटा ताकी बहू पार्वतीकी वार्ता ।

सो पार्वती श्रीठाकुरजीकी सेवा नीकी भांति करती और पुरुषोत्तम दास महारा इनको नीकी भांतिसों जानतो जब कन्नौज जातो तब पार्वतीके घर उतरतौ तब कितनेक दिन पाछें पार्वतीके हाथ पाँव श्वेत व्हैगये तबते श्रीठाकुरजीकी रसोई करत तथा स्पर्श करत बहुत २ ग्लानि आवती तब पुरुषोत्तमदास महाराकों पार्वतीनें पत्र लिख्यौ तामें लिख्यौ सो मेरी बीनती श्रीगुसांईजीसों कहियौ मेरी देहको यह प्रकार भयोहै तातें मोकों सेवा करत पाक करत बडी ग्लानि आवत है सो मैं कहाकरूं सो पुरुषोत्तमदास महाराने पार्वतीको लिख्यौ पत्र श्रीगुसांईजीको बांच सुनायौ और बीनती कीनी भेंटकी मोहर ही सो आगे राखी पाछें श्रीगुसांईजीने पुरुषोत्तम महाराको आज्ञा दीनी जो दिन द्वैचारिमें कहंगौ पाछे दिन द्वैचारि बीते तब श्रीगुसांईजीने पुरुषोत्तमदास महाराको आज्ञा दीनी जो पार्वतीको पत्र लिख तामें लिखियौ जो तू श्रीठाकुरजीकी सेवा नीकी भांतिसों

करियौ काहू बातकी ग्लानि मतिलाइयो श्रीठा-
 कुरजी तेरो रोग सब आपहीते दूर करेंगे तब
 पुरुषोत्तम महराने पार्वतीको पत्र लिख्यौ तामें श्री-
 गुसाईंजीने श्रीमुखते बचन कहे सो लिख पठाये
 सो वह पत्र पार्वतीपै पहुंचौ सो पत्र बांचके श्रीगु-
 साईंजीकी आज्ञाते सेवा प्रसन्नतासो करन लागी
 कछू ग्लानि मनमें नहीं लावती पाछें महीना तीन
 चारिमें हाथ पांव नीके भए तब पार्वती बहुत प्रसन्न
 भई सो प्रसन्नतासों सेवा करनलागी बहुर श्रीगुसां-
 ईंजीको पत्र लिख्यौ भेंट पठाई और कह्यौ जो महा-
 राजके प्रतापते नीकी भईहों सो पत्र बांचिके श्रीगु-
 साईंजी बहुत प्रसन्नभये सो वह पार्वती बड़ी कृपा-
 पात्र भगवदीय हुती प्रभूनके पर मानचलती ताते
 श्रीगुसाईंजी इनके ऊपर सदा प्रसन्न रहते यह वार्ता
 सब पद्मनाभदासके कुटुम्बकी भई ताते पद्मना-
 भदास बडे भगवदीय है ताते इनकी वार्ता कहां ताई
 लिखियै प्रसंग ॥ १ ॥ वैष्णव ॥ ६ ॥

अथ पद्मनाभदासकौ नाती पार्वतीको
 बेटा रघुनाथदासकी वार्ता ।

सो रघुनाथदास बनारसमें बहत शास्त्र पढिके ।

श्रीगोकुल आयौ तब श्रीगुसांईजी दंडोत कीनी सो गुसांईजी बडेनकी कानिते इनके ऊपर कृपा करते कथा कहते सो रघुनाथदास सुनते सो एकदिन परमानन्द सौनीने इनसों पूछौ जो रघुनाथदास तुम तौ बहुत शास्त्र पढे हो पंडित हो आज श्रीगुसांईजीने कहा कथा कही हुती सो कहौ तब रघुनाथदासने परमानन्द सौनी सों कह्यौ जो तुम तौ सांच पूछत हो पारि हूंतो कछू समझत नाही तब यह बात परमानन्द सौनीने श्रीगुसांईजीके आगे कही जो महाराज रघुनाथदास तौ कछू समझत नाही पाछें श्रीगुसांईजीने रघुनाथदासको ग्रन्थ दोय चार पढाय और मार्गकी प्रनालिका कही पाछें रघुनाथदास समझन लाग्यौ बडौ पंडित भयौ सो कितनेक दिन पाछें अपने घर कन्नौजमें आयौ तब मातासों कही जो हूंतो न्यारो होयगौ श्रीठाकुरजीकी सेवा करूंगो तब माताने कही जो भलेई तू सेवा करि पाछें न्यारो भयौ वाकी माता जलभर लावती पार्वती पात्र माँजती श्रीठाकुरजीकी सेवा नीकी भांतिसों करती परचारगी सब करती जब राजभोग सरतौ तब अपने घर अकेली लीटी करि श्रीठाकुरजीको भोग समर्पि वा भोग सराय आप

प्रसाद लेती या भांतिसों करती ऐसे करत दिन पांच साति बीती तब अपने सेव्य श्रीठाकुरजीने कह्यौ जो अरी पार्वती मेरोगरो खरखरात है अकेली लीटीनते ताते तू दारितौ कर्यौ तब पार्वतीने कह्यौ जो महाराज तुमतौ दारिभात सालनसो आरोगतहो तब श्रीठाकुरजीने कह्यौ जो मेतो तेरो कीयौ आरोगतहो पाछें दारभात सब सालन करन लागी ताते पार्वती बड़ी कृपापात्र भगवदीय हुती यह वार्ता सब पद्मनाभदासके परिवारकी भई ताते वे पद्मनाभदास श्रीआचार्यजी महाप्रभूनके ऐसे कृपापात्र भगवदीय हैं सो इनकी वार्ता ऐसी २ कितनी कहैं ताते अब कहां ताई लिखिये॥ प्रसंग ॥ १ वैष्णव॥ ७॥

अथ रजो क्षत्राणी अडेलमें रहती

ताकी वार्ता ।

सो वा रजो क्षत्राणी नित्य पकवान सामग्री करि श्रीआचार्यजी महाप्रभूनके लिये ले आवती सो श्रीआचार्यजी महाप्रभू आरोगते वाको नित्य नेम हुतो सो एक दिन लक्ष्मन भट्टजीकौ श्राद्धदिन आयौ सो श्रीआचार्यजी महाप्रभूनने ब्राह्मण भोजनको बुलाए हुते तहां घृत थोरोसो चाहियत हुतौ

तब श्रीआचार्यजी महाप्रभूनने एक वैष्णवसों कही जो रजो कैसे घृत लेआउ तब वा वैष्णवने रजोसों कही जो रजो श्रीआचार्यजी महाप्रभूनने घृत मंगायौ है तब रजोने वा वैष्णवसों कह्यौ जो घृत काहेको चाहियत है तब वा वैष्णवने कह्यौ जो आज श्रीलक्षमन भट्टजीको श्राद्धदिन है सो ब्राह्मण भोजनको बुलाए गये हैं सो थोरो घृत रसोईमें घट्यौ है तातें मंगायौ है तब रजोने कह्यौ जो मेरे तौ घृत नहीं है तब वह वैष्णव फिर आयौ आयके श्रीआचार्यजी महाप्रभूनसों कह्यौ जो महाराज रजोके घृत नहीं है तब श्रीआचार्यजी महाप्रभूनने कह्यौ जो तू फेरिजा और खीजके कहियौ जो श्रीआचार्यजी महाप्रभूनने घृत मंगायौ है तब वह वैष्णव फिर गयौ और रजोसों कह्यौ जो श्रीआचार्यजी महाप्रभू खीजत हैं तबहू रजोने घृत नहीं दियौ तब वह वैष्णव फिर आयौ तब श्रीआचार्यजी महाप्रभूनसों कह्यौ जो महाराज रजो घृत नहीं देत तब श्रीआचार्यजी महाप्रभूनने कह्यौ जो अबके फेरि जा और कहियौ जो श्रीआचार्यजी महाप्रभू खीजत हैं तातें घृत देउ तबहू नहीं दियौ तब श्रीआचार्यजी महाप्रभूसों कह्यौ जो महाराज रजो

घृत नहीं देत तब श्रीआचार्यजी महाप्रभूननें और ठौरते काम चलायौ तब रात्रीको रजो पकवान लेके आई तब रजोको देखिके श्रीआचार्यजी महाप्रभू पीठदे बैठे तब रजोने कही जो महाराज मेरो अपराध कहा है तब श्रीआचार्यजी महाप्रभूननें कह्यौ जो तेरे घृत न हुतौ तौ सामग्री कहाँते करलाई तब रजोने कह्यौ जो हूं लक्ष्मन भट्टकी लोंडीतो नहीं मेरे घृत न हुतौ ताते न दीनो ताते तुम्हारे घृत हुतौ सो क्यों न दीनो तब श्रीआचार्यजी महाप्रभूननें कह्यौ जो मैं श्रीठाकुरजीको घृत क्यों करके देउ तब रजोने कही जो मैं श्रीठाकुरजीको घृत क्यों करके देउ तब आप बोले नहीं तब रजोने सामग्री आगे राखी और कही जो राज आरोगो तब श्रीआचार्यजी महाप्रभूननें कह्यौ जो आज श्राद्धदिन है ताते दूसरी वार लेनो नहीं तब रजोने कही जो महाराज तुम्हारे घरको होय जो मति लेउ यह तौ लीयौ चाहिये तब रजोके आग्रहते श्रीआचार्यजी महाप्रभूनें आरोगी रजो श्रीआचार्यजी महाप्रभूनकी ऐसी कृपापात्र भगवदीयही ताते इन रजोकी वार्ता कहाँताई लिखिये ॥ प्रसंग ॥ १ ॥ वैष्णव ॥ ८ ॥

अथ पुरुषोत्तमदासक्षत्री बनारसमें रहते तिनकी वार्ता ।

सो सेठ पुरुषोत्तमदासकों श्रीआचार्यजी महा-
प्रभूनकी आज्ञा हुती जो तुम पास कोई नाम लेन
आवै ताको तुम नाम दीजियौ तातें सेठ पुरुषोत्तम-
दास नाम देते और अपने घर श्रीमदनमोहनजीकी
सेवा करते परि कबहुं विश्वेश्वरनाथ महादेवजीके
दर्शनकों नजाते ऐसे बहुत दिन बीते तब एकदिन
विश्वेश्वरनाथ महादेवजीनें सेठ पुरुषोत्तमदाससों
कह्या जो सेठजी तुम हमसों गांवको नातोतो राखौ
कबहुं हमको प्रसाद तौ दियौ करौ ऐसे स्वप्नमें कही
तब सवारे सेठ पुरुषोत्तमदास उठि सेवासों पहुंचके
बाहर आये तब वस्त्रपहरकें बीडा दोय प्रसादी लेके
डवरा प्रसादको लेके विश्वेश्वरनाथ महादेवजीके
दर्शनकों चले तब गांवके लोग आश्चर्य भए जो सेठ
पुरुषोत्तमदास कबहुं दर्शनको न आवते सो आज
क्यों आये सो सब लोग साथ आए सो सेठ पुरु-
षोत्तम दासने देवालयमें जायके विश्वेश्वरनाथ महा-
देवजीके आगे बीडा दोय धरि प्रसादको डवरा धरि
श्रीकृष्ण स्मरण कहिकें उठि चले तब बडे २ पंडित

ब्राह्मण हुते तिनने सेठ पुरुषोत्तमदाससों कह्यौ जो
 सेठ पुरुषोत्तमदास दंडोत नमस्कार कछू न कीनों
 श्रीकृष्णस्मरण कहिके उठिचल सो तो तुमको
 उचित नाहीं तब सेठ पुरुषोत्तमदासने उन ब्राह्मण-
 नसों कह्यौ जो तुम महादेवजीकों पूछि लीजियौ
 तुमसों महादेवजी कहेंगे पाछे उन ब्राह्मणनमें एक
 महादेवजीको बड़ो कृपापात्र भगवदीय हुतौ तासों
 महादेवजीने स्वप्नमें कह्यौ जो हमने इनसों महाप्र-
 साद मांग्यौ हौ सो देन आये हैं हमारो इनको
 व्यौहार जै श्रीकृष्णको है ताते तुम इनसो कछू
 मति कहौ पाछे सठ पुरुषोत्तमदास बडे उत्सवको
 प्रसाद कबहुं २ लेजाते तब एकदिन महादेवजीने
 कालभैरवसों कह्यौ जो सेठ पुरुषोत्तमदास वैष्णवन
 के घरते अवेरो सबेरो आवतहै ताते तू इनके घरको
 चौकी पहरा नित्य देत रहियौ सों कालभैरव नित्य
 इनके घरको चौकी पहरा देतौ सो एक दिन सेठ
 पुरुषोत्तमदास वैष्णवनके घरते अवारे आवत है
 सो सेठ पुरुषोत्तमदास घरके द्वार आये तब फि-
 रके देखें तौ कालभैरव एक ठौर ठाढौ है तब सेठ
 पुरुषोत्तमदासने वासों पूछौ जो तू कौन है तब
 वह बोलो जो हूं कालभैरवहों मोको महादेवजीने

आज्ञा दीनी है ताते तुम्हारे घरकी चौकी पहरा देतहों तब सेठ पुरुषोत्तमदास खिरकी देकें भीतर गए ॥ प्रसंग ॥ १ ॥

बहुर एक दक्षिणदेशको ब्राह्मण सैवी हुतो सो बडो पंडित महादेवजीको कृपापात्र हुतौ सो वा ब्राह्मणको महादेवजीको साक्षात् दर्शन होतो सो वह ब्राह्मण नित्य प्रति महादेवजीके दर्शन करतौ तब जलपान करतौ ऐसो महादेवजीको भक्त हुतौ सो एक समैं जन्माष्टमीको उत्सव आयौ सो विश्वेश्वर नाथ महादेवजी सेठ पुरुषोत्तमदासके घर गये जन्माष्टमीको उत्सव देखनको सो वा ब्राह्मणने जन्माष्टमीके उत्सवके दिना दर्शन न पायो और नवमीके दिना दुपहरलों जब सेठ पुरुषोत्तमदासके घरते महादेवजी बिदा होयकें आये तब वा ब्राह्मणने महादेवजीको दर्शन पायो तब वा ब्राह्मणने महादेवजीसों पूछो जो कालि और आज हम दर्शन दुपहरलों नाहीं पायो सो काहेते तब वा ब्राह्मणसों महादेवजीने कह्यौ जो हम कालि सेठ पुरुषोत्तमदासके घर उत्सव देखन गए हे सो अबही सेठ पुरुषोत्तमदासके घरते बिदा होयके आवतहों तब वा ब्राह्मणने कही जो सेठ पुरुषोत्तमदास कौन हैं ति-

नके घर तुम उत्सव देखनको जातहौ तब महादे-
 वजीने कह्यौ जो बडे भगवद्भक्त हैं तब वा ब्राह्म-
 णने कही जो मोहूँको भगवद्भक्त करो तब महादेव-
 जीने कह्यौ जो सेठ पुरुषोत्तमदासके पास तू जायके
 नाम ले आउ तब वा ब्राह्मणने कही जो तुमही मोकों
 नाम देउ तब महादेवजीने कही जो मेतो तोकों
 नाम देउंगो सही परि मेरो दियौ नाम तोको फले-
 गो नाहीं ताते तू सेठ पुरुषोत्तमदासके पास नाम-
 लै आउ वे तोकों नाम देयंगे तब वह ब्राह्मण सेठ
 पुरुषोत्तमदासके पास नाम लेनगयौ सो आयके भी-
 तर खबर करवाई जो एक ब्राह्मण आयो है तब सेठ
 पुरुषोत्तमदासने कही जो बैठारो माथोखाली करन
 आयौ होयगो तब सेठ पुरुषोत्तमदास सेवासो
 पहुँचिके बाहर आये तब वा ब्राह्मणने दंडौत कीनी
 तब सेठ पुरुषोत्तमदासने कही जो ऐसो अनुचित
 क्यों करतहो हम क्षत्री तुम ब्राह्मण ऐसे यों न घटे
 है तब वा ब्राह्मणने सेठ पुरुषोत्तमदाससों कही
 जो हमको नाम देउ तब सेठ पुरुषोत्तमदासने
 कह्यौ जो हूँ तो नाम नाहीं देउंगों बहुरि ब्राह्मणने
 बहुत आग्रह कीनों परि पुरुषोत्तमदासने नाम न
 दीनों तब वह ब्राह्मण महादेवजीके पास आयौ तब

कह्यौ जो सेठ पुरुषोत्तमदास नाम नाही देत तब
 महादेवजीने कह्यौ जो त फेरिजा हमारो नामली
 जियौ जो मोको श्रीमहादेवजीने पठायौ है तब वह
 ब्राह्मण फेरि सेठ पुरुषोत्तमदासके पास आयौ और
 कह्यौ जो मोकों महादेवजीने पठायौ है ताते मोकों
 नामदेउ तब सेठ पुरुषोत्तमदासने वा ब्राह्मणकों
 नाम दीथौ नाम सुनायके हाथ जोरिकें श्रीकृष्ण-
 स्मरन कह्यौ तब वा ब्राह्मणने कह्यौ जो अब मोकों
 प्रनाम क्यों करत हौ तब सेठ पुरुषोत्तमदासने
 कह्यौ जो अब तुम भगवदभक्तभये मेरे तुम बंद-
 नीयहौ तुम्हारे और हमारे बंदनीय श्रीआचार्यजी
 महाप्रभू हैं मेंतौ श्रीआचार्यजी महाप्रभूनकी कृपाते
 नाम देतेहौ पाछे वह ब्राह्मण श्रीआचार्यजी महाप्र-
 भूनके पास अडेल आयौ तब श्रीआचार्यजी महा-
 प्रभूनके पास नामसमर्पण करवायौ पाछें कितनेक
 दिन रहके श्रीआचार्यजी महाप्रभूनके ग्रन्थ पढे
 ॥ प्रसंग ॥ २ ॥

बहारि एक समय सेठ पुरुषोत्तमदास बैठे बैठे
 मंदिर वस्त्र करते हुते इतनेहीमें गोपाल दास बेटा
 श्रीठाकुरजीको सेन भोग सरायवेकों मन्दिरमें न्हा-
 यके आयो तब देखेंतो सेठ पुरुषोत्तमदास बैठे बैठे

मन्दिर वस्त्र करत हैं तब गोपालदासके मनमें आई जो अबतो सेठजी वृद्ध भए हैं ताते में सेवामें तत्पर होउतौ आछौं तब यह बात गोपालदासके मनकी सेठ पुरुषोत्तमदासने जानी तब कह्यौ जो बेटा आगें आउ तब गोपालदास जायकें देखैतौ वर्ष बीस तथा पच्चीसकें बैठे हैं तब पुरुषोत्तमदासने कह्यौ जो बेटा यह भगवदीयनकी मनमें न लावनी भगवदीय सदा तरुन हैं परि अवस्था होय ताको मान दीयौ चाहिये ॥ प्रसंग ॥ ३ ॥

बहुरि एक समय सेठ पुरुषोत्तमदास झाड खंडमें मदार मधुसूदन ठाकुर हैं सो पर्वत ऊपर मन्दिर है पर्वतको नाम मंदार पर्वत है ता ऊपरते मनुष्य गिरे तो चोट न लगे और अपने सब पाप कहि कामना करि गिरेतौ देह छूटे पाप दूर होय और जो कामना करि होय सो दूसरे जन्ममें सिद्ध हो वह ऐसो स्थल है तहां एक समय श्रीआचार्यजी महाप्रभू पधारे हुते तहां सेठ पुरुषोत्तमदास और एक ब्राह्मण श्रीआचार्यजी महाप्रभूनको सेवक सो दोउजने मंदार मधुसूदनजीके दर्शनकों पर्वत ऊपर चढे सौं उहां जायके मधुसूदनजीके दर्शन कीनों पाछें रात्रि परिगई तातें उहांहीं सोय रहै पाछें

रात्रिकों एक सिद्ध आयौ वह जातिको ब्राह्मण हुतौ
 वा सेठ पुरुषोत्तमदासके साथके ब्राह्मणसों पूछौ जो
 तुम कोन हों तब वह बोल्यौ हम वैष्णव हैं श्रीआ-
 चार्यजी महाप्रभूनके सेवक हैं तब वा सिद्ध ब्राह्म-
 णने कह्यौ जो मेरे पास एक मणि है सो तुम लेजाउ
 तौ लेउ तब वा वैष्णवने कह्यौ जो यह मणि
 कौन काम आवत है तब सिद्ध ब्राह्मणने कही जो
 यह मणि ऐसी है जो माँगे सो देत है तब वा ब्राह्म-
 णने कही जो मैंतो विरक्तहौं मैं मणि लेकें कहा
 करूं परि मेरे साथ एक क्षत्री है सो वह गृहस्थ है
 सो वह सोवत है जो वाकों देउ तौ जगाऊं तब वा
 सिद्ध ब्राह्मणने कहा जो जगावो तब वा वैष्णवने
 सेठ पुरुषोत्तमदासकों जगायौ और कही जो
 यह ब्राह्मण मणि देत है सो तुम लेउ तब सेठ
 पुरुषोत्तमदासने कही जो यह मणि कौन काम
 आवत है तब वा मणिकौ प्रभाव कह्यौ तब सेठ पुरु-
 षोत्तमदासने कह्यौ जो यह मणि हमारे कामकी
 नाहीं ताते हूंतो न लेउंगो तब सिद्ध ब्राह्मण फिर
 गयौ तब सेठ पुरुषोत्तमदासके संग ब्राह्मण हुतौ
 ताने सेठ पुरुषोत्तमदाससों कह्यौ जो तमतो गृहस्थ
 हौ बहुत कुटुम्बी हो तुम्हारे माथे सवा है तुमने

मणि क्यों न लीनी तुमको तो मणि लेनो उचित हो
 तब सेठ पुरुषोत्तमदासने कह्यो जो अरे ब्राह्मण बा-
 वरे में श्रीठाकुरजीको तथा श्रीआचार्यजी महाप्र-
 नको आश्रय छोड़िके कहा मणिको आश्रय करूं
 तेने मणि क्यों नलीनी तब वानें कह्यो जो मैंतौ बि-
 रक्तहों मैं मणि लेके कहा करूं मोको जगदीस सेर
 चून देयगौ तब सेठ पुरुषोत्तमदासने वा वैष्णव-
 सों कह्यो जो तोको जगदीस सेरचून देयगौ तो मों-
 को कहा जगदीस दशसेर चून नदेयगो जगदीसके
 काहु बातकी न्यूनता है ऐसे कहिकें दोऊ जनेनने
 वो मणि नलीनी वे सेठ पुरुषोत्तमदास श्रीआचा-
 र्यजी महाप्रभूनके ऐसे कृपा पात्र भगवदीय हैं
 ॥ प्रसंग ॥ ४ ॥

बहुरि एक समय श्रीआचार्यजी महाप्रभू सेठ
 पुरुषोत्तमदासके घर पधारे तब दामोदरदास हरि-
 सानी श्रीआचार्यजी महाप्रभूनके साथ हैं सो
 श्रीआचार्यजी महाप्रभूनने सेठ पुरुषोत्तमदासके
 सेव्य श्रीठाकुरजी मदन मोहनजीको पंचामृत
 स्नान करवायौ और आप पाक करि श्रीठाकुर-
 जीको भोग समर्प्यो भोग सराय अनोसर करि
 श्रीआचार्यजी महाप्रभूनने आप भोजन कीयो तब

दामोदरदास हरिसानीने श्रीआचार्यजी महाप्रभू-
नसों पूछौ जो राज यह कहा तब श्रीआचार्यजी
महाप्रभूनने कह्यौ जो यह मेरी आज्ञाते नाम देत
है तथापि मोको याकी इतनी मर्यादा राखी चाहिये
सो वे सेठ पुरुषोत्तमदास श्रीआचार्यजी महाप्रभू-
नके ऐसे परम कृपापात्र भगवदीय है ताते इनकी
वार्ताको पार नाही सो अब कहां तांइ लिखिये ॥
प्रसंग ॥ ५ ॥ वैष्णव ॥ ९ ॥

पुरुषोत्तमदासकी बेटी रुक्मनीकी वार्ता।

सो एक समय श्रीगुसांईजी कासीमें पधारे हुते
तब तहां सूर्य ग्रहण आयौ तब श्रीगुसांईजी मनि-
कर्णिकाके स्नानको पधारे तब रुक्मनीहू श्रीमदन
मोहनजीको स्नान करायकें आप मनिकर्णिका
स्नानको गई श्रीगुसांईजी पधारे जानकें तब श्रीगु-
सांईजीसों वैष्णवनने कह्यौ जो महाराज सेठ पुरुषो-
त्तमदासकी बेटी रुक्मनी आई है तब श्रीगुसां-
ईजीने कह्यौ जा रुक्मनी आगे आउ तब अपने
पास बुलाय लीनी तब श्रीगुसांईजीने पूछा जो तू
कितनेदिन पाछें गंगास्नानकों आई है तब रुक्म-
नान कह्यौ जा महाराज चौबीस वर्ष पर्यंत पाछें
आईहों तब यह सुनिकें श्रीगुसांईजीको हठौ भारि-

आयौ और कह्यौ जो ऐसी भगवदीय जिनको एक क्षणहं अवकाश नहीं है जो गंगास्नानको आवै श्रीगुसांईजी बहुत प्रसन्न भय और रुक्मनीको देखिके श्रीगुसांईजी कहते जो याके श्रीठाकुरजी आरिण कब होयंगे ॥ प्रसंग ॥ १ ॥

बहुरि क्षत्रीलोग सब कार्तिकमासमें गंगास्नान करते तब रुक्मनीने सेठ पुरुषोत्तमदाससों कह्यौ जो तुम आज्ञा करो तौ मैंहु कार्तिकस्नान करूं तब सेठ पुरुषोत्तमदासने कह्यौ जो भलेंई स्नान करि जो चाहिये सो लीजिये तब रुक्मनीने कह्यौ जो खांड घृत दिवाय देउ मैदा तौ घरमें है तब सेठ पुरुषोत्तमदासने खांड घृत दिवाय दियौ तब रुक्मनी पहर रात्रि पिछली रहै जब उठे सो नौतन सामग्री करिकें समय समय राजभोगलों श्रीमदनमोहनजीको समर्पि फिर उत्थापनसों सामग्री करे सो सेन भोगलों समर्पि ऐसे कार्तिक मासमें करै और वैशाखमें शीतल सामग्री करै श्रीठाकुरजीको आरोगावै सो प्रसाद वैष्णवनको लिवावै या भांतिसों करै सो एक दिन सठ पुरुषोत्तमदासने रुक्मनीसों कही जो रुक्मनी स्नान कब करत है ताकों जात कबहं देखियत नाहा तू कार्तिक कोन बेर न्हातिहै

तब रुक्मनीने कहाँ जो मोको स्नान सों कहा काम है मेंतो या भांतिसों करतहों तब यह सुनिकें सेठ पुरुषोत्तमदास बहुत प्रसन्न भए श्रीगुसांईजी आप श्रीमुखते सराहना करते रुक्मनी ऐसी कृपापात्र भगवदीय ही ॥ प्रसंग ॥ २ ॥

बहुरि कितनेक दिनमें रुक्मनीकी देह आसक्ति भई तब रुक्मनीने कहाँ जो अब यह देह छूटैतौ भलौ है श्रीठाकुरजीकी सेवा न होय आवै तो यह देह कौन कामकी है तब कितेक दिन पाछें रुक्मनीकी देह छूटी सो एक वैष्णवने श्रीगुसांईजीसों कही जो महाराज रुक्मनीने गंगा पाई तब श्रीगुसांईजी श्रीमुखते कहे जो ऐसे मति कहौ जो रुक्मनीने गंगा पाइ ऐसे कहौ रुक्मनी गंगाने पाई वह रुक्मनी श्रीआचार्यजी महाप्रभूनकी ऐसी कृपापात्र भगवदीय ही ताते इनकी वार्ता अनिर्वचनीयहै सो कहा-तांइ लिखियै ॥ प्रसंग ॥ ३ ॥ वैष्णव ॥ १० ॥

अथ पुरुषोत्तमदासकौ बेटा

गोपालदासकी वार्ता ।

सो गोपालदाससों श्रीमदनमोहनजी सानुभाव हुते जो चाहियै सो मांगि लेते ऐसे सदैव कृपा करत बहुरि गोपालदास कीर्तन बहुत करते और गो-

पालदासकी देह आसक्ति भयी तब भगवद नामको उच्चारण करते तब श्रीमदनमोहनजी आप हुकारी देते ऐसी कृपा करते श्रीआचार्यजी महाप्रभूनके ग्रन्थ सुबोधिनीजी श्रीभागवत निबंध और रहस्य ग्रंथसो सब पाठ करते भागवत लीलामें मग्न रहते सदैव लीलाको विचार करते ऐसे करिकें सर्व काल व्यतीत कीयौ पाछें देह छूटी तब श्रीगुसांईजीने सुनी जो गोपालदासकी देह छूटी है तब आप श्रीमुखते कही जो गोपालदासकी सराहना करी सो वे गोपालदास ऐसे भगवदीय हैं सो यह वार्ता सब सेठ पुरुषोत्तमदासके परिवारकी भई ताते इनकी वार्ता कौ पार नहीं सो अब कहांताई लिखिये ॥ प्रसंग ॥ १ ॥ वैष्णव ॥ ११ ॥

अथ रामदास सारस्वत ब्राह्मण ताकी वार्ता ।

सो वे रामदास श्रीठाकुरजीकी सेवा नीकी भांति-
सों करते अपरसमें जल भरते बीडाहू अपरसमें
राखते या प्रकारसों करते सो रामदासके पास द्रव्य
बहुत हुतौ सो कितेक दिन पाछें वह द्रव्य खरच
भयौ थोरोसो द्रव्य आय रह्यौ तब मनमें विचारी

जो कछू आवत होय तो भलों है तब ता दिनते वह द्रव्य तातीनको व्याजू दीनों तब व्याज बहुत आमन लाग्यौ लोभके लिये तातीनको व्यौपार कीयौ (पूरबदेशमें फटे वस्त्र बुनत हैं तिनसों ताती कहत है) तब रामदासजीके सेव्य श्रीठाकुरजी श्रीनवनीतप्रियाजीने कह्यौ रामदास तूतौ हमको तातीनपर राखत है तब रामदासजी यह बात सुनिके चौंकि उठे और कह्यौ जो महाराज मोसौ चूक परी तब रामदासजी तातीनपर गए और कह्यौ जो मेरो द्रव्य देउ तब उन तातीनने रामदासजीसों पूछ्यौ जो यह कारन कहा है सो द्रव्य मांगत हौ तब रामदासजीने कह्यौ जो मैं कहा-करूं मोकोतो लरिका संग काम पच्यो है ताते लरिकाको मन राख्यौ चाहियै तब तातीनने कह्यौ जो हम द्रव्य इक ठोरो करत है तब कितेक दिन पाछें उन तातीनने द्रव्य दीयौ सो द्रव्य लेकें घर आए फेर वैसेही सेवा करन लागे सो सब द्रव्य निवट्यो तब बनियानकी दूकानते उचापति करन लागे तब ऋणि बहुत होगयो तब उचापति बनियाकी दूकानते दूरकीनी और बनियाकी दूकानते उचापति करन लागे परि वा बनियाकी हाट आगे

होयकें निकसते नहीं और गेल होयकें जाते तब
 एक दिन बनियाने रामदाससों कही जो भलौ तुम
 मेरी दूकानके आगे होयके नहीं निकसत हौ और
 उचापति नाही करत तौ मेरो लेखो करिके मेरो पैसा
 चुकाय देउ तगादो बहुत करडौ कीयौ तब श्रीठा-
 कुरजी रामदासजीको स्वरूप धरिकें बनियाकी हाट
 ऊपर गए और श्रीमुखते कही जो लेखौ लाउ पैसा
 चुकाय देउ तब वा बनियाने वही देखि लेखौ करिके
 पैसा चुकाय दीनों रुपैया एकसौ अधिक दीयै श्रीठा-
 कुरजी आप श्रीहस्तसों लिखि आये पारि यह बात
 रामदासजीने न जानी तब एक दिन रामदासजीको
 बुलायवे वैष्णव आए तब उन वैष्णवनके पाछें २
 रामदासजी गए सो रामदासजी वा बनियाकी दूका-
 नके आगे होयके निकसे तब आनाकानी देके नि-
 कसे इतनेमें वा बनियाने कही जो रामदासजी तुम
 मेरी हाटते उचापति नाही करत सो तौ मेरो अ-
 भाग्य है पारि तुमारो मोपै अधिक द्रव्य है सो तो
 उठाय लेउ तब रामदासजीने कह्यौ जो उहांते फिर
 आवत हौं तब रामदासने मनमें बिचारौ जो मेतौ
 याकौ कछू दीयो नहीं और यह कहत है जो तु-
 म्हारौ अधिक द्रव्य है सो तो उठाय लेउ यह का-

रन कहा है परि जानियत है जो यह श्रीठाकुरजी औरते काम भयौ है पाछे रामदासजी वैष्णवनके घरते आये तब वा बनियाकी हाटपै जायकें लेखो मांगो जो लेख्यौ लाउ तब वा बनियाने कह्यौ जो कहालेखौ देखौगे तब वा बनियाने वही दिखाई तब वा वहीमें रामदासजीने श्रीठाकुरजीके हस्ताक्षर देखे तब चुप करि रहै तब घर आय रामदासजीने स्त्रीसों कही जो हूंतो घरमें नाहीं रहूंगो चाकरी करूंगौ तब सिपाहगीरीको विचार कीयौ तब घोडा मोल लीयौ सब हथियार बांधन लागे तब जल और बीडा अपसरमें लेत है सो अपरस छूटी बिना अपरसमें लैन लागै सो कितेक दिन पाछें रामदासजी अडेल आयै सो हथियार बांधेही जायकें श्रीआचार्यजी महाप्रभूनके दर्शन कीने दंडवत कीनी तब श्रीआचार्यजी महाप्रभूनने श्रीमुखतें धन्य २कह्यौ जो रामदास तू धन्य है तब और वैष्णव पास बैठे हैं सो कहन लागे जो महाराज अब याकों धन्य क्यों कहत हो अब तौ यह अपरसतासों नाहीं रहत है सिपाहीनमें चाकरी करत है तब श्रीआचार्यजी महाप्रभूनने कही जो यह धन्य याते है श्रीठाकुरजीको श्रम नाहीं करवावत याकी बराबर कोऊ

धीरजवंत नाही श्रीआचार्यजी महाप्रभू आप ता समय गंगास्नानको पधारे तब मार्गमें एक खाड देख्यौ तब श्रीआचार्यजी महाप्रभूनने कह्यौ जो यह खाड अजहू भरचौ नाही सो इतनो कहतही वैष्णव सब खाडभर न लागै तब रामदासजीहू एक टोकरा लेकै खाड भरन लागे तब श्रीआचार्यजी महाप्रभू स्नान करिके पधारे तब ताई खाड भर दीनों तब रामदासजीको देखिके श्रीमहाप्रभूजी बहुत प्रसन्न भए ॥ प्रसंग ॥ १ ॥

और रामदासजीके कछू संतत न हुती तब स्त्री-ने रामदासजीसों कह्यौ जो तुम और विवाह करौ तौ तुम्हारे बालक होय तब रामदासजीने कह्यौ जो हमको तौ बालककी इच्छा नाही तब स्त्रीने कह्यौ जो मोंको तौ बालककी इच्छा है तब रामदासजीने कह्यौ जो तोको बालककी इच्छा है तब तौ हमारे श्रीनवनीतप्रियाजीकी बालभावसों सेवा करि जैसे बालककुं खवाइयै प्याइयै खिलाइयै हित करियै तैसे तुम श्रीनवनीतप्रियाजीको लडावो तब तेरे बालक होयगौ तब रामदासजीकी स्त्रीने श्रीनवनीत-प्रियाजीकी बालभावसों सेवा करि सो या प्रकारसों सेवा करि जो बालक भयौ है सो वे रामदासजी

श्रीआचार्यजी महाप्रभूनके ऐसे कृपापात्र भगव-
दीय हैं ताते इनकी वार्ताको पार नहीं सो इनकी
वार्ता अब कहांताई लिखियै॥प्रसंग॥वैष्णव॥१२

**गदाधरदास सारस्वत ब्राह्मण कंडामें
रहते तिनकी वार्ता ।**

सो गदाधरदासके मांथे श्रीमदनमोहनजीकी
सेवा हुती सो श्रीठाकुरजी बडे गौर हुते सो नित्य-
प्रति जैसो उनके जिजमान केसे आवतौ तैसो श्री-
ठाकुरजीको समर्पते सो एक दिन जिजमानकेसे
कछू आयौ नहीं तब जलही छानके समर्प्यो परि
मनमें बहुत खेद भयौ छातीमें अग्निसी उठी ऐसे
करत रात्रि परगई तब एक जिजमान द्वारेपर आय
पुकार्यौ और कही जो किवाड खोलौ तब गदाध-
रदासने किवाड खोले तब वा जिजमानने एक बागो
और चार रुपैया और कछू सामग्री गदाधरदासको
दीये और कह्यौ जो आज मेरे पिताको श्राद्धदिन
हुतौ ताकी यह दक्षिणा लेउ तब गदाधरदासने
लीनी सो बागो सामग्री घरमें धरके आप बाजा-
रमें गये सो एक हलवाई मिठाई आछी करत हुतो
ताकी हाटपै गए तब जायकें वा हलवाईसों पूछ्यौ
जो तेरे मिठाई आछी है तब हलवाईने कही जो मि-

ठाई जलेबी अबही कीनी है यामेंते बेची नाहीं तब जलेबी तुलाय मोल देके घर आए तब गदाधरदास आयकें स्नान करि श्रीठाकुरजीको भोग समप्यों समयानुसार भोग सराय अनोसर करके पाछें वैष्णवनको बुलाय महाप्रसाद सबनको लिवायौ सो अति अलौकिक स्वाद भयो ऐसो जो कछू कह्यौ न जाय सो सब महाप्रसाद वैष्णवनको लिवायौ और आप भूखेही सोय रहै पाछें सवारे उठि सीधौ सामग्री लाए तब स्नान करि रसोई करी श्रीठाकुरजी सेवा शृंगार करि श्रीठाकुरजीको भोगसमप्यों भोग सराय वैष्णव फेर बुलाए जब वैष्णव प्रसाद लेवेको आयके बैठे तब पूछन लागे जो रात्रिको महाप्रसाद हमने लीनो सो बहुत स्वाद भयौ सो क्यों करि समप्यों तब गदाधरदासने सब प्रकार कह्यौ तब सब वैष्णव बहुत प्रसन्न भये और कह्यौ जो गदाधरदासने सत्य कह्यौ ॥ प्रसंग ॥ १ ॥

बहुरि एक समय गदाधरदासने सब वैष्णव महा प्रसादको बुलाए हुते पारि साक साजन कछू न हुतौ तब गदाधरदासने कही जो ऐसो कोउ वैष्णव है सो साक ले आवै तब तिनमें एक वैष्णव वेणीदासको भाई माधोदाससों बडौ विषयी हुतौ ताते

वेश्या घरमें राखी हुती तिनने कह्यो जौ में ले
 आऊंगो गदाधरदासने कह्यो जो भले लेआवो तब
 माधोदास गयो सो बथुआकी भाजी ले आयौ सो
 माधोदासनेनीकी भांतिसों दीनी रसोईमें पाछें रसोई
 सिद्धि भई तब श्राठाकुरजीको भोग समप्यो पाछें
 भोग सराय अनोसर करके वैष्णवनको महाप्रसाद
 लेन बैठाये परि वह भाजी अतिस्वाद भई तब गदा-
 धरदासने माधोदासको आशीर्वाद दियौ जो तू
 हरिभक्त दृढ होयगो पाछें गदाधरदासके आशी-
 र्वादते माधोदास भलो वैष्णव भयौ सो वे गदाधर-
 दास श्रीआचार्यजी महाप्रभूनके ऐसे कृपापात्र
 भगवदीय हुते ताते इनकी वार्ताको पार नहीं ताते
 इनकी वार्ता अब कहाँताई लिखियै ॥ प्रसंग ॥ २ ॥
 वैष्णव ॥ १३ ॥

अथ वेणीदास माधोदास दोऊ भाई तिनकी वार्ता।

सो बडेभाई वेणीदास छोटेभाई माधोदास सो
 माधोदास वही जो गदाधरदासके घर बथुवाकी
 भाजी लेआयौ हो सो माधोदास बडो विषयी हुतौ
 ताने घरमें वेश्या राखी हुती तातें सब वैष्णव माधो-

दासकी निन्दा करते सो बात श्रीआचार्यजी महा-
 प्रभूनने सुनी जो माधोदास बडौ विषयी भयौ है
 घरमें वेइया राखी है सो एक दिन श्रीआचार्यजी
 महाप्रभूनने माधोदाससों पूछौ जो क्यों रे माधोदास
 तेने घरमें वेइया राखी है तब माधोदासने श्रीआ-
 चार्यजी महाप्रभूनसों कह्यौ जो महाराज मेरो मन
 आसक्त भयो है तासों राखी है तब श्रीआचार्यजी
 महाप्रभू आप चुप कर रहै सो तीन बेर आपने
 माधोदाससों पूछौ तब तीनों बेर माधोदासने यौही
 कह्यौ जो महाराज मेरो मन वासों आसक्ति भयो
 है तासों राखी है तब वैष्णवनने श्रीआचार्यजी महा-
 प्रभूनसों कही जो महाराज अबलोंतौ आपकी
 कानिही परि अब तौ तुम्हारे आगे कह्यौ तासों तुमने
 तौ कछू नकही तब श्रीआचार्यजी महाप्रभूनने उन
 वैष्णवनसों कही जो वाकों मन वासों आसक्त भयौ
 है सो श्रीठाकुरजीकों फेरते कितनी बार लागेगी
 और गदाधरदासने वाकों आशीर्वाद दीयौ है जो
 तोकों दृढभक्ति होयगी सो यह माधोदास है तब
 कितेक दिन पाछे माधोदासकी बुद्धि श्रीठाकुरजीने
 फेरी तबतो वाने वेइया दूर कीनी पाछे श्रीआचा-
 र्यजी महाप्रभूनकी कृपाते माधोदास भलो वैष्णव
 भयौ ॥ प्रसंग ॥ १ ॥

बहुर कितेक दिन पाछें एक माला मौतीनकी बहुत सुन्दर बहुत मौलकी बिकवेकों आई सो देखके माधोदासने बडे भाई वेणीदाससों कह्यौ जो यह माला श्रीठाकुरजीके कंठ लायक है तब बडेभाई वेणीदासने कही जो यह मालाकी कहा है हमारे पास जो है सो सब श्रीनवनीतप्रियाजीकी है ऐसे कहिकें बात टार दीनी तब माधोदासने कही जो अपने घरमें है सो सब ठाकुरजीको है तौ माला क्यों न लेउ तब बडेभाई वेणीदासने कही जो हम गृहस्थ है हमको विवाहकाज सब करना है ऐसे क्योंबने तब छोटेभाई माधोदासने कही जो हूंतौ न्यारो होउंगो सो न्यारो भयो द्रव्य सब बांट लीनों सो द्रव्यकी वस्तु लेके दक्षिण गयो तब वस्तु सब बेची तब व्यवहार करके द्रव्य बहुत उपज्यौ तब एक माला मौतीनकी पहिले मौलसे उतमोत्तम लीनी सोमाला लैके घरकों चले सो आवत बाटमें एक बडी नदी आई तब नावमें बैठे तब नवनीतप्रियाजी लाल छडी हाथमें लेकर आये और कह्यौ जो नाव डुबाऊं तब माधोदासने कह्यौ जो निजेछातः करि प्यति तब श्रीठाकुरजीने कही जो तू क्यों गयो हौ तब माधोदासने कही जो महाराज मैं माला लेन गयो हौ तब श्रीनवनीतप्रियाजीने कही जो हमारे

क्या माला नहुती हमारे माला बहुतेरी हैं तब माधो-
 दासने कहाँ जो तुम्हारे माला बहुतेरी हैं पारि सेव-
 ककोंतौ उपाय करनौ तब नाव डूबतेते रही जितने
 मनुष्य नावमें बैठे हुते ते सब हलकल करन लागे
 और माधोदासको मन प्रसन्न हुतौ तब सबनके
 मनमें आई जो ए बडे महापुरुष हैं पाछें माधोदास
 उहांते घर आये तब श्रीआचार्यजी महाप्रभूनको
 दंडवत कीनी और हाथमें माला दीनी तब श्रीआ-
 चार्यजी महाप्रभूनने कही जो नाव डूबते ते कैसे
 रही तब माधोदासने सब समाचार कहे तब और
 वैष्णव पास बैठे हुते तिनने श्रीआचार्यजी महाप्र-
 भूनसों कही जो वही माधोदास है जो श्रीमहाप्र-
 भूनकी कृपाते श्रीठाकुरजीने माधोदासको मन
 फेरयो और भगवद्भाव उत्पन्न भयो अन्याऊपर
 आसक्तिता हुतौ सो श्रीठाकुरजीके ऊपर भई सो
 माधोदास ऐसे भगवदीय हैं ताते इन वेणीदास
 माधोदासकी वार्ताको पार नहीं सो इनकी वार्ता
 कहांताई लिखिये ॥ प्रसंग ॥ २ ॥ वैष्णव ॥ १४ ॥

अथ हरि वंशपाठकसारस्वत ब्राह्मण

बनारसमें रहते तिनकी वार्ता।

सो वे हरिवंशपाठक पटनामें गये हैं सो वहांके

हाकिम सों बहुत मिलाप हुतो सो वह हाकिम अपने मनमें कहै जो ए मेरे पास कछू माँगै तो मैं इनको देउं पारि कछू माँगै नहीं यो करत डोल उत्सवके दिन द्वै रहै तब अपने सेव्य ठाकुरजी हुते तिनने स्वप्नमें जताइ जो तू मोकों डोल न झुलावैगो तब हरिवंशपाठकनें मनमें विचार्यौ जो अब कहा करुंतब हरिवंशपाठकहाकिम पास गयेसो जायकें कही जो आपके पास कछू मांगन आयौ हूं सो मोकों दीयौ चाहिये तब राजाने कही जो कहा चाहिये तब हरिवंशपाठकने कह्यौ जो मोको दिन द्वैमें बनारस पहुंचनो है तब हाकिमने कह्यौ जो भलो तब हाकिमन घोडा और मनुष्य साथ दीये पंडेमें डाक चोकी बनाई ऐसे करत अपने घर आयै पाछे आप मन्दिरमें आयकें डोल सिद्धि कीयो डोलकी सामग्री सब सिद्धि करकें पाछे ठाकुरजीको डोलमें बैठाये बहुत सुख भयौ सो थोरे दिन पाछे फिर पटना गय तब हाकिमनें कह्यौ जो तुमको ऐसी कहा जलदी हुती तब हरिवंशपाठकने कही जो कछू काम हुतो पारि मनका बात कछू न कही सो वे हरिवंशपाठक श्रीआचार्यजी महाप्रभूनके

ऐसे कृपापात्र भगवदीय हैं ताते इनकी वार्ता अनि-
र्वचनीय है सो कहाँताईं लिखिये॥ प्रसंग १॥ वै० १५॥

अथ गोविन्ददासभल्ला ताकी वार्ता ।

सो गोविन्ददास भल्लाकी गांठिमें द्रव्य बहुत हुतो
सो श्रीआचार्यजी महाप्रभूनके सेवक भये तब
गोविन्ददासने श्रीआचार्यजी महाप्रभूनसों पूछौ जो
महाराज मेरी गांठिमें द्रव्य है सो में कहा करूं तब
श्रीआचार्यजी महाप्रभूनने कह्यौ जो श्रीठाकुरजीकी
सेवा करि तब गोविन्ददासने कह्यौ जो महाराज
सेवा कैसे करूं स्त्री अनुकूल नाहीं तब श्रीआचा-
र्यजी महाप्रभूनने कह्यौ जो तू स्त्रीको त्याग करि तब
गोविन्ददासने स्त्रीको त्याग कीयौ पाछें कही जो
महाराज द्रव्यको कहा करूं तब श्रीआचार्यजी म-
हाप्रभूनने कह्यौ जो अब द्रव्यको चार विभाग करि
तब गोविन्ददासने द्रव्यके चार बाट कीये तब फेरि
कह्यौ जो महाराज कहा आज्ञा है तब श्रीआचा-
र्यजी महाप्रभूनने कह्यौ जो १ विभाग तो श्रीनाथ-
जीको समर्पि और एक विभाग अपनी स्त्रीको दै
और १ विभाग सेवाकेलिये तू राखि तब गोविन्ददा-
सने कही जो महाराज कछू आप अंगीकार करिये
तब श्रीआचार्यजी महाप्रभूनने कह्यौ जो भल्लौ एक

विभाग हमें दें तब सब विभाग जहाँके तहाँ देंकै
 अपने बाटको द्रव्य लेंकै आपु महाबन आय रहै
 सो महाप्रसाद वैष्णवनको लिवावते वैष्णव न मि-
 लेतो गायनको खवावते तामेंते आप रंचकहू न लेते
 आप न्यारी लीटी करि भोग समर्पिके लेते ऐसी
 भांतिसों सेवा करते सो सब द्रव्य निबट्यौ तब श्री-
 गोवर्द्धननाथजीकी सेवामें आय रह तब श्रीगोवर्द्ध-
 ननाथजीकी परिचारगी करते रसोईकी टहल सब
 करते दोऊवारके पात्र मांजते और रात्रिडेठ तथा
 सवापहर पाछली रहती तब उठते सो गागरि त-
 हांते लेके चलते सो मथुरामें विश्रांत घाटपै स्नान
 करिकें श्रीयमुनाजलकी गागरि भरिकें चलते सो
 राजभोग पहिले आय पहुंचते बहूरा पात्र मांजि
 रसोई पोति अपनी सब सेवासों पहुंचकें नीचे आ-
 वते पाछि तिलक पौछि माला उतार गांठि बांधकें
 आसपासके गामनते कौरी भिक्षा मांगि लावते सो
 सेर चार पांचको आहार करते सो आहार मा-
 फिक जुरतौ तब आवते तब आप पीस रोटी करि
 श्रीनाथजीकी ध्वजाके सन्मुख दिखाय तामें चरणो-
 दक मिलाय प्रसाद लेते ऐसे निर्वाह करते तब ऐसी
 भांति करत बहुत दिन बीते परि यह बात श्रीनाथ-

जीको न भावे तब श्रीनाथजीने श्रीआचार्यजी महा-
 प्रभूनसों कही जो तुम्हारो एक सेवक मोकों बहुत
 दुःख देत है तब श्रीआचार्यजी महाप्रभू अडेलते
 चले सो आगरेमें आएतब तहांके वैष्णवसों श्रीआ-
 चार्यजी महाप्रभूनने पूछी जो श्रीठाकुरजी किन-
 रुठाए हैं तब उन वैष्णवनने कही जो महाराज हमतौ
 कछू जानत नाहीं तब वहांते श्रीआचार्यजी महा-
 प्रभू मथुरा पधारे तब मथुराके वैष्णवनसों श्रीआ-
 चार्यजी महाप्रभूनने पूछौ जो श्रीठाकुरजी किन रु-
 ठाए हैं तब वहांके वैष्णवनने कह्यौ जो महाराज हम
 तौ कछू समझत नाहीं तब श्रीआचार्यजी महाप्रभू
 उहांते श्रीजीद्वार पधारे तब श्रीनाथजीके दोऊ क-
 पोल हाथनसों छुईके कह्यौ जो बाबा अनमने कैसेहौ
 तब कही जो तुम्हारो सेवक मोकों बहुत खिजावत
 है तब श्रीआचार्यजी महाप्रभूनने सब सेवकनसों
 पूछौ जो तुम कहा कहा सेवा करतहो आर कहा
 प्रसाद लेतहो तब सबनने अपनी २ सेवा कही और
 प्रसाद लेवेको प्रकार कह्यौ पाछें गोविंददाससों
 पूछौ जो तू कहा सेवा करतह तब जो सेवा करत
 हुतो सो सब कही और प्रसाद लेवेको प्रकार कह्यौ
 सो सब श्रीआचार्यजी महाप्रभूनने सुनी तब अपने

मनमें जानी जो इन रुठाये हैं तब श्रीआचार्यजी महाप्रभूनने गोविंददास भल्लासों कही जो तुम श्रीठाकुरजीकी रसोईमें प्रसाद लेउ तब गोविंददासने कह्यौ देव ऐसे कैसे लेउ तब श्रीआचार्यजी महाप्रभूनने कह्यौ जो तू हमारी रसोईमें प्रसादले तब गोविंददासने कह्यौ गुरु ऐसे कैसे लेउ तब श्रीआचार्यजी महाप्रभूनने कह्यौ जो तू सेवा मति-करै तब गोविंददासक्षत्री अहंकारसों सेवा छोड़िके मथुरा गए सो केसोरायजीकी सेवाको इजारा पठानके पासते लीयौ तब सेवा करन लाग्यौ सो एक बार श्रीकेसोरायजीकी सिज्या निवारते बनाइ सो सिज्या बहुत अद्भुत भई तब श्रीकेसोरायजी वा सिज्याके ऊपर पोढ़न लागै तब तैसीही निवार वा गामके हाकिमनें बनवाई परि वह निवार वैसी न भई तब वा कारीगरनें कही जो वह निवार तौ श्रीठाकुरजीकी है तब हाकिमनें कही जो वह निवार में दैखूंगो पाछे हाकिम श्रीठाकुरजीके दिवालेमें जायके सिज्या उपर चढ़ि बैठ्यौ सो गोविंददासनें सुनी तब गोविंददासने आयके गुप्ती-लेकै हाकिमको गारीदीनी जो तू कौन है जो हमारे श्रीठाकुरजीकी सिज्या उपर बैठ्यौहै ऐसे वा

हाकिमको ठौर मारचौ तब हाकिमके मनुष्यनने गोविंददासको ठौर मारचौ सो यह बात श्रीआचार्यजी महाप्रभूनके आगै काहू वैष्णवने जाय कही और कहौ जो ऐसी गति वैष्णवकों क्यों बूझिये तब श्रीआचार्यजी महाप्रभूनने कहौ जो याके परलोकमें तौ कछू हानि नाहीं परि इनने मेरी आज्ञा न मानी तासों याकी देह या भांतिसों छूटी है यह गोविंददास पहिले जन्ममें श्रीनंदरायजीको भैंसा हुतौ याने माटी पानी बहुत ढोयो सो वे गोविंददास भल्ला श्रीआचार्यजी महाप्रभूनके ऐसे कृपापात्र भगवदीय हैं ताते इनकी वार्ताको पार नाहीं सो कहांताई लिखिये ॥ प्र० ॥ १ ॥ वै० ॥ १६ ॥

अथ अम्माक्षत्राणी जो कडामें रहती तिनकी वार्ता ।

सो अम्माके दोय बेटा हुते सो दोऊ परम वैष्णव हुते आप वैष्णव हुती और वाके लरिका वासों अम्मा कहते और श्रीठाकुरजीकी सेवा नीकीभांतिसों करती सो वाके सेव्य श्रीठाकुरजी श्रीबालकृष्णजी वासों अम्मा कहते सो कितेक दिनपाछें एकबेटा वाको मरगयो तब श्रीठाकुरजीकी रसोई

करि श्रीठाकुरजीको भोग समप्यो समयानुसार भोग सराय पाछें रोवन लागी तब अम्माको रोवत देखिकें श्रीठाकुरजी खेद पावन लगे श्रीठाकुरजी कहै अम्मा तू रोवे मति परि वह रोवतते रहै नाहीं ऐसे करत वाको दूसरोहू बेटा मरगयो तबतो बहुत रोवन लागी तब श्रीठाकुरजी वाको रोवतेसों राखे और कहै अम्मा तू मतिरोवे तब अम्मा रोवतते रहै नाहीं तब श्रीठाकुरजीने श्रीगुसांईजीसों कह्यो जो अम्मा रोवति है सो में बहुत खेद पावतहों तब श्रीगुसांईजी अम्माके घर पधारे और कह्यो जो अम्मा तू मतिरोवे श्रीठाकुरजी खेदपावत हैं तब रोवतते रही और अम्मा सेवाको सबसाज करिकें पाछें स्नान करिकें पाछें मंदिरमें जायकें दोऊ हाथ-नसों सोधों लगायकें श्रीठाकुरजीके लगावै या भांतिसों सेवा आछी तरह करती ॥ प्रसंग ॥ १ ॥

बहुर एक दिन दूधको कटोरा श्रीठाकुरजीके आगे भरिराख्योहुतो ता समय श्रीगुसांईजी अम्माके घर पधारे मंदिरको टेरा सरकायके दर्शन करनलागै तब श्रीगुसांईजी देखेंतो ठाकुरजी दूध पीते हैं तब श्रीगुसांईजी देखिकें पाछें फिर आये तब अम्माने कही जो बाबा पाछें क्यों फिर आये

तब श्रीगुसांईजीने कह्यौ जो श्रीठाकुरजी दूध पीव-
तहैं तब अम्माने कही जो श्रीठाकुरजी तो लरिका
हैं तुमकहा जानत नाहीं तब श्रीगुसांईजी दशन
करिकें पाछें फिरे और अम्मासों श्रीगुसांईजीने
कह्यौ जो यह दूध हमारे घर पठाय दीजियो तब
अम्माने कह्यौ जो राज आपही तो आरोगनवारे
भावैतौ इहां आरोगौ भावै उहां आरोगौ पाछें
श्रीगुसांईजी आपतौ घर पधारे तब अम्मानें वह
दूध श्रीगुसांईजीके घर पठाय दीयौ सो अम्मासों
श्रीठाकुरजी ऐसे सानुभाव हुते प्रत्यक्ष वारता
करते जो वस्तु चाहिये सो मांगिलेते सो अम्मा
श्रीआचार्यजी महाप्रभूनकी ऐसी कृपापात्र भगव-
दीय ही ताते इनकी वार्ताकौ पार नाहीं सो अब
कहांताई लिखिये ॥ प्रसंग ॥ २ ॥ वैष्णव ॥ १७ ॥

अथ गज्जनधावनक्षत्रीआगरेके वासीतिनकी वार्ता ।

सो गज्जन धावन श्रीनवनीतप्रियाजीकी सेवा
नीकी भांतिसों करते श्रीठाकुरजी सानुभाव हुते
गज्जनके साथ श्रीनवनीत प्रियाजी खेलते गज्जनको
कबहूँ गाय करते कबहूँ बक्षरा करते तब गायको

मुख अपने पीताम्बरसों पोंछते तब वक्षरा करते तब पकर राखते चलन न देते और जब घोरा करते तब पीठ उपर असवारी करते जब हाथी करते तब ग्रीवा ऊपर असवारी करते ऐसे करत गज्जनके घुट रुधिस गये ऐसी कृपा नवनीतप्रियाजी गज्जन धावनके ऊपर ऐसी करते भोगसामग्री जो चाहिये सो मांगलेते ऐसी कितनीक वार्ता है सो कहां ताई लिखियै और एकदिन श्रीनवनीतप्रियाजीने गज्जन धावनसों कही जो मोकों श्रीगुसाईंजी श्रीआचार्यजी महाप्रभूनके घर पधराय तासमय श्रीआचार्यजी महाप्रभू गोकुलमें हुते तहां गज्जन आयके श्रीआचार्यजी महाप्रभूनसों कह्यौ जो महाराज श्रीनवनीतप्रियाजीकी ऐसी आज्ञा भई है जो मोकूं श्रीआचार्यजी महाप्रभूनके पास पधराय तब श्रीआचार्यजी महाप्रभूनने कही जो भलो पधराय तब गज्जनधावनने श्रीनवनीतप्रियाजी श्रीआचार्यजी महाप्रभूनके मंदिरमें पधराये तब श्रीआचार्यजी महाप्रभूनने जैसौ प्रस्ताव बन्यौ तैसे पधराय भोग समर्प्यौ पाछें रात्रिको आप बहुत सोधों लगायके श्रीनवनीतप्रियाजीको अपनी सिज्या ऊपर लै पोढ़े दूसरे दिन नई सिज्या करवाई ता ऊ-

पर पोढ़े पारि बह सिज्या छोटी भई तब श्रीनवनीत-
 प्रियाजीने कह्यौ जो हूंतौ या सिज्या ऊपर न पोढ़ंगो
 तब श्रीआचार्यजी महाप्रभूनने कही जो ऐसे कैसे
 बने तब श्रीनवनीतप्रियाजीने कह्यौ जो कछू बाधक
 नाहीं है तब श्रीआचार्यजी महाप्रभूनने आप सोंधों
 लगायके पासही ले पोढ़े पाछें दूसरे दिन सिज्या
 बडी करवाई तापर पोढ़ाए तब पोढ़े तापाछें थोड़ेसे
 दिन रहिकें श्रीआचार्यजी महाप्रभू श्रीगोकुलते
 अडेलकों पधारे तब गज्जनहू साथ गयौ गज्जनधा-
 वनबिना श्रीनवनीतप्रियाजी एक क्षणहू न रहते ऐसे
 ही नवनीतप्रिया बिना गज्जन एक क्षण न रहते तब
 एक दिन श्रीनवनीतप्रियाजीके लिये श्रीअक्काजीने
 गज्जनधावनको पान लेने पठायौ कह्यौ जो पान ले
 आवो तब गज्जन ऐसेतौ कहि न सकयो जो श्रीनव-
 नीतप्रियाजी मोसों हिले हैं सो में कैसें जाऊं ताते
 अनबोल्ह्यौ पान लेनको उठि चल्ह्यौ सो थोरीसी
 दूरगयौ इतनेमें ज्वर चढिआयौ सो उहांहीं पडि
 रह्यौ और इहां श्रीअक्काजीने श्रीनवनीतप्रियाको
 भोग समर्प्यौ तब अक्काजीसों नवनीतप्रियाजीने
 कह्यौ जो गज्जनको बुलावो मेरो गज्जन आवैगो तब
 भोजन करुंगो तब श्रीअक्काजीने मनुष्य दोय

बुलावनको पठाये तब वे मनुष्य देखें तौ गज्जन थोरीसी दूरपै परचौ है ज्वर चढि रह्यो है मनुष्य तहांते बुलाय लाये तब गज्जन आप स्नान करि मंदिरमें गयौ तब तत्काल ज्वर उतर गयौ तब गज्जनने श्रीनवनीतप्रियासों कह्यौ जो बाबा भोजन क्यों नाहीं करत अब भोजन करौ तब भोजन श्रीनवनीतप्रियाजीने कीयौ गज्जनधावनसों श्रीनवनीतप्रियाजी ऐसे सानुभाव हुते श्रीनवनीतप्रियाजीते एक क्षण न्यारौ भयौ जो तत्काल ज्वर चढि आयौ और जब निकट आयौ तब तत्काल ज्वर उतर गयौ ताते गज्जनधावन श्रीनवनीतप्रियाजीके सदा पास रहते सो वे गज्जनधावन श्रीआचार्यजी महा प्रभूनके ऐसे कृपापात्र भगवदीय हैं ताते इनकी वर्तिका पार नाहीं सो कहांताई लिखिये प्रसंग ॥ १ ॥ वैष्णव ॥ १८ ॥

**अथ नारायणदास ब्रह्मचारी सारस्वत-
ब्राह्मण महावनमें रहते तिनकी वार्ता।**

सो नारायणदासके सेव्य श्रीठाकुरजी श्रीगोकुल चन्द्रमाजी सो नारायणदास श्रीगोकुल चन्द्रमाजीकी नीकीभांतिसों सेवा करते और गायनकों

घास खवावते सो धोय पौछिकें खवावते ताको ता-
 त्पय यह जो श्रीठाकुरजी दूध अरोगत हैं जो मति
 दूधमें रज आवै ऐसे करते और श्रीआचार्यजी महा-
 प्रभू जब श्रीगोकुल पधारते तब नित्य प्रातःकाल
 श्रीगोकुलमें महावन पधारते श्रीगोकुल चन्द्रमा-
 जीकी सेवा करिवेको सो सेवा करि भोग सम पिंके
 पाछे श्रीगोकुल पधारते और नारायणदास जहां
 हाथपांव धोवेको बरहेमें जाते जा ठोरते मांटी खो-
 दते ता ठौर द्रव्य निकसतौ ताऊ पर माटी डारि
 उठि आवते परि द्रव्यको स्पर्श न करते सो नारा-
 यण ऐसे त्यागी हुते सो नारायण दास एकदिन
 सोवत हुतौ तहां खाटके आसपास द्रव्यके ढेर भये
 हुते तब नारायणदास देखे तौ खाटके आसपास
 द्रव्यके ढेर भये हैं तब नारायणदासनें भतीजीसों
 कही जो बेटी बेगि उठि घरमें बिगार बहुत भयौ
 है बुहारिकें कूरौ सब बाहर डारि आउ तब नाराय-
 णदास तौ बरहेमें देह कृतको गये पाछे भतीजीने
 सोई कीयौ सब बुहारके कूडेकी नाई सब बुहार
 दीनौ जगै सब लीपडारी पाछे नारायणदास स्नान-
 करि मन्दिरमें गयै तब सेवा सिंगार सब करिकें
 श्रीठाकुरजीके साम्हे देखे सो श्रीठाकुरजीनें नारा-

यणदासको अति सुन्दर दर्शन दीनों तब अति-प्रसन्न श्रीठाकुरजीको देखके नारायणदासने कहाँ जो महाराज यह घटा काहेको उनहीहै न जाने कहाँ वरसेगी पाछें आपही कहाँ जो यह घटा श्रीआचार्यजी महाप्रभूनको सरवस्व है वहाँ वरसेगी पाछें नारायणदास श्रीगोकुल चन्द्रमाजीको राजभोग समर्पिके बाहर आय बैठे तब हृदौ भरि आयौ जो श्रीठाकुरजी कौन भांतिसों आरोग्य हैं ऐसी विचार मनमें लाए तब भतीजीने कही जो श्रीआचार्यजी महाप्रभूनके सेवक जहाँ भोग समर्पित हैं सो श्रीआचार्यजी महाप्रभूनकी कानिते अरोग्य है सो तुमतौ श्रीआचार्यजी महाप्रभूनके सेवक परम कृपापात्र भगवदीय हों ताते तुम्हारो समर्थ्यो क्यों न आरोग्येंगे तुम सन्देह क्यों करत हो तब नारायणदासने कहाँ जो बेटी आरोग्यें जब जानियै तब कोई वैष्णव अपने घर आय अचानक महाप्रसाद लेय तब जानियै जो श्रीठाकुरजी अरोग्यें होयगे वैष्णव ऊपर नारायण दासको ऐसी भाव डुतौ ॥ प्रसंग ॥ १ ॥

बहुरि एकदिन नारायणदास श्रीगोकुल चन्द्रमाजीको शृंगार करि रसोईमें गये तहाँ शृंगार

भोगको सिद्ध करके सरायवेकों थार धरचौ इतनेमें एक वैष्णवने नारायणदासके पास आयके बधाई दीनी जो श्रीआचार्यजी महाप्रभू गोकुलते पधारत हैं सो नारायणदास सुनतही ताती खीरको डवरामें मेलि श्रीठाकुरजीको भोग समर्पि उतावले श्रीआचार्यजी महाप्रभूनके दर्शनको आये तब आयके श्रीआचार्यजी महाप्रभूनके दर्शन करके दंडवत कीनी सो श्रीआचार्यजी महाप्रभूनके चरणारविन्द ऊपर माथो मेलि रहै तब नारायणदासको माथो पकरि आप श्रीहस्तसों उठायो और पूछो जो श्रीगोकुल चन्द्रमाजीके यहां कहा समय है तब नारायणदासने कही जो महाराज अबही सिंगारभोग समर्पिके आयौ हूं सो सुनिके श्रीआचार्यजी महाप्रभू तत्काल पधारे तब जातही स्नान करिके मन्दिरमें हाथ धोय आचमनकी झारी हाथमें लेके भोग सरायवेको मन्दिरमें पधारे तब भीतर जायके देखेतो श्रीगोकुलचन्द्रमाजीके श्रीहस्त खीरमें भरे हैं और श्रीहस्तकमल खेंचिरहे हैं तब श्रीआचार्यजी महाप्रभूनने श्रीगोकुलचन्द्रमाजीसों कही जो महाराज श्रीहस्तको क्यों खेंचि रहेहौ तब श्रीगोकुलचन्द्रमाजीने कही जो तुमको आये

जानिके मोकों नारायणदास तांती खीर समर्पिकें
तुमारे पास गयो सो खीर मेरे हातसो तांती लागी
सो मेने थोरीसी चाटकेँ हाथ झटके सो सब मन्दि-
रमें छींट लागी हैं और मेरे हाथ और ओष्ठ राते
भये हैं सो श्रीगोकुलचंद्रमाजीके हाथ और ओष्ठ
अजहूं लाल हैं पाछे श्रीआचार्यजी महाप्रभूननें
खीर पंखासों सीरीकरि भोग समर्पिके बाहर आये
तब नारायणदाससों खीजे और कह्यौ जो तेने
श्रीठाकुरजीको तांती खीर समर्पि तब नारायणदा-
सनें श्रीआचार्यजी महाप्रभूनसों बीनती कीनी जो
में राजको पधारे जानि उतावलो राजपास आयौ
तब श्रीआचार्यजी महाप्रभूननें कही जो आज
पाछें ऐसौ काम मति करियौ पाछें समय भयौ तब
श्रीआचार्यजी महाप्रभूनने भोग सरायौ तब श्रीगो-
कुलचंद्रमाजीने श्रीआचार्यजी महाप्रभूनके दोऊ
श्रीहस्त पकरिकेँ कह्यौ जो तुम खीर महाप्रसाद
लेउ तब श्रीआचार्यजी महाप्रभूननें कह्यौ जो महा
राज जातिव्यवहार की कठिन है तब श्रीगोकुलचंद्र-
माजीने कह्यौ जो यह मेरी आज्ञा है ताँतै तुम
कछू विचार मति करौ खीरको महाप्रसाद लेउ
तब श्रीगोकुलचन्द्रमाजीने खीरको महाप्रसाद हो

सो अपने आगेंही श्रीआचार्यजी महाप्रभूनको लिवायौ तब श्रीआचार्यजी महाप्रभूनने लीनो तादिनते अनसखडीमें होत हैं नारायणदाससों श्रीगोकुलचंद्रमाजी ऐसी भांति सेवा करवावते वे नारायणदास ऐसे भगवदीय हैं तातें श्रीगोकुलचंद्रमाजी ऐसी कृपा करते ॥ प्रसंग ॥ २ ॥

बहुरि कितनेकदिन पाछें नारायणदासकी देह थकी सो बहुत आशक्ति भइ तब एकदिन श्रीगोकुलचन्द्रमाजीने नारायणदाससों कह्यौ जो नारायणदास तू कछू मांगि तब नारायणदासने कही जो महाराज हूं यह मांगत हूं जो तुम श्रीगुसांईजीके घर पधार सेवा करवावौ नारायणदासके मनमें यह जो श्रीठाकुरजी और कहूं सुख न मानेगे सेवा आछी भांति सों न होयगी सो नारायणदासने अंतसमें श्रीठाकुरजीके पास यह मांग्यौ पाछें कितनेक दिनमें नारायणदासकी देह छूटी तब श्रीगोकुलचंद्रमाजीने कितेक दिनताई कृष्णदासस्वामिके पास सेवा करवाई पाछें श्रीगुसांईजीके घर मथुरामें पधारे सो श्रीगुसांईजीने श्रीरघुनाथजीके माथे पधराय दीयै सो वे नारायणदास ब्रह्मचारी श्रीआचार्यजी महाप्रभूनके ऐसे कृपापात्र भगवदीय हैं तातें इनकी

वाता कहांताई लिखिये प्रसंग ॥ ३ ॥ वैष्णव ॥ १९ ॥

अथ एक क्षत्राणी महावनमें रहती तिनकी वार्ता ।

सो एक समय श्रीआचार्यजी महाप्रभू पृथ्वीप-
रिक्रमा करत २ महावन पधारे सो वा क्षत्राणीकों
चारों स्वरूप प्राप्त भए हैं सो चारों स्वरूप श्रीआ-
चार्यजी महाप्रभूनके आगैं अनिराखैं सो तिन
चारों स्वरूपनके नाम एक तौ श्रीनवनीतप्रियाजी
और एक श्रीगोकुलचंद्रमाजी और एक श्रीललि-
तत्रिभंगीजी और एक श्रीलाडलेजी ये चारों स्व-
रूप श्रीआचार्यजी महाप्रभूनने चार वैष्णवनके
माथे पधराय दीए सो या भांति श्रीगोकुलचंद्रमा-
जीतो नारायणदास ब्रह्मचारीके माथ पधराये और
श्रीलाडलेजी जीयदासक्षत्रीके माथ पधरायै और
श्रीललितत्रिभंगीजी देवा क्षत्रीके माथे पधरायै और
श्रीनवनीतप्रियाजी गज्जनधावनके माथे पधरायै या
भांति चारों स्वरूप चार वैष्णवनके माथे पधराय
दीयै तब चारों वैष्णवनसों श्रीआचार्यजी महाप्र-
भूनने कहा जो यह मेरे सर्वस्व है सो स्वरूप तुम्हारे
माथे पधरायै हैं सो इनकी सेवा नीकी भांतिसों

करियौं और तुमसो जब सेवा न होय आवै तब हमारे घर पधराय जैयौ पाछें नवनीतप्रियाजीनेतो कछूकदिन गज्जनधावनके माथे सेवा करवाई पाछें श्रीआचार्यजी महाप्रभूनके घर पधरायै सो सबतो गज्जनधावनकी वार्तामें लिख्यो है और श्रीगोकुलचंद्रमाजीने कितेक दिनताई नारायणदास ब्रह्मचारीके माथे सेवा करवाई पाछे कृष्णदासस्वामीके पास सेवा करवाई पाछे श्रीगुसाईंजीके घर पधारे पाछे श्रीगुसाईंजीने श्रीरघुनाथदासजीके माथे पधरायै सो प्रकार नारायणदास ब्रह्मचारीकी वार्तामें लिख्यो है और श्रीलाडलेजीको प्रकार सब जीयदासजीकी वार्तामें लिख्यो है सो अब श्रीआचार्यजीके कुलमें विराजत हैं सो ललित त्रिभंगीजी अंतर्ध्यान भए सो प्रकार देवाक्षत्री कपूरकी वार्तामें लिख्यो है सो वह क्षत्राणी श्रीआचार्यजी महाप्रभूनकी ऐसी कृपापात्र भगवदीय ही ताकी वार्ता कहांताई लिखिये ॥ प्रसंग ॥ १ ॥ वैष्णव ॥ २० ॥

जीयदासक्षत्री सूरतिनकी वार्ता ।

सो जीयदासके माथे श्रीआचार्यजी महाप्रभूने श्रीलाडिलेजीकी सेवा दीनी सो जीयदासके

पास श्रीलाडिलेजीने चार पहर सेवा करवाई सो-
 जीयदासके चार बेटा हुते तिनमें पुरुषोत्तमदाँस
 छबीलदास इन दोऊ भाईनने कोई एक दिन सेवा
 कीनी पाछें दोऊ भाईनके संतति न भई तब इनके
 पाछें इनके मामा कृष्णदास चौपडा हुते तिनके
 मांथे श्रीलाडलेजी पधारे सो कितेक दिनताई कृष्ण-
 दास चौपाडोंसो सेवा करवाई सो भली भांतिसों
 सेवा कीनी सो एकसमय महामारी आई सो कृष्ण-
 दासके घरके सब कुटुम्बकी देह छूटी तब कृष्णदास
 अकेले रहै तब कृष्णदासके मित्र हरजी तथा मथु-
 रामल्ल क्षत्री हुते सो कृष्णदास तहां आय रहै सो
 कितेक दिनताई कृष्णदास और हरजी दोऊ मिलकें
 सेवा कीनी पाछें कृष्णदासकी देह छूटी तब हरजी
 भाईनें डेढ़ वर्षलों सेवा कीनी पाछें श्रीगुसाईंजीके
 घर पधारे सो श्रीलाडलेजी अब विराजत हैं सो वे
 जीयदास श्रीआचार्यजी महाप्रभूनके ऐसे परम
 कृपापात्र भगवदीय हैं सो इनकी वार्ताको पार
 नहीं सो कहांताई लिखियै ॥ प्रसंग ॥ १ ॥ वै० २१ ॥

अथ देवाक्षत्रांकपूर तिनकी वार्ता ॥

सो देवाकपूरके माथे श्रीआचार्यजी महाप्रभूनने
 श्रीललित त्रिभंगीजीकी सेवा पधराय दीनी सो

देवाकपूरकी जबलों देह रही तबलों सेवा कीनी
 तापाछें देवाकपूरकी स्त्रीकी देह छूटी ताको संस्का-
 रकर आये तापाछ मन्दिर उधारके देखेंतौ श्रीठा-
 कुरजी नहीं और सामग्री सब धरी है एक श्रीठा-
 कुरजी नहीं हैं सो जाने कहां अन्तरध्यान भए
 यातें यौ जानी परी जो देवाकपूरके चार बेटा हुते
 पर उनके पास सेवा न करवाई श्रीठाकुरजीतौ
 स्नेहके वश हैं सो भगवदिच्छा ऐसी ही भई ताते
 देवाकपूर तथा देवाकपूरकीस्त्री श्रीआचार्यजी महा-
 प्रभूनकी ऐसे कृपापात्र भगवदीय हैं ताते इनकी
 वार्ता कहांताई लिखियै ॥ प्रसंग ॥ १ ॥ वैष्णव २२ ॥

अथ दिनकरदाससेठ तिनकी वार्ता ।

सो दिनकरदासकों कथाके ऊपर बहुत रुचि
 हुती सो श्रीआचार्यजी महाप्रभू आप अडेलमें
 कथा कहते तहां दिनकरदास नित्य सुनते सो एक
 दिन दिनकरदास रसोई करत हुते सो आटचौ
 सान्यौ हुतो ऊपरा बराय दीने है लीटी करि राखी
 हुती इतनेमें श्रीआचार्यजी महाप्रभूनके सेवक
 जलधारिया जो श्रीठाकुरजीको जल भरिवेकों आयौ
 तब दिनकरदासने पूछौ जो श्रीआचार्यजी महा-
 प्रभू कहा करत हैं तब वा जलधारियानें कह्यौ जो

पोथी खोली है अब कथा कहेंगे तब दिनकरदासने काचीही अंगाकरी लीनी सेकी नाही बेगि उठि वस्त्र पहरकें आयौ आयकें कथा सुनी श्रीआचार्यजी महाप्रभू कथा कह रहे हैं तब वा जलधारियाने श्रीआचार्यजी महाप्रभूनसों कह्यौ जो महाराज दिनकरदासने काची अंगा करी लीनी सेकीहुं नाही तब दिनकरदाससों श्रीआचार्यजी महाप्रभूनने कही जो तू काची अंगा करी क्यों खाय आयौ है तब दिनकरदासने कही जो महाराज अंगा करी तौ नित्य लेउंगौ पारि यह अमृतकथा कब सुनूंगो तब श्रीआचार्यजी महाप्रभूनने कह्यौ जो अबते तू रसोई करि श्रीठाकुरजीको भोग समर्पि प्रसाद लेय पहुँचके जब आवैगो तब पोथी खोलूंगो तेरे आए विना कथा न कहेंगे आजते हमारी कथाको श्रोता तू तातें तू निश्चिंत होयकें आइयौ तब तादिनते दिनकरदास बेगिही रसोई करि भोग समर्पि प्रसाद लेके जब कथाके समय आवते तब श्रीआचार्यजी महाप्रभू पोथी खोलते सो वे दिनकरदास सेठ श्रीआचार्यजी महाप्रभूनके ऐसे कृपापात्र भगवदीय है सो इनकी वार्ताको पार नाही ताते अब कहाँताई लिखिये ॥ प्रसंग ॥ १ ॥ वैष्णव ॥ २३ ॥

अथ मुकन्ददास कायस्थ तिनकी वार्ता।

सो मुकन्ददास आप कबि हुते सो कबित्त करते सो कबित्त बहुत कीये हैं श्रीआचार्यजी महाप्रभू-नके तथा श्रीगुसाईजीके तथा श्रीठाकुरजीके बहुत कबित्त कीये है और मुकन्दसागर एक ग्रन्थ कीयो सो एक समय मुकन्ददास उज्जैनके कारकुन होयके आए तब तहांके पंडित सब आयमिले तब पंडितनने मुकन्ददाससों कह्यो जो तुम हमारे पास श्रीभागवत सुनोंतो सुनावें तब मुकन्ददासने कह्यो जो तुम हमारौ भागवत जानत हो तब उन पंडितनने कह्यो तुमारौ कहा भागवत न्यारौ है तब मुकन्ददासने एक श्लोककौ व्याख्यान कीयो पाछे महीनालौ सुनायो परि आपकाहू पास कथा न सुनी कोई पंडित कदाचित व्याख्यान करतौ ताकौ बहुत भांति दूषण देके आवते जो काहेते सुबोधिनीमें बहुत प्रवेश हो मुकन्ददासकी श्रीआचार्यजी महाप्रभूनके चरणकमल पर दृढता हुती ताते सुबोधिनी स्फुर्डरूप हुती ऐसे करत करत कितनेक दिनमें उज्जैनमें मुकन्ददासकी देह छूटी तब काहू वैष्णवने श्रीआचार्यजी महाप्रभूनके आगे आय कही जो महाराज मुकन्ददासने अवंतिका पाई तब श्रीआ-

चार्यजी महाप्रभूनने कही जोऐसे मति कहौ ताते
ऐसे कहौ जो मुकन्ददासकों अवंतिकानेंपाये सो
वे मुकन्ददास श्रीआचार्यजी महाप्रभूनके ऐसे
परम कृपापात्र भगवदीय हैं ताते इनकी वार्ताकों
पार नहीं सो कहांताई लिखिये ॥ प्रसंग ॥ १ ॥
वैष्णव ॥ २४ ॥

अथ प्रभूदास जलौटा क्षत्री सीहन- न्दकेवासी तिनकी वार्ता ।

सो प्रभूदासके सेव्य ठाकुर श्रीमदनमोहनजी
सो राजनगर सिकन्दरपुरमें बैठे हैं सो जब श्रीआ-
चार्यजी महाप्रभू मथुरा पधारे तब प्रभूदास साथ
हैं तब एक दिन श्रीआचार्यजी महाप्रभू आप
संध्यावन्दन करिकें स्नान करत हुते विश्रांतके ऊपर
तहां दोचार वैष्णव और बैठे हैं तब तहां रूप सना-
तन कृष्णचैतन्यके सेवकनें श्रीआचार्यजी महाप्रभू-
नसों पूछौ जो यह वैष्णव कौनहै तब श्रीआचा-
र्यजी महाप्रभूनने कही जो ये हमारे सेवक हैं तब
रूपसनातनने कही जो ऐसे दुर्लभ क्यों रहत है
तब श्रीआचार्यजी महाप्रभूनने कही जो मैं इनको
बहुत बरजे जो तुम या मार्गमें मति परौ पारि इन मेरो

कह्यौ न मान्यौ ताको फल यह भोगत हैं परि रूप-
 सनातन कछू समझे नाहीं तब श्रीआचार्यजी महा-
 प्रभूनके दर्शन करिकें रूप सनातनतौ गए पाछें
 कितनेकदिनमें एक वैष्णव रूपसनातनके साथकौ
 श्रीजगन्नाथजीके दर्शनको गयौ तहां कृष्णचैतन्य
 मिले तब कृष्णचैतन्यने वा वैष्णवसों श्रीआचा-
 र्यजी महाप्रभूनके कुशल समाचार पूछे और कह्यौ
 जो नीके है कहां मिले हुते कहा करत पाये हुते तब
 वा वैष्णवने कृष्णचैतन्यसों कह्यौ जो श्रीआचा-
 र्यजी महाप्रभू मथुरा पधारे हुते और विश्रांतऊपर
 मिले हुते बहुत नीके हैं और श्रीआचार्यजी महाप्र-
 भूनके दर्शनको रूपसनातनहूं गए हुते विश्रांतऊ-
 परसों श्रीआचार्यजी महाप्रभूनसों रूपसनातनने
 और वैष्णवनकी बात पूछी जो ये ऐसे दुर्लभ क्यों
 रहत हैं तब श्रीआचार्यजी महाप्रभूनने कही प्रभू-
 दासकी बात कही जो म इनकौ बहुत बरजे परि इन
 मेरो कह्यौ न मान्यो ताको फल ये भोगत हैं सो यह
 बात सुनिके कृष्णचैतन्यकौ मूच्छा आइ सो एक
 मुहूर्तलो मूच्छा रही पाछें सावधान भये तब फेरि
 पूछौ जो तुमने कहा बात कही तब वा वैष्णवने
 फेरि कह्यौ जो श्रीआचार्यजी महाप्रभूनने कह्यौ

जो यामार्गमें मति परौ तब कृष्णचैतन्यको फेरि मूच्छा आई सो दोय सुहृत्तलों रही पाछें फेरि सावधान भए ऐसे तीनवार पूछौ सो तीनोंवार मूच्छा आई चौथीवार फेरि वा वैष्णवसों पूछी जो कहा कही तब वाने कृष्ण चैतन्यसों कही जो अब मोपै कही न जाय जो यह बात ऐसी है जो केवल बिरही होय सो जाने रूपसनातन कहा जाने ॥ प्रसंग ॥ १ ॥

और एकसमय प्रभूदासनें बेगी रसोई करी सो दारतौ काचीरही और अंगाकरी जरगई तब प्रभूदासके मनमें आई जो ऐसी सामग्री श्रीठाकुरजीकूं कहा समर्पू सो चरणोदक मेलिकें प्रसाद लीयो और श्रीठाकुरजी तो बाट देखतही रहे जो प्रभूदास भोग समर्पेंगो और मैं आरोगूंगो और प्रभूदासनें तो बिगरी सामग्री जानिके न समर्पी तब श्रीठाकुरजीने श्रीआचार्यजी महाप्रभूनसों कही जो आज मोको प्रभूदासने भोग समर्प्यो नाहीं मेने बाट देखी जो अब मोको प्रभूदास भोग समर्पेंगो और मैं आरोगूंगो परि प्रभूदासने भोग नाहीं समर्प्यो तब उत्थापनके समय प्रभूदास दर्शनको आये तब श्रीआचार्यजी महाप्रभूनने प्रभूदाससों कह्यौ जो

आज तेने श्रीठाकुरजीके बिना समर्पि प्रसाद लीयौ तब प्रभूदासनें सांची बात कही जो महाराज दारतौ काची रही और अंगाकरी जरगई ताते ऐसी सामग्री जानि भोग समर्प्यो नाहीं चरणोदक मेलि प्रसाद लीयो तब श्रीआचार्यजी महाप्रभूननें कह्यौ जो ऐसी रसोई क्यों करी श्रीठाकुरजीने तो बड़ी बारलों बाट देखी जो प्रभूदास भोग समर्पेगो और में आरो-गुंगो ताते तेने ऐसी रसोई क्यों करी सावधान हैके क्यों न करी पाछें सावधान हैके रसोई करन लागै ॥ प्रसंग ॥ २ ॥

और एक समय श्रीआचार्यजी महाप्रभू ब्रजमें पधारे हुते तब प्रभूदास साथ है तब एक दिन श्रीआचार्यजी महाप्रभूननें ब्रजमें श्रीगोवर्द्धनके निकट स्थल भोग धरायो पाछें भोग सरायौ तब प्रभूदाससों श्रीआचार्यजी महाप्रभूननें कह्यौ जो प्रसाद लेउ तब प्रभूदासने कह्यौ जो मेने स्नान नाहीं कीनों तब श्रीआचार्यजी महाप्रभूननें प्रभूदाससों कही जोतू देखि तब श्लोक करिकें दिखायौ ॥

श्लोक-वृक्षेवृक्षेवेणुधारीपत्रेपत्रे चतुर्भुजः ।

यत्र वृन्दावनं तत्र लक्ष्यालक्ष्यकथा कुतः ॥ १ ॥

जलादिभी रजः पुण्यं रजसोऽपि जलं वरम् ।

यत्र वृन्दावनं तत्र स्नानास्नानकथा कुतः ॥ २ ॥

यह श्लोक पढ़िकें प्रभूदासको दिखायौ ब्रजको स्वरूप वृक्षवृक्षविषें बेणुधारी पत्रपत्रविषै चतुर्भुज देखे या भांतिकों प्रभूदासको दर्शन करवायो ऐसो सादृश्य ब्रजको स्वरूप दिखायौ पाछें प्रभूदासनें प्रसाद लीयौ दंडवत करिकें प्रभूदासके ऊपर श्रीआचार्यजी महाप्रभूनकी ऐसी कृपा हुती सो आपते कृपा करिकें ब्रजको स्वरूप दिखायौ ॥ प्रसंग ॥ ३ ॥

और एक समय श्रीआचार्यजी महाप्रभू आप मन्दिरमें हुते तब ऐसी मनमें आई जो श्रीठाकुरजीको भोग समर्पिये सो दहीको भोग समर्पिये ता समय प्रभूदास बाहर हुते सो प्रभूदासने श्रीआचार्यजी महाप्रभूनके अंतःकरनकी जानी तब प्रभूदास बाहिर गये तब गावमें जायकें एक अहीरी मिली तासों पूछौ जो तेरे दही है तब वा अहीरीने कह्यौ जो हां दही है तब प्रभूदासनें कह्यौ जो लाउ तब अहीरी दही ले आई तब प्रभूदासने कह्यौ याको मोलि कहि तब वा अहीरीने कहीजो तू मोकों कहा देयगो तब प्रभूदासने कह्यौ जो तू माँगेगी सो देउंगो तब वा अहीरीने कही जो एक टका तो दे और कहा मुक्ति देयगो तब प्रभूदासने कही जो यह तो टका

ले और तोकों मुक्ति दीनी तब वा अहीरीने कही जो तू मोको लिखदे जो मुक्तिदीनी तब प्रभूदासने लिख दीनी और दही लेके घर आए सो दही भीतर दीयौ तब श्रीआचार्यजी महाप्रभूनने वह दही भोग समप्यौ सो श्रीठाकुरजी आरोगे सो वह दही अति स्वादभयौ पाछें श्रीगुसांईजी जब सांझके समय दर्शनकों आये तब यह बात श्रीआचार्यजी महाप्रभूनसों कही जो महाराज प्रभूदासने दहीके ऊपर मुक्ति दीनी सो लिखि आये तब श्रीआचार्यजी महाप्रभूजीने प्रभूदाससों पूछी जो प्रभूदास वह दही अति स्वाद भयो हुतौ सो तेने वाकों मोल कहा दीयो हुतौ तब प्रभूदासने कह्यौ जो महाराज वा अहीरीने एक टका और मुक्ति मांगी सो एकटका और मुक्तिदीनी तब श्रीआचार्यजी महाप्रभूनने कह्यौ जो तेने कछू न दीनों तब प्रभूदासने कही जो महाराज हूं कहा करूं जो मोपे मांग्यौ हुतौ सो दीनो जो भक्ति मांगती तो भक्ति देतौ पाछें वा अहीरीकी सखीने कह्यौ जो तोकोतो ठग लीनी तब वा अहीरीने सखीसों कह्यौ जो तू कहा जाने ए बडे भगवद्भक्त हैं इनको बचन सत्य है तब कितनेक दिनमें वा अहीरीकी देह छूटी तब यम दूत

आए इतनेमें विष्णुदूतहूं आए सों आपुसमें
 झगरन लागे तब यमदूतन सो विष्णुदूतनने कही
 जो याको तो श्रीआचार्यजी महाप्रभूनके सेवक
 प्रभूदासने मुक्ति दीनी है सो कागद याकी साडीकी
 खूंटते बंध्यो है सो यह बात वा अहीरीके सगे
 सहोदरनने सुनी परि आंखि न देखे पाछें वा अही-
 रीको विष्णुदूत ले जाने लगे तब वा अहीरीने वि-
 ष्णुदूतनसो कह्यो जो मेरी सखीको दर्शन देउ वाकों
 अविस्वास है पाछे विष्णुदूतनने वाको दर्शन दीनों
 तब वह कहन लागी जो मोहूको लेजाउ तब विष्णु-
 दूतनने कह्यो जो हमारे हाथ कहा है हम तौ आज्ञा-
 कारी हैं ताते तू प्रभूदाससों कहि तब वह सखी
 प्रभूदासके पास आई तब प्रभूदासने वाको श्रीआ-
 चार्यजी महाप्रभूनके पास नाम दिवायो तब वाहूको
 कार्य भयो पाछें विष्णुदूत वा अहीरीको लेगये तब
 वाकी मुक्ति भई पाछें वा अहीरीके सगे कुटुम्बने
 वाकी साडीके खूंटते कागद खोलिके देख्यो तब
 बांचिके रोवनते रहे सो प्रभूदासको श्रीआचार्यजी
 महाप्रभूनकी कृपाते ऐसी सामर्थ्य हुती सो वे प्रभू-
 दास बडे भगवदीय हैं ताते इनकी वार्ता कहांताई
 लिखिये ॥ प्रसंग ॥ ४ ॥ वैष्णव ॥ २६ ॥

अथ प्रभूदासभाट सीहनन्दके तिनकी वार्ता।

सो वे प्रभूदास भाट श्रीठाकुरजीकी सेवा नीकी भाँतिसों करते सो बहुत दिन सेवा करत बीतें पाछें वृद्धभयौ तब बहुत आशक्ति भये तब जानि यह देह दिन चार पांचमें छूटेगी तब सावधानता छूटी असावधान भए तब सगरे मिलके प्रभूदासको प्रथोदक तीर्थ है तहां लगये जब प्रथोदक आयौ तब सावधान भए आंखि खोलके देखे तो प्रथोदक तीर्थ है तब प्रभूदासने कह्यौ जो मोकों इहां क्यों लाये हौ तब सगरे जनेनने कह्यौ जो यह प्रथोदक तीर्थ है तुम्हारी अंत अवस्था देखिके लाये हैं तब प्रभूदासने कही जो मोकों प्रथोदकसे कहा काम है मैं तो श्रीआचार्यजी महा-प्रभूनको सेवक हूं मोकों प्रथोदक कहा कृतार्थ करेगो मोकों वरस १ लों इहां राखोगे तौऊ मेरी देह यहां न छूटेगी मोकों सीहनन्द ले चलौ जब अपने श्रीठाकुरजीके चरण देखूंगो तब देह छूटेगी तब दिन पांच सातलों राखें पारि दिन २ प्रभूदासको शरीर नीको भयौ सावधान भए तब फिर सीहन-

नदले गये तब अपने सेव्य श्रीठाकुरजीको देखे
 दर्शन करिके दंडवत कीनी तब प्रभूदासने श्रीठा-
 कुरजीसों कह्यो जो श्रीआचार्यजी महाप्रभूननें
 तुमको मेरे मांथे पधराए हैं और येतौ बावरे लोग
 तुम्हारौ आश्रय छुडायकें मोकों तीर्थ आगे लगये
 पारि श्रीआचार्यजी महाप्रभू ऐसी क्यों करे जो
 मेरी देह तीर्थपे छूटे पाछें श्रीठाकुरजीकी सेवा
 सिंगार करिकें बेगि २ भोग समर्थ्यो भोग सराय
 अनोसर कीयो पाछे सबनते कह्यो जो तुम बेगि
 बेगि प्रसाद लेउ ता पाछें मेरी देह छूटेगी तब सब
 प्रसाद ले चुके तब सबनसों प्रभूदासने जै श्रीकृष्ण
 कह्यो और प्रभूदासने तत्काल देह छोडी पाछें
 सीहनंदमें एक कीरतचौधरी हुतो सो प्रभूदासकी
 निन्दा करन लागौ और कह्यो जो प्रभूदास प्रथो-
 दिकते उलटौ फिर आयौ और सीहनन्दमें देह
 छोडी ऐसी निन्दा करतौ सो एक दिन रात्रिकों
 सोयो हुतो तहां कोऊ चारि जने हाथमें मुगदर
 लेके आये सो कीरतचौधरीको बहुत मारचौ तब
 कीरत चौधरीनें कह्यो जो तुम मोकों क्यों मारत
 हौ तब उनने कह्यो जो प्रभूदासकी निन्दा तू क्यों
 करत है तब कीरतचौधरीने कह्यो जो अब मैं निन्दा

न करूंगौ और बहुत मनुहार करी तब उन कह्यौ
 जो तू फेरि निन्दा करेगो तौ तोको याही भांतिसो
 मारेंगे तब कीरत चौधरीने कह्यौ जा आवते निन्दा
 न करूंगो भक्ति करूंगो पाछें स्तुति करन लागे
 तब प्रभूदासकी बात चले तब कीरतचौधरी कहै
 जो वे बडे महापुरुष हैं तब और लोग कहन लागे
 जो पहले तौ तुम प्रभूदासकी निन्दा करत हुते
 और अब स्तुति क्यों करत हो तब सबनको कीर-
 तचौधरीने अपने देहकी व्यवस्था दिखाई और
 कह्यौ जो रात्रिकों कोऊ चारिजने आयके मार
 मार हाड चूरन कीयौ ताते भगवदीयकी निन्दा
 सर्वथा न करनी और जो करे तो या लोकमें यही
 हाल होय और परलोकमें अघोर नरकमें जाय सो
 वे प्रभूदास भाट श्रीआचार्यजी महाप्रभूनके ऐसे
 कृपापात्र भगवदीय हैं तातें इनकी वार्ता कहांताई
 लिखिये ॥ प्रसंग ॥ १ ॥ वैष्णव ॥ २६ ॥

अथ पुरुषोत्तमदास आगरेमें राजघाट
 ऊपर रहतहुते तिनकी वार्ता ।

सो एक समय श्रीगुसाईजी आगरे पधारे हुते
 तब पुरुषोत्तमदासके घर उतरे तब पुरुषोत्तमदा-

सकी स्त्री छिप रही तब पुरुषोत्तमदाससों श्रीगु-
साईजीने पूछौ जो तेरी स्त्री कहाँ गई है तब पुरुषो-
त्तमदासने कही जो जनेउ टूटी होयगी पाछें श्रीगु-
साईजी बेगिवेगि रसोई करि दार भात साक चार
पांच करे तब रोटी बेलिवेकी बेरि पुरुषोत्तमदासकी
स्त्री आई तब श्रीगुसाईजीने पूछौ जो अबलों तू
कहाँ ही तब पुरुषोत्तमदासकी स्त्रीने कह्यौ जो राज
कछु काम करत हुती पाछें पुरुषोत्तमदासकी स्त्रीने
रोटी बेलि २ दीनी तब रसोई सिद्धभई तब श्रीगु-
साईजीने श्रीठाकुरजीकों भोग समर्प्यौ पाछें सम-
यानुसार भोग सराय पाछें वही थार कटोरा पडगी
सब उन पात्रनमें श्रीगुसाईजीसों कही जो भोजन
करियै तब श्रीगुसाईजीने कही जो यहतौ श्रीठा-
कुरजीके पात्र हैं इनमें भोजन कैसें करें ताते हम
इन पात्रनमें भोजन न करेंगे तब पुरुषोत्तमदास
तथा उसकी स्त्रीने कह्यौ जो महाराजकी कृपाते
कछू द्रव्य निवट्यौ नाहीं और पात्र नये मंगावेंगे
आप इनमें भोजनकरियै तब श्रीगुसाईजीभोजन
करनको बैठे तब पुरुषोत्तमदासकी स्त्री श्रीगुसाई-
जिके पास बैठके पंखा करन लगी और कह्यौ जो
महाराज और सामग्री आरोगो तब श्रीगुसाईजीने

कह्यौ जो मोकूँ रुचेगी सो मैं आरोगुंगो तब पुरुषो-
त्तमदासनें कह्यौ जो महाराज श्रीनन्दरायजीके
घर कैसे आरोगतहौ ऐसे कहिके स्त्रीपुरुष दोऊजने
श्रीगुसाईजीकों बहुत सामग्री लिवाय सो तिनके
संकोचके लिये श्रीगुसाईजी कहै जो तुम कहोगे
सो करेंगे तब भोजन कीये पाछे अपने सेव्य श्रीठा-
कुरजीकी सैयाऊपर बिछोना बिछाय श्रीगुसाई-
जीको पोढाये पुरुषोत्तमदास चरणसेवा करन लागे
स्त्री पंखा करनलागी पाछे घडीएक रहिके श्रीगुसां
ईजीने दोउनसों कह्यौ जो अब तुम जायके महा-
प्रसाद लेउ तब उन कह्यौ जो महाराज महाप्रसाद
तो नित्य लेत है परि तुम्हारी सेवा कब करेंगे सो वे
स्त्रीपुरुष दोऊजने श्रीआचार्यजी महाप्रभूनके ऐसे
कृपापात्र भगवदीयहैं ताते इनकी वार्ता अब कहाँ
ताई लिखिये ॥ प्रसंग ॥ १ ॥ वैष्णव ॥ २७ ॥

**अथ त्रिपुरदासकायस्थशेरगढके
वासीहुते तिनकी वार्ता ।**

सो त्रिपुरदासको श्रीआचार्यजी महाप्रभूनऊपर
तथा श्रीगोवर्द्धननाथजीके विषे बहुत ममत हुतो
जहां बैठते जहां ठाढे होते तहां श्रीनाथजीको पीठ

न देके बैठते पीठ देके ठाडे न होते सो त्रिपुरदास एक तुरककी चाकरी करते परगना बहुत कमायो जो कछु बस्तु आवती सो पहिले श्रीनाथजीको पहुंचावते और सालनसाक पहुंचावते ऐसे सदा-सर्वदा करते सो एकदिन वा तुरकने त्रिपुरदासको बन्दीखानेमें दिये और कह्यो जो तेने मेरो द्रव्य बहुत खायो है सो जब वह तुरक सोयो तब कोऊ चारजने हाथम मुगदर लेके आए सा आयके वा तुरकको खाटते औंधो पटकि बहुत मारचो तब वा तुरकने कह्यो जो तुम मोको क्यों मारतहो तब उनने कह्यो जा तेने त्रिपुरदासको बन्दीखानेमें क्यों दियो है तब वह तुरक बहुतबिल बिलानों हाहाकरिके नाक भूमिमें घिसके उनसों कहा जो मोको तुम मारोमति मैं अबही त्रिपुरदासको छोडत हों तब उन कह्यो जो त्रिपुरदासको न छोडेगो तो हम याही भांतिसों नित्य मारेंगे ऐसे कह्यो तब वे तौ गये तब वा तुरकने आयके अपने लोगनसों कह्यो जो त्रिपुरदासको बन्दीखानेमेंते अबही छोडदेउ तब मनुष्य त्रिपुरदासको छोडन गये तब त्रिपुरदासने उनसों कहा जो अब ता रात्रि बहुत गई है ताते सबेरे छोडियो तब वे मनुष्य फिर आये और

वा तुरकसों कह्यौ जो साहिब त्रिपुरदास कहत हैं
 जो अब तौ रात्रि बहुत गई है सवारे छोड़ियो तब
 वा तुरकने अपने मनुष्यनसों कह्यौ जो तुम अबही
 त्रिपुरदासकों छोड़ लावो तब वे मनुष्य वेगही
 जायके त्रिपुरदासकों छोड़ लाए तब वा तुरकने
 त्रिपुरदाससों कह्यौ जो तुम आपने घर जाउ तब
 त्रिपुरदासने कह्यौ जो अबतौ रात्रि बहुत गई है
 सवारे जाउंगो तब वा तुरकने त्रिपुरदाससों कह्यौ
 जो तू कहा काऊको जीव लेयगो ताते तू अबही
 इतनी बेर अपने घर जाउ तब त्रिपुरदास अपने
 घर आये ॥ प्रसंग ॥ १ ॥

बहुर कितनेक दिन पाछें त्रिपुरदासवाही तुरकके
 साथ अटकगये पाछें एकदिन रसोईयाने त्रिपुरदा-
 ससों कह्यौ जो चरणोदक महाप्रसाद निवट्यौ है
 रंचकहू नहीं तब त्रिपुरदासने रसोईयासो कह्यौ
 जो पांडे तेने हमसों पहिले क्योंन कह्यौ हम चर-
 णोदक महाप्रसाद मंगाय देते अब कहा करियै तब
 रसोईया चुपकर रह्यो तब सवारे उठिकें त्रिपुरदास
 वा तुरकके दरबार जान लगै तब कह्यौ जो पांडे
 रसोई करि श्रीठाकुरजीको भोग समर्पि प्रसाद
 लीजियो मेरी वाट मति देखियो मेरौ आवनो न

बनेगो और मनमें यह निश्चै कीयौ जो जबलों यह देह चलेगी तबलों काम काज करुंगौ और देह जब चलेगी तब पड रहुंगौ परि चरणोदक महाप्रसाद लीयै बिना जल पान न करुंगौ यह निरधार अपने मनमें कीयौ तब तुरकके दरबार गये तब रसोई-याने स्नानकरि रसोई करन लागौ तब आधी रसोई भई इतनेमें एक लरिका वर्षदसकौ तीनथैली लायौ सो एक थैलीमें तौ चरणामृत और एक थैलीमें श्रीआचार्यजी महाप्रभूनको चरणामृत और एक थैलीमें श्रीनाथजीको महाप्रसाद सो वे तीनो थैली रसोईयाको दीनौ और कह्यौ जो यह तीनो थैली त्रिपुरदासने पठाई है सो थैली देकें वह लरिका तुरंतही चलयौ गयौ पाछें रसोई सिद्ध भई तब श्रीठाकुरजीको भोग समर्प्यौ पाछें समयानुसार भोग सरायो तब रसोईयानें त्रिपुरदासको बुलायवेको मनुष्य पठायौ परि त्रिपुरदास आये नहीं तब दोय तनिवार मनुष्य बुलावेकौ पठायौ तब त्रिपुरदासने रसोईयासों कह्यौ जो पांडे तुम मोकों काहैकों बुलावत हौ में तौ चरणामृत महाप्रसाद लीयैबिना जलपान न करुंगौ तब रसोईयाने त्रिपुरदाससों कह्यौ जो चरणामृत महाप्रसादकी थैली तौ तुम-

नेही पठाई है एक लरिका वर्ष दसकौ हुतौ सो तीन
 थैली देग्यौ है तब त्रिपुरदासने कह्यौ जो वह लरिका
 कहां है मोकों दिखाय तब रसोईयाने कह्यौ जो वह
 लरिका तौ तुरंतही थैली देकै चल्थौ गयो तब त्रिपु-
 रदासने जान्यौ जोये श्रीठाकुरजीके काम हैं तब
 आपको धिक्कारकरन लाग्यौ जो में ऐसौ हट क्यों
 कीयौ जो श्रीठाकुरजीको श्रम करनौ पड्यो सो
 आप धिक्कार बहुत करन लाग्यौ जो मेंने श्रीठाकु-
 रजीको श्रम बहुत करवायौ पाछें स्नान करि चरणा
 मृत महाप्रसाद लीयौ पाछें समर्प्यौ महाप्रसाद
 लीयौ ॥ प्रसंग ॥ २ ॥

बहुारि कितनेक दिनमें त्रिपुरदासकी चाकरी
 छूटी सो शीतकालके दिन आयै तब श्रीनाथजीको
 कवाय पठावै तौ कहांते पठावै इतनों समों घरमें
 नाहीं त्रिपुरदासकी कवाय हरवर्ष जाती सो श्रीना-
 थजी आप अंगीकार करते तब त्रिपुरदासने कह्यौ
 जो अब कहा करियै तब एक द्वाति पीतरकी हुती
 सो बेची ताके दामनकी गजी मंगाई सो रंगाई
 ताकी कवाय बनवायके श्रीनाथजीको पठाई सो
 रंगी देखिके भंडारीने भंडारमें डार दीनी तब कित-
 नेक दिनमें श्रीगुसांईजी श्रीनाथजीद्वार पधारे सो

जब श्रीनाथजीको शृंगार करने लगें तब श्रीगुसां-
जीसों श्रीनाथजीने कहाँ जो मोकों शीत बहुत
लागत है तब श्रीगुसांईजीने कहाँ जो दूसरी अंगीठी
लावौ तब दूसरी अंगीठी लाए तोहू कही जो मोको
शीत बहुत लागत है तब श्रीगुसांईजीने गद्दल उढायो
तबहू श्रीनाथजीने कहाँ जो मोकों शीत लागत है
तब श्रीगुसांईजीने तीसरी अंगीठी मंगाई तबहू कही
जो मोकों शीत लागत है तब श्रीगुसांईजीने भंडा-
रीको बुलायौ और वासों पूछौ जो कोन कोन
वैष्णवनकी कवाय आईहुती तब जाजा वैष्णवकी
आईहुती ताता वैष्णवकौ नाम लीयौ तब श्रीगुसां-
ईजीने कही जो त्रिपुरदासको कवाय नहीं आई
तब भंडारीने कहाँ जो त्रिपुरदासकी एक रंगीन
कवाय आई है सो भंडारमें पडी है तब श्रीगुसां-
ईजीने कहाँ जा रंगीन कवाय ले आवो तब भंडारी
वह रंगीन कवाय ले आयौ तब श्रीगुसांईजी देखे
तौ मेली मरगजीसी हो रही है तब वाकों झार
पोंछिके तत्काल दरजी बुलायके फरगुल सिद्ध
करवाई तब वह फरगुल श्रीनाथजीकौ उढाई तब
श्रीनाथजीने कहाँ जो अब मेरो शीत निवर्त भयो
ऐसे श्रीनाथजी भक्तिके पक्षपात जो भक्तिभावकी

वस्तुको या भांति अंगीकार करै सो वे त्रिपुरदास
श्रीआचार्यजी महाप्रभूनके ऐसे कृपापात्र भगव-
दीय है ताते इनकी वार्ता कहांताई लिखियै ॥
प्रसंग ॥ ३ ॥ वैष्णव ॥ २८ ॥

अथ पूरनमल्लक्षत्री तिनकी वार्ता ।

सो पूरनमल्लकी गांठिमें द्रव्य बहुत हुतौ सो
पूरनमल्लकों श्रीनाथजीकी आज्ञा भई हुती जो तू
मेरो मन्दिर समराउ तब पूरनमल्ल श्रीआचार्यजी
महाप्रभूनके पास आयौ और आयके कह्यौ महा-
राज मोकों श्रीनाथजीकी आज्ञा ऐसीभई है जो तू
मेरो मन्दिर समराउ तब श्रीआचार्यजी महाप्रभू-
नने कह्यौ जो मन्दिर बेग समरावो तब पूरनमल्ल-
ने श्रीआचार्यजी महाप्रभूनसों नाम पायौ पाछें
मन्दिर उठावन लाग्यौ सो द्रव्यहुतौ सो सब नींव
खोदवेंमें लग्यौ जब सब द्रव्य निवट्यो पाछें पूरन
मल्ल पूरव चाकरीको गयै तब राजसी लोगनने
श्रीआचार्यजी महाप्रभूनसों पूछे जो महाराज
आज्ञा देउतौ हम मंदिर समरावे तब श्रीआचार्य-
जी महाप्रभूनने श्रीनाथजीसों पूछौ जो महाराज
ये राजसी लोग मंदिर समरावन कहत है सो सम-
रावें तब श्रीनाथजीने श्रीआचार्यजी महाप्रभूनसों

कह्यौ जो पूरनमल्ल आवेगौ तब मन्दिर समरावेगौ
तब राजसी लोगनसों श्रीआचार्यजी महाप्रभूनने
नाहीं कीनी तब वे फिरगये तब कितेक दिनमें
पूरनमल्ल पूरवते बहुत द्रव्य कमायके लायौ तब
पूरनमल्लने कितनेक दिनमें मन्दिर समरायके
सिद्ध करवायौ पाछें श्रीआचार्यजी महाप्रभूनने
आछौ मुहूर्त देखिके श्रीनाथजीके मंदिरमें पाट
बैठाये तब पूरनमल्लने बहुत द्रव्य खरचौ॥प्रसंग१॥

बहारि श्रीगुसांईजी श्रीनाथजीद्वार पधारे तब
पूरनमल्ल श्रीनाथजीके दर्शनकौ आयौ सो अति
आनन्दसों दर्शन कीयौ तब श्रीगुसांईजीने कह्यौ
जो पूरनमल्ल तेरे मनमें और कछू मनोरथहै सो
राखैमति तब पूरनमल्लने श्रीगुसांईजीसों कह्यौ जो
महाराज मेरे मनमें एक मनोरथरह्यौ है जो अति
सुन्दर अति सुगन्धकौ अरगजा अपने हाथनसों
में समरपू तब श्रीगुसांईजीने आज्ञा दीनी जो जा
समर्पि तब पूरनमल्लने अत्युत्तम सुगन्धिकौ अर-
गजाकरिके श्रीनाथजीकौ समर्प्यौ तब पूरनमल्लने
अपने मनमें अति आनन्द पायौ ता पाछें पूरनमल्ल
श्रीनाथजीके पासते श्रीगुसांईजीके पास आयौ
तब श्रीगुसांईजी पूरनमल्लके ऊपर बहुत प्रसन्न

भयै तब श्रीगुसांईजी आप पौढेहै सो उपरना पूरनमल्लकौ उढायौ तब पूरनमल्लनें अति आनन्द पायौ पाछे श्रीगुसांईजीनें श्रीनाथजीकौ पंचामृतसों स्नान करवायौ पाछे अंगवस्त्र करिकें सेवा शृंगार करिकें रसोई करि भोग समप्यौ समयानुसार भोग सरायकें पाछे श्रीगुसांईजीनें श्रीनाथजीकौ प्रसादी गढ़ल पूरनमल्लकौ उढायौ पाछे प्रतिवर्ष प्रसादी बढल श्रीगुसांईजी पूरनमल्लकौ देतें सो वे पूरनमल्ल श्रीगुसांईजीके तथा श्रीआचार्यजी महाप्रभूनके ऐसे परम कृपापात्र भगवदीय है ताते इनकी वार्ता कहांताई लिखियै ॥ प्रसंग ॥ २ ॥ वैष्णव ॥ २९ ॥

अथ यादवेन्द्रदास कुम्हार तिनकी वार्ता ।

सो श्रीआचार्यजी महाप्रभू तथा श्रीगुसांईजी जब परदेशकों पधारते तब यादवेन्द्रदास इनके साथ सामग्री लेकै चलते हडवाई कनात बिनाबांसकी छोटी रावटी तथा एक दिनको सीधौ सामग्री इतनों बोझ लेके संग चलते और रसोईकी चाकरी सब करते रात्रिकौ पहरौ देते ॥ प्रसंग ॥ १ ॥

बहुरि श्रीगुसांईजी गोकुलमें हुते तब रात्र पहर एक गई हुती तब श्रीगुसांईजीने कह्यौ जो या विरियां मंदिरकी नीव खोदीजाय तौ मंदिर भलौ दृढ होय अब भलौ मुहूर्त है ऐसैं कहिकें श्रीगुसांईजी तौ पोटे पाछे यादवेन्द्रदासनें एक पहरमें नीव खोदि सिद्धि करराखी सो जब पीछली रात्रिकौ श्रीगुसांईजी पोढके उठे तब देखें तौ माटीनके ढेर पडेहैं तब पूछौ जो यह माटी कैसी है तब वैष्णवननें कह्यौ जो महाराज यादवेन्द्र दासने खोदीहै तब श्रीगुसांईजीने यादवेन्द्र दाससों पूछौ जो यह नीव तेने खोदीहै तब यादवेन्द्रदासने कह्यौ जो महाराज रात्रिकों वावेर आपने आज्ञा करी हुती ताहींवेर खोदी है सो नीव ऐसी बडी खोदी जो महीना एकलों राजमजदूर दशपन्द्रह लगें तोहू भरी न जाय सो ऐसी सामर्थ्य यादवेन्द्रदासमें हुती ॥ प्रसंग ॥ २ ॥

और यादवेन्द्रदासने श्रीनाथजीद्वारकौ कूआ अपनेही हाथनसों खोद्यौ सो माटी निकसी ताकी ईट पकाई अपने हाथनही कूआ चिन्यो पारि जल खारो निकस्यौ तब यादवेन्द्रदास सोरोंगयौ श्रीगंगाजीमेंते जल लेकें अंजुली भरि २ के डारे और

कहै जो वाकूआको जल आपसों करो ऐसे कहिके
 तर्पण कीयौ ऐसे करत जब जान्यौ जो जल मीठौ
 भयौ तब श्रीगंगाजीमेते निकस्यौ पाछें श्रीनाथ-
 जीद्वार आये तब वाकूआको जल श्रीनाथजीको
 अंगीकार करवायौ सो यादबेन्द्रदास श्रीआचा-
 र्यजी महाप्रभूनके परम कृपापात्र भगवदीयहैं
 ताते इनकी वार्ता कहांताई लिखियै ॥ प्रसंग ॥ ३ ॥
 वैष्णव ॥ ३० ॥

अथ गुसांईदास सारस्वत ब्राह्मण तिनकी वार्ता ।

सो एक समय श्रीआचार्यजी महाप्रभूनको
 श्रीठाकुरजीको स्वरूप प्राप्ति भयो सो स्वरूप
 गुसांईदासके माथे सेवाको पधराय दीयै और
 कही जो इनकी सेवा तू नीकी भांतिसों करेयौ सो
 गुसांईदास सेवा नीकी भांतिसों करन लागे सो
 गुसांईदाससों श्रीठाकुरजी सानुभाव भए बोलन
 लागै पाछें कितेक दिनमें एक वैष्णवसो गुसांईदा-
 सनें कही जो तुम इहां रहौ तौ हमको सहायता
 होय हम तुम मिलिके सेवा करै परि वह वैष्णव
 हौं न करै पाछें एक दिन श्रीठाकुरजीनें गुसांई-
 दाससों कह्यौ जो तू मोकों वा वैष्णवके माथे

पधराय पाछें वा वैष्णवसों गुसाईदासनें कह्यौ जो महाराज श्रीठाकुरजीकी आज्ञा तो ऐसी भईहै जो तू मोकों वा वैष्णवके मांथे पधराय ताते भगव-दिच्छा ऐसीही दीसतहै तब वा वैष्णवनें गुसाईदाससों कही जो तुम कहा करोगे तब गुसाईदासने कह्यौ जो हूंतौ बद्रिकाश्रम जाऊंगौ उहां मेरी देह छूटेगी तब वा वैष्णवने गुसाईदाससों कह्यौ जो श्रीठाकुरजीकी गति नाहीं जानी जातहै जो तुम्हारी देह उहां न छूटै और तुम इहां फिर आवो तो में श्रीठाकुरजीको देऊंगौ नाहीं तब गुसाईदासनें कह्यौ जो श्रीठाकुरजी ऐसी तो न करेंगे और कदाचित करेंगे तो तुम्हारे द्वार पोरिया रहूंगौ श्रीठाकुरजीके दर्शन करचौकरूंगौ तब वा वैष्णवनें श्रीठाकुरजी पधरायै सो नीकीभांतिसों सेवा करन लाग्यौ पाछें गुसाईदासतों बद्रिकाश्रम गयै सो बद्रिकाश्रममें उहां गुसाईदासकी देह छूटी पाछें वा वैष्णवने गुसाईदासकी देह छूटीकी खबर पाई तब वह वैष्णव सुख सों सेवा करन लाग्यौ तब वह वैष्णव श्रीआचार्यजी महाप्रभूनकी कृपाते भलौ वैष्णव भयौ सो वे गुसाईदास श्रीआचार्यजी महाप्रभूनके ऐसे परम कृपापात्र भगवदीय हैं ताते इनकी वार्ता कहांताई लिखियै ॥ प्रसंग ॥ १ ॥ वैष्णव ॥ ३१ ॥

अथ माधोदासभट्टकाशमीरकेवासी

तिनकी वार्ता ।

सो माधोभट्ट प्रथम केशव भट्टके सेवक हुते सो केशवभट्ट श्रीआचार्यजी महाप्रभूनके पास आयै सो बहुतदिन रहै सो श्रीआचार्यजी महाप्रभू कथा कहते सो केशवभट्ट सुनते सो माधोभट्ट श्रीआचार्यजी महाप्रभूनके सेवकनमें जाय बैठते तब भगवद्वाता कहते सो प्रथम प्रसंग चलै तब माधोभट्टसों केशवभट्टने कह्यौ जो तू मेरो संग छोडिके उहांके सेवकनमें क्यों जातहै वहां जायके हांसी ठठौरी करतहै तब माधोभट्टने केशवभट्टसों कह्यौ जो मोकों तुम्हारो संग तथा तुम्हारी कथाते उहां की हांसी आछी लागत है ताते हौ जातहौ तब केशवभट्टने जान्यौ जो अब यह हमारे कामको ना है अब हमारे कामते गयौ पाछें केशवभट्टने श्रीआचार्यजी महाप्रभूनसों कही जो मैंने श्रीभागवत तुम पासते सुन्यौ परि मोकों कछू बोध न भयौ तब श्रीआचार्यजी महाप्रभूनने कह्यौ जो तुम मेरी बराबर बैठिके सुन्यौ और ज्ञातिकौ भाव राख्यौ ताते बोध न भयौ और माधोभट्टकी भाग-

वतकी स्फुरति भई यह दैवीसृष्टीको प्रकार जाननौ
तब श्रीभागवतकी कथा सम्पूर्ण भई तब केशव-
भट्टने श्रीआचार्यजी महाप्रभूनसों कही जो कछू
गुरुदक्षिणा लेउ तब श्रीआचार्यजी महाप्रभूनने
कह्यौ जो हम कछू लेत नहीं तब केशवभट्टने कह्यौ
जो में तुमको एक सेवक समर्पितहों सो माधो-
भट्टजी आचार्यजी महाप्रभूनको सोपे पाछें केश-
वभट्ट श्रीआचार्यजी महाप्रभूनके पासते विदा
होयके अपने देशको गयो पाछें माधोभट्टने श्री-
आचार्यजी महाप्रभूनके पास नाम पायो पाछें सम-
र्पण करवायो ॥ प्रसंग ॥ १ ॥

और जा गाममें माधो भट्ट रहत हुतौ ता गाममें
एक बडौ ग्रहस्थ रहत हुतौ ताके एक बेटा हुतौ
सो मरगयो तब वह गृहस्थ बहुत रोवन लाग्यौ
विलाप करन लाग्यौ और कहन लाग्यौ जो कोऊ
जाको जिवावेगौ तौ मेंहू जीउंगौ नहीं तौ मेंहू
मरुंगौ ऐसे कहिके बहुत शोक करे तब एक वैष्णव
पेडेमें जात हुतौ तब वा गृहस्थको विलाप करतौ
देखिके वाने कह्यौ जो या गाममें माधोसारिके
भगवदीय रहतहैं वे बडे भगवदीय महापुरुष हैं
तिनके पास तू जा वें कृपा करेंगे तब तेरो लरिका
जीवेगौ तब वह गृहस्थ माधोभट्टके पास आयौ

और बहुत विलाप करन लाग्यो और माधौभट्टसों
 कह्यो जो यह लरिका मेरो जीवेगौ तौ मेंहू जीउंगौ
 नातर मेंहू मरुंगौ या भांतिसों बहुत विलाप करे
 और रोवे तब वा गृहस्थ देखिके माधौभट्टको दया
 आई तब मनमें विचार करने लागे जो याको बेटा
 जीवेतौ आछौ है यह गृहस्थ भलो है यह बहुत
 विलाप करत है बहुत दुख पावत है यह विचारके
 माधौभट्टके मनमें बहुत खेद भयौ और कह्यो जो
 याको दुःख दूर होय तौ भलो है पाछे माधौभट्ट
 मन्दिरमें जायके श्रीठाकुरजीसों बिनती कीनी एक
 श्लोक करिके श्रीठाकुरजीके आगे कह्यो ॥

सोश्लोक-दयालोस्ते समर्थस्य दुःखायैव दयालुता ॥

विश्वोद्धरणदक्षस्य सा तवैकस्य शोभते ॥ १ ॥

यह श्लोक श्रीठाकुरजीने सुनिके कह्यो जो यह
 कितनीक बात है जो तुमको दया आई तो वासों
 कहौ जो जा तेरो बेटा जीवेगौ पाछे माधौदास
 श्रीठाकुरजीको बढायके बाहर आये तब वा गृह-
 स्थसों कह्यो जो जा तेरो बेटा जीवेगौ परि वा गृह-
 स्थको विश्वास न परे मनमें विचारे जो हूं घर जा-
 उंगौ और जो कदाचित न जीयौ होय तौ कहा
 करुं मुखते तौ कछू कह्यो न जाय परि मनमें

विश्वास परे नहीं इतनेमें घरके लोग दौरिकें आय
 वासों कह्यौ जो तेरो बेटा जियौ है ताकी बधाई
 देउ तब वह गृहस्थ माधौभट्टको दंडवत करिकें
 अपने घर आयौ पाछें बधैयाको बधाई दीनी और
 बहुत हार्षित भयौ पाछें माधौभट्टनें अपने मनमें
 विचार कीयौ जो बहुत अनुचित कीयौ अब यह
 लोग याही भांतिसों नित्य दुःख देयगे याते अब
 या गाममें रहिवेको काम नहीं ऐसो विचारकें
 रात्रि जब आधी गई तब श्रीठाकुरजीको जगाय
 संपुटमें पधरायकें तुरतही गाम छोडिकें चले सो
 अडेलमें श्रीआचार्यजी महाप्रभूनके पास आय
 रहै दया आये ते स्थल छूटो श्रीठाकुरजीको आधी
 रात्रिके समय भाजनो परौ ताते भगवदीयको जो
 काम करनौ सो विचारके करनो बिना विचारे
 सर्वथा नहीं करनौ ॥ प्रसंग ॥ २ ॥

और श्रीआचार्यजी महाप्रभू श्रीभागवतकी
 सुबोधिनी कहते सो माधौभट्ट बेगि २ लिखत जाते
 और जा ठौर न समझपरे ताठौर लेखिनी छोडिके
 बैठि रहते तब श्रीआचार्यजी महाप्रभू माधौभट्टको
 समझायके अर्थ कहते जब माधौभट्ट समझके आगे
 लिखते और श्रीआचार्यजी महाप्रभूनके आगे

माधौभट्ट या भांतिसों बैठते सो पावदीसैं ऐसी
सावधानीसों रहते ॥ प्रसंग ॥ ३ ॥

और एक समय श्रीआचार्यजी महाप्रभू परदे-
सकों पधारे तब माधौभट्ट साथ है तब श्रीआचा-
र्यजी महाप्रभू पैडेमें एक गाममें उतरे तब रात्रि
पहेर डेढ गई हुती तब माधौभट्ट उठिके लघुबा-
धाको गाममें आए तहां चोरननें तीर चलायौ सो
माधौभट्टके लाग्यौ तब श्रीआचार्यजी महाप्रभूनको
नाम लेत माधौभट्टनें देह छोडी तब इतनेमें श्रीआ-
चार्यजी महाप्रभूनके साथके वैष्णव आय गयै तब
देखेंतौ माधौभट्टकी देह छूटी है तब वैष्णवनके मनमें
सन्देह भयौ जो माधौभट्ट सरिके वैष्णवकी ऐसी
गति क्यों बूझियै तब साथके वैष्णवनने श्रीआचा-
र्यजी महाप्रभूसों पूछौ जो महाराज यह बात कैसे
होय जो माधौभट्टसरिके वैष्णवकी ऐसी गति क्यों
बूझीये तब श्रीआचार्यजी महाप्रभूननें उन वैष्ण-
वनसों कह्यौ जो माधौभट्टने तौ श्रीठाकुरजीके चर-
णारविन्द चांपे सो इनको कछू कर्तव्यता रही नाहीं
यह बडा भगवदीय हो पर इनसों एक भगवदप-
राध पय्यौ है तब वैष्णवननें पूछी जो महाराज
ऐसो कहा अपराध परचा हा तब श्रीआचार्यजी

महाप्रभूननें कह्यौ जो यह पाहिले अपने सेव्य श्रीठा-
 कुरजीको सेवा ऊपर फूल बिछावत हौ सो एक
 दिन बिना जाने फूलनमें सुई रह गई सो माधा-
 भट्टने नाहीं कीनां सा वा सुईको श्रीठाकुरजीके
 अंगमें स्पर्श भयो सो ता अपराधते ऐसे भयो परि
 याकी देह सावधानता सो छूटी है भगवन्नाम लेत
 छूटी ताते यह श्रीनाथजीके पासहै मेरी कानते
 श्रीनाथजी बुरी गति कबहु न करेंगे अपने पासही
 राखेंगे यह श्रीआचार्यजी महाप्रभूननें अपने श्री-
 मुखसों कह्यौ ताते वैष्णवनकों श्रीठाकुरजी सेवा
 नीका भांतिसों करनी बहुत सावधानी सो वे माधौ-
 दासभट्ट श्रीआचार्यजी महाप्रभूनके ऐसे कृपापात्र
 भगवदीय है ताते इनकी वाता कहाँताई लिखियै ॥
 प्रसंग ॥ ४ ॥ वैष्णव ॥ ३२ ॥

अथ गोपालदास तिनकी वार्ता ।

सो गोपालदासने मार्ग चलन वारेनकों अपने
 घरके पास विश्रामके लिये अस्थल करि राख्यो
 हुता जा मागमें विश्राम करे ताको हेत यह जो
 कोई भगवद्भक्त आय रहै तासों भगवद्भार्ता करें
 ताकारन अस्थल करि राख्यौ हुतौ सा वहाँ एक
 समय पद्मरावल उज्जेनके वासी सां द्वारका आवते

है सो रात्रिको वा गांममें आय रहेसो गोपालदास
 सेवासों पहुँचिकें पद्मरावलके पास आये और पद्म-
 रावलसों पूछो जो तुम कहाँते आएँहो तब पद्मरा-
 वलने कहाँ जो हम श्रीद्वारिकाते आए हैं तब
 गोपालदासने श्रीरणछोडजीके कुशल समाचार पूछे
 तब उहाँके समाचार पद्मरावलने गोपालदाससों कहे
 पाछें पद्मरावलकी जो बालपनेते अवस्था हुती सो
 बात चली जो पद्मरावल द्वारिकामें बहुत रहते श्रीर-
 णछोडजीके दर्जन बहुत करते सो जब खरची निव-
 डती तब अपने घर आवते सो पद्मरावलके जिज-
 मान मावजी पटेल आजन कुनबी गांवके देसाई
 हुते सो पद्मरावल द्वारिकाजीते आवते तब मावजी
 पटेल खरची देते सो लेंके जब पद्मरावल द्वारिका-
 जीको जाते ऐसैं वर्ष दिनमें तीन वार जाते पद्मरा-
 वलको श्रीरणछोडजीके विषै बहुत आसक्ति हुती
 सो श्रीरणछोडजीकी वार्ता पद्मरावलने गोपालदा-
 सके आगे कहीं तब गोपालदासने अपन मनमें
 कही जो ऐसी इनको श्रीरणछोडजीके दर्शनमें आ-
 सक्ति है तैसी इनको श्रीमहाप्रभूनके विषै आसक्ति
 होय तौ इनको काय्य होय ताते इनसों कछू कहि-
 ये तब गोपालदासने पद्मरावलसों पूछो जो तुमसों

कबहू श्रीरणछोडजी बोलत हैं कछू कहत हैं कछू मांगत हैं तब पद्मरावलने कह्यौ जो मोसों तो कबहू कछू कहत नाहीं तब पद्मरावलने गोपालदाससों पूछो जो कहा श्रीरणछोडजी कहूसों बोलतहैं तब गोपालदासने कह्यौ जो हां २ बोलत हैं तब श्री आचार्यजी महाप्रभूनकी वार्ता कही जो तुमने एते दिन श्रीरणछोडजी सेए हैं सो श्रीरणछोडजी प्रगट भए हैं तब पद्मरावलने पूछौ जो वे कहां हैं तब गोपालदासने कही जो वे अडेलमें हैं तब पद्मरावलने कही जो ऐसो दर्शन श्री श्रीरणछोडजी देत हैं तैसो दर्शन श्रीआचार्यजी महाप्रभू देयंगे तब गोपालदासने कही जो हां २ देयंगे तब पद्मरावलके मनमें विश्वास आयौ जो यह बात सत्य ताही दिनते पद्मरावलको आतुरता भई जो कबमें जाऊं और कब श्रीआचार्यजी महाप्रभूनके दर्शन पाऊं सो रात्रकों वहांही रहे ता पाछें सवारे गोपालदाससों बिदा होयके तहांते चलौ सो मार्गमें विचार करत जाय जोमें कबजाऊं और कब श्रीआचार्यजी महाप्रभूनके दर्शन पाऊं ऐसे विचार करत घर अपने उज्जैनमें आए परि चित उदासमें रह्यौ पाछें मावजीपटेलसे मिले तब मावजीपटेलने पूछौ जो गुरुजी अबकें

तुम्हारो मन प्रसन्न देखियत नाहीं सो काहेते तब
 पद्मरावलने गोपालदाससो सुनी हुती सो बात कही
 जो श्रीरणछोडजी अडेलमें प्रगट भये सो मेरो
 मनोरथ दर्शन करवेकौ है सो जानौ हौ कब जाऊंगौ
 तब मावजीपटेलने कह्यौ जो तुम रणछोडजीके
 दर्शनको जातहौ सो मोहूको अपने साथ लेचलौ
 तब पद्मरावलने कह्यौ जो तुम राजसी लोग हौ
 तुम्हारे साथ बहुत मनुष्य होयंगे और यह दर्शन
 तौ एकान्त स्थलको है ताते यह बात तौ मोको
 भावत नाहीं तब मावजीपटेलने कह्यौ जो हूंतौ सबथा
 तुम्हारे संग अकेलोही चलंगौ तब पद्मरावलने कह्यौ
 जो भलौ तब यह समाचर अपनी स्त्रीसों कहै और
 कह्यौ जोमें तौ पद्मरावलके संग अडेल दर्शनको
 जात हौ तब स्त्रीने कह्यौ जो वहां कहाहै तब माव-
 जीपटेलने कह्यौ जो वहां श्रीवल्लभाचार्यजी प्रगट
 भये हैं सो साक्षात् श्रीरणछोडजी प्रगट भये हैं
 और जैसो दर्शन श्रीरणछोडजी देत हैं तैसो दर्शन
 श्रीआचार्यजी महाप्रभू देत हैं सो यह बात सुनिके
 मावजीपटेलकी स्त्रीके मनमें बहुत उत्साह भयौ और
 कह्यौ जो आपके संगमें हूंचलंगी तब मावजी-
 पटेलने कह्यौ जो मेतो पावन चलंगौ तू कैसे चलेगी

तब स्त्रीने कही जो मेहूं पावन चलूंगी मेरे कछू लरिका तो है नाहीं तब फेरि मावजीपटेलने कहाँ तौ हम तुम दोऊजने चले तौ घर कौनके भरोसैं रहेगो स्त्रीने कहाँ जो मेरो घरतें कछू प्रयोजन नाहीं है हौं सर्वथा तुम्हारे साथ चलूंगी तब मावजीपटेलने अपने मनमें विचार्यो जो याको बहुत आतुरता भई दर्शनको बहुत मनोरथ है तब कहाँ जो भलो तू हूं चल तब मावजीपटेलने अपनो घर काहू भले मनुष्यके हवाले कर दीनों तब पद्मरावल मावजीपटेल तथा उसकी स्त्री बिरजो ये तीनों चले सो जब प्रयाग पहुंचे तब अडेलको दर्शन भयौ तब बहुत आतुरता भई जो श्रीआचार्यजी होयकें चलयौ जैये ता समय श्रीआचार्यजी महाप्रभू श्रीयमुनाजी ऊपर पधारे हुते सो सन्ध्यावन्दन करत हुते तहां सेवक दोय चार साथ हुते तब इन तीनोंको श्रीआचार्यजी महाप्रभूनको दर्शन भयौ तब तौ बहुतही आतुरता भई ता समय श्रीआचार्यजी महाप्रभूनने इनको देख्यो तब श्रीआचार्यजी महाप्रभूनने सेवकनसों कहाँ जो यह नाव पार लेजाउ पद्मरावल श्रीरणछोडजीके सेवक आये हैं सो इन तीनोंको नावमें बैठारिकें बेगि ले आउ सो नाव

लेकें वैष्णव पारआए तब उन वैष्णवननें कह्यौ जो पद्मरावल तीनों जनें होय सों आवौ श्रीआचार्यजी महाप्रभूननें नाव पठाइ है तब पद्मरावल और मावजी पटेल तथा उनकी स्त्री विरजो इन तीनों जनेको नावमें बैठायके ले आये तब श्रीआचार्यजी महाप्रभूनको दर्शन भयौ सो जैसो गोपालदासने कह्यौ हुतौ तैसोई दर्शन भयो सो दर्शन करिकें मनमें बहुत प्रसन्न भये पाछें पद्मरावलने श्रीआचार्यजी महाप्रभू पास नाम पायौ सो नाम पायके उठे तब पद्मरावलनें बिनती करिकें कह्यौ जो महाराज अंगीकार करियै तब श्रीआचार्यजी महाप्रभूननें प्रसन्न होयके कह्यौ जो तू कहा कहत है तब पद्मरावलनें कह्यौ जो मोको गोपालदासनें कह्यो है तासों निवेदन करिवाईये और पद्मरावलनें बिनती करिकें कह्यौ जो महाराज मावजीपटेल और मावजी पटेलकी स्त्री विरजो ये दोऊजने आपकी शरण आये हैं सो इनको नाम निवेदन करवाईये तब श्रीआचार्यजी महाप्रभूननें कृपा करके नाम समर्पण करवायौ पाछें श्रीआचार्यजी महाप्रभू आप भीतर पधारे तब श्रीआचार्यजी महाप्रभूननें पद्मरावलसों कह्यौ जा तुम महाप्रसाद इहांई

लीजियो तब पद्मरावलनें बीनती करिकें कह्यौ जो
 महाराज मोकों तुमनें श्रीरणछोडजीको दर्शन
 दीनों है सो स्वरूप आप कृपा करिके आरोगोगे
 तब श्रीआचार्यजी महाप्रभूनको दर्शन भोजन कर-
 तमें पद्मरावलको श्रीरणछोडजीको दर्शन भयौ सो
 साक्षात् रणछोडजी भोजन करत हैं तब पद्मराव-
 लकों दृढ विश्वास भयौ तब श्रीआचार्यजी महा-
 प्रभू आप भोजन करिके बिराजै तब महाप्रसादकी
 पातर पद्मरावलको कृपा करके दीनी पाछें पद्मरा-
 वलनें बीनती कीनी जो महाराज मोकों कहा आज्ञा
 है तब श्रीआचार्यजी महाप्रभूनने आज्ञा दीनी जो
 तुम श्रीठाकुरजीकी सेवा करौ तब पद्मरावलनें कह्यौ
 जो जैसी मेरो मन महाराजके स्वरूपमें लग्यौ है
 तैसो मन सेवामें लगे तौ सेवा करूं तब श्रीआचा-
 र्यजी महाप्रभूननें कह्यौ जो तुम श्रीठाकुरजीकी
 सेवा तौ करौ जो तुम्हारौ मनोरथ श्रीठाकुरजी सब
 पूरन करेंगे तब पद्मरावल श्रीआचार्यजी महाप्र-
 भूनसों बिदा होयके अपने देशको गये तब पद्म-
 रावल अपने देशमें जायके श्रीठाकुरजीकी सेवा
 करन लागे तब अपने सेव्य श्रीठाकुरजीकी सैया
 बनवाई सो सैया छोटी भई तब श्रीठाकुरजीनें कह्यौ

जो या सैयापै मोपै सोयो जाय नाही पाछें पद्मरा-
वलने दूसरी सैया बडी करवाई ताके ऊपर श्रीठा-
कुरजी पौढन लागे और श्रीठाकुरजी सानुभाव
जनावन लागे और एक समय पद्मरावलकी स्त्रीने
श्रीठाकुरजीकों भोग समर्प्यो तामें ताती खीर
समर्पी तब श्रीठाकुरजीने खीरमें श्रीहस्त मेलो तब
खीर बहुत ताती लागी सो श्रीठाकुरजीने श्रीआ-
चार्यजी महाप्रभूनसों कह्यो और श्रीहस्त कमल
दिखायौ सो लाल परि गयौ तब पद्मरावल श्रीआचा-
र्यजी महाप्रभूनके पास बैठे हुते तब पद्मरावलसों
श्रीआचार्यजी महाप्रभूनने कह्यो जो तेरी स्त्रीने श्री-
ठाकुरजीकों ताती खीर समर्पी सो श्रीठाकुरजीको
ताती खीर न समर्पीयै तब पद्मरावलने श्रीआचा-
र्यजी महाप्रभूनसों कह्यो जो श्रीठाकुरजीने एक
मुहूर्तलों सीरी क्यों न होने दीनी तब श्रीआचा-
र्यजी महाप्रभूनने कह्यो जो श्रीठाकुरजीतौ बालक
हैं श्रीठाकुरजीकों भोग धरै पाछें विलंब न सहि-
सकें यातें जो भोग धरियै सो बहुत तातो न धरियै
सो पद्मरावलकों श्रीआचार्यजी महाप्रभूनने ऐसी
आज्ञा दीनी आज्ञा देकें श्रीठाकुरजीको ऐसौ अनु-
भव जतायौ पाछें पद्मरावल अपने घर आयै तब

यह बात अपनी स्त्रीसों कही पाछें पद्मरावल बहुत सावधानीसों सेवा करन लागै श्रीआचार्यजी महा-प्रभूनकी कृपाते श्रीठाकुरजी सानुभावता जनावन लागै जो चाहियै सो मांगिलेते अपनी सब बात कहते सो वे पद्मरावल गोपालदासके संगते ऐसे भगवदीय हैं ताते इनकी वार्ता कहांताई लिखिये प्रसंग ॥ १ ॥ वैष्णव ॥ ३३ ॥

अथ पद्मरावल साचौरा ब्राह्मण उज्जै- नकेवासी तिनकी वार्ता ।

सो पद्मरावल अडेलमें आयके श्रीआचार्यजी महाप्रभूनके सेवक भए सो गोपालदास वांसवा-डाके तिनकी वार्तामें लिख्यौ है बिस्तार करिकें पाछें अपने देसको चलन लागै तब श्रीआचार्यजी महाप्रभूनसों बीनती कीनी जो महाराज होतौ अति मूर्ख हों जड हों कछू जानत नाही और मेरी जा-तिके ब्राह्मण महाकर्मजड हैं स्मार्त हैं सो मोकों दुख देत हैं तब श्रीआचार्यजी महाप्रभूनने अपने चरणारविंदको चन्दन और चरणामृत दीनो और कह्यौ जो तोकों सब सिद्धांत स्फुरेगो सो चरणामृत लीनों सो उतनेहीमें सब सिद्धांत स्फुर्द भयौ पाछै

देश उज्जैनमें आए पाछें बडे २ ब्राह्मण प्रति वृत्ति पूछन लागै तब जितनेनने पूछौं तिनकुं प्रति उत्तर दैक सब बिदाकियै सो पद्मरावलकों श्रीआचार्यजी महाप्रभूनकी कृपाते ऐसी विद्या स्फुर्द भई जो बडे २ पंडित जीतकें बिदा कीयै वे पंडित प्रति उत्तर दे नसकै ॥ प्रसंग ॥ १ ॥

और पद्मरावल द्वारिका श्रीरणछोडजीके दशनकों चले तब श्रीरणछोडजीनें स्वप्नमें कह्यौ जो राजनगरमें एक सेवक हमारौ है ताके घर तू जैयौ और पाक उहांई करियो तब पद्मरावलनें कह्यौ जो महाराज में तौ जानत नाहीं और बिना बुलाए में कोनके घर जाऊं तब श्रीरणछोडजीनें कह्यौ जो वह तोकों आपही बुलावनकों आवैगौ पाछें श्रीरणछोडजीनें अपने सेवकनसों कह्यौ जो पद्मरावल इहां आवेंगे सो उनकी सेवा तू नीकी भांति सों करियो और अपने घर पधराय पद्मरावलकों रसोई भली भांति सों करवाइयो तब वा सेवकनें श्रीरणछोडजी सों कह्यौ जो महाराज में उनकू कैसे जानूंगौ तब श्रीरणछोडजीनें कह्यौ जो वेतौ प्रसिद्ध हैं तू आपही ते जानेंगौ तब कितनेक दिनमें पद्मरावल उहां आए सो वा गांमके बाहिर उतरे सो पद्मरा-

वलके साथ विद्यार्थी एक हुतौ तासों पद्मरावलने कहीँ जो तू गाममें जायकें कोरी भिक्षा मांग लाउ तब वह विद्यार्थी गाममें गयो सो चार पांच ठौरतें कोरी भिक्षा मांग लायौ तब पद्मरावलने वा विद्यार्थीसों कहीँ जो तू अन्न जाजा कैसे लायौ है ताता कैसे उलटौ फेरि आउं तब वह विद्यार्थी जाजाकौ अन्न लायौ हौ सो ताकौ फेरन लाग्यौ तब एकने कहीँ जो तुम ले गये हैं अब फेरन क्यों आए हौ तब वा विद्यार्थीने कहीँ जो मैं कहा करूं हमारे बडे गुरु हैं तिनकी आज्ञा मानी चाहिये तब वा विद्यार्थीसों कहीँ जो तुम्हारे गुरुकौ नाम कहा है तब वा विद्यार्थीने कहीँ जो मेरे गुरुकौ नाम पद्मरावल है तब वह श्रीरणछोडजीकौ सेवक विद्यार्थीके साथ चलो आयो सो आयके पद्मरावलसों कहीँ जो मेरे घर पधारौ तब पद्मरावलसों कहीँ जो हुंतौ काहुके घर जात नाहीं तब वानें कहीँ जो मोकों श्रीरणछोडजीने आज्ञा दीनी है जो तू पद्मरावलकों अपने घर पधराइयो सो रसोई भली भांतिसों करवाइयो तब पद्मरावलको अपने घर पधराय रसोई भली भांतिसों करवाई सो पद्मरावलने रसोई करि श्रीठाकुरजीकों भोग समर्प्यो

पाछें प्रसाद लीयौ और रात्रिकों उहांहीं सोय रहै
तब सवारे पद्मरावल चलन लागै तब श्रीरणछो-
डजीको सेवक राखन लाग्यौ तब पद्मरावल रहे
नाहीं ॥ प्रसंग ॥ २ ॥

बहुर एक दिन आठौ बहुत मिल्यो और घृत
थोरौ मिल्यो तब जितनी रोटी वा घृतमें चुपडी
गई सो तो ऊपर धरी और कौरी हुती सो नीचै
राखी तब श्रीठाकुरजीको भोग समर्प्यौ और कह्यौ
जो महाराज बिनु चुपरि रोटी तो रहन दीजियो और
चुपरी रोटी आरोगियो तब श्रीठाकुरजीनें तौ सबही
रोटी आरोगी पाछें पद्मरावलसों कह्यो जो तेनें मेरे
आगें काहेकूं धरी मेरे आगें जो तू धरैगौ सो आरो-
गूंगौ पाछें महाप्रसाद लैनको बैठे तब रोटी बहुत
अद्भुत स्वाद भयी तब पद्मरावलनें कितनीक रोटी
बची सो साथ बांधिलीनी सो नित्य जब पाक करि
भोग समरपै पाछै प्रसाद लैनको बैठते तब रोटी-
मेते एक टुक मेलिलेते तब महाप्रसाद लेते पाछें
कितनेक दिनमें द्वारका जाय पहुंचै तब श्रीरणछो-
डजीको दर्शन कियो दिन पांच सात रहिकें श्रीर-
णछोडजीसों बिदा होयके चलै तब मार्गमें गोपाल-
दास वांसवाडाके घर आये तब रात्रिकों उहांहीं

रहै तब पद्मरावलने गोपालदाससों कह्यो जो तुम्हारी कृपाते मोकों श्रीआचार्यजी महाप्रभूनको दर्शन भयौ और तुम्हारी कृपाते मोपै श्रीआचार्यजी महाप्रभूनने कृपा करी सो पद्मरावल श्रीआचार्यजी महाप्रभूनके ऐसे कृपापात्र भगवदीय है ताते इनकी वार्ता कहांताई लिखिये ॥ प्रसंग ॥ ३ ॥ वैष्णव ॥ ३४ ॥

अथ पुरुषोत्तमजोसी साचौरा

ब्राह्मण तिनकी वार्ता ।

सो एक समय पुरुषोत्तम जोसी बनारसको चले सो मार्गमें उज्जैन आयौ सो उज्जैन आयके पूछौ जो पद्मरावलके बेटा कहां रहत हैं सो पद्मरावलके बेटाचारि हुते सो तीन बेटा तौ इकठौरे हुते और बडे बेटा कृष्णभट्टसों न्यारे हुते सो पुरुषोत्तम जोसी जहां पद्मरावलके तीनों बेटा इकठौरे हुते तिनके घर गये तिनने पुरुषोत्तमजोसीको थोरोसो अन्न दियौ सो कछु भूखे रहै तब मनमें कह्यो जो पद्मरावलके बेटा ऐसे क्यों बूझिये वे तौ सुधे ब्राह्मण है पाछें कृष्णभट्टने सुनी जो पुरुषोत्तम जोसी आये हैं तब कृष्णभट्टने पुरुषोत्तम जोसीको अपने घर पधराय तब भली भांति सों प्रसाद लिवायौ तब पुरुषोत्तम जोसी बहुत प्रसन्न भये दिन

चार राखै तब पुरुषोत्तम जोसी चलन लागै तब
 कृष्ण भट्टहसाथ चलै सो मजल जाय उतरे तब
 रात्रिको जब कृष्णभट्ट सोये तब पुरुषोत्तमजोसीने
 अपनी स्त्रीसों पूछो जो कृष्ण भट्ट सोये तब स्त्रीने
 कही जो हाँ सोये तब पुरुषोत्तमजोसीने श्रीआ-
 चार्यजी महाप्रभूनकी वार्ता कही पाछें कृष्णभट्टने
 मनमें विचार्यो जो पुरुषोत्तम जोसीने मेरे आगे
 श्रीआचार्यजी महाप्रभूनकी वार्ता नहीं कही
 पारि हों अब कछू चर्चा वार्ता चलाऊं सो जब
 श्रीगोकुल मजल पांच सात रह्यो तब कृष्णभट्टने
 प्रसंग चलायो सो पुरुषोत्तमजोसी घोड़ापै हुते
 सो वे तौ बिहूल भए तब कृष्णभट्टने पुरुषोत्तम
 जोसीकी स्त्रीसों कह्यो जो एक ओरते तुम थामें
 रह्यो और एक ओर ते में थामत हों तब कृष्ण
 भट्टने वार्ता चलाई सो भगवद्वाताम पुरुषोत्तमजोसी
 तौ बिहूल भये सो घोड़ेऊपर रह्यो न जाय तब दोऊ
 जनें आस पास थामें जाय ऐसे करत मजल आय
 उतरे तब घोड़ा ऊपरते उतारन लागै तब पुरुषोत्तम
 जोसीने कह्यो जो मोकों तुम क्यों उतारत हो तब
 कृष्णभट्टने कह्यो जो मजलको मुकाम आय पहुंची
 है ताते उतारत हैं पारि पुरुषोत्तमजोसीको मजल

आयवेकी खबर नहीं भगवद्दार्तामें रसाविष्ट भये सम्पूर्ण दिवस भयो परि प्रसाद लेवेहुकी कङ्कू सुधि रही नहीं ऐसे करत कितनेक दिनमें श्रीगोकुल आय पहुंचे तब पुरुषोत्तमजोसीने श्रीगुसांईजीको दशन कीनो और श्रीगुसांईजीसों पूछौ जो महा-राज कृष्णभट्टके ऊपर ऐसों कृपा काहेतें भई है तब श्रीगुसांईजीने कह्यौ जो याको चाचा हरिवंस-जीको सग है ताते ऐसो भयो तब पुरुषोत्तमजो-सीको गर्व निवत भयो और अति प्रसन्न भये और कृष्णभट्टसों आप वार्ता पूछन लागे पाछे कितनेक दिन रहिके श्रीगुसांईजीसों बिदा होयके चले सो उज्जैन आये मार्गमें भगवद्दार्ता करत चले आये और दोऊजनें अति प्रसन्न भये सो वे पुरुषोत्तम जोसी श्रीआचार्यजी महाप्रभूनके ऐसे कृपापात्र भगवदीय हैं ताते इनकी वार्ता कहांताई लिखिये ॥ प्रसंग ॥ १ ॥ वैष्णव ॥ ३५ ॥

अथ जगन्नाथ जोसी तिनकी वार्ता ।

सो जगन्नाथ जोसीने श्रीठाकुरजीको वागो पह-राय सब सिंगार करिकें राजभोगको थार आगै आन राख्यौ तब जगन्नाथजोसीके मनमें आई जो श्रीठाकुरजी वागो पहरेही अरोगत हैं ताते थार छूड़

जायगो तब श्रीठाकुरजीनें जगन्नाथ जोसीके मनकी जानी तब थारमें लात मारिकें डार दीनों तब जगन्नाथजोसीनें और पाक बेगि बेगि करिकें थार परोसि श्रीठाकुरजीके आगे आन राख्यौ तब श्रीठाकुरजीके मनमें आई जो वेसेहि फेरि लात मारकें डारदीनों तब फेरि दूसरी वेर पाक करिकें श्रीठाकुरजीके आगे आनि राख्यौ तबहू श्रीठाकुरजीनें लात मारकें डारि दीनों तब तीसरीवार पाक करन लागै तब जगन्नाथ जोसी बहुत श्रमित भयै पाछे नीचौ माथौ करिकें विचार करन लागै जो कौन अपराधते श्रीठाकुरजी आरोगत नाही थार डार देत हैं पाछे बहुत बीनती कीनी तब श्रीठाकुरजीने यह बात जताई जो तू थार छूडवेते डरपत हैं तौ तू हमारे आगे काहेकूं आनि राखत है इतनों बचन श्रीठाकुरजीकों सुनिकें जगन्नाथजोसी चौंकउठे तब नाक भूमिमें घिस बहुत मनहार करिकें कह्यौ जो महाराज मेंतौ कछू जानत नाही अब मेरो अपराध क्षमा करियै पाछे श्रीठाकुरजी आरोगे परि मास दोयलों बोले नाही फेरी बहुत बीनती कीनी तब बोलन लागे ऐसे सरल भाव हुतौ॥ प्रसंग ॥ १॥

और जगन्नाथजोसी श्रीठाकुरजीकों भोग सप-

पिंते तामें ताती खीर बहुत समर्पिते सो श्रीठाकुरजी वैसोही ताती खीर आरोगते सो कितनेक दिन पाछे श्रीआचार्यजी महाप्रभू गुजरात पधारे तब खिरालूमें जगन्नाथजोसीके घर उतरे तब श्रीठाकुरजीको दर्शन कीयो तब देखे तो श्रीठाकुरजीके ओष्ठ राते हैं तब श्रीआचार्यजी महाप्रभूनने श्रीठाकुरजीसों पूछो जो महाराज जिह्वा और ओष्ठ राते क्यों हैं तब श्रीठाकुरजीने कह्यो जो जगन्नाथजोसी मोकों ताती खीर बहुत समर्पत है सो तैसेही में आरोगत हौ तब जगन्नाथजोसीसों श्रीआचार्यजी महाप्रभूनने कह्यो जो तू ताती खीर श्रीठाकुरजीको क्यों समर्पत है तब जगन्नाथजोसीने कह्यो जो महाराज हमतो कछू जानत नाही जो ऐसी बात है हम तो जानत जो ताती खीर भली तब श्रीआचार्यजी महाप्रभूनने कह्यो जो खीर सुहाती भली खीर बहुत ताती न समर्पिये ता पाछे जगन्नाथजोसी वैसोही करन लागे ॥ प्रसंग ॥ २ ॥

और एक समय श्रीआचार्यजी महाप्रभूनके दर्शन करिवेको जगन्नाथजोसी अडेलको चले तब मार्गमें अन्नकूटको दिन आयो तब एक सेवक साथ हुतौ तासों कह्यो जो चामरदार घृत खांड और

कछू आच्छी सामग्री मिलै सो सब ले आउ तब वह सेवक गयो तब देखे तो गांवमें कछू नाहीं तब वह सेवक फिर आयो और कह्यौ जो इहां तो कछू मिलत नाहीं एक ज्वार मिलत हैं तब जगन्नाथजो-सीने कह्यौ जो भलें ज्वारही ले आउ तब गांवमें जायके ज्वार लीनी तब आच्छी भांति कूट फटक छानि बीन चुनिके ले आये पाछे जगन्नाथजोसीने वा ज्वारको ठोमर कीयो तब या सेवकने कह्यौ जो भुसी निकसी है सो ताको टोकरामें करि ऊपर राख्यो जो ताकी बाफ सो जलदी होय आवेगो तब जगन्नाथने कह्यौ जो भले तब वह ठोमर खदखदान लाग्यौ तब वह टोकरा वामें गिरपरयो सो सब इक-ठोरो मिलि गया पाछें भगवदिच्छा मानिके जैसौ तैसौ श्रीठाकुरजीको भोग समर्प्यौ पाछै भोग सराय महाप्रसाद लीयो तब जोसी रात्रिको सोयो तब श्रीठाकुरजीने कह्यौ जो मेरे पेटमें दुखत है तब जगन्नाथ जोसीने सुतिवा और सोंठ और अजवा-यण समर्पीं पारि मनमें पश्चात्ताप बहुत भयो पाछे श्रीठाकुरजीने कह्यौ जो अब मेरे पेटम सुख भयौ॥ प्रसंग ॥ ३ ॥

बहुर एक समय जगन्नाथ जोसी अपने सव्य

श्रीठाकुरजीको उत्थापन करिके पास ठाढे हुते श्रीठाकुरजीकों मूँठा करत हुते और वैष्णव ठाढे दर्शन करत हुते ता समय एक रजपूत गरासिया आयौ सो वो वैष्णव हुतो सो आयके वैष्णवनमें ठाढौ भयौ ता समय एक डोकरी फूलकी माला लेके आई सो वह माला दूरते श्रीठाकुरजीके ऊपर वाने डारी तब जगन्नाथजोसीकों रिस चढी सो माला वैष्णवनके ऊपर डारी सो वह माला वैष्णवके गलेमें जाय परी तब वा गरासिया रजपूतकों रिस आई तब गरासियानें अपने मनमें बिचारी जो देखो या जोसीनें माला वाकों दीनी और मोकों न दीनी परि भलो जो रजपूतको जायो जो या जोसीकों ठौर माखूं तब वह रजपूत तरवार हाथमें लैके नित्य तकत फिरे दाव पावै तौ घात करै तब जगन्नाथ जोसी एक दिन बहिर भूमिते आवत हुते तब वा रजपूतनें जगन्नाथजोसीके ऊपर पीछेंते तरवार चलाई तब श्रीठाकुरजीनें वह तरवार श्रीहस्तसों थामी और श्रीमुखसों कह्यो जो याकों मारे मति वह तब रहि गयो जब जगन्नाथजोसी फिरके देखे तो श्रीठाकुरजी श्रमित भये पीछें ठाढे हैं तब जगन्नाथजोसीनें वा गरासियासों कह्यो जो फिटिरे पापी

तेनें यह कहा कीयौ तब वह रजपूत तरवार डारिकें जगन्नाथके पावन पन्थौ और कहौ जो मेरे ऊपर कृपा करियौ अनुग्रह करियौ और जगन्नाथजो-सीके पाँव हाथसों पकर रह्यौ तब जगन्नाथजोसीको दया आई तब वाकों नाम दीयौ सो जगन्नाथजोसी ऐसे कृपापात्र भगवदीय हैं तब वा रजपूतको जगन्नाथजोसीनें नाम दीयौ निवेदन करवायौ तब वह भलो वैष्णव दीन भयौ वैष्णवनके बीच ठाढ़ रह्यौ ताको फल सिद्ध भयौ वे जगन्नाथजोसी ऐसे कृपापात्र भगवदीय हैं ताते इनकी वार्ता कहांताई लिखि ये ॥ प्रसंग ॥ ४ ॥ वैष्णव ॥ ३६ ॥

जगन्नाथजोसीकी माता तिनकी वार्ता ।

ताकें द्वे बेटा हुते बडे बेटातौ नरहर जोसी और छोटे बेटा जगन्नाथजोसी खिरालूके वासी तिन दोउ-नसों मातानें कह्यौ जो तुम जायके श्रीआचार्यजी महाप्रभूनके पास नाम पाइ आवौ और समर्पण करवाय आवौ और बेटानके हाथमें एक एक मुहर दीनी सो मोहर एक लाठीमें मेलिकें वे दोऊ भाई अडेलकों चले सो कितनेक दिनमें अडेल जाय पहुंचे सो श्रीआचार्यजी महाप्रभून अडेलमें हते नाहीं आप तो पुरुषोत्तम क्षेत्र श्रीजगन्नाथरायजीके

दर्शनको पधारे हुते कछू जगन्नाथजोसी नरहर जोसीने विचार कीयो जो हमफिर चलेंगे तौ हमारी माता खीजेगी जा नाम समर्पण कीयै बिनु तुमक्यों आये ताते आपुन पुरुषोत्तम क्षेत्र चलै यह अपने मनमें विचार करिके जगन्नाथ जोसी और नरहर जोसी ये दोऊ भाई पुरुषोत्तमक्षेत्रको चलै सो थोरे दिनमें पुरुषोत्तम क्षेत्र जाय पहुंचै जायकै पूछौ जो श्रीआचार्यजी महाप्रभू आप कहां रहतहैं तब एक वैष्णवनें घर बताय दीनो तहां यह दोऊ भाई गये तब श्रीआचार्यजी महाप्रभूनको दर्शन करिकै बैठे तब श्रीआचार्यजी महाप्रभूननें पूछौ जो तुम्हारी माता नीकी है तब इनको बहुत आश्चर्य भयौ जो यह तो हमको पहचानत हैं और हमतौ कबहू देखे नहीं और श्रीआचार्यजी महाप्रभूननें फिर पूछौ जो श्रीठाकुरजीके दर्शन कर आये तब इन दोऊनें कहौ जो महाराज नहीं कियै तब श्रीआचार्यजी महाप्रभूननें आज्ञा दीनी जो जायकै दर्शन कर आवौ तब यह दोऊ भाई दर्शनको गये तहां देखें तौ श्रीआचार्यजी महाप्रभू जगन्नाथरायजीके पास ठाढ़े है तब इनको आश्चर्य भयौ जो यह कहा हमतौ इनको अबही घर देखि आये हुते तब मनमें

फिर जानी जो दूसरी बाट होयगी तहां होयके आये
 होयंगे परि मनमें सन्देह भयौ पाछें दर्शन करिकें
 आये तब देखेंतो श्रीआचार्यजी महाप्रभू बैठे हैं
 तब आयकें दंडौत करिकें बैठे तब दोऊ भाई वि-
 स्मय भये आपसमें मौहडो देखन लागे चक्रत होय
 रहें तब श्रीआचार्यजी महाप्रभूननें पूछौ जो दर्शन
 करि आये और जो तुम्हारे मनमें सन्देह आयौ
 हुतौ सो निवर्त भयौ तब इन दोऊ भाईनें कह्यौ जो
 संदेह तौ निवर्त भयौ तब श्रीआचार्यजी महाप्रभू-
 ननें कह्यौ जो तुम्हारी मातानें भेट मोहर पठाई है
 सो लावौ तब लाठीमें ते मोहर काटिकें आगें राखी
 पाछें नाम निवेदन करवायो अपनों महात्म इन
 दोऊ भाईनको आपनें ऐसो दिखायौ सो स्वरूपा-
 शक्ति भई तापाछें वहां कितनेक दिन रहिकें आज्ञा
 मांगिकें चलें सो मार्गमें श्रीआचार्यजी महाप्रभू-
 नके स्वरूपको विचार करत जाय ऐसे करत अपने
 घर आय पहुंचे तब मातासों सब समाचार कहै
 तब माता बहुत प्रसन्न भई पाछें श्रीआचार्यजी
 महाप्रभूनकी कृपाते भले भगवदीय भए ताते इन
 की वार्ता अब कहांताई लिखिये ॥ प्रसंग ॥ १ ॥
 वैष्णव ॥ ३७ ॥

अथ नरहरजोसी जगन्नाथ जोसीके बडे भाई तिनकी वार्ता ।

सो एक समय नरहरजोसी पुरुषोत्तम क्षेत्र श्रीजगन्नाथरायजीके दर्शनको चले सो तहां मजल जाय उतरे तब स्नान करिके रसोई करि श्रीठाकुरजीको भोग समप्यौ तब देखें तौ एक बालक बरष दसको एक रूख ऊपरते उतरके आय ठाडौ भयौ तब वा बालकको देखिके नरहरजोसीको आश्चर्य भयौ जो यह लरिका कहाते आयौ तब वह लरिका नरहरजोसीके आगे हाथ पसारके मांगन लाग्यौ तब नरहरजोसीने अपने मनमें विचार्यौ जो यह सुंदर लरिका मेरे आगे कहाँको हाथ पसार्यौ तब नरहरजोसीने द्रै रोटी घीसों चुपरके तिनके ऊपर दारिधरिके बालकके हाथमें दीनी तब वह बालक इमलीके रूख ऊपर चढिगयौ पाछें फेरि नरहरजोसी देखेंतौ वह बालक नाहीं तब दूसरे दिन मजल जाय उतरे स्नान करि श्रीठाकुरजीको भोग समप्यौ तब तैसेही वह बालक इमलीके रूख ऊपरते उतरके आयौ और तैसेही हाथ पसार्यौ तब नरहरजोसीको और संदेह भयौ जो कोऊ छलि-

वैकौ आयौ होय तो कैसें देउ और जो भगवत्स्व-
 रूप होय तौ महाप्रसादी महाप्रसाद कैसें देउ तब
 यह संदेह करिकें वा बालककों कछू न दीनों तब
 वह बालक रुख ऊपर चढिगयौ पाछें नरहरजो-
 सीनें महाप्रसाद लीयौ सो यह बात खिरालूममें जग-
 न्नाथ जोसीसों श्रीठाकुरजीनें कही जो आजमें नर-
 हरजोसीके पास गयौ हौ तहां में हाथ पसारकें
 मांग्यौ परि मोकों कछू न दीयौ तब जगन्नाथ
 जोसीने वह दिन वह महीना वह सम्वत् वह वार
 लिख राख्यौ जो नरहरजोसी आवेंगे तब पूछेंगे
 तब कितनेक दिनपाछें नरहरजोसी अपने घर आयै
 तब मातासों भाईसों मिले पाछें दूसरे दिन दोऊ
 भाई सेवामें न्हाए तब जगन्नाथजोसीने श्रीआचा-
 र्यजी महाप्रभूनके कुशल समाचार पूछे जो नीके
 हैं पाछें जगन्नाथ जोसीनें नरहरजोसीसों कह्यौ जो
 अमुके सम्वतमें अमुक महीनामें अमुकी तिथिमें
 अमुके वार पटनातें आगें पेडेंमें मजल उतरें तब
 रसोई करिकें श्रीठाकुरजीकों भोग समर्प्यौ तहां
 कोऊ बालक हाथ पसारत देख्यौ तब नरहरजो-
 सीनें कह्यौ जो एक दिन तौ में सुन्दर बालक देखकें
 द्वै रोटी घीसों चुपरि ताऊपर दार धरिकें दीनी

और दूसरे दिन तो मोकों संदेह भयो जो कोऊ कोऊ छलिवेकों आयौ होय तौ कैसें देउ ताते न दीनी तब जगन्नाथजोसीनें कह्यौ जो तुमनें बुरीकीनी जो न दीनी वेतौ श्रीठाकुरजी आप हुते और जब आपन दोऊ भाई श्रीआचार्यजी महाप्रभूनके दर्शनकों गये हुते तब हमारी मातानें मौहर भेट पठाई हुती सो आपन संदेह करिराखी हुती तब आप श्रीआचार्यजी महाप्रभूनने मांग लीनी ताते अपने मार्गमें श्रीआचार्यजी महाप्रभून बिना श्रीठाकुरजीबिना संदेह न करनो अपने मार्गमें श्रीआचार्यजी महाप्रभू केवल प्रतापते उन बिना कछू न संभवे तब दोऊ भाईनके मनमें यह निश्चय भयो॥ प्रसंग ॥ १ ॥

और एक समय नरहरजोसीको जिजिमान अलियानगांवमें रहतौ ताको नाम महीधरजी हुतौ तथा बाकी वहनको नाम फूलवाई हुतौ तिनसों नरहरजोसीनें कह्यौ जो तुम श्रीगुसांईजीके पास नाम पावौ वैष्णव होउ तब उन कह्यौ जो भलें अवश्य तुम श्रीगुसांईजीकों पधरावो तब नरहरजोसी आगे आयके श्रीगुसांईजीकों पधरावके अलियानमें गये तब महीधरजी तथा फूलवाईसों

कह्यौ जो श्रीगुसांईजी पधारे हैं तब दोऊ भाई बहन
 अत्यन्त प्रसन्न भयै तब महीधरजीनें नरहरजो-
 सीसों कह्यौ जो मैं श्रीगुसांईजीको खाली हाथन
 कैसें पधराऊं तब महीधरजीनें नरहरजोसीसों रुपै-
 या मोहरनकी खीचरी करवायक न्यौछावर करिके
 श्रीगुसांईजीको अपने घरमें पधराय ता पाछें मही-
 धरजी फूलबाई तथा सब बाल गोपाल सब कुटुं-
 बको श्रीगुसांईजीके पास नाम दिवायौ निवेदन
 करवायौ और भली भांतिसों श्रीगुसांईजीकी सेवा
 करिके बिदा कियै पाछें श्रीगुसांईजी द्वारिकाको
 पधारे तब नरहरजोसी खिरालू अपने घर आयै ता
 पाछें कितनेक दिनमें वा अलियान गांवमें आग
 लगी ता समय नरहरजोसी खिरालूके तालाबके
 ऊपरते नित्यकर्म करिके तुलसी फूलकी डारि तथा
 झारी हाथमें लैके घर आवत हुते तासमय नरहर-
 जोसीके मनमें आई जो अलियान गांवमें आग
 लगी तब नरहरजोसी पैडे ठाडे होयके तुलसीदल
 बीचमें धरिके झारीमेंते जल लैके अंजुलीसों तुल-
 सीदलके पास पानीकी धारा करिके कुंडलियां
 कीनी इतनेहीमें अलियानमें आग बुझी और मही-
 धरजीकी हवेली घर सब बच्च्यौ तापाछें कितनेक

दिनमें नरहरजोसी अलियानमें गये तब फूलवा-
ईनें नरहर जोसीसों कह्यौ जो यहां आगको उप-
द्रव बहुत भयौ है सो श्रीगुसाईंजीकी कृपाते अपने
तौ कल्याण भयौ तब नरहरजोसीनें कह्यौ जो प्र-
भूनकी कृपाते सदा कल्याणही होय इतनों कहिकें
नरहरजोसी खिरालू आये तब महाप्रसाद लीयौ
पाछें दोऊ भाई एकान्त बैठे तब नरहरजोसीने
जगन्नाथजोसीसों कह्यौ जो में एक दिन नित्यकर्म
करिकें तालाबके ऊपरते आवत हुतौ तुलसी-
फूलकी डारी तथा झारी मेरे हाथमें हुती और अलि-
यान गांवमें आग लगी सो बात कही तब नरहर-
जोसीसों जगन्नाथजोसीनें कह्यौ जो आपुनकों इत-
नों हट कीयौ न चाहिये जो श्रीठाकुरजीकों श्रम
करवायौ यह अपने मार्गकी रीति नाहीं तब नरह-
रजोसीनें कह्यौ जो में तो हट नाहीं कीयौ परि मेरे
मनमें ऐसी आई जो ये अबही वैष्णव भये हैं और
आगि लगी ताते मेंने ऐसौ कीयौ तब दोऊ भाई
हंसि मुसिक्याय चुपकरि रहै पाछें कह्यौ जो प्रभू
बड़े कौतुकी हैं इनकी कृपाते सब भलौ होय आ-
पन हट न कीजै यह अपनो धर्म नाहीं ताते श्री-
वल्लभराजकुमारकी अद्भुत लीला है सरण आयै

तिनकों अतिही कल्याण होय सो वे नरहरजोसी तथा जगन्नाथजोसी तथा इनकी माता ऐसे कृपा-पात्र भगवदीय हैं जो परमार्थके लिये ऐसे कीयौ ताते इनकी वार्ताको पार नहीं सों अब कहांताई लिखिये ॥ प्रसंग ॥ २ ॥ वै० ॥ ३८ ॥

अथ राणाव्याससाचौरा ब्राह्मण

गोधराके वासीकी वार्ता :

सो जगन्नाथजोसीने प्रथम राणाव्यासपास नाम पायौ हुतौ फिर श्रीआचार्यजी महाप्रभूनपास नाम पायौ परि जगन्नाथजोसी राणाव्यासके पास बहुत रहते सो एकसमय राणाव्यास भगवदिच्छाते गोधराकी वेश्यानें इनसों संग कीयौ सो बात राजद्वारमें सुनी तब हाकिमके प्यादे राणाव्यासको लेन-आयै तब जगन्नाथजोसीने राणाव्यासको और गांममें करदीनों पाछें जगन्नाथजोसी तहां अकेलै रहै और वे प्यादे आये हुते सो राणाव्यासको दूढ़न लगै तब जगन्नाथजोसीने कह्यौ जो राणाव्यास तौ इहां नहीं चलौ हौं उत्तर देउंगौ तब जगन्नाथ जोसीको लायके हाकिमके आगे ठाडौ कीयौ तब हाकिमनें कह्यौ जो राणाव्यास कहां है उननें पराई

स्त्रीसों अन्याव कीयौ है तातें बाकों लावौ और
 मेंतौ जगन्नाथजोसीकों नीकें जानतहों जा जाको
 नाम जगन्नाथजोसी सो कबहुं अन्याव करै यह तौ
 राणाव्यासनें अन्याव कीयौ है ताते उनको लाव तब
 जगन्नाथजोसीनें कह्यौ जो मेरी कही सुनो तौ में
 कहूं तब हाकिमनें कह्यौ जो कह्यौ तब जगन्नाथजो
 सीनें कह्यौ जो राणाव्यासनें अन्याव नहीं किया
 राणाव्यास ऐसे काम कबहुं न करै तब हाकिमनें
 कह्यौ जो क्यों जानियै तब जगन्नाथजोसीनें कह्यौ
 जो मेरी कही मानों तौ में कहूं जो राणाव्यासके
 बदलै जो कछु कहौ सो में करूं तब हाकिमनें
 एक पैयाको मुगदर मंगायौ सो अग्निमें मेलिकें
 तातो कीयौ तब जगन्नाथजोसी स्नान करिकें आयौ
 तब जगन्नाथजोसीनें ठाडौ होयकें कह्यौ जो राणा-
 व्यासनें अन्याव कीयौ होय तौ मोकों अग्नि जरा-
 यकें भस्म करि डारियौ और नहीं अन्याव कीयौ
 होय मुगदल शीतल होय जइयौ पाछें वह मुगदल
 अग्निमेंसे काढिकें दोऊ हाथनसों उठाय अपने
 गरमें मल्यौ सो घडी एक लौं राख्यौ सब जने
 बोलै जो जोसी तू काढि तब जगन्नाथजोसीनें कह्यौ
 जो हूं काढिकें कोनकें गरमें डारूं तब हाकिमनें

कह्यौ जो मेरे गरेमें डारौ पाछें जोसीनें भूमिमें डार-
 दीनों तब भूमि जरगई तब सबजने कहन लागे जो
 जगन्नाथजोसी तुम धन्य हौ तुम सांचे हौ तुमको
 तुम्हारे धनीको ऐसो सांच है यों कहिकें जगन्नाथ-
 जोसीकों समाधान करिकें कह्यौ जोसी तुम कछू
 मांगौ मैं तेरे ऊपर प्रसन्न भयोहौं जो जोसीनें कह्यौ
 जो इतनों मांगत हौं जो जानें यह चुगली करी है
 तासौं कछू मति कहियो तब यह सुनिके हाकिम
 तथा सबजने बहुत प्रसन्न भये पाछें जगन्नाथजोसी
 अपने घर आये वे ऐसे भगवदीय हैं जो श्रीआचा-
 र्यजी महाप्रभूनकी कृपाते कहा न होय॥ प्रसंग॥ १॥

और पहिले राणाव्यासनें माधौदास सारस्वतके
 पास नाम पायौ हुतौ पाछें श्रीआचार्यजी महा-
 प्रभूनके सेवक भयै तब परम वैष्णव भयै सो वे
 राणाव्यास सिद्धपुरमें रहते सो राणाव्यास और
 जगन्नाथजोसी सरस्वतीमें स्नान करत हुते ता समय
 एक रजपूतानी सती होयवेकों आई तब राणा-
 व्यासके पास जगन्नाथजोसी हुतौ तिननें पूछौ जो
 सती होत है ताको प्रकार कहा तब राणाव्यासनें
 कह्यौ जो प्रेतके संग वृथा ऐसौ शरीर जरावत है
 जो राणाव्यासनें मूंड हिलायकें कह्यौ जो वह रज-

पूतानी सती होन आई हुती ताने देख्यो तब वा रज-
 पूतानीने साथके मनुष्यनसों कह्यो जो हुंतो न
 जहंगी मोकों सत नाही है ताते मेरी हत्या चढेगी
 ऐसे कहिकें बहुत हसि दीनी और जरी नाही तब
 वे लोग वा मृतकको जरायके वा स्त्रीकों गांवके बा-
 हिर झोंपरी करदीनी तब स्त्री उहां रही तापाछे रा-
 णाव्यास न्हायवेकों आयै तब वा स्त्रीने राणाव्या-
 ससों आयके पूछो जो तुमने मूंड हिलायके कहा
 बात कही ता बातके देखते हों न जरी ताते मोसों
 वह बात कहौ तब राणाव्यासने कह्यो जो हमतौ
 आपुसमें हंसत बात करत हुते तब स्त्रीने कह्यो जो
 हमसों काहेको दुरावतहौ जो बात होय सो कहौ
 और बहुत आग्रह कीयो तब राणाव्यासने कह्यो
 जो हम आपसमें हंसत हुते जो यह ऐसी उत्तम देह
 पायके नाहक प्रेतके साथ जरावत है या देहसों
 श्रीठाकुरजीकी सेवा न कीनी न भजन कीयो ऐसी
 उत्तम देह धरिकें श्रीठाकुरजीकों न भज्यौ तब वा
 स्त्रीने राणाव्याससों कह्यो जो हुंतो तुम्हारी शरण
 हों जो जा भांति यह देह श्रीठाकुरजीके काम आवै
 सो करो तब यह बात सुनिके राणाव्यासने कह्यो
 जो अब तौ तोकों सूतक है सूतक उतरेगो तब हो-

गौ तब स्त्री अपने स्थलको गइ परि वाको बहुत
 बेरह उत्पन्न भयो जो दिन प्रतिदिन आवै सो राणा
 व्यासको दर्शन करि जाय ऐसे करत सूतक उतर्यौ
 तब सुद्ध होयके राणा व्यासके पास आइ तब राणा
 व्यासने कही जो तू सवारे आइयौ सो वा स्त्रीने
 तादिन कछू खायो नाहीं पहले चना चबायके रहती
 सो वा दिन वा स्त्रीने जलपान हूं नहीं कीयो पाछे
 प्रातःकाल भयो तब राणाव्यासके आयवेको समो
 भयो तब आयके बेठि रही तब राणाव्यास आये
 और स्नान करिके भगवत्स्मरण कीयौ तब वा
 स्त्रीसों कहौ जो तू स्नानकरिके बेठि रही पाछे राणा
 व्यासने श्रीआचार्यजी महाप्रभूनको ध्यान धरिके
 वाके कानमें नाम सुनायो तब नाम सुनतही स्त्रीको
 भगवद्भाव उत्पन्न भयो तब वा स्त्रीने राणाव्याससों
 पूछौ जो अब मैं कहा करूं तब राणाव्यासनें कह्यौ
 जो अब भगवत्सेवा करौ तब वा स्त्रीने कह्यौ जो
 मेरी स्थित तौ ऐसी है जो तुम कछू टहल देउ सो
 मैं करूं पाछे राणाव्यास उपरना परदनी धोयवेकों
 देते सो धोयके सिद्ध करिके पहुंचावती प्रसाद
 राणाव्यासके घर लेती ऐसें करत राणाव्यासके
 घरको कामकाज सब करनलागी पाछे भगवत्से-

वाको सब काम काज करनेलागी सो कितनेकदिन
पाछें राणाव्यासके घर श्रीआचार्यजी महाप्रभू
पधारे तब राणाव्यासनें वा स्त्रीकों श्रीआचार्यकी
महाप्रभूनपास नाम निवेदन करवायौ तब वह स्त्री
परम वैष्णव भई सो राणाव्यास श्रीआचार्यजी
महाप्रभूनके ऐसे परम भगवदीय हैं ताते इनकी
वार्ता कहांताई लिखिये ॥ प्रसंग ॥ २ ॥ वैष्णव ॥ ३९

**अथ रामदाससारस्वतब्राह्मण राज-
नगरमें रहते तिनकी वार्ता ।**

सो रामदासजीके मांथे नटवर गोपालजी श्री-
आचार्यजी महाप्रभूननें और अपनी पादुकाजी
सेवाके लिये पधराय दीनी सो सेवा सदैव करै ऐसे
कृपापात्र भगवदीय है सो रामदास विवाह करिकें
पृथ्वीपरिक्रमाकों चले सो कितनेक दिनमें पृथ्वी-
परिक्रमा करिकें अपने घर आयै परि रामदास
स्त्रीकों अंगीकार न करते तब दिन द्वै तथा चारि
रहिकें द्वारिकाकों चलै तब रामदासकी स्त्रीहू साथ
चली परि रामदास स्त्रीको साथ न आवन देहि
ईटनसों मारे परिरामदासकी स्त्री तौ दूर २ साथही
भई और रामदासके दासकी पातरमें झूठन उबरे

सो खाय नहीं भूखी ही पारि रहै परंतु पतिके
 साथ २ ही रहे तब एक दिन श्रीरणछोडजीने राम-
 दाससों कही जो तू अपनी स्त्रीको अंगीकार कर
 त्याग काहेकों करत है तब रामदासने कही जो
 में विरक्त हों बेरागी हों मेरौ स्त्रीसों कहा काम है
 तब श्रीरणछोडजीने कह्यौ जो तेनें विवाह काहेकों
 कियौ जा तू श्रीआचार्यजी महाप्रभूनको सेवक
 है तोका ऐसी निठुरता न चाहियै जो श्रीआचार्यजी
 महाप्रभूनको सेवक जानि कछू कहत नहीं अब
 हों कहत हों तू अपनी स्त्रीकों अंगीकार करि तब
 रामदासने अपनी स्त्रीसों कह्यौ जो तू मेरे साथ
 चलीआउ तब मार्गमें रामदासके साथ जान लागी
 तब मजल जाय उतरे तब रामदासने अपनी स्त्रीसों
 कही जो तू वस्त्र साज लेके डेरामें बेठि रहियौ और
 में ऊपरा बीनि लाऊं पाछें आय स्नान करि रसोई
 करी श्रीठाकुरजीको भोग समर्प्यो भोग सराय
 पाछ प्रसाद लीयौ और स्त्रीकों प्रसाद दियौ सो
 कितनेक दिन मार्गमें चलै आये पाछें एक दिन श्री-
 रणछोडजीने रामदासकों आज्ञा दीनी जो तू अपनी
 स्त्रीको नाम दै तब रामदासने कह्यौ जो हूं नाम कैसें
 देउं तब श्रीरणछोडजीने कह्यौ जो तू नाम दै मेरी

आज्ञा है तब श्रीआचार्यजी महाप्रभूनको नाम ले श्रीरणछोडजीकी आज्ञाते स्त्रीको नाम दीयौ तब स्त्रीके हाथको महाप्रसाद लेन लाग्यौ पाछें कितनेक दिनमें श्रीआचार्यजी महाप्रभू राजनगर पधारे तब रामदासनें आयकें श्रीआचार्यजी महाप्रभूनके दशन कीये तब रामदासनें कह्यौ जो महाराज मेरी स्त्रीको नामसमर्पण करवाईये तब आपने कह्यौ जो अबतौ तेने नाम दीयौ है फेरि कहा तब रामदासनें कह्यौ जो महाराज में तो श्रीरणछोडजीकी आज्ञा ते नाम दीयौ है और मोकों श्रीरणछोडजीकी आज्ञा है जो श्रीआचार्यजी महाप्रभूनपास नाम निवेदन करवाइयौ तब यह सुनिकें श्रीआचार्यजी महाप्रभूनने नाम निवेदन करवायौ पाछें घर आय गृहस्थाश्रम करन लागे वे रामदास श्रीआचार्यजी महाप्रभूनके ऐसे कृपापात्र भगवदीय हैं ताते इनकी वार्ता कहांताई लिखिये ॥ प्रसंग ॥ १ ॥ वैष्णव ॥ ४० ॥

गोविंददुबे साचौराब्राह्मणतिनकी वार्ता ।

सो गोविंददुबे श्रीठाकुरजीकी सेवा नीकी भांति सों करें परि मनमें विग्रह हुतौ तब गोविंददुबेने श्रीआचार्यजी महाप्रभूनके बीनती पत्र लिख पठायौ जो महाराज मेरे मनमें विग्रह बहुत रहत है

ताते में कहा करूं तब श्रीआचार्यजी महाप्रभूनने नवरत्न ग्रन्थ प्रगट करि गोविंददुबेका लिख पठायौ और पत्रमें लिख्यौ जो या ग्रंथको पाठ तू नित्य करियौ सा तेरी विग्रहता सब मिट जायगी सो कृपा-पात्र आयौ तब गोविंददुबे नवरत्नको पाठ करन लागै सा पाठ करत गोविंददुबेकी सब विग्रहता मिट गई तब श्रीठाकुरजीकी सेवा नीकी भांति सों करन लागै प्रसंग ॥ १ ॥

और एक समय गोविंददुबे मीरांबाईके घर हुते तहां मीरांबाई सो भगवद्भार्ता करत अटके तब श्रीआचार्यजीने सुनी जो गोविंददुबे मीरांबाईके घर उतरे हैं सो अटके हैं तब श्रीगुसाईंजीने एक श्लोक लिखि पठायो सो एक ब्रजवासीके हाथ पठायौ तब वह ब्रजवासी चलयौ सो वहां जाय पहुंचौ ता समय गोविंददुबे संध्यावंदन करत हुते तब ब्रजवासीने आयकें वह पत्र दीनो सो पत्र बांचिके गोविंददुबे तत्काल उठे तब मीरांबाईने बहुत समाधान कीयो परि गोविंददुबेने फिर पाछें न देख्यौ ॥ प्रसंग ॥ २ ॥

और एक समय श्रीआचार्यजी महाप्रभू आप द्वारिका पधारे तब गोविंददुबे और जगन्नाथजोसी

और पांच सात वैष्णव हुते सो आपके साथ हैं तब श्रीआचार्यजी महाप्रभूनसों द्वारिकामें बीनती कीनी जो महाराज कछू कथा कहिये तब श्रीआचार्यजी महाप्रभूनने गोविंददुबेसों कह्यौ जो अब-हीतौ मोकों अवकाश नाही तब गोविंददुबेने बीनती कीनी जो महाराज थोरीसी कहिये तब श्रीआचार्यजी महाप्रभूनने कथा कहिवेकों पोथी खोली तब इतनेमें गोविंददुबेसों श्रीरणछोडजी बातें करन लागे तब अपने गोविंददुबेसों कह्यौ जो पोथी खुलायके बातें कौनसों करत है तब श्रीआचार्यजी महाप्रभूनने फिर देख्यौ जो श्रीरणछोडजीसों बातें करत हैं तब आपने पोथी बांधी और फिर आप पोढ़े ॥ प्रसंग ॥ ३ ॥

और सब वैष्णव श्रीआचार्यजी महाप्रभूनके थारकौ महाप्रसाद पावते तब एक दिन श्रीआचार्यजी महाप्रभूनने खवाससों कह्यौ जो तुम इन वैष्णवनकौ थारकौ महाप्रसाद मति देउ सो ता दिन श्रीआचार्यजी महाप्रभू भोजन करिकें उठे हुते सो उठतही खवासने थार छूयके मांजि धरयो तब श्रीआचार्यजी महाप्रभूनके थारके महाप्रसाद न मिल्यो सो ता दिन सब वैष्णवनने उपवास कर्यौ

तब श्रीरणछोडजीनें श्रीआचार्यजी महाप्रभूनसों कह्यो जो तुम इन वैष्णवनको थार नित्य देतहौ तैसे इनको नित्य दीजियो तब दूसरे दिन श्रीआचार्यजी महाप्रभूननें गोविंद दुबे और जगन्नाथजोसीसों कह्यो जो तुमनें कालि महाप्रसाद क्यों नहीं लीनों भूखे काहेकों रहे तब गोविंददुबे और जगन्नाथजोसीनें श्रीआचार्यजी महाप्रभूनसों बीनती करिके कह्यो जो महाराज कालि आपके थारको महाप्रसाद न मिल्यो तब श्रीआचार्यजी महाप्रभूननें कह्यो जो तुमको अपने थारको महाप्रसाद तो न देतो परि तुम्हारी सिपारस बड़ी ठौरते भई है ताते अब देनों परचो पाछें जो नित्य थारको महाप्रसाद देत हुते तैसेही देन लागे तब ये वैष्णव प्रसन्न होयकें रसोई करन लागे तब तहांताई श्रीआचार्यजी महाप्रभू द्वारिकामें बिराजै तहां जाय वैष्णव पास रहै पाछें श्रीआचार्यजी महाप्रभू श्रीरणछोडजीसों बिदा होयकें अडेलकों पधारे तब सब वैष्णव श्रीआचार्यजी महाप्रभूनके साथ आए सो श्रीआचार्यजी महाप्रभूनको अडेलमें पहुंचायके फेर अपने २ घर आये पाछें श्रीठाकुरजीकी सेवा करन लागे सो वे गोविंददुबे श्रीआचार्यजी महाप्र-

भूनके ऐसे परम कृपापात्र भगवदीय हैं ताते इनकी
वार्ता कहांताई लिखिये ॥ प्रसंग ॥ ४ ॥ वैष्णव ॥ ४१ ॥

अथ राजादुबे माधौदुबे दोऊ भाई
साचोराब्राह्मण तिनकी वार्ता ।

सो ता गाममें दोऊ भाई साचोरा ब्राह्मण रहते
सो एकको नाम हरिकृष्ण हुतौ और एकको नाम
रामकृष्ण हुतौ सो बडो भाई रामकृष्ण पढ्यौ बहुत
हुतौ और छोटी भाई मूरख हुतौ और वह बडो जो
पढ्यौ हुतौ सो गामके चौतरा ऊपर बैठके पटेलके
आगे कथा कहतौ और छोटी भाई मूरख हुतौ सो
खेतीकी रखवारी करतौ सब टहल करतौ सो वह
बडो भाई कछू काम गयौ हुतौ दूसरे गाममें सो ता
दिन इहां की कथा रह गई पाछें एक दिन मेहकी
वर्षा बहुत भई सो वह छोटी भाई खेतते उठिकें घर
आयौ तब भावजने कहौ जो तुम रोटी जैलेउ तब
वा देवरने कह्यौ जो सीत बहुत लागत है और में
बहुत भीज्यौ हूं ताते तू तातो परोसो तौ जेऊँ तब
भावजने कह्यौ जो तू खाय तौ खा नातरमें जायकें
सोय रहत हौ अब तू कहा गामके चौतरा ऊपर
बैठिकें पटेलके आगे कथा कहैगौ के दादेकौ गरास

फेरेंगौ ताते खानों होय तौ खा नातर हूंतौ जायकें
 पडि रहूंगी और जैसो है तैसौ खा नातर कहूं उठिजा
 तब वा देवरके मनमें बहुत दुःख लाग्यौ और अपने
 मनमें विचार्यौ जोहूं या देशको त्याग कहूं कहूं
 निकस जाऊं ता पाछें घरमें ते निकसके मनमें वि-
 चार करन लाग्यौ जो राजादुबे माधौ दुबे बडे महा-
 पुरुष हैं ताते इनको नमस्कार करिकें जाऊं पाछे
 तहां गयौ तब राजादुबे माधौदुबे दोऊ भाईनको नम-
 स्कार कीयौ और रोवन लागौ तब दुबेजीने पूछौ
 जो तू कौन है पाछें देखिके पहिंचान्यौ तब वासों
 कह्यौ जो तूतौ अमुकेको बेटा है हरिकृष्ण तेरो
 नाम है और तू हमारी जातिको है सो तोको ऐसो
 कहा दुःख है तासो तू रोवत है तब वाने कह्यौ जो
 मेरे दुःखको पार नहीं तब दुबेजीने कह्यौ जो तू अ-
 पनो दुःख कहि तोको कहा दुःख है तब याने कह्यौ
 जो तुम मेरे दुःखको दूर करो तो कहूं तुम बडे हौ
 महानपुरुष हो तब दुबेजीने कह्यौ जो श्रीठाकुरजी
 बडे हैं वे सबको दुःख दूर करेंगे तू अपनों दुःख कहि
 तब यानें सब समाचार कहे जो मोकों भावजने ऐसे
 २ वचन कहे हैं सो मेरे हृदयमें खटकत हैं ताते मैं
 तुम्हारे पास आयौ हूं सो मेरौ दुःख तुमसे दूर

होयगो पाछे दुबेजीने वाका समाधान कीयौ समा-
 धान करिकें वाको महाप्रसाद लिवायौ पाछें रात्रि-
 को सोय रह्यो तब प्रातःकाल भयौ तब वासों दुबे-
 जीने कह्यो जो तू स्नान करि आउ तब वह जायके
 देह कुत करि स्नान करिकें आयौ तब माधौदुबेसों
 राजा दुबेने कह्यौ जो अब कहा करियै तुमही जानों
 तुम्हारी जीभ चली है जो तुम करोगे नहीं तो कैसे
 छूटोगे झाड लग्यौ है तब माधौदुबेने कह्यौ जो अ-
 बतौ तुम्हारी शरण आयौ है तुम श्रीआचार्यजी
 महाप्रभूनके सेवक हो अबतौ याको कार्य्य कीयौ
 चाहिये तब पहिले तौ याको क्षौरकरवायौ पाछें स्नान
 करवायके मंदिरके द्वारके आगे बैठायौ तब माधौ
 दुबेने राजादुबेसों कह्यौ जो अब याको कहनों होय
 सो कहौ तब राजादुबेने माधौदुबेसों कह्यौ जो तु-
 म्हारो यह काम है मेरो काम नहीं तासे तुमहीं कहौ
 तब माधौदुबेने राजादुबेसों कह्यौ जो तुम बडे हैं ताते
 तुमहीं कहौ तब राजादुबेने माधौदुबेसों कह्यौ जो
 मेरी आज्ञा है ताते तुमहीं कहौ तब माधौदुबेने वाकूं
 उपदेश दीयौ अष्टाक्षर मंत्र कानमें कह्यौ पाछें वाको
 अष्टोत्तरशत नामको जप करवायौ सो जप कीयौ
 सो एक २ माला जप कीयै पाछें संस्कृत बोलन

लाग्यौ तब माधौदुबेने राजादुबेसों हँसकें कह्यौ जो
 अब आज्ञा होय तौ एक वार याको फेरि जप कर
 बाइये तब राजादुबेने माधौदुबे सों कह्यौ, कह्यौ जो
 अवश्य करवाईये पाछें माधौदुबेने दूसरीवार जप
 करवायौ तब भगवत्स्वरूप स्फुट भयौ और पुराण
 इतिहासमें ज्ञान भयौ तब माधौदुबेने राजादुबेसों
 कह्यौ हंसिकें कह्यौ जो आज्ञा होय तौ अब फेरि-
 याके जप करवाईये तब राजादुबेने माधौदुबेसों
 कह्यौ जो अब यह इतनेहीको पात्र है अधिक समा-
 य नहीं और कह्यौ जो तुम कछू मनमें मति ता-
 ईयौ जो हमते भयौ है ताते यह कछू भयौ है सो
 श्रीआचार्यजी महाप्रभूनकी कृपाते भयौ है हमारौ
 तुम्हारौ स्वरूप तौ वै जानत हैं पाछे वानें उहांई
 प्रसाद लियौ पाछें दुबेजीकी आज्ञा मांगिके अपने
 गांमके चौतरा ऊपर जाय बैठो और कथा कहन
 लाग्यौ पहले बडो भाई कथा कहतौ सो वह गांव
 गयौ जानिके कोई न आवतौ सो वा दिन कहंतै
 वाको सेवक आयौ ताने कथा कहत देख्यौ तब
 वाने गामके पटेलसों आय कह्यौ जो तुम कथा सु-
 निवेको क्यों न गए भट्टजी तौ कथा कहि रहे हैं
 तब पटेल आयके देखे तौ भट्टजी कथा कह रहे हैं

तब पटेलनें कह्यौ जो भट्टजी अबताईं तुम कथा कहनको नाहीं आय तब भट्टजीनें कह्यौ जो पहिलें बडे भाई कथा कहते ताते में नाहा आवतौ अब और गांम गये हैं ताते में कथा कहिवेकों अब आयौहूं तब वे भगवदिच्छाते भट्टजी भलीभांति कथा कहन लाग्यौ तात सब कोऊ बहुत प्रसन्न भए और सब कोऊ कहन लागे जो हमारौ बडौ भाग्य है जो अबकें ऐसौ ब्राह्मण मिल्यौ तब कितनेक दिनमें वह कथा सम्पूरण भई तब सबनें मिलिकें भट्टजीकी पूजा करी और कह्यौ जो अबतो तुमहीं कथा कहिवे करौ कथाकों आइयौ पाछें वह ब्राह्मण माधौदुबेके पास आयौ आयकें वानती करी जो तुमारी कृपाते मेने कही जो जाकी यह पूजा मिली- है सो तुम लेउ यह सब द्रव्य तुमरौ है तुम मेरे गुरुहौ तब राजादुबे माधौदुबेने वासों कह्यौ जो हमारे और तुम्हारे गुरु श्रीआचार्यजी हैं तातें यह द्रव्य सब उनको है हमारौ यामें कछु नाहीं ताते यह द्रव्य सब अडेल पहुंचावनो तब वा ब्राह्मणने सब द्रव्य अडेल पहुंचायौ सो कितनेक दिन पाछें रामदास साचौरा ब्राह्मण और जगन्नाथजोसी य वैष्णव श्रीआचार्यजी महाप्रभूनक दर्शनको अडल

जातहैं तिनके साथ वह द्रव्य अडेल पहुंचाय दीयौ तब कितनेक दिनमें वाकों बडौ भाइ आयौ वह गांम गयौ हुतौ सो आयौ तब याने राजाडुबे माधौडुबेसों कह्यौ जो तुम आज्ञा देउ तौ मेरे पिताको ग्रास है सो फेरौ तब डुबेजीने कह्यौ जो अब कहा कछू संदेह है तू जा सब सिद्ध होयगौ तब वह डुबेजीसों आज्ञा लेकें वा गांमको चलयौ सो जाय पहुंच्यौ पाछें वा राजासों मिल्यौ आशीर्वाद दीयौ तब वह रजपूत वा भट्टको देखिकें बहुत प्रसन्न भयौ और कह्यौ जो हमारो बडौ भाग्य जो तुम कृपा करिके आये और कह्यौ तुम डेरा करौ तब उन डेरा कीयौ पाछें रसोईकी सामग्री चलती करी पाछें सबजनें भट्टजीके पास आय बैठे तब भट्टजीनें एक श्लोकको व्याख्यान कर्यौ तब वे सब जनेबहुत प्रसन्न भये और कह्यौ जो तुम पांच रात्र कृपा करिके रहो पाछें तुमारी बिदा करेंगे ऐसे कहिकें वेतौ अपने घरको गये पाछें रसोई करि श्रीठाकुरजीकों भोग समर्प्यौ भोग सरायकें महाप्रसाद लीयौ तब दूसरे दिन सब मिलिकें विचार करन लागें जो भट्टजीकी बिदा कब करियै और कहा करियै और यह ब्राह्मण बहुत योग्य है और

बहुत दिनमें आयौहै तब उन सबनमें एक वृद्ध हुतौ तिनने कह्यौ जो याको सो मनतौ अन्न देउ और एक सत याकों मुद्रा देउ और याके पिताको ग्रास पुरातन भूमिहै सो एकसो बीघा है सो याको लिखि देउ इतनों लिखि देउ जो हमहूं ब्राह्मणऋणते छूटे तब सबनने कह्यौ जो यह ठीक बात कहेहे सो याको कह्यौ सबनको करना चाहिये पाछें सबन मिलकें चीठी लिखिदीनी और कह्यौ जो याकों अन्न सिद्ध है सो ले जाउ तब भट्टने कह्यौ जो यह सब अन्न मेरे घर पहुंचाओ तब वा अन्नके गाडा भरदीनें और कह्यौ जो अपनेसाथ लिवाय लेजाउ आर सबन मिलकें वस्त्र दीनें और गाय और एक भेंस और सतमुद्रा इतनों याको दीयौ और कह्यौ जो तुम इतनों प्रतिवर्ष आयकें ले जायोकरो तब भट्टजी सबनसों विदा होयकें अपने गांवको चले सो आय पहुंचे तब अपने द्वारेके आगे आय पुकारचौ और पुकार कह्यौ जो भाभी किवाड खोल हों पटेलके चौतरा ऊपर कथा कहिकें और पिताको ग्रास फेरिकें आयौ हों ताते अब द्वारि खोल तब भाभी खोलकें देखे तौ देवर सांचेही ठाढो है तब देखकें बडौ भाई उठि आयौ तब देखे तौ

छोटे भाईके ऊपर भगवत तेज बिराजत है तब वह बड़ों भाई डरप्यौ जो मति यह कहू मनमें बुरी लावे तब वह छोटा भाई भाभीके पांय लाग्यौ और कह्यौ जो तुम्हारे बचनते मोकों श्रीठाकुरजीकी कृपाते भई है तब वाके बड़े भाईने कह्यौ जो स्नान करौ महाप्रसाद लेउ तब छोटे भाईने कह्यौ जो मेतो राजादुबे माधौदुबेकों नमस्कार कीये बिना जलपान न करूंगौ तब वाके बड़े भाईने कह्यौ जो यह कहा तब छोटे भाईने कह्यौ जो यह भयौ है सो सब उनकी कृपाते भयौ है मोकों तो तुम नीके जानत हो जैसौ हो तैसौ तब बड़े भाईने कह्यौ जो मैं तुम्हारे साथ चलूंगो तब दोउ भाई राजादुबे माधौदुबेके घर गये तब जायके बड़े भाईने उनको नमस्कार कीयौ और छोटेने दंडोत करी तब राजादुबेने माधौदुबेसों कह्यौ जो तुम्हारौ सेवक आयौ है और यह प्रसंग याके बड़े भाईके आगे मति कहियौ तब दुबेजीने कह्यौ जावो बैठो तब वे दोउ भाई बैठे ता पाछें दुबेजीसों छोटे भाईने सब वार्ता निवेदन करी तब दुबेजीने कह्यौ जो तेरे उपर श्रीआचार्यजी महाप्रभूनको हाथ है ताते ऐसौ क्यों न होय तब वाके बड़े भाईने कह्यौ जो हमतो श्रीआचार्यजी

महाप्रभूनके दर्शन नहीं करे हमने तौ तुम देखे हौ
 और जैसे याके ऊपर कृपा करिके याकों कृतार्थ
 कीयौ है तैसें मोकोहूं कृपा करके कृतार्थ करौ तब
 वाकू हूं दुबेजीने कृतार्थ कीयौ नाम सुनायौ पाछें
 दोऊ भाईनको महाप्रसाद लिवायौ पाछें छोटे भाईने
 दुबेजीसों कह्यौ जो आज्ञा होय ता अन्न ये मुद्रा
 गाय भेंस कपडा उहां सों जो लायौ हों सो आपके
 मन्दिरमें आवै तब दुबेजीने कह्यौ जो तुमतौ जान-
 तही हौ जो या द्रव्यके धनी तौ श्रीआचार्यजी
 महाप्रभू हैं तब वाने कह्यौ जो आपकी आज्ञा प्रमान
 तब दुबेजीने कह्यौ जो अन्न और गाय भेंस और
 सब द्रव्य इकठोरो करौ पाछें दुबेजीसों दोऊ भाई
 बिदा होयके अपने घर आये तब सब द्रव्य हुतौ
 सो इकठोरो कीयौ पाछें दिन थौरे सेमें श्रीआचा-
 र्यजी महाप्रभू द्वारिका पधारे तब सिद्धपुरमें राणा-
 व्यासके घर उतरे तब राजादुबे माधौदुबे और वह
 सब द्रव्य लेके श्रीआचार्यजी महाप्रभूनके दर्श-
 नकों सिद्धापुरमें आये तब आयके श्री आचार्यजी
 महाप्रभूनके दर्शन कीये पाछें इन दोऊ भाईनको
 श्रीआचार्यजी महाप्रभूनके पास नाम निवेदन कर-
 वायौ और वह द्रव्य हुतौ सो सब भेट कीयौ तब
 दिन द्वै चार रहिके आप आगे पधारे तब राजादुबे

माधौदुबे और वे दोऊभाई ब्राह्मण श्रीआचार्यजी
महाप्रभूनसों बिदा होयकें अपने घर आये पाछें वे
दोऊ भाई ब्राह्मण राजादुबे माधौदुबेके संगते बडे
भगवदीय भए ताते संग करनो सों भगवदीयको
करनों वे राजादुबे माधौदुबे ऐसे कृपापात्र भग-
वदीय हैं ताते इनकी वार्ता कहांताई लिखिये ॥
प्रसंग ॥ १ ॥ वैष्णव ॥ ४२ ॥

**अथ उत्तम श्लोकदास साचौरा ब्राह्मण
तिनकी वार्ता ।**

सो उत्तम श्लोकदास श्रीनाथजीके सेवकनकी
रसोई करते और सबनकूं आप परोसते ताते सब
सेवक उत्तम श्लोकदासकों महतारी कर बोलते सेव-
कनों प्रीतिसे परोसते ताते श्रीगुसांईजी इनके ऊपर
बहुत प्रसन्न रहते वे उत्तम श्लोकदास श्रीआचार्यजी
महा प्रभूनके ऐसे कृपापात्र भगवदीय हैं ताते
इनकी वार्ता कहांताई लिखिये। प्रसंग ॥ १ ॥ वैष्णव ॥ ४३ ॥

**अथ ईश्वरदुबे साचौरा ब्राह्मण
तिनकी वार्ता ।**

सो ईश्वरदुबे श्रीनाथजीके सेवकनकी रसोई करते
और उत्तम श्लोकदासहू श्रीनाथजीके सेवकनकी

रसोई करते सो तब उत्तमश्लोकदासकी देह छूटी तब श्रीगुसांईजीने ईश्वरदुबेको नाम उत्तमश्लोकदास राख्यौ सो वे श्रीनाथजीकी सेवकनकी रसोई करते सो अपनी गांठिते घृत मंगायके सबनके नेकते अधिक घृत परोसते ताते याहूसों सब सेवक महतारी कहके बोलते सो यह बात श्रीगुसांईजीने सुनी सो सुनिके बहुत प्रसन्न भये तब ईश्वरदुबेसों श्रीगुसांईजीने पूछो जो तुम अपनी गांठिते द्रव्यका घृत मंगायके काहेको परोसत हो तब ईश्वरदुबेने कह्यौ जो महाराज इनको सेवामें श्रम बहुत होतहै तब यह सुनके श्रीगुसांईजी बहुत प्रसन्न भय और कहें जो याको सब सेवक ऊपर ऐसी बात सत्य है तब ईश्वरदुबेसों श्रीगुसांईजीने कह्यौ जो तू मांगिहो तेरे ऊपर बहुत प्रसन्न भयौहों तब ईश्वरदुबेने प्रसन्न होयके कहा जो महाराज मेरी मन तुम ऊपरते अप्रसन्न होय तब श्रीगुसांईजीसों वैष्णवनने कहौ जो महाराज याने यह कहा मांग्यौ तब श्रीगुसांईजी सुनिके चुपकरि रहे तब श्रीगुसांईजीसुं हरिदासने पूछो जो महाराज मेरे मनमें सन्देह है जा उत्तमश्लोकदासने यह कहा मांग्यौ तब श्रीगुसांईजीने कह्यौ जो यह संदेहतो उनहीसों मिटैगो तब उन

वैष्णवननें उत्तमश्लोकदाससों पूछौ जो तुमने श्री-
 गुसाईंजी पास कहा मांग्यौ तब उत्तमश्लोकदासने
 कह्यो जो जब श्रीगुसाईंजी मोपर प्रसन्न होयकें
 कह्यौ जो हों तेरे ऊपर प्रसन्न भयौ हों ताते तू मांगि
 तब श्रीगुसाईंजी मोकों प्यारे लागै तब मनमें विचार
 भयौ जो आज प्रभूजीकी प्रसन्नताते खरो प्यारो
 लागतहों और में सेवक हों और जो कदाचित्
 कोऊ अपराधते मन प्रसन्न होय जाय तब मेरो
 मन कहूं बिगरे ताते यह मांग्यौ जो सदा निरंतर
 तुमारे चरणारविन्दपर मन रहे सो उनके दीएते
 रहे तब यह बात सुनिकें सब वैष्णव प्रसन्न भये
 तब विचारे जो सेवकको ऐसोई धम चाहिये पाछें
 श्रीगुसाईंजी प्रसन्न होयकें श्रीअंगकी सेवादीनी सो
 वे मुखिया भीतारिया भये वे उत्तमश्लोकदास श्री-
 आचार्यजी महाप्रभूनके ऐसे परमकृपापात्र भगव-
 दीय हैं ताते इनकी वार्ताको पार नहीं ताते इनकी
 वार्ता कहाँताई लिखिये॥ प्रसंग ॥ १॥ वैष्णव ॥ ४४॥

अथ वासुदेवदास छकडा सारस्वत

ब्राह्मण सीहनंदके तिनकी वार्ता ।

सो एक समय श्रीआचार्यजी महाप्रभूनके बड़े
 पुत्र श्रीगोपीनाथजीसों अडलते आगरे पधारे सो

आगरमें वैष्णवननें एक सौ एक मोहर भेंट कीनी पाछें आगरते श्रीगोपीनाथजीनें आज्ञा करी जो कोई ऐसो वैष्णव है जो एक सौ एक मोहर हमारे घर पहुंचावै तब वासुदेवदासने कह्यो जो महाराज मोहर मोकों देउ में पहुंचाउंगो तब वे मोहर वासुदेवछकडाको दीनी सो मोहर लायके मेलिके गोला कीयौ सो गोलाकी पूजा करत मार्गमें चलेगये सो दिन पांचमें अडेलजायपहुंचे सो गांवकेबाहर गोला फोरके मोहर काटि पाछें श्रीगुसांईजीको दीनी और श्रीगोपीनाथजीको पत्र श्रीगुसांईजीको दीनी पाछें श्रीगुसांईजीनें वह पत्र बांचिके मोहर गिन लीनी पाछें श्रीगुसांईजीनें वासुदेवदासको महाप्रसाद लिवायौ पाछें वासुदेवदासने श्रीगुसांईजीसों बीनती कीनी जो महाराज पत्रको जबाब लिखियै और पत्रमें मोहरनकी पहुंच लिखियै जो हुंतौ सवार जाउंगौ तब श्रीगुसांईजीनें वा पत्रको जबाब लिखि दीनों जो मोहर पहुंचीताकी पहुंच लिख पत्र विडचौ सो बीडक वासुदेवदासको दीनों पाछें वासुदेवदास सोय रहै तब रात्रि धडी एक रही तब वासुदेवदास उठिकें श्रीगुसांईजीके पास आयके दंडोत करिकें अडेलते चले सो पांचदिनमें श्रीजीद्वाराआये श्रीग-

साईजीको पत्र श्रीगोपीनाथजीको दीनौ दिन दशमें अडेलआये और गये सो पत्र वांचिक गोपीनाथजी बहुत प्रसन्नभये आर पूछौ जो वासुदेवदास मौहर कौन भांतिसों लगये हुते तब वासुदेवदासनें कह्यौ जो महाराज मौहरनको गोला करकें वा गोलाकी पूजा करत लगयौ तब श्रीगोपीनाथजीने कह्यौ जो या भांति कबहुं न राखियै जो स्वरूप करि मानियै ताकों या भांति कैसे करियै तब वासुदेवदासनें कह्यौ जो महाराज प्रतिष्ठा तौ न भई हुती ॥ प्रसंग ॥ १ ॥

बहुर एकसमय श्रीगुसाईजी श्रीमथुरामें बिराजत हुते सो एक समय श्रीगुसाईजी शृंगार करि सेवाते पहुंचिकें बाहर बैठकमें बिराजे सो बैठकमें बैठकें रूपचंदनंदाके पत्र लिख्यो तामें वसंतकी सामग्री मंगाई तब वासुदेव सो कह्यौ जो तू इतनी सामग्री लेकें संध्याकों आईयौ तब भंडारीको आज्ञा दीनी जो एक टोकरा याको प्रसादको देउ तब भंडारीनें सुको प्रसाद दीनों टोकरामें तब श्रीगुसाईजीनें वासुदेवदासको आज्ञा दीनी जो तोकों पनही पहरेंकी कछू चिंता नाही पैडेमें प्रसाद खातो चलयौ जैयौ तब वासुदेवदास सोई करत आयै सो जब आगरे आय पहुंचे तबताई प्रसाद खाय चुके तब झोरी

झारीकें रूपचंदनंदाके घर गये तासमय रूप चंद-
नन्दा अपने घर प्रसाद ले चुक्यो हौ चल्लेकें सीक
करतहो सो वासुदेवदास पत्र लेकें आये तब रूप-
चंदनंदानें हाथ धोय पोंछिकें वह पत्र मांथे चढायकें
लीनों और भाईसों कह्यौ जो वासुदेवदास आये हैं
सो घरमें कह्यौ ये भूखे होयगे तब वासुदेवदासने
कह्यौ जो मोकों तौ मथुरा जानों हैं तासों मोकों
सखडी महाप्रसाद लेवेको अवकाश नाही ताते
सामग्री लेदेउ तौ में जाऊं इहां तौ प्रसाद लेउंगो
नाहीं तब रूपचंदनंदा वस्त्र पहरेकें सामग्री लेन
गये तब वासुदेवदास वहां गये तब रूपचंदनंदानें
छोटे भाई गोपालदाससों कह्यौ जो अपने घरमें
जितनो प्रसाद होय सो तू लेके छारछू दरवाजे
बैठियौ हम आवत हैं तब छोटे भाईने जितनों घरमें
प्रसादहौ सो सब लेकें छारछू दरवाजे आय बैठ्यौ
और रूपचंदनंदा बाजारमें आयके सब सामग्री
लीनी तब वासुदेवदासने कह्यौ जो मेरो अगारौ घर
तौ प्रसादी है तब सब सामग्री पिछली ओर कटिसों
दृढ़ कर बांधी पाछें रूपचंदनंदा और वासुदेवदास
छारछू दरवाजे आये तब देखें तौ छोटे भाई बैठो
है प्रसाद लीये सो सब प्रसादसों वासुदेवदासकी

झोरी भरी और विदा कीए आप दोऊ भाई घरको आए और आपवासुदेव मथुराको आये सो तीसरे पहर श्रीगुसांईजी स्नान करवेकों पधारे हुते ता समय वासुदेवदास सामग्री लेके आय ठाडौ भयौ तब श्रीगुसांईजी उठिके वासुदेवदासकी कटिते सामग्री खोलिलीनी और श्रीगुसांईजी वासुदेवदासके ऊपर बहुत प्रसन्न भये और आज्ञा दीनी जो तोको महाप्रसादकी सामग्री राखी है सो जायके प्रसाद ले तब वासुदेवदास विश्रांत स्नान करिके आयौ तब प्रसाद लीयौ सो वासुदेवदासकी क्षुधा बहुत हुतीमणदेठखातौ परि जैसौ खातौ बहुत तैसेही बहुत पराक्रम हुतो मथुराते दोय पहरमें आगरे गये और आये ऐसे पराक्रमी हुते ॥ प्रसंग ॥ २ ॥

बहर नित्यप्रति श्रीगुसांईजी श्रीठाकुरजीकी सेवा करिके बाहिरआयके खवाससो कहते जो तू थेली पीढा लैके विश्रांतजैयौ और आपदर्शनार्थ जन्मस्थान पधारते सो जन्मस्थान दर्शन करिके पाछे श्रीगुसांईजी विश्रांत स्नानको पधारते या भांतिसों श्रीगुसांईजी नित्य करते सो एकदिन मथुरिया चौबे सब मिलके काजीकेपास जायके चुगली करी लो लो दहसों लाग बांधी करौ सो इनके

सेवक आए हैं सो तुमको दोय चार हजार रुपैया देइंगें तब काजीमनुष्य दोयसौ हथियार बांधिकें जन्मस्थान आय ठाडौ भयौ इतनेमें श्रीगुसांईजी श्रीकेशोरायजीके दर्शनको पधारे तब दर्शन करिकें बाहर आए पाछें घोडाऊपर सवारभये तब काजीने कह्यौ जो अब तुम कहां जाउगे तब वासुदेवदासनें श्रीगुसांईजीसों बीनती कीनी जो महाराज मोकों बुरी नजर दीसत है तब श्रीगुसांईजीने कह्यौ जो ये तेरो कहा करेंगे तोसों होय सों तू हू करि तब वासुदेवदास देखे तौ एकके हाथमें ढाल और गुरज देखी सो ताकें वासुदेवनें एक थपेड मारी सो थपेड लागतमात्र वह तौ गिरपरचौ तब वाकी ढाल और गुरज लेकें वासुदेवदासके पीछें मनुष्य बीस पच्चीस हुते तब वे भाजिकें हवेलीमें बैठिकें दरवाजौ देकें छिप रहै तब श्रीगुसांईजी घोराऊपर सवारभये और उनके दरवाजैहौकर पधारे तब वासुदेवदासने श्रीगुसांईजीसों कह्यौ जो महाराज अब भले इकठौरे भये हैं जो आज्ञा होयतौ इन सबनकों दरवाजौ तौरकें मारों तब श्रीगुसांईजीनें नाहीं कीनी और कह्यौ जो तेरो ये कहा लेत हैं पाछें श्रीगुसांईजी विश्रांत पधारे तब दूसरे दिन श्रीगुसांईजी स्नानको पधारे तब वह

काजी अपने मनुष्यनकों साथ लेकरं गरमें पडुका
 देंकें आयकें बीनती करी जो महाराज आज हम
 कन्हैया देखें और भीमहं देखे जो प्रभूजीके प्रता-
 पते सब डरे तब श्रीगुसांईजीने कह्यौ जो यह ऐसो
 हुतौ जो फिर यासों बोलते तौ अकेलौ यह सबनकों
 मारतौ तुम सब ठोर रहते और याको मनमें तौ
 बहुत आईहुती परि हमें तौ ऐसी न करनीहुती
 पाछें काजीको समाधान करिकें घरको पठायौ सो
 श्रीगुसांईजीकी कृपाते श्रीआचार्यजी महाप्रभूनके
 सेवक ऐसे सामर्थवान हुते ॥ प्रसंग ॥ ३ ॥

और सीहनन्दमें उत्सव होतौ तब वासुदेवदास
 कों बुलावते नाहीं तब एकसमय सीहनन्दके वैष्णव
 मिलिकें श्रीगोकुल श्रीगुसांईजीके दर्शनको आये
 सो तिनके साथ वासुदेवदासहं आये तब वैष्णवननें
 श्रीगुसांईजीको दर्शन कीयौ पाछें उहां रहिकें कोई
 समय पायकें वासुदेवदासने श्रीगुसांईजीसों बीनती
 करकें कही जो महाराज ये वैष्णव मोकों सीहन-
 न्दमें उत्सव होतहै तब बुलावत नाहीं तब श्रीगुसां-
 ईजी चुपकरिरहै तब पाछें उन वैष्णवनको जब डे-
 राको बिदाकिये तब तिनमेंते चारपांच मुखिया रहैं
 मो तिनको श्रीगुसांईजीने राखें और सब वैष्णव-

नको डेरा पठाये तब श्रीगुसांईजीनें उन वैष्णवनसों
 पूछो जो तुम वासुदेवदासको उत्सव कीर्तनमें क्यों
 नहीं बुलावतेहो तब उन वैष्णवननें बीनती करिकें
 कही जो महाराज वासुदेवदासको बड उत्सवमें
 क्यों नहीं आवतहैं और छोटे उत्सवमें नहीं बुल
 वत जो ये भूखे रहेंगे तो दोषलागे तब श्रीगुसांई-
 जीनें उनको आज्ञादीनी जो तुम बंधान बांधो जो
 सोवैष्णवनकों बुलावो तो पचास तौ और वैष्णव-
 नको बुलावौ और पचासमें एक वासुदेवदासको
 बुलावौ और जहां पचास बुलावो तो पच्चीस तौ और
 वैष्णव बुलावो और पच्चीसमें एक वासुदेवदासको
 बुलावो और जहां पच्चीस बुलावो तहां तेरह तौ
 और वैष्णवनकों बुलावौ और बारहमें एक वासु-
 देवदासको बुलावौ ऐसे दशतांई श्रीगुसांईजीनें
 बंधान बांध्यौ ऐसे पांचतांई बंधान बांध्यौ ऐसे जि-
 तने बुलावने होय तितने तौ और वैष्णव बुलावौ
 और आधेनमें एक वासुदेवदासको बुलावो तब उन
 वैष्णवननें कह्यौ श्रीगुसांईजीसों जो महाराज भूखे
 रहेगें तब श्रीगुसांईजीनें उन वैष्णवनसों कह्यौ जो
 दशतांई तुम आधेमें वासुदेवदासकों बुलावौ तामें
 चाहेसो/होय ताको तुम कहा करोगे सो यह प्रकार

मेने तुमको करदीनों है सो मेरी आज्ञाते तुमको कछू बाधा नहीं जो तुम आधेमें वासुदेवदासको खुशीसे बुलावौ पाछें भूखो रहे तौ तुमको कछू दोष नहीं परि यह श्रीआचार्यजी महाप्रभूनको सेवक है ताते बुलायेबिना वासुदेवदासको तुम उत्सव मति करियो तब वैष्णवनने कही जो महाराजकी आज्ञा होयगी सोई करेंगे तब वे कोईक दिन श्रीगोकुल रहिकें पाछें सब वैष्णव सीहनन्दको गये तब वे वैष्णव सोई करन लागे श्रीगुसांईजी वासुदेवदासको श्रीआचार्यजी महाप्रभूनको सेवक जानिकें ऐसी कृपा करते सो वे वासुदेवदास श्रीआचार्यजी महाप्रभूनके ऐसे परम कृपापात्र भगवदीय हैं ताते इनकी वार्ता कहांताई लिखिये ॥ प्रसंग ॥ ४ ॥ वैष्णव ॥ ४५ ॥

अथ बाबा वेणुदास और कृष्णदास
घघरिया तथा यादवदास ति० वा०।

सो वे बाबा वेणु दास हृदयके नेत्रनसों देखते सो बाबावेणुदास और छोटे भाई कृष्णदास ये दोऊ भाई श्रीकेसोरायजीके आगे कीर्तन करते तहां याद

वदास हूं कीर्तनमें साथ हुते तब कीर्तन करनलागे सो ये पद गावत हुते जी “देखरी नैनन गिरवरधर-नसों” यह पद गावत कृष्णदासने अपनी देह छोड़ी तब यादवदासने बाबा वेणुदाससों कह्यौ जो यह पद गावत कृष्णदासने अपनी देह छोड़ी तब बाबा वेणु-दासने कह्यौ जो हमतौ अपनी देह श्रीनाथजीद्वारमें छोड़ेंगे पाछें कृष्णदासको संस्कार श्रीकेसोराय-जीके पाछें कीयो ता पाछें सूतक उतरचो तब शुद्ध होयकें श्रीनाथजीद्वार चले सो कितनेक दिनमें श्रीनाथजी द्वार आय पहुंचे तब पर्वत ऊपर आयकें बाबा वेणुदासने श्रीनाथजीके दर्शन कीये पाछें बाबा वेणुदासने कीर्तन कीये तब श्रीनाथजीके कंठते फूलकी माला गिरि सो माला और एक बीडा रामदास भीतरियानें बाबा वेणुदासको दीनों सो बाबा वेणुदासने मांथे चढायकें लीनों तब राम-दास भीतरियानें बाबावेणुदाससों कह्यौ जा तुम्हारी बिदा श्रीनाथजीने कीनी तब बाबावेणुदासने श्री-नाथजीको दंडोत कीनी पाछें नीचे उतरे सा आ-न्यौरकी ओर उतरे तब बाबा वेणुदासने यादव दाससों कह्यौ जो हूं तो पर्वतते नीचे उतरिके अपनी देह छोड़ूंगो तू सावधान रहियौ और तू वेगो

आईयों ऐसैं यादवदाससों काहक बाबा वेणुदास पर्वतते नीचे उतरके श्रीनाथजीको दंडौत कर तमात्र अपनी देह छोडी पाछें यादवदासनें बाबा वेणुदासको संस्कार कीयों पाछें सूतक उतरयों तब शुद्ध होयकें यादवदास श्रीगुसांईजीके पास आये सो श्रीगुसांईजीको दर्शन कीयों और दंडौत कीनी तब श्रीगुसांईजी यादवदासको परम भगवदीय जानकें मनमें विचारें जो कोइ एक दिनमें यादवदासकी स्थितिहै ताके लिये श्रीगुसांईजी विचारें जो श्रीनाथजीकी सेवामें यादवदासको राखियै तौ अच्छो है तब श्रीगुसांईजीनें कह्यो जो यादवदास तुम अकेले हो ताते अब श्रीनाथजीकी सेवा करो तब श्रीगुसांईजीकी आज्ञाते यादवदासनें श्रीनाथजीकी सेवा नीकी भांतिसों करी सो सेवासों पहुंचिकें यादवदास नीचे उतरे और नीकी भांतिसों सेवा करते सो कहूं बंगालेमें जायकें यादवदास लकडी परी होय सो इकठौरी करी पाछें जब जान्यो जो लकडी सिद्ध भई तब श्रीनाथजी पास आज्ञा मांगिकें दंडौत करिकें नीचे उतरे सो अग्नि लेकें जहां लकडी इकठौरी हुती तहां आप आए सो लकडीनको श्रीनाथजीकी स्वजाके आगे चौतरा बनायों सो चौत-

राके ऊपर आप पोढ़े जादिशाको व्यार चलत हुती
 ता दिशाको अग्नि धरिकें ध्वजाको प्रनाम करिकें
 श्रीनाथको स्मरण करिकें यादवदासनें अपनी देह
 छोडी पाछें व्यारते अग्नि जरि उठी सो जरिकें भस्म
 होगई यादवदासने अपने हाथनसों अनो संस्कार
 कीयो तथा बाबा वेणुदासको संस्कार कीयो ताते
 यादवदासनें अनो यही विचार कीयो जो सब से-
 वकनको मेरो संस्कार करिवेमें कष्ट होयगौ और
 सेवामें विरोध होयगो ताते यादवदासनें अनो सं-
 स्कार अपने हाथसों कीयो और पहिलें बाबा वेणु-
 दासनें यादवदाससों कह्यौ हुतौ जो तू वेगी आइ-
 यौ बिलम्ब मति करियौ सो तो श्रीगुसांईजीने श्री-
 नाथजीकी सेवा सोपी ताते इतनेदिन बिलंब भयौ
 पाछें दिन द्वै भये तब श्रीगुसांईजीने पूछौ जो या-
 दवदास देखियत नाही सो कहां गयो है तब सेव-
 कननें कह्यौ जो महाराज यादवदास कहूं बनमें ल-
 कडी इकठौरी करत हुते तब श्रीगुसांईजीने कही
 जो उहां जायकें देखौ तौ तब श्रीगुसांईजीके कह-
 तमात्र वैष्णव जायकें देखें तौ उहां कछू नाही रा-
 खकी ठेरी परी है तब वैष्णवननें श्रीगुसांईजीसों
 आयकें कह्यौ जो महाराज उहां तौ कछू दीखत

नाहीं राखकी ठेरी परी है तब श्रीगुसाईंजी अपने श्रीमुखसों कह्यौ जो ऐसो भगवद्भक्त जो काहुंको दुःख न देतौ वे यादवदास श्रीमहाप्रभूनके ऐसे परम कृपापात्र भगवदीय जो स्वइच्छासे अपनी देह छोडी सो सब ग्वालननें देख्यौ सो चक्रत होय रहे ताते बाबा वेणुदास और कृष्णदास घवरिया और यादवदास बनिया ऐसे कृपापात्र भगवदीय हैं ताते इनकी वार्ताको पार नाहीं सो अब कहांताई लिखिये ॥ प्रसंग ॥ १ ॥ वैष्णव ॥ ४६ ॥

अथ जगतानन्द सारस्वत ब्राह्मण

थानेश्वरकेवासी तिनकी वार्ता ।

सो जगतानन्द सरस्वती ऊपर कथा कहते तब समय श्रीआचार्यजी महाप्रभू थानेश्वर पधारे सो जगतानन्द सरस्वती ऊपर कथा कहि रहै हुते सो तहां श्रीआचार्यजी महाप्रभू जाय विराजे तब जगतानन्द सरस्वतीनें एक श्लोकको व्याख्यान कीयौ तब श्रीआचार्यजी महाप्रभूननें कह्यौ जो याको व्याख्यान भावतौ बहुत है तब जगतानन्दनें कह्यौ जो श्लोकको अर्थ तौ कह्यौ जा श्रीशुकदेवजीनें कह्यौ सो कह्यौ तब श्रीआचार्यजी महाप्रभूनने

कह्यौ जो श्रीशुकदेवजी लरिका है तब जगतानन्दनें कह्यौ जो अधिकी व्याख्यान होय तौ तुमही आय के कह्यौ तब श्रीआचार्यजी महाप्रभूननें कह्यौ जो तू तौ व्यास आसन बैठ्यौ है हम तेरो अतिक्रम क्यों कर कर तब इतनों सुनत मात्र जगतानन्दचौकी छोड़के उठिठाडौ भयौ तब श्रीआचार्यजी महाप्रभूनने चौकीऊपर वस्त्र बिछायके पोथीधरी और फिर आप ताके नीचे बैठे और वा श्लोकको भाव फेरिके वाको अर्थ कह्यौ सो व्याख्यान करत२तीन पहर व्यतीत भये तब श्रीआचार्यजी महाप्रभूननें कह्यौ जो या श्लोकके व्याख्यान मास दोय तीनलों बीतेगो परि अब तुम भूखे होउगे ताते अब तुम उठो तब जगतानन्दनें कह्यौ जो महाराज आप तौ ईश्वर आपके भाव घटिवेके नहीं तहां चाहो तहांताई कहौ तब श्रीआचार्यजी महाप्रभूननें पोथी बांधी तब जगतानन्दनें साष्टांग दंडवत कीनी और कह्यौ जो महाराज मेंरौ घर पावन करियै तुम तो साक्षात पूरन पुरुषोत्तम हौ तब श्रीआचार्यजी महाप्रभूनने कह्यौ जो तू तो अन्यमार्गीय है हम तेरे घर कैसे पधारेंगे तब जगतानन्द सरस्वती स्नान करिके आय ठाडौ भयौ और वीनती करके कह्यौ जो

महाराज मोकों कृपा करिकें नाम दीजिये तब श्री-
 आचार्यजी महाप्रभूनने कृपा करिकें नाम दीयो
 तब श्रीआचार्यजीमहाप्रभू वाके घर पधारे और
 जगतानंदके घर सेव्य ठाकुरजी हुते सो वे तुल-
 सीमांश बैठते तहां वे सदा एक लोटी श्रीठाकुर-
 जीके ऊपर डारते हैं तब श्रीठाकुरजीकू श्रीआचा-
 र्यजी महाप्रभूनने तुलसीमेंसों काढिके पंचामृतसों
 स्नान करवाय न्यारे बैठाये पाछें शृंगार करि राज
 भोग समर्प्यो पाछें जगतानंदकों सेवाकी विधि
 सिखाये और कह्यो जो नित्य याही भांतिसों सेवा
 करियो तब जगतानंद भले भगवदीय भये सो श्री-
 ठाकुरजीकी सेवा नीकी भांतिसों करन लागे सो वे
 जगतानंद श्रीआचार्यजी महाप्रभूनके ऐसे कृपा-
 पात्र भगवदीय है ताते इनकी वार्ता कहांताई लि-
 खिये ॥ प्रसंग ॥ १ ॥ वैष्णव ॥ ४७ ॥

अथ आनंददास विश्वंभरदास दोऊ

भाई क्षत्री हुते तिनकी वार्ता ।

सो वे दो भाई अति कृपापात्र भगदीय हैं सो वे
 दोऊ भाई एकत्र बैठिकें भगवत्वार्ता करते तथा
 श्रीआचार्यजी महाप्रभूनकी वार्ता अहर्निश करते

कबहुं वाता कहत छोटे भाइकों निद्रा आय जाती तब श्रीठाकुरजी हुंकारी देत तब बड़े भाइ आनंददाससों तो भगवत्वार्ताके आवेशमें जानते नहीं जो हुंकारी कोन देत है जब वार्ता कहि चुकते तब आनंददास विश्वंभरदाससों पूछते जा मेंने तोसूं वार्ता कहि सो तू समझौ तब विश्वंभरदासनें कही जो मे तौ इहांताई सुनी पाछें मोका ता निद्रा आई हुता तब आनंददासनें कही जो तू तौ अबताई हुंकारी देत हुतो तब विश्वंभरदासनें वासों कही जो मे तौ हुंकारी दीनी नहीं तब आनंददासनें कही जो श्रीठाकुरजीनें हुंकारी दीनी होयगी तब दोऊ आनन्ददास विश्वंभरदास अपने मनमें बहुत प्रसन्न भये और कह्यौ जो हमारो बड़ो भाग्य है श्रीआचार्यजी महाप्रभूनकी कृपाते श्रीठाकुरजीने हुंकारी दीनी हमारी कही सब वार्ता सुनी ताते वे दोऊ भाई आनंददास विश्वंभरदासश्रीआचार्यजी महाप्रभूनके ऐसे कृपा पात्र भगदाय हैं ताते इनकी वार्ता अब कहांताई लिखय ॥ प्रसंग ॥ १ ॥ वैष्णव ॥ ४८ ॥

अथ एक ब्राह्मणी हुती तिनकी वार्ता ।

सो ब्राह्मणीके माथे श्रीआचार्यजी महाप्रभूननें श्रीबालकृष्णजीकी सेवा पधराई हुती सो वह ब्राह्म-

णी श्रीबालकृष्णजीकी सेवा करती परि वह अपने घरमें निपट निकंचन हुती ताते श्रीठाकुरजीके आगे माटीको कुंजा भर राखती और रसोईमें माटीके पात्र और घर निपट संकीर्ण इतनेहीमें सब रसोई मंदिर आचार हुते और नेत्रनसों थोरी दीसे वृद्ध भइ ताते ऐसा सेवा करती सो और वैष्णव देखिके सेवा करतमें सो आपसमें सब चर्चा करन लागे जो श्रीआचार्यजी महाप्रभूनने या ब्राह्मणीके माथे कहा जानिके सेवा पधराई है यह तौ कछू समझत नाहीं ऐसे सब वैष्णव आपुसमें चर्चा वार्ता करन लागे सो एकदिन श्रीआचार्यजी महाप्रभूनको कोस ऊपर गांव हुते तहां पधारे हुते पाछे तहां ते फिरे तब तहांते वा ब्राह्मणीके द्वारके आगे होयके निकसे तब साथके वैष्णव हुते तिननें श्रीआचार्यजी महाप्रभूनसों वीनती कीनी जो महाराज आपने वा ब्राह्मणके माथे श्रीबालकृष्णजीकी सेवा पधराई है ताको यह घर है सो याके घर पधारके देखिये याको घर याको आचार कैसो है तब श्रीआचार्यजी महाप्रभू आप असरण सरण अंतरयामी वा ब्राह्मणीके घर पधारे सो ता सभें वह ब्राह्मणी रसोई करत हुती रोटी करिके धीसों चुपरत जाय और श्रीठाकुरजी आप

आरोगत जाय परि वाकों तौ दीसत कछू नहीं हाथसों टटोरे कहैं जो रोटी आगें दीसत नहीं कहा मूस बिलाई ले जात है ऐसे कहै और रोटी करत जाय और श्रीठाकुरजी आरोगत जाय सो श्रीआचार्यजी महाप्रभू ठाढे ठाढे देखे पाछें श्रीआचार्यजी महाप्रभूननें वा डोकरीसों कह्यौ जो अरी बाई तेरो बडौ भाग्य है जो तेरी करी रोटी श्रीठाकुरजी आप आरोगत हैं तब वह बाई श्रीआचार्यजी महाप्रभूनको दंडोतकरि पाछें बोली जो महाराज में नहीं जानी जो राज पधारे हैं मोकों तौ कछू दीसत नहीं परि तुम्हारी कही श्रीठाकुरजी मान लेत हैं तब श्रीआचार्यजी महाप्रभूनने वैष्णवनसों कह्यौ जो श्रीठाकुरजा तौ केवल स्नेहके वश है ताते मेरी कानसों श्रीठाकुरजी आरोगत हैं और उनकी भक्ति मान लेत हैं तब वैष्णव मुसिक्यायकें चुप करि रहै पाछें श्रीआचार्यजी महाप्रभू अपने घर पधारे वा बाईके ऊपर बहुत प्रसन्न भयै वह बाई श्रीआचार्यजी महाप्रभूनकी ऐसी परम कृपापात्र भगवदीय ही ताते इनकी वार्ताको पार नहीं सो अब कहां ताई लिखिये ॥ प्रसंग ॥ १ ॥ वैष्णव ॥ ४९ ॥

अथ एक क्षत्राणी तिनकी वार्ता ।

सो वह क्षत्राणी आप चरखा कातती सो सूतके पैसा दोय तीन आवते सो ताकी जो सामग्री आवती सो ले आवती रसोई बालभोग करि श्रीठाकुरजीको भोग समर्पती ऐसे निर्वाह करती सो एक दिन एसो विचार कर्यौ जो सूतकाते तासो थोरोर अधिक काते सो इकठोरौ करत जाय सो टका दश बारहको भेलौ कियौ सो सूत बेचके टका दस बारह आये सो विनको घृत खांड ले आई सो घर आयके मेदा छानी पाछें दूसरे दिन सबके लड्डुआ सिद्ध कीये और मनमें कही जो दिन दस बारहको सामग्री सिद्ध भई है सो दिन दश बारहको निश्चंत भईहों सो तादिन श्रीठाकुरजीको आरोगाई और बाकी सामग्री एक हांडीमें करके मंदिरमें धरि राखी पाछें श्रीठाकुरजीको राजभोग समर्प्यौ भोग सराय आरती करके आप महाप्रसाद लेके चरखा काँतन लागी तब श्रीठाकुरजी आप सिंहासनसे उतरके सामग्रीकी हांडी लैके सिंहासन ऊपर आय बैठे सो हांडीमेंसे लड्डुवा काढिके आप आरोगन लागे तब मंदिरमें हांडी खटखटान लागी तब वा क्षत्राणीने कही जो कहा मंसा बिलाई होय देख तौ

सही कोन है तब वह क्षत्राणी काँतत हुती सो तहांते उठिके देखन गई मंदिरके किवाड खोलकें देखे तौ श्रीठाकुरजी सिंहासन ऊपर हांडी लेकें बैठे हैं और वामेते लड्डुआ काढि २ कें आरोगत है तब वह क्षत्राणी देखकें छाती कूटनलागी और कहन लागी जो यह सामग्री तौ तुम्हारेही लिये दिन दस बारहको करि राखी हुती यह तुमने कहा कीयौ जो आजही आरोगे तब श्रीठाकुरजीने कह्यौ जो कहा तु लेखो करिके आजही निवरी तेने आलसके लिये इक ठौरीकर राखी हुती सो कहा नित्य नई न होती तब वह क्षत्राणी बोली जो महाराज मेरो अपराध क्षमा करो अबते नइ सामग्री नित्य प्रति करिकें समंपूगी सो श्रीठाकुरजी याके लिये आरोगे जो ये दिन दस बारहको निश्चंत होती तो याकों आरत रहती नाहीं और जो नित्यकी नित्य सामग्री करे तौ याकों आरति रहै जो मोकों सामग्री करनी है ताते श्रीठाकुरजीने ऐसैं करी ताते श्रीठाकुरजीकी सामग्री दिन वारिते अधिक न करनी और या क्षत्राणीने छाती कूटी जो श्रीठाकुरजी आरोगे ताके लिये कूटी श्रीठाकुरजी तो प्रसन्न होयकें आरोगे वाने छाती याके लिये नाहीं कूटी जो श्रीआचा-

र्यजी महाप्रभूनके मार्गकी तौ यह मर्यादा है जो श्रीठाकुरजीके आगे भोग धरियै सो आरोगे उठाय धरियै सो सामग्री होय सो न आरोगे तौ श्रीठाकुरजीनें आचार्यजी महाप्रभूनके मार्गकी मर्यादा छोड़ी तो कदाचित मोहकों छोड़ें याके लिये वा क्षत्राणीने छाती कूटी तब श्रीठाकुरजीनें कही जो तू तौ आजही लेखौ करि निवरी नित्य नई कहा न होती तब याकों निश्चय भयौ जो मार्गकी मर्यादा तौ श्रीठाकुरजीनें नाहीं छोड़ी हों दस बारह दिनकों निश्चंत होय बैठती ताके लिये श्रीठाकुरजी आरोगे ताते वह क्षत्राणी ऐसी परम भगवदीय ही तिनकों श्रीठाकुरजी सेवाते एक क्षणहूं स्वास्थ होन देते नाहीं सेवामें सदा आरति रहै सो कियौ वा क्षत्राणीसों श्रीठाकुरजी ऐसे सानुभाव हुते जो चाहियै सों मांगलेते ऐसी कृपापात्र भगवदीय ही ताते इनकी वार्ताको पार नाहीं सो कहांताई लिखिये ॥ प्रसंग ॥ १ ॥ वैष्णव ॥ ५० ॥

अथ सास गोरजा, बहू समराई दोऊ
क्षत्राणी सीहनंदकेवासी ति० वार्ता ।

सो इनके मांथे श्रीआचार्यजी महाप्रभूननें

श्रीदामोदरजीकी सेवा पधराइं हुती सो इन सास
 बहुनते श्रीठाकुरजीबहुत सानुभाव हुते सो एक
 समय श्रीआचार्यजी महाप्रभू आप थानेश्वर पधारे
 तब थानेश्वरहीमें रहै परि सीहनंदन पधारते जो
 काहेते थानेश्वर और सीहनंदके बीच सरस्वती नदी
 है सो श्रीआचार्यजी महाप्रभू सरस्वती उल्लंघन
 न करते काहेते जो आप आचार्य है ताते थानेश्वर-
 हीमें रहते सो श्रीआचार्यजी महाप्रभू थानेश्वर
 पधारे तब सासनें बहूसों कह्यौ जो में श्रीआचार्यजी
 महाप्रभूनके दर्शनको जातहों तू श्रीठाकुरजीकी
 सेवा नीकी भांतिसों करियौ शृंगार करि रसोई
 करिकें भोग समर्पियो इतनों बहूसों सास कहिकें
 श्रीआचार्यजी महाप्रभूनके दर्शनको गई तब वह
 न्हायके सेवा करन लागी जब पाक सिद्ध भयौ तब
 श्रीठाकुरजीको भोग समर्प्यौ तब समयानुसार
 भोग सरावन गई तब देखे तौ सामग्री सब यथा-
 स्थिति ज्योंकि त्यों है तब बहूनें वीनती कीनी जो
 महाराज मेंतौ जानत कछू नाहीं और सासनें तो
 मोसों कह्यौ नाहीं और तुम आरोगत नाहीं सो
 काहेते अबहू कहा करूं ऐसे बहुत बिलबिलायके
 खेद करन लागी जो मोसों कछू चूक परि होयगी

रसोई आछी न भई होयगी तथा पात्र मांजितेमें शुद्ध न भये होयगे कछू तौ भयो होयगो जो श्रीठा-
 कुरजी आरोगत नाही पाछें भोग सराय पात्र मांजे
 आछी भांतिसों धोय पोंछके फेरि रसोई करी दूस-
 रीबार जब पाक सिद्ध भयौ तब श्रीठाकुरजीको
 भोग समप्यौ और मनमें कहत जाय जो मेते कछू
 चूक पारि होयगी हों तौ कछू जानत नाही कहा
 भयौ ताते श्रीठाकुरजी आरोगे न होयगे अब आछी
 भांतिसों पात्र मांजिकें रसोई करी है सो अब श्रीठा-
 कुरजी आरोगेंगे सो जब समय भयौ तब दूसरी-
 बेर भोग सरावन गई तब देखेतौ श्रीठाकुरजीके
 आगे सामग्री यथास्थित है तब फेर बिलबिलावै रावै
 और बनिती करे और कहै जो महाराज हों कछू
 जानत नाही सो तुम क्यों नाही आरोगत और
 अपने मनमें विचार करती जाय जो मोकों रसोई
 करनो आवत नाही के मेरी देहको कछू दोष है
 ऐसे विचार करत जाय और भोग सरावत जाय
 और छातीभर आवै और कहै मेरो कोन अपराध
 होयगो जो श्रीठाकुरजी आरोगत नाही पाछें फेरि
 जब पात्र आछी भांतिसों मांजिकें तीसरीबार भोग
 समप्यौ समय भयौ तब भोग सरावन गई तब फेरि

सामग्री यथास्थिति है तब तो महाखेद भयौ जो अबहू कहा करूं श्रीठाकुरजी भूखे रहेंगे सासनेंतौ मोसों कल्लू कह्यौ नाहीं ऐसैं कहे तब मूर्छा खायकें श्रीठाकुरजीके आगे भूमिमें गिरपरी और बहुत दुःख करन लागी श्रमित बहुत भई ताते बाको तनक निद्राहु आई सवारेसों जलहू नाहीं लीनों सो कंठ जूदो मुखे अतिव्याकुल हैकै परी तब श्रीठाकुरजीते बाको बहुत दुःख सह्यौ न गयौ तब सिंहासनते नीचें उतरिकें श्रीठाकुरजीनें वासों कह्यौ जो तू काहेको खेद करत है हों तीन्योवेर आरोगोहूं तू कल्लू संदेह मति करे तब याने कह्यौ जो में कैसे जानूं तब श्रीठाकुरजीने कह्यौ जो तू भूखी है कल्लू खायले तब कह्यौ जो हूं तो न खाउँगी जब आपको आरोगत देखूंगी तब लेउँगी तब श्रीदामोदरजीनें कह्यौ परि यहतौ मानेनाहा तब आप जलकी झारी लेकें आए और कह्यौ अरी तेरौ गरौ सुखो जात है तू तनक जलपान तौ ले तब श्रीठाकुरजीने अपने श्रीहस्तसों बाके मुखमें जल चुवायौ तब कह्यौ जो सवारे तू देखेगी तौ म आरोगूंगो तब उठिकें सखड़ी महाप्रसाद सब गायनको लिवायौ रसोई पोतकें रसोईकी सामग्री सब सिद्ध करराखी रात्रिकों उत्साहसों

सोयरही पाछें प्रातःकाल उठिकें नित्यकर्म तथा
 स्नान करि तथा रसोई करि तब पाक सिद्धभयौ
 तब श्रीठाकुरजीको भोग समप्यौ तब टेरा सरका-
 वन लागी तब श्रीदामोदरजी बोले जो अब तू टेरा
 काहैको सरकावत है अब तू देखि में आरोगतहों
 और सब सामग्री यथास्थिति रहेगी तब समराई
 तहां ठाडीभई और श्रीठाकुरजी भोजन करत देखे
 तब श्रीठाकुरजी आप भोजन किये पाछें सब सा-
 मग्री थारमें ज्योंकी त्यों यथास्थित रही तब श्रीठा-
 कुरजीने कही जो याही भांतिसों तू नित्य जान
 लीजियौ तब समराईने कही जा हूं तो देखूं तबही
 मानू ता पाछें नित्य भोग धरे तब श्रीठाकुरजीको
 भोजन करत देखे तब श्रीठाकुरजीहूं समराईके दे-
 खत भोजन करै जो चाहे सो मांगिलेय पाछें हां-
 सादिक करै पाछें वाको सब रसको अनुभव कर-
 वायौ सो समराई सकल रसको अनुभव करन लागी
 तब यह बात श्रीदामोदरजीने श्रीआचार्यजी महा-
 प्रभूनसों कह्यौ तब श्रीआचार्यजी महाप्रभूनने
 समराईकी सास गोरजासों कही जो श्रीठाकुरजी
 कछू सानुभाव जतावत है तब गोरजातो कछू बोली
 नाहीं पाछें गोरजा श्रीमहाप्रभनसों बिदा होयकें

सीहनंद अपने घर आई तब दूसरे दिन सासनै
 सेवा करि रसोई करके आपने श्रीठाकुरजीको भोग
 समर्प्यो जब भोग सर्यो तबहुं चौकी उठी जो
 श्रीठाकुरजी आरोगे नहीं तब सासनै कह्यो जो
 सुनि बहू श्रीठाकुरजी तौ लरिकहैं ताते तोहीसों
 हिले होयंगे ताते रसोई तु बेगि कर तब बहूने रसोई
 करि भोग समर्प्यो तब श्रीठाकुरजीनें कह्यो जो मैंतौ
 अबही आरोगोहों तब बहूने कही जो हूतै देखूं
 तब मानू तब भोग समर्पिकें कह्या जो महाराज
 आरोगों तब समराईके देखत श्रीठाकुरजी आरोगे
 सो जब सास रसोई करे तब बहूको बुलावे जो
 थार ले जाउ सो वो थार ले जायके आरोगावे ऐसे
 नित्य प्रति करै सो यह बात श्रीठाकुरजीनें श्रीम-
 हाप्रभूनसों कही पाछें बहु श्रीआचार्यजी महाप्र-
 भूनक दर्शनको थानेश्वर गई तब आयके श्रीआ-
 चार्यजी महाप्रभूनको दर्शन कीयौ ता समय श्री-
 आचार्यजी महाप्रभू पाक करत हुते तब समराई
 रोटी बेलनको बेठी तब श्रीआचार्यजी महाप्रभूननें
 बहूसों कह्यो जो तेरी सब बात हमसों श्रीठाकु-
 रजीनें कही है जो हमको समराई भली भांतिसों
 सुख देत है तब समराई मुसकयाय रही आर कह्यो

जो इतनी हू बात श्रीठाकुरजीके पेटमें नाहीं ठहरी तो कहा करिये पाछें कह्यौ जो महाराज लरिका-की कहा पूछत होतब श्रीआचार्यजी महाप्रभू सुनके बहुत प्रसन्न भये और आप श्रीमुखसों कहन लागे जो देखो इनसों कैसो सम्बंध है श्रीठाकुरजीको और कहै जो या बहूके ऊपर बहुत कृपा है और बहू सालन करती सो नीकी भांतिसों करती सो श्रीआचार्यजी महाप्रभूननें कह्यौ जो नित्य सालन क्यों नाहीं करत तब बहू बोली जो लरिकाके मनमें आवै सों करियै तब यह सुनके श्रीआचार्यजी महाप्रभू बहुत प्रसन्न भये याकी सास गोरजा बहुत उत्तम सामग्री करती ताते श्रीठाकुरजीको बहुत प्रिय लागती ताते इन सास बहूनके ऊपर बहुत प्रसन्न रहते ताते इन सास बहूनको दर्शन देवेको श्रीमहाप्रभूजी तथा देखिवेके निमित्त प्रतिवर्ष आप थानेश्वर पधारते तब श्रीआचार्यजी महाप्रभू कहते जो कहा करिय सो सरस्वती उल्लंघनी नाहीं नातर इनको सीहनंदमें दर्शन देतौ सो वे सास बहू ऐसी परम कृपापात्र भगवदीय ही ताते इनकी वार्ता कहांताई लिखिये ॥ प्रसंग ॥ १ ॥

वैष्णव ॥ ५१ ॥

अथ कृष्णादासी रुक्मनी बहूजीकी- दासी हुती तिनकी वार्ता ।

सो कृष्णादासी अडेलमें श्रीरुक्मनी बहूजीकी खवासी करती सो एक समय रुक्मनी बहूजीके गभ रह्यौ हौ तब कृष्णादासीनें कह्यौ जो अबके बेटो होयगौ तिनको नाम श्रीगोकुलनाथजी धरुंगी सो गभके दिन सम्पूर्ण भये तब रुक्मनीजी बहूके पेटमें विथा भई तब कृष्णादासीनें जायके जोतीषीसों पूछ्यौ जो अब मुहूर्त केसो है तब वा जोतषीनें दिन नीको न कह्यौ तब कृष्णादासी फिर आयके श्रीरुक्मनी बहूजीके पेटपै हाथ फेयौ और कह्यौ जो महाराज अब तौ मति पधारौ आजकौ दिन नीको नाहीं तब पेटकी व्याधि सब दूर भई पाछे दिन दोय तीन बीते तब कृष्णादासीने बिचार्यो अब फेरि पूछियै जो आज दिन केसो है तब कृष्णादासीनें फेरि जायके पूछ्यौ जो आज दिन केसो है तब वा जोतषीने कह्यौ जो आज दिन बहुत नीको है तब कृष्णादासीने आयके श्रीरुक्मनी बहूजीसों वनिती करके कह्यौ जो महाराज अब पोढियै अब बालक प्रगट होय तौ भलो है तब बहूजी महाराज पोढी तब

कृष्णादासीनें बहूजी महाराजके पेटपै हाथ फेर्यौ औ कह्यौ जो महाराज अब पधारियै तब श्रीगुसांईजी श्रीनाथजीद्वार पधारे हुते तब पेटमें व्यथा भई और बालकको जन्म भयौ तब ता समय कृष्णादासीने श्रीगोकुलनाथजी नाम धर्यौ ता पाछें श्रीगुसांईजीको बधेया पठायौ तब श्रीगुसांईजी महाराज अडेलकों पधारे तब नामकरण कीयो तब श्रीवल्लभ नाम धर्यौ परि कृष्णादासीकी कानिते श्रीगोकुलनाथजी नाम राख्यौ ऐसी कृष्णादासीके ऊपर कृपा थी जो जाके कहै ते दोऊ नाम प्रसिद्ध भये ॥ प्रसंग ॥ १ ॥

पाछें श्रीघनश्यामजीको जन्म भयौ तब नामकरण विचारण लागे तब श्रीवल्लभजीने कह्यौ जो श्रीगोकुलनाथजी नाम धर्यौ तब श्रीगुसांईजीने कह्यौ जो यह नाम तौ तिहारो है तब दोऊ नाम प्रमाण कायै सो श्रीवल्लभ कुलके विषे सब कोऊ श्रीवल्लभ नाम कहत हैं और सब जगतमें श्रीगोकुलनाथजी प्रसिद्ध भये और जन्मपत्रमें श्रीकृष्ण है सो गोप्य राख्यौ श्रीगुसांईजीने कह्यौ जो यह नाम गोप्य रहै ताते कृष्णादासी श्रीआचार्यजी महापुनर्वती ऐसी आगाव भगवतीगनी सो

इनकी वार्ता कहाँताई लिखिये ॥ प्रसंग ॥ २ ॥
वैष्णव ॥ ५२ ॥

अथ ब्रूळामिश्र पंडित तिनकी वार्ता ।

सो ब्रूळामिश्र एक कपूर छत्रीके प्रोहित हुते ताकी स्त्रीके संतति न हुती तब वानें दूसरों विवाह कीयौ तब ताहू स्त्रीके संतति न भइ तब बहूने वा क्षत्रीसों कह्यौ जो तुम हरिवंश पुराण सुनौ तब तुम्हारे संतति होयगी तब वा क्षत्रीने जायके ब्रूळामिश्रसों प्रार्थना करी जो तुम मोकों हरिवंश पुराण सुनावौ तब ब्रूळामिश्रने कह्यौ जो अबतो मोकों अवकाश नाहीं जब अवकाश होयगो तब तुम्हारे घर जायके सुनाऊंगौ तब वह क्षत्री अपने घर आयौ जब एक महीना बीत्यौ तब एक दिन अचानक ब्रूळामिश्र वा क्षत्रीके घर पधारे तब ब्रूळामिश्रकौ वा क्षत्रीने बहुत आदर सन्मान कीयौ तब ब्रूळामिश्रने कह्यौ जो तुम दोऊ स्त्रीपुरुष स्नान करिके आय बैठौ तब दोऊ स्त्रीपुरुष स्नान करिके आय बैठे तब ब्रूळामिश्रने देह शुद्ध होवेक लीये एक दान करवायौ पाछें हरिवंश पुराणको एक श्लोक अन्तको सुनायौ ॥

सो श्लोक ॥ इदं मया ते हरिकीर्तनं महच्छ्रीकृष्णमाहा-
त्म्यमपारमद्भुतम् ॥ शृण्वन्पठन्नाशु समाप्नुयात्फलं
यच्चापि लोकेषु सुदुर्लभं महत् ॥ १ ॥

यह हरिवंश पुराणके अन्तको श्लोक सो बूला-
मिश्रने वा क्षत्रीको सुनायौ और आशीर्वाद दीयौ
और मंत्राक्षत पढिकें वा क्षत्रीकी बडी स्त्रीकी गोदमें
दीए तब वा क्षत्रीने कह्यौ जो यह मिश्रजी तुमने
कहा कियो यह तौ स्त्री धर्म हूं नाहीं होत है तब
बूलामिश्रने कह्यौ जो श्रीठाकुरजी सर्व सामर्थ्यवान
हैं जो देनहार होयंगे तो याहीको पुत्र देयंगे अब
तौ मेने याकों अक्षत दीये सो तो दीये तब इतनों
कहिकें बूलामिश्र अपने घरकों चलन लागै तब वा
स्त्रीने बहुत बीनती कीनी जो मोकों सम्पूर्ण हरिवंश
पुराण सुनावौ तब बूलामिश्रने कह्यौ जो तोकों
श्रीठाकुरजी सम्पूर्ण फल एकही श्लोकमें देयंगे
ऐसे कहिकें बूलामिश्र तौ अपने घरको आये पाछे
वा बडी स्त्रीको ऋतु आई पाछे गर्भवंत भई तब
कितनेक दिनमें वाकें पुत्र भयौ वे बूलामिश्र श्रीम-
हाप्रभूनके ऐसे भगवदीय हैं तिनके अनुग्रह हते
वाके पुत्र भयौ हरिवंश पुराणको एक श्लोक सुनेते
सम्पूर्ण सुनेको फल भयौ ताते बूलामिश्र ऐसे परम

कृपापात्र भगवदीय हैं ताते इनकी वार्ता कहांताई
लिखिये ॥ प्रसंग ॥ १ ॥ वैष्णव ॥ ५३ ॥

अथ मीरांबाईके पुरोहित रामदास तिनकी वार्ता ।

सो एक दिन मीरांबाईके श्रीठाकुरजीके आगे
रामदासजी कीर्तन करत हुते सो रामदासजी
श्रीआचार्यजी महाप्रभूनके पद गावत हुते तब
मीरांबाई बोली जो दूसरो पद श्रीठाकुरजीको
गावो तब रामदासजीने कह्यो मीरांबाई सो जो
अरेदारी रांड यह कोनको पद है यह कहा तेरे
खसमको मूंड है जो जा आजते तेरो मुंहडौ कबहूँ
न देखूंगौ तब तहांते सब कुटुम्बको लेकर रामदा-
सजी उठि चले तब मीरांबाईने बहुतैरो कह्यो परि
रामदासजी रहे नाहीं पाछे फिरके वाको मुख न
देख्यो ऐसे अपने प्रभूनसों अनुरक्त हुते सो वा
दिनते मीरांबाईको मुख न देख्यो वाकी वृत्ति छोड
दीनी फेरिवाके गांवके आगे होयके निकसे नाहीं
मीरांबाईने बहुत बुलाए परि वे रामदासजी आयें
नाहीं तब घर बैठे भेंट पठाई सोई फेरि दीनी और
कह्यो जो रांड तेरो श्रीआचार्यजी महाप्रभून ऊपर

समत्व नाहीं जो हमको तेरी वृत्ति कहा करनी है
हमारे तो श्रीआचार्यजी महाप्रभू सर्वस्व हैं हमतों
उनके हैं उन बिना हमारे सर्वस्व त्याग करना उनके
चरणार्बिंदको आश्रय राखनों ऐसी वृत्ति बहु
तेरी होयगी वे रामदास श्रीआचार्यजी महाप्रभूनके
ऐसे कृपापात्र भगवदीय हैं ताते इनकी वाता कहा-
ताई लिखिये ॥ प्रसंग ॥ १ ॥ वैष्णव ॥ ५४ ॥

अथ रामदास चौहान तिनकी वार्ता ।

सो रामदास चौहान श्री गोवर्द्धनकी कंदरामें
रहते सो प्रथम श्रीआचार्यजी महाप्रभू श्रीनाथजी-
द्वार पधारे तब श्रीगोवर्द्धननाथजीको पाट बेठाये
तब रामदासजी गोवर्द्धनकी कंदरामेंसू बाहिर
आये तब श्रीआचार्यजी महाप्रभूनने रामदासजी
सों कह्यौ जो रामदास श्रीगोवर्द्धननाथजीकी सेवा
सावधानीसों करियौ तब रामदासजीने वहां एक
मंदिर छोटौसों ईटनको बनवायौ तब श्रीआचार्यजी
महाप्रभूनने वा मंदिरमें श्रीनाथजीको पधराये सो
पहिले श्रीगोवर्द्धननाथजी श्रीगोवर्द्धनपर्वत ऊपर
बिराजते सो ब्रजवासी लोगनने एक फूसकी छति
कर राखी हुती ता छतिमें बैठते और कबहुं २ दूध
दही ब्रजवासी समर्पते देवदमन यह नाम कहते सो

दूध दही माखन सब आरोगते तथा श्रीगोपाललालजी यह नाम कहते सो श्रीआचार्यजी महाप्रभूनने श्रीगोवर्द्धननाथजीको मंदिरमें पधराये पाछे श्रीनाथजा नाम प्रगट कीयौ तबते सब कोऊ श्रीनाथजी कहन लागे वे रामदासजी श्रीआचार्यजी महाप्रभूनके ऐसे परम कृपापात्र भगवदीय हैं तात इनकी बातोंको पार नहीं सो अब कहां तोई लिखिये ॥ प्रसंग ॥ १ ॥ वैष्णव ॥ ५५ ॥

अथ रामानंद पंडित सारस्वतब्राह्मण तिनकी वार्ता ।

सो एक समय श्रीआचार्यजी महाप्रभू थानेश्वर पधारे तहां रामानंद पंडितके घर पधारे सो रात्रिको उहां पोढे हुते सो जब पिछली रात्रि भई तब रामानंद पंडितने अपना स्त्रीसों कह्यौ जो वेगि उठि गोबर और ले चौकाको चाहियेगो नातारि सवारे ये वैष्णव उठेंगे सो ले जायंगे तब यह बात श्रीआचार्यजी महाप्रभूनने सुनी ता समय श्रीआचार्यजी महाप्रभू हाथ पांव धायवेको उठे हुते तब अति क्रोधवंत भये तब श्रीआचार्यजी महाप्रभूनने रामानंद पंडितको बुलायौ तब आपने गडुआमेंते जल

लेकें वाके हाथमें मेलिकें मंत्र पढिके वा जलको वा ऊपर छिरको और अपने श्रीमुखसों कह्यौ जो में तेरो त्याग कीयौ तेने मेरे सेवकनसों यों कह्यौ जो तू वेगि उठि गोबर औरले नातर वैष्णव उठेंगे तो लेजायंगे तो तू रसोईको सामान कहाँते करेगौ ऐसी कहिकें तहांते उठि चले क्षण एक रहे नहीं सो थानेश्वरते एक गांव ता ऊपर महीतीर्थ है सो तहां आये फिर वहां आपने स्नान कीयौ सो जब श्रीआचार्यजी महाप्रभू रामानंद पंडितके घरते चलन लागे तब थानेश्वरके वैष्णवने बहुत बीनती कीनी परि श्रीआचार्यजी महाप्रभू रहे नहीं और कह्यौ जो में यहां रहिकें जलपान न करूंगौ ता पाछें काहुने रामानंद पंडित पास नाम पायौ हौ तिनसों श्रीगुसाईंजी गंगोज्व कहते तब श्रीआचार्यजी महाप्रभू थानेश्वर पधारे पाछें रामानंदकी अवस्था विकल भई तब बाजारमें जो वस्तु देखतो सो खातो कछू मर्यादा नहीं परि इतनी मर्यादा तौ करै जो खाय सो समर्पिके खाय यों कहै जो श्रीगोवर्द्धननाथजी तुम आरोगियो इतनों कहिकें मुखमें मेले सो एक दिन हलवाईकी दुकानपै जलेबी बहुत आछी देखी सो जलेबी वामेंते लेकें कह्यौ जो श्रीनाथजी तुम

आरोगियो ऐसे कहिके खाई ता समय श्रीनाथ-
जीने श्रीआचार्यजी महाप्रभूनसों कह्यो जो आज
तो हमने जलेबी बहुत आछी आरोगी है तब
श्रीआचार्यजी महाप्रभूनने कह्यो जो कौने समर्पि
है तब श्रीनाथजीने कह्यो जो तुम्हारे सेवक रामा-
नंदने समर्पि है तब श्रीआचार्यजी महाप्रभूनने
कह्यो जो महाराज मे तौ वाकौ त्याग कीयौ तुम
वाके यहां क्यों आरोगे हौ तब श्रीनाथजीने कह्यो
जो तुम मोकों काहेको सोंपति हौ हम तुम्हारी
कानिते अंगीकार करत हैं तुम हमको जाको सोंपत
हौ ताको तुम त्याग करत हो परि हम तुम्हारे सों-
पेकों नाहीं छोडत है तब श्रीआचार्यजी महाप्रभू
चुपकरि रहै तब यह बात श्रीआचार्यजी महाप्रभू-
नने दामोदरदास हरसानीसों कही तब दामोदर-
दास हरसानीने बीनती कीनी जो महाराज आप
याको अंगीकार कब करौगे तब श्रीआचार्यजी
महाप्रभूनने दामोदरदाससों कह्यो जो यासों अब
वैष्णवको अपराध पडेगो तो हम याकों लक्षजन्म
पाछें अंगीकार करेंगे श्रीनाथजीने अंगीकार कीयौ
तौहै परि इतनों अंतराय भयौ ताते वैष्णवसों
बोलनों सो विचारके बोलनों बिना विचारें सर्वथा

न बोलनों ऐसे वैष्णवको रहनों ॥ प्रसंग ॥ १ ॥
वैष्णव ॥ ५६ ॥

अथ विष्णुदास छीपी तिनकी वार्ता ।

सो विष्णुदास वृद्ध भये तब श्रीगोकुलमें श्रीगु-
साईजीकी बैठकके द्वारेकी द्वारपालकी करते और
कोई पंडित आवतौ तासों विष्णुदास पूछते जो तुम
क्यों आए हो और कहा जात हो तब उन पंडित-
ननें कह्यौ जो हम श्रीगुसाईजीके पास वाद करन
आए हैं तब विष्णुदासनें उन पंडितनसों कह्यौ जो
तुम मोसों वाद कर लेउ तब विष्णुदास उन पंडि-
तनसों वाद करके निरुत्तर करदेते व्याकरणशास्त्र
पुराण इतिहास सब शास्त्रनके बचन लेके निरुत्तर
कर देते तब वे पंडित अपने मनमें समाधान करि-
के पाछें फिर जाते और वे कहते अपने मनमें जो
जिनके द्वारपालक ऐसे हैं तो तिनके धनीकी कहा
बात होयगी सो श्रीगुसाईजीलों काहू पंडितकों न
जान देते द्वारहोते पंडित निरुत्तर होयके फिर जाते
तब एकदिन श्रीगुसाईजीनें कह्यौ जो कोई पंडित
अब वाद करनकों नाहीं आवत सो काहेते तब

वैष्णवनें कह्यो जो महाराज उन पंडितकों विष्णु-
दास निरुत्तर कर देते हैं ताते पंडित अपने मनमें
समाधान करिके फिर जाते हैं तब श्रीगुसांईजी
श्रीमुखसों कह्यो जो विष्णुदास तुमको तो श्रीमहा-
प्रभूनकी कृपाते ऐसी सामर्थ है जो तुम पंडितनको
जीतकें निरुत्तर कर देत हो परि उन ब्राह्मणोंको
अति श्रम होत है ताते अब जो कोई पंडित वाद
करनकों आवै ताकों हमारे पास आवन दीजो तब
उन पंडितनकों जान देते विष्णुदास श्रीआचार्यजी
महाप्रभूनके ऐसे परम कृपापात्र भगवदीय हैं उनको
ऐसी सामर्थ हुता जो पंडितनकों निरुत्तर करि दूषण
करते ॥ प्रसंग ॥ १ ॥

और एक भट्ट हुतौ सो श्रीगुसांईजीसों कहतौ
जो तुम्हारे सेवकनको में जिमाऊंगो तब श्रीगुसां-
ईजी चुपकर रहते सो वा श्रीगुसांईजीको सुसर
हुतौ श्रीवत्स्यामजीको नाना हुतौ सो एक दिन
वांभट्टने श्रीगुसांईजीको न्यौत्यो तब श्रीगुसांईजी
उनके घर भोजनको पधारे तब तहां विष्णुदास
जलपानको गडुआलेकें साथ गये तब श्रीगुसांईजी
भोजन करिकें उठे तब श्रीगुसांईजीकों विष्णुदासने
शुद्ध आचमन करवायौ पाछें श्रीगुसांईजी मंदिरमें

पधारे तब विष्णुदासको श्रीगुसांईजीने आज्ञा दीनी जो तुम प्रसाद लेके बेगि आइयो सो जा थारमें श्रीगुसांईजीने भोजन कीए हुते ता थारमेंते प्रसाद अपनी पातरमें धरिकें थार धोय धन्यो पाछें आप प्रसाद लेवेको बैठे तब भट्टजी और सामग्री लेकें आये तब विष्णुदासने कह्यो जो मोकों नाहीं चाहियत तब भट्टजीने कह्यो जो झूठन काहेको लेतहौ नीकी सामग्री लेउ तब विष्णुदासने कह्यो जो मोकों नाहीं चाहियत मेरी पातरमें डारोगै तो मेरी पातर छूय जायगी तब भट्टजी अति क्रोधवंत भये पाछें उन भट्टजीने श्रीगुसांईजीसों कह्यो जो तुम्हारे शूद्रनें मोसों ऐसे कह्यो जो मेरी पातरमें सतिडारो और डारोगे तो मेरी पातर छूय जायगी तब श्रीगुसांईजी चुप करिरहै पाछें श्रीगुसांईजी मुसिक्यायके भट्टजीसों कह्यो जो तुम हमारे सेवकनको जिमावन कहत हुते सो तुमसों हमारो एक शूद्र न जिमायौ गयो और सेवकनको कैसे जिमाओगे तब भट्टजी मुसक्यायके चुपकरिरहै सो वे विष्णुदास श्रीआचार्यजी महाप्रभूनके ऐसे परम कृपापात्र भगवदीय हैं ताते इनकी वार्ताको पार नाहीं सो कहांताई लिखिये ॥ प्रसंग ॥ २॥ वैष्णव॥५७॥

अथ जीवनदासक्षत्रीकपूर सीह- नंदकेवासी तिनकी वार्ता ।

सो एक समय सीहनंदके सब वैष्णव मिलिकें श्रीआचार्यजी महाप्रभूनके दर्शनको अडेल आवत हुते सो मार्गमें एक दिन मजल जाय उतरे तहां सब वैष्णव अपने २ चौका देत हुते ता समय मेह चढि आयौ तब वैष्णवनने कह्यौ जो वर्षा आई ऐसो कार्य भयौ तब जीवनदास बोले तुम चिंता मति करो तब जीवनदासने श्रीआचार्यजी महाप्रभूनको नाम लेके मेहको आन दीनी जो तोको श्रीआचार्यजी महाप्रभूनकी आनि है जो तू बरषे मति तब वह मेह रहगयौ पाछें सब वैष्णवनने भोग समर्पि महाप्रसाद लीनौ तहां रात्रिको सोये ता पाछें सब वैष्णव अडेल आये तब श्रीआचार्यजी महाप्रभूनको दर्शन कीयौ पाछें यह बात सबनने श्रीगुसांईजीसों कही जो महाराज एक दिन सब हम वैष्णव पाक करत हुते ता समय मेहचढि आयौ तब जीवनदासने आपकी आनि देके ऐसे कहिकें मेहको बरजो तब यह सुनिकें जीवनदाससों श्रीआचार्यजी महाप्रभूनने पूछौ और कह्यौ जो क्योंरे हमारी तेने

आनि दीनी और कदाचित वर्षा होती तो तू कहा करतौ ? तब जीवनदासने कह्यौ जो महाराज वह कोन है जो आपकी आनि दीये उपरांत बरषे यह इन्द्रकी कहां सामर्थ है तब यह बात जीवनदासकी सुनिकें श्रीआचार्यजी महाप्रभू सुसिक्क्यायकें चुप-करि रहै तब उन जीवनदासपै श्रीआचार्यजी महाप्रभूनकी ऐसी कृपा हुती उन जीवनदासकों श्रीआचार्यजी महाप्रभूनके स्वरूपको ऐसी ज्ञान हुतौ सो आनि देकें मेह बरजो तिनकी कहा कहिये तब वैष्णवनने कह्यौ ये बडे भगवदीय हैं वे जीवनदास श्रीआचार्यजी महाप्रभूनके ऐसे परम कृपापात्र भगवदीय हैं ताते इनकी वार्ता अब कहांताई लिखिये ॥ प्रसंग ॥ १ ॥ वैष्णव ॥ ५८ ॥

अथ भगवान्दास सारस्वतब्राह्मण ति ॥

सो उन भगवानदासने श्रीआचार्यजी महाप्रभूनकी सेवानकी भांतिसों कीनी तब श्रीआचार्यजी आप भगवानदासके ऊपर बहुत प्रसन्न भये तब भगवानदासको श्रीआचार्यजी महाप्रभूनने आप कृपा करिकें अपनी श्रीपाडकाजीकी सेवा दीनी जो तू

इनकी सेवा नीकी भांतिसों करियौ तब भगवानदास श्रीपादुकाजीकी सेवा नीकी भांतिसों ऐसी भांतिसों सेवा करते जो श्रीठाकुरजी इनसों सानुभाव हुते बातें करते सो एक समय श्रीआचार्यजी महाप्रभू भगवानदासके घर पधारे सो जा ठौर श्रीआचार्यजी महाप्रभू बिराजतहैं ता ठौर नित्य उठिकें सवारें भगवानदास दंडौत करते सो याते वा ठौरपर कोऊ पाव न धरतौ ऐसौ उनकी भावहौ सो वे भगवानदास श्रीआचार्यजी महाप्रभूनके ऐसे कृपापात्र भगवदीय हैं ताते इनकी वार्ता कहांतांइ लिखिये ॥ प्रसंग ॥ ३ ॥ वैष्णव ॥ ५९ ॥

अथ भगवानदास श्रीनाथजीके भीतरिया तिनकी वार्ता ।

सो एकसमय श्रीनाथजीके बालभोगकी सामग्री करत भगवानदाससों कछू सामग्री दाझी तब श्रीगुसांईजी भगवानदासके ऊपर बहुत खीजे और भगवानदासकों सेवाते भिन्न बैठारे सो भगवानदास गोविंदकुंड ऊपर आय अच्युतदासके पास आय बैठे पाछें श्रीगुसांईजी आप स्नान करि-वेको गोविंदकुंड ऊपर पधारे और भगवानदासतौ

पूंछरीकी और अच्युतदासके पास हुते सो भगवानदासने सब समाचार कहे पाछे जब श्रीगुसांईजी गोविंदकुंड स्नान करिके अच्युतदासको दर्शन देन पधारे तब श्रीगुसांईजीके दर्शन करिके अच्युतदासकी आंखनमेसूं आंसूंनको प्रवाह चलयौ सो देखके अच्युतदासको श्रीगुसांईजीने अच्युत दाससों पूछौ जो अच्युतदास तुमको ऐसो दुःख कहाहै तब अच्युतदासने श्रीगुसांईजीसों कहौ जो महाराज श्रीआचार्यजी महाप्रभूनको तौ श्रीनाथजीने आज्ञा दीनी है जो तुम जीवनको ब्रह्म सम्बंध करावो सो साठलाख जीवनको तुमद्वारा अंगीकार करना है और श्रीआचार्यजी महाप्रभूनेतौ तुमको सोंपे है और तुम जीवनको अपराध देखन लागे और जीवतौ सदा अपराधहीते भरचो है और जीवनकों अंगीकार कैसें होयगो तब श्रीगुसांईजी यह बात सुनिके आप भगवानदासको हाथ पकरिके श्रीगोवर्द्धन ऊपर लेचढे और श्रीगोवर्द्धननाथजीकी सेवा जारितिसों करते ता रीतिसों सेवा करनकी आज्ञा दीनी और कही जो अबते सावधानीसों सेवा करियौ और सामग्री आछी भांतिसों करियौ तब भगवानदासने ता समय श्रीगुसांईजीके आगे नयौ

पद करिकें गायौ सो पद ॥ राग सारंग “ श्रीविड-
लेशचरण कमल ” ॥ सो यह पद गायौ सो सुनिकें
श्रीगुसांईजी बहुत प्रसन्न भये पाछें भगवानदास
सावधानीसों सेवा करन लागे ताते भगवानदास
श्रीआचार्यजी महाप्रभूनके ऐसे कृपापात्र भगव-
दीय हैं सो इनकी वार्ता अब कहांताई लिखिये ॥
प्रसंग ॥ १ ॥ वैष्णव ॥ ६० ॥

अथ अच्युतदास सनाढ्य ब्राह्मण तिनकी वार्ता ।

सो वे अच्युतदास मानसीगंगाऊपर रहते तहां-
चक्रतीर्थ है तहां रहते सो नित्यशृंगारके समय श्री-
नाथजीके दर्शनको आवते सो दर्शन करिकें अपने
स्थलको आवते सो उन अच्युतदासजीनें श्रीना-
थजीकी तीन परिक्रमा दंडौती करीहुती तब श्रीगु-
सांईजी अच्युतदासके ऊपर बहुत प्रसन्न भये और
श्रीगुसांईजी अपने श्रीमुखसों कहते जो अच्युत-
दास बड़े भगवदीय हैं और बड़े महापुरुष हैं सो
वे अच्युतदास श्रीआचार्यजी महाप्रभूनके तथा
श्रीगुसांईजीके ऐसे परम कृपापात्र भगवदीय हैं
ताते इनकी वार्ता कहांताई लिखिये ॥ प्रसंग ॥ १ ॥
वैष्णव ॥ ६१ ॥

अथ अच्युतदास गौडब्राह्मण तिनकी वार्ता ।

सो वे अच्युतदास बड़े भगवदीय हैं और श्री-
आचार्यजी महाप्रभूनने इनके माथे श्रीमदनमो-
हनजीकी सेवा पधराईहुती आपको पाट बैठारेहुते
सो अच्युतदास श्रीमदनमोहनजीकी सेवा नीकी
भांतिसों करते तब श्रीमदनमोहनजी आप अच्यु-
तदाससों सानुभाव हुते बातें करते और अच्युत-
दास ऊपर श्रीठाकुरजी ऐसी कृपा करते और एक
दिन अच्युतदास श्रीनाथजीके दर्शनको आवत
हुते तब श्रीगोवर्द्धननाथजीकी एक दंडौती परि-
क्रमा करते ऐसे भगवदीय है और जब श्रीगुसां-
ईजीके पास आवते तब श्रीगुसांईजी अच्युतदा-
सकों दंडौत न करन देते और कहते जो ऐसे श्री-
आचार्यजी महाप्रभूनके कृपापात्र भगवदीयहैं ताते
इनको दंडवत न करन दीजियै पाछें श्रीआचार्यजी
महाप्रभूनने लौकिक लीला आसुरव्यामोहलीला
दिखाई तब अच्युतदासने श्रीमदनमोहनजीको
श्रीआचार्यजी महाप्रभूनके घर पधराये आप श्री-
बद्रीनाथजीके दर्शनको उठिगये तब उहां जायके

श्रीबद्रीनाथजीके दर्शन करिकें अन्नजलको त्याग करिके अपनी देह छोड़ी पाछें श्रीमदनमोहनजीको कह्यौ गोपीनाथजीने श्रीगोवर्द्धननाथजीके पास पधराये वे अच्युतदास श्रीआचार्यजी महाप्रभूनके ऐसे भगवदीय हैं जिन श्रीआचार्यजी महाप्रभूनको स्वरूप साक्षात् करिजान्यौ और उनकी श्रीमहा-प्रभूनके ऊपर बड़ी आसक्तिहुती जो परोक्ष भये पाछें अन्नजलको त्याग कीयौ तब देह छोड़ी भक्ति-मार्गको स्वरूपके बल विरहासक्ति है सो वे अच्यु-तदास ऐसे भगवदीय हैं ताते इनकी वार्ता कहां तांई लिखिये ॥ प्रसंग ॥ १ ॥ वैष्णव ॥ ६२ ॥

अथ अच्युतदास सारस्वत- ब्राह्मण तिनकी वा० ।

सो एक समय श्रीआचार्यजी महाप्रभूनके संग अच्युतदासने पृथ्वीपरिक्रमा दीनीहुती सो श्रीआ-चार्यजी महाप्रभूनने अच्युतदासको अपनी पादु-काजीकी सेवा दीनी सो अच्युतदासने अति उत्तम-रीतिसों श्रीपादुकाजीकी सेवा कीनी ताते श्रीआ-चार्यजी महाप्रभू अच्युतदासको नित्य दर्शन देते और जो श्रीआचार्यजी महाप्रभूनने संन्यास ग्रहण

कीयौ सो केवल उनके भावार्थ कीयौ तब एक वै-
 ष्णवसों श्रीआचार्यजी महाप्रभूननें कह्यौ जो एक
 डोंगी काशीको भाडेकर लाउ तब वह वैष्णव डोंगी
 भाडे कर लाये ताके ऊपर श्रीआचार्यजी महा-
 प्रभू चढिके बनारस पधारे तहां संन्यास डेढ मही-
 नाताई राख्यौ तब वह वैष्णव जो काशीमें गयौ
 हो सो काशीते कडामें आयौ तब अच्युतदास त-
 था सब वैष्णवनसों कह्यौ जो श्रीआचार्यजी महा-
 प्रभूने संन्यास ग्रहण कीयौ फेरि काशी पधारे
 सो उहां डेढ महीना ताई रहै पाछे आसुरव्यामो
 हलीला दिखाई तब अच्युतदासनें वा वैष्णवसों
 कह्यौ जो तोको भ्रम भयौ होयगो तब वा वैष्णवने
 कह्यौ जो मैं श्रीआचार्यजी महाप्रभूनके साथ हुतौ
 सो काशीते देखिके अबही हौं आयौ हौं तब अच्यु-
 तदासने कह्यौ जो ऐसी कबहू न करे जो जीवनको
 आसुरव्यामोहलीला दिखावत हैं तब अच्युतदा-
 सनें मंदिरके किवाड खोलिके वा वैष्णवको श्री-
 आचार्यजी महाप्रभूनके दर्शन करवाये तब देखे
 तो श्रीआचार्यजी महाप्रभू विराजे हैं और पोथी
 देखत हैं तब वा वैष्णवनें दंडौत कीनी तब श्रीआ-
 चार्यजी महाप्रभूनें कह्यौ तुम कछू संदेह मति करौ

यह प्रागट्य लौकिकरीतियों देह धरेकी लीलाहै और सिंहासन बैठक अलौकिक लीला नित्य है ताते यह लीला अब दशअवतार प्रगट हैं ताते तहां आयेहैं ताते संदेह न करनो यह आसुरव्यामोहलीला है सो श्रीगुसांईजी सर्वोत्तममें लिखे है जो "प्राकृतानुकृत व्याज मोहिता सुरमानुषः" मनुष्य देह धरे ताकी यह लीला है सो अच्युतदास ऐसे स्वरूप नेष्टाके जिनको श्रीआचार्यजी महाप्रभूनके स्वरूपको ऐसेो दृढ विश्वास है वे अच्युतदास श्रीआचार्यजी महा प्रभूनके ऐसे कृपापात्र भगवदीय हैं ताते इनकी वार्ता कहांतांई लिखिये॥ प्रसंग॥१॥वैष्णव॥६३॥

अथ नारायणदास अम्बालेके

वासी हुते तिनकी वार्ता ।

सो वे नारायणदास देशाधिपतीके चाकर हुते तिनको राजद्वारकों काम बहुत हुतौ ताते श्रीआचार्यजी महाप्रभूनके दर्शनकों आय सकते नहीं परि अंतःकरनमें श्रीआचार्यजी महाप्रभूनके दर्शनकी आतुरताबहुत जो श्रीआचार्यजी महाप्रभूनके दर्शनको कब जाऊंगो परि आय सकते नहीं ताते नारायणदासनें एक चाकर राख्यौ ताको महीना रुपैया चारिको कीनों और वासों कह्यौ जो तेरौ यह

काम है जो मौकों छिन २ में सुरत दिवायौ करि
 जो भैयाजी श्रीआचार्यजी महाप्रभूनके दर्शनकों
 कब चलोगे यह कहिकें सुनाऊ जो हमको श्रीआ-
 चार्यजी महाप्रभूनके दर्शनकी सुधि रहै सो वह
 चाकर यौहीं कह्यौ करे तब नारायणदास अपने
 कार्यमें बैठे तब आगे आयकें ठाडो होयकें एक
 घडी उपरांत कहै जो भैयाजू श्रीआचार्यजी महा-
 प्रभूनके दर्शनकों कब जाउंगे ऐसेही नित्य प्रति
 कहै और नारायणदास श्रीआचार्यजी महाप्रभू-
 नको भेंट बहुत पठावतें नारायणदास ऐसे भगव-
 दीय हैं सो उनको चित्त सदा श्रीआचार्यजी महा-
 प्रभूनके चरणारविन्दसे रहतौ ताते श्रीआचार्यजी
 महाप्रभू बहुतहीं प्रसन्न रहते वे नारायणदास ऐसे
 कृपापात्र भगवदीय हैं ताते इनकी वार्ता कहांताई
 लिखिये ॥ प्रसंग ॥ १ ॥ वैष्णव ॥ ६४ ॥

**अथ नारायणदास भट्ट मथुरामें
 रहते तिनकी वार्ता।**

सो नारायणदासको श्रीमदनमोहनजीनें आज्ञा
 दीनी हुती जो बृन्दावनमें अमुकी ठोर हों सो व-
 हांसों काढिकें मौकों बाहिर पधराऊ तब नारायण-
 दास जायकें श्रीमदन मोहनजीकों बाहिर पधरायकें

पाछे जब श्रीगोपीनाथजीने श्रीमदनमोहनजीकों पाट सिंहासन बैठारे तब कितनेक दिनताई नारायणदासनें सेवा कीनी तब उनके पाछे उनको कोऊ न हुतौ ताते बंगाली गोडीया सेवा करन लागे श्रीगोपीनाथजीनें पाट बैठारे ताते सब कोऊ दशनको जात है वे नारायणदास ऐसे भगवदीय है तिनको श्रीमदनमोहनजीनें श्रीआचार्यजी महाप्रभूनको सेवक जानिकें नारायणदासके उपर कृपा कीनी ताते वे नारायणदास श्रीआचार्यजी महाप्रभूनके ऐसे कृपापात्र भगवदीय हैं ताते इनकी वार्ता कहां ताई लिखिये प्रसंग ॥ १ ॥ वैष्णव ॥ ६५ ॥

अथ नारायणदास चौहान ठट्ठेके दासी तिनकी वार्ता ।

सो वे नारायणदास ठट्ठेके पादशाहके दीवान कुलकुल्लां हुते जो नारायणदास दीवान करे सो होय पाछे कितनेक दिनमें वह पादशाह नारायणदासके ऊपर कोप्यौ तब नारायणदासको पकर्यौ तब बहुत मार्यौ और बन्दीखानेमें दे दीयौ पाछे पचास लाख रुपया वाके माथे दंडको कीयौ सो दिन प्रति पांच हजार भरनौ और जा दिन रुपैया न भरे

ता दिन नारायणदासके पांचसौ कौरडा मारने
 पादसाहने ऐसों बंधान कीयो तब एक समय श्री-
 आचार्यजी महाप्रभूनके सेवक दोऊ भाई ब्राह्मण
 तिनने अपने मनमें विचार कीयौ जो ठड़ेमें नारा-
 यणदास दीवान है सो हम उनके पास चले हमकों
 अपनी कन्याको विवाह करना है ताते जो वे कछू
 देय तौ कन्याको विवाह करै सो ऐसो विचारकें वे
 दोऊ भाई अपने घरते ठड़ेको चले सो ठड़ेमें जायकें
 पहुंचे तब वहां जायकें सुन्यौ जो नारायणदास तौ
 बंदीखानेमें परचौ है तब वह दोऊ भाई अपने मनमें
 विचार करन लागे जो अब कहा करियै ऐसो वि-
 चार इन दोऊ भाईनने कीयौ जो अब यहांसों च-
 लियै तब प्रातःकाल यह बात नारायणदासने सुनी
 जो वे दोऊ भाई श्रीआचार्यजी महाप्रभूनके सेवक
 गांवमें आये हैं सो उनने सुनी जो नारायणदासतौ
 बंदीखानेमें परचौ है ताते अब यहांसे प्रातःकाल
 चलेंगे तब नारायणदासने उनके पास मनुष्य पठा-
 यौ और कहवाय पठाई जो तुम आये सो मेरो
 बड़ा भाग्य है मेरे पास तुम प्रातःकाल होयकें द-
 शन अपने मोकों देकें जैयौ तब वे दोऊ भाई प्रातः
 काल उठि देहकृतिकारि तिलक मुद्रा करि नित्य-

कर्मसों पहुँचकें श्रीआचार्यजी महाप्रभूनको चरणामृत और महाप्रसाद लैकें जहां नारायणदास बंदीखानेमें हुते तहां दोऊ भाई नारायण दासके पास जाय मिले तब नारायणदासने उनको देखिकें परम आनंद भयौ और बहुत प्रसन्न भये तब उन दोऊ भाईनने चरणामृत और महाप्रसाद नारायण दासको दीनों तब नारायणदासने लीनों और कह्यौ जो मोकों बंदीखानेमें वैष्णवनको दर्शन भयौ तब नारायणदासने श्रीआचार्यजी महाप्रभूनके कुशल समाचार पूछे पाछे भगवद्वातार्किके प्रसंग करनलागे इतनेमें नारायणदासके घरतें पांचहजार रुपैयानकी थैली आई सो द्वारपालने थैलीके उपर मौहरछाप करिकें नारायणदासके पास पठाई तब नारायणदासने वे पांचों थैली उन दोऊ भाईनको सोंपि दीनी और दंडौत कीनी और कह्यौ जो अब तुम बेगि पधारौ और श्रीआचार्यजी महाप्रभूनको मेरी दंडौत करियौ और तुम अपनी कन्याको विवाह या द्रव्यते भली भांतिसों करियों तब वे दोऊ भाई ब्राह्मण नारायणदासतें विदा होयकें चले तब इतनेमें पादसाह बोल्यौ जो पांचों थैली नारायणदास वारी लावौ तब दरबान बोल्यौ जो पांचों थैलीन

ऊपर मौहर छाप करि नित्य नारायणदासके पास पठावत है त्योंही पठाई हैं तब पादसाह बोल्यौ जो खजानचीको बुलावो तब मनुष्य जायके खजानचीको बुलाय लायै तब खजानची आगे आय ठाडौ भयौ तब पादसाहनें खजानची सों पूछौ जो क्यौरे तेरेपास नारायणदासके पासते पांच थैली आई हैं तब खजानचीनें कही जो साहब मेरे पास तौ नाहीं आई तब पादसाहको बहुत क्रोध भयौ और कह्यौ जो नारायणदासको बुलावौ तब नारायणदासको बंदीखानेमें ते बुलायै सो बुलायके पात्साहके पास ठाडौ कीयौ तब नारायणदास ते पात्साहनें पूछौ जो नारायणदास आज थैली क्यों नाहीं आई पाछे थोडोसों गाढो कोरडा करिके कोरडावारो बुलायौ और पात्साहनें पांचसो कोरडाको हुक्म दीयौ और पात्साह बोल्यौ जो नारायणदास सांच कहि जो आज थैली क्यों नाहीं आई द्वारपालनें तौ मुहर छाप करिके तेरे हवाले कीनी और तेने यह कहा कीयौ तू सांच कहि नाहीं तो कोरडा लागत हैं तब नारायणदास सलाम करिके बोल्यौ जो हजरत आज मेरे गुरुभाई आये हुते सो वे पांचौ थैली उनको दीनी और मेने अपने मनमें कह्यौ जो में आज मार खाय

रहूंगो परि यह घडी कहां हैं तब पात्साह चुप करि
 रह्यो पाछें एक घडी बिचारिकें कहौ जो श्यावास
 तू अपने गुरुके मार्गमें ऐसे सांचौ हैं सो मैं तेरे ऊपर
 बहुत प्रसन्न तब पात्साहनें वाही समय बेडी कट-
 वाइके वाही समय घोडा तथा सिरोपाउ मंगायकें
 नारायणदासको पहरायौ घोडा दीयौ और निवा-
 ज्यौ तब फेरिके अपनौ कुल्लकुल्लांको दीमान राख्यौ
 जैसो पहिले हुतौ तैसेही कीयौ काम सब सोंप्यौ
 और नारायणदासके माथे दंड कीयौ हुतौ सो सब
 माफ करिके सिरो पाव पहरायके कह्यौ जो जा
 घर होय आउ सो सिरो पाव पहिरकें घोडा ऊपर
 चढिकें नारायणदास घरको गये सो वे दोऊ भाई
 वैष्णव गांवमेंही हुते सो वे दोऊ भाई वैष्णव सुनिकें
 नारायणदाससों मिलिवेको आये तब नारायणदास
 उनसों मिले भेटे और कह्यौ जो मेरे गुरुके सेवक
 आये तौ मैं छूटौ तब उन वैष्णवनने कह्यौ जो
 श्रीआचार्यजी महाप्रभूनकी कृपाते क्यों न छूटे तब
 नारायणदासनें ६ हजार मोहरकी एक थेली वैष्ण-
 वनके हाथ श्रीआचार्यजी महाप्रभूनको भेंट पठाई
 पाछें वे दोऊ भाई उहांसो चले सो कितनेक दिनमें
 श्रीगोकुल आये तब श्रीआचार्यजी महाप्रभु श्री-

गोकुलमें हुते सो उन दोऊ भाई वैष्णवनने आयकें श्रीआचार्यजी महाप्रभूनको दर्शन कीयो और नारायणदासकी हजार मौहरनकी थैली आगे राखी तब श्रीआचार्यजी महाप्रभूनने नारायणदासके कुशल समाचार पूछे तब उन वैष्णवनने सब समाचार कहै तब श्रीआचार्यजी महाप्रभू अपने श्रीमुखसों कहैं जो जाको वैष्णव ऊपर ऐसो दृढ़ स्नेह हैं ताको कष्ट क्यों रहै पाछें वे वैष्णव ब्राह्मण श्रीआचार्यजी महाप्रभूनते बिदा होयकें अपने घरको गये सो बेटीको विवाह आच्छी भाँतिसो कीयो और पहले उनको नाम नारिया हुतौ सो सेवक भये पाछें श्रीआचार्यजी महाप्रभूनने नारायणदास नाम धन्यौ जाको ऐसो मन होय तापै श्रीठाकुरजी ऐसी कृपा करें प्रभूजीको नाम भक्तवत्सल है सो अपनेको थोरेहीमें कृपा करत हैं सो वे नारायणदास ऐसे कृपापात्र हुते इनकी वार्ता कहाँ ताँई लिखिये ॥ प्रसंग ॥ १ ॥ वैष्णव ॥ ६६ ॥

अथ एक क्षत्राणि अकेली सीहनन्दमें
रहती तिनकी वार्ता ।

सो वा क्षत्राणीके श्रीनवनीतप्रियाजी विराजे हैं

श्रीठाकुरजी सानुभाव हैं सो वह बाई अकिंचनसेवा जब करिपहुंचे तब सूतकाते तामें जो कुछ बढती आवे तासों निर्वाह करे सो घरके द्वारे काछिनतरकारी बेचनआवै तब श्रीठाकुरजी मंदिरमेंतै पुकारके कहैं अरी अमुकी तरकारी बिकने आई है तू ले ऐसे श्रीठाकुरजी कहैं तब वह क्षत्राणी सब भांतिकी तरकारी लेहि सो केतिकतौ कच्ची समप्ये केतिक रसोईमें छोंकिक्कें समप्ये और कबहू काछिनको शब्द श्रीठाकुरजी न सुने और बहू काछिन आगे निकसजाय तब वह बाई सामग्री कछुले न सके तब श्रीठाकुरजी वासों बहुत रारिकरें जैसे लौकिक लरिका रारकरे तैसे श्रीठाकुरजी वा क्षत्राणीसों झगरोकरें और एक दिन कछू पकवान बालभोगको होय न आयौ तब रोटी घीसों चुपारिकें रात्रिकेलियै ढांकिराखी सो जब रात्रि आधीभई तब श्रीठाकुरजी बोले वा क्षत्राणी बाईको जगाई और कही जो हों भूखोहों तब वा बाईनें कह्यौ जो लालजी पकवानतौ कछू नाहीं है और रोटी घृतसो चुपरी धरी है तब श्रीठाकुरजी कहै जो भलो रोटी-हीलाउ तब वा बाईने रोटी आगे आनि राखी तब श्रीठाकुरजीनें बाईसो कह्यौ जो तू मोकों रोटीकी

तुतुरीकरके दे तब वह बाई श्रीठाकुरजीके हस्तमें
 देत जाय तब अपने श्रीहस्तमें लेके कतारे २ के
 आरोगतजाय पाछें जब जलपान करिके पोढ़े परि
 क्षत्राणीके मनमें क्षोभ भयौ बहुत सो और कह्यौ
 जो सवारे उधारे लायके पकवान कर धरौंगी जो
 रात्रिकों श्रीठाकुरजीने फीकी अकेली रोटी आरोगी
 पाछें दूसरे दिन पकवान करिधर्यौ तब रात्रिकों
 श्रीठाकुरजीने मांग्यौ तब पकवानलेके आगे धर्यौ
 तब श्रीठाकुरजी आरोगे तब कह्यौ जो अमुकी
 तेने पकवान तौ धर्यौ परिमोंको पकवान बीच
 रोटीकी तुतरीअति अद्भुतस्वादलगी तब वा क्षत्रा-
 णीने कह्यौ जो महाराज में कहाकरूं मेरे कोई कमा-
 वन बारोंतौ है नाहीं मैं तों अकेलीहों मोतेतौ कबहूं
 कछू होय आवत नाहीं तब श्रीठाकुरजीने वा क्षत्रा-
 णीसों कहौ जो तू नित्य पकवान काहेको करत है
 तू मोकों रोटी चुपरिके धरिराख्यौकरि मोको तेरी
 रोटी बहुत रुचित है ताते तू संकोच मतिकरै हमकों
 तौ तेरी रोटीचुपरी बहुत स्वाद लागत है पाछें वह
 रोटी करि राखती सो श्रीठाकुरजी आरोगते वह
 क्षत्राणी श्रीआचार्यजी महाप्रभूनकी ऐसी कृपा-
 पात्र भगवदीयही ताते इनकी वाताको पारनाहीं सो
 अब कहांताई लिखिये ॥ प्रसंग ॥ १ ॥ वैष्णव ॥ ६७ ॥

अथ दामोदरदास कायस्थ सेरगढके

बासी तिनकी वार्ता ।

सो तिनकी सेव्य ठाकुर श्रीकपूररायजीसो बहुत गौरस्वरूप हुतौ तिनके पास श्रीनवनीताप्रियाजी बैठिते सो एक समय दामोदरदासकी स्त्री वीरबाई ताके गर्भ रह्यौ पाछें प्रसूत भई सो पुत्रजन्म भयौ सो घरकी बहू बेटी सब प्रसूतके कामकाज करन लागी सो श्रीठाकुरजीकी सेवामें विलम्ब भयौ वीरबाई प्रसूतकमेंते बहुत कहै जो कोऊ सेवामें न्हाय श्रीठाकुरजीकी सेवामें अबेर होत है परि कोई नाहीं न्हाय तब श्रीठाकुरजीनें वीरबाई सो कह्यौ जो तू स्नान करिके सेवा क्यों नाहीं करत है तब वीरबाई प्रसूतकमें ते उठिके श्रीठाकुरजीसो कह्यौ जो महाराज मेरी तो यह व्यवस्था है मोकों तो सेवामें आवनों नाहीं प्रसूतिकामेंहूँ अपरस छूड़ जायगौ तब श्रीठाकुरजी महाराजने वीर बाईसो कह्यौ जो मोकों तो सेवामें विलम्ब होय है मोको इतनी अवार भइहै और कोऊ न्हात नाहीं ताते तूही न्हाउ तब वह वीरबाई श्रीठाकुरजीके आग्रहते उठिके प्रसूत कामेंते न्हायके कछू देकें श्रीठाकुरजीकी

सेवा करिकें पाछें भोग समर्थों पाछें समयानुसार भोग सरायकें अनोसर करिकें आय भोजन करिकें खाटमें सोय रही श्रीठाकुरजीकी आज्ञासों सेवा कीनी सो ऐसैं चालीस दिनताईं नित्य करती तब श्रीठाकुरजीनें कह्यौ जो तेनें मेरी आज्ञा हूं मानी और वेद मार्गकी रीति हू राखी ताते श्रीठाकुरजी बहुत प्रसन्न भये तब चालीस दिन बीते तब शुद्ध स्नान करिकें सेवा करन लागी पहले पात्र वस्त्र सब अपरस दूरकीने और दूसरे सब नये मँगवाये पाछें भलीभांतिसों सेवा करन लागी ताते वह वीरबाई श्रीआचार्यजी महाप्रभूनकी ऐसी कृपापात्र भगव-वदीय ही ताते इनकी वार्ता अब कहांताईं लिखिये॥ प्रसंग ॥ १ ॥ वैष्णव ॥ ६८ ॥

अथ स्त्री पुरुष दोउक्षत्रीहुते तिनकी वार्ता।

सो वे स्त्रीपुरुष दोऊजने सीहनंदमें आय रहै सो वह घर निपट छोटी हुतौ ताते श्रीठाकुरजी ता समय बैठते सो आधी कोठरीमें तो रसोई करते और आधीमें रहते और सैयाको ठौर न हुती ताते एक बांसको मेडा कर राख्यौ हुतौ ताके ऊपर श्रीठाकुरजी पोढ़ते आप स्त्रीपुरुष दोऊ जने रात्रकों

आंगनमें सोय रहते ऐसे करत तब चातुर मासके दिन आये तब मेह बरषतौ तोऊ वे आंगनमें सोय रहते परिभीतर न सोवते तब श्रीठाकुरजी भीतरसों बोलते जो अरे अमुका अमुकीहौ तुम भीजत क्योंहौ भीतर क्यों नाहीं सोवतहौ बाहिर काहेकौ पौढे भीजतहौ ताते तुम भीतर आवौ और हमतौ ऊंचे मेडापर हैं तुम नीचे क्यों नाहीं सोवतहौ तब वा क्षत्राणीनें कह्यौ जो महाराज तुमतौ ऊंचा मेडा ऊपर पौढतहौ और में नीचे कैसें सोऊं तब श्रीठाकुरजी प्रसन्न होयके कहै जो कछू बाधक नाहीं तुम कछू संकोच मति करौ हम तुम ते प्रसन्न होयके कहत है ताते तुम भीतर खुशीसों सोय रहौ पाछें तब वे दोऊजने भीतर सोमन लागे परि ऐसी भांतिसों सोवते मति कहूं स्वासवाजै ऐसे सावधानीसों सोवते सो वे स्त्रीपुरुष श्रीआचार्यजी महाप्रभूनके ऐसे कृपापात्र भगवदीयहै ताते इनकी वार्ता कहांताई लिखिये ॥ प्रसंग ॥ १ ॥ वैष्णव ॥ ६९ ॥

अथ सूतार कारीगर अडेलमें रहते ति० ।

सो उन सूतार ऊपर श्रीआचार्यजी महाप्रभू बहुत कृपा करते वा सूतारके ऐसौ नेम हुतौ जो श्रीआचार्यजी महानप्रभूनके दर्शन विना एक दिन

न रहतौ ताते वह सूतार सब घरको कामकाज छोड़िकें नित्य श्रीआचार्यजी महाप्रभू नके दर्शनको आवतौ तब घरके मनुष्य दुःख बहुत पावते ताके लिये श्रीआचार्यजी महाप्रभू आप वा सूतारके घर पधारते वासों श्रीआचार्यजी महाप्रभू बहुत वार्ता करते और श्रीआचार्यजी महाप्रभू नकी माता इलंमागरूजी सो श्रीआचार्यजी महाप्रभू नकी माता खीजती और कहै जो तुम ऐसे अनुचित क्यों करत हो ऐसे उचित नहीं ऐसे करिकें इलंमागरूजी बहुत रिस करती परि श्रीआचार्यजी महाप्रभू चौथे पांचवें दिन तौ पधारते ऐसी कृपा श्रीआचार्यजी महाप्रभू वा सूतारके ऊपर करते सो वह सूतार श्रीआचार्यजी महाप्रभू नको ऐसे कृपापात्र भगवदीय हो ताते इनकी वार्ता कहांताई लिखिये ॥ प्रसंग ॥ १ ॥ वैष्णव ॥ ७० ॥

अथ एक क्षत्री हुत ताकी वार्ता ।

सो वा क्षत्रीसों अन्य मार्गीयको स्नेह हुतौ सो एक दिन वह क्षत्री अन्यमार्गीयके घर गयो तब वा क्षत्रीसों कह्यौ जो तुम आज यहांही पाक करियो तब वाके आग्रहते वा क्षत्री वैष्णवने पाक उहां-

ही कीयौ तब पाक करिकें वा अन्यमार्गीय ठाकुरके आगे श्रीनाथजीको नाम लेकें भोग समप्यौ पाछें समयानुसार भोग सराय वाको प्रसाद दीयौ पाछें आपने लियो पाछें उहांही विश्राम कीयौ सो निद्रा वसभये तब वा अन्यमार्गीयके सेव्य स्वरूपनें स्वप्नमें कह्यौ जो आजतौ हम भूखे रहै तब वा अन्यमार्गीयनें कह्यौ जो तुमकों तौ वा वैष्णवनें पाक भोग समप्यौ हौ और तुम भूखै कैसे रहिगये तब उनके सेव्य श्रीठाकुरजीने कह्यौ जो वह तौ श्रीनाथजी आप आरोगे है हमको तौ श्रीनाथजीने उहांते दूरकीयौ तब वह अन्यमार्गीयको मित्र सोयो हौ ताको जगायौ तब वह जाग्यौ तब सब समाचार कहै तब वा क्षत्रीनें कह्यौ जो में तोसो केतीकवार कह्यौ जो तू श्रीआचार्यजी महाप्रभूनको सेवक होय सो याहीके लियै हमारे प्रभूजी श्रीआचार्यजी महाप्रभूनकी कृपाते सेवकके हाथको आरोगत है पाछे वह अन्यमार्गीय सब कुटुंब सहित श्रीआचार्यजी महाप्रभूनकी शरण आये सब समेत सेवक भयौ पाछें वाके स्वरूपको श्रीआचार्यजी महाप्रभूननें पंचामृतसों स्नान करवायौ पाछें पाट बैठारे तब पाछे भोग समप्यौ समयानुसार

भोग सरायके सब वैष्णवको बुलाय महाप्रसाद
 लिवायौ पाछें वह अन्यमार्गीय श्रीठाकुरजीकी
 सेवा भली भांतिसों करन लाग्यौ पाछें वह क्षत्री
 भलौ वैष्णव भगवदीय भयौ वा क्षत्री वैष्णवके
 संगते भलौ भगवदीय भयौ ताते संग करनौ तौ
 वैष्णवको करनौ भगवदीयको करनौ वह क्षत्री
 वैष्णव श्रीआचार्यजी महाप्रभूनको ऐसौ कृपापात्र
 भगवदीय हौ ताते इनकी वार्ता कहाँताई लिखिये ॥
 प्रसंग ॥ १ ॥ वैष्णव ॥ ७१ ॥

लघुपुरुषोत्तमदास क्षत्री ति० वार्ता ।

सो वे लघुपुरुषोत्तमदास श्रीआचार्यजी महा-
 प्रभूनको तथा श्रीनाथजीको एक सार जानते
 श्रीआचार्यजी महाप्रभूनको स्वरूप साक्षात पुरुषो-
 त्तम करि जानते लघु पुरुषोत्तमदासकी श्रीआचा-
 र्यजी महाप्रभूनके ऊपर बड़ी आसक्ति हुती ताते
 श्रीमहाप्रभूजी लघुपुरुषोत्तमदासके ऊपर बहुत
 प्रसन्न रहते लघुपुरुषोत्तमदास दूसरों स्वरूप जानते
 नहीं श्रीठाकुरजीको तथा श्रीमहाप्रभूजीको एक
 जानते वे लघुपुरुषोत्तमदास ऐसे कृपापात्र भगव-
 दीय है ताते इनकी वार्ता कहाँताई लिखिये ॥
 प्रसंग ॥ १ ॥ वैष्णव ॥ ७२ ॥

अथ कविराजभाट तिनकी वाता ।

सो वे कविराजभाट ब्राह्मण हुते सो तीन भाई हुते सो तीनों भाई श्रीआचार्यजी महाप्रभूनके ऐसे परम कृपापात्र भगवदीय हैं उनको समर्पण करवायौ पाछें श्रीनाथजी सन्निधान बहुत कवित्त पढे नये २ कवित्त करिकें श्रीनाथजीके सन्निधान कवित्त सुनावते पाछें श्रीआचार्यजी महाप्रभूनके कवित्त बहुत कीये ताते श्रीआचार्यजी महाप्रभू कविराज भाटके ऊपर बहुत प्रसन्न रहते सो वे कविराजभाट श्रीआचार्यजी महाप्रभूनके ऐसे परम कृपापात्र भगवदीय हैं ताते इनकी वार्ता अब कहांताई लिखिये ॥ प्रसंग ॥ १ वैष्णव ॥ ७३ ॥

गोपालदास ठोराके वासी ति० वार्ता ।

सो गोपालदासके कीये छंद बहुत हैं सो गोपालदासकी श्रीआचार्यजी महाप्रभूनके ऊपर बहुत आसक्ति हुती सो एक समय गोपालदास अडेल आय सो दूसरे दिन श्रीआचार्यजी महाप्रभूनको जन्मोत्सव हुतो सो श्रीआचार्यजी महाप्रभू मार्कण्डेय पूजाको बैठे हुते ता समय गोपालदासने एक नयौ छन्द करिके गायौ ॥ सोपद ॥ रागविलावल ॥

माधौमास भारि बैसाख श्रीवल्लभहारि जन्म लीयौ ॥
 यह सुनिकें श्रीआचार्यजी महाप्रभू बहुत प्रसन्न
 भय पाछें गोपालदासनें बहुत छन्द कीये सो वे
 गोपालदास श्रीआचार्यजी महाप्रभूनके ऐसे कृपा-
 पात्र भगवदीय हैं ताते इनकी वार्ता कहांताई
 लिखिये ॥ प्रसंग ॥ १ ॥ वैष्णव ॥ ७४ ॥

जनार्दनदास चौपडा क्षत्री ति० वार्ता ।

एक समय श्रीआचार्यजी महाप्रभू श्रीनाथजी-
 द्वार पधारे हुते पाछें श्रीगोकुल आये तब जनाद-
 नदासनें श्रीमहाप्रभूनको दर्शन कीयौ तब कह्यौ
 जो ये साक्षात् पूरण पुरुषोत्तम हैं इश्वर हैं तब
 जनार्दनदासनें बीनती कीनी जो महाराज मोकों
 शरण लीजियै तब श्रीआचार्यजी महाप्रभूनने
 जनार्दनदासको आज्ञा दीनी जो स्नान करिकें
 आऊ तब जनार्दनदास स्नान करिकें आयौ और
 दंडवत कीनी और बीनती कीनी जो महाराज
 मोकों नाम समर्पण करवाईयै तब श्रीआचार्यजी
 महाप्रभूननें श्रीनाथजीके सन्निधान जनार्दन
 दासको समर्पण करवायौ पाछें श्रीआचार्यजी
 महाप्रभूनकी कृपाते जनार्दनदास भलौ वैष्णव

भयौ सो श्रीआचार्यजी महाप्रभू जनार्दनदासके
ऊपर बहुत कृपा करते वे जनार्दनदास श्रीआचा-
र्यजी महाप्रभूनके ऐसे कृपापात्र भगवदीय है सो
इनकी वार्ता कहांताई लिखियै ॥ प्र० ॥ १ ॥ वै० ॥ ७५ ॥

गडुस्वामी सनाढ्य ब्राह्मण ति० वार्ता ।

सो वे गडुस्वामी आप स्वामी कहावते सो एक
समय श्रीआचार्यजी महाप्रभू वृन्दावनमें पधारे
हुते तब गडुस्वामीको आज्ञा भई श्रीठाकुरजीने
कृपा करिके रात्रिको स्वप्नमें जनायौ जो सवारे
श्रीआचार्यजी महाप्रभू इहां पधारेंगे सो तू इनकी
शरण जैयौ तू सेवक हूजियौ तब श्रीआचार्यजी
महाप्रभू आप सवारे पधारे तब गडुस्वामी स्नान
करिके जहां श्रीआचार्यजी पधारे हुते तहां गये तब
जायके गडुस्वामीने दंडौत कीनी और बीनती
करिके यह कह्यौ जो महाराज मोको शरण लीजिये
तब श्रीआचार्यजी महाप्रभू मुसिक्यायके कहै जो
तुमतौ आप स्वामी हौ तुमको सेवक कैसे करिये
तब गडु स्वामीने श्रीआचार्यजी महाप्रभूनसों बी-
नती कीनी जो महाराज मोको भगवद् आज्ञा भई है
जो तू श्रीआचार्यजी महाप्रभूनकी शरण जैयौ

ताते महाराज मोकों शरण लीजियै तब श्रीआचार्यजी महाप्रभूननें गडुस्वामीको नाम दीयौ पाछें निवेदन करवायौ ता पाछें जो गडुस्वामीनें जो सेवक कीयै हुते तिन सबनको श्रीआचार्यजी महाप्रभून पास नाम दिवायौ पाछें वे गडुस्वामी बडे भगवदीय भये श्रीआचार्यजी महाप्रभू आप गडुस्वामीके ऊपर बहुत प्रसन्न रहते सो वे गडुस्वामी ऐसे भगवदीय है ॥ प्रसंग ॥ १ ॥ वैष्णव ॥ ७६ ॥

अथ कन्हैयासाल क्षत्री तिनकी वार्ता ।

सो उन कन्हैयासाल क्षत्रीके ऊपर श्रीआचार्यजी महाप्रभू बहुत प्रसन्न रहते बडी कृपा करते श्रीआचार्यजी महाप्रभूननें आप कृपा करिके अपने ग्रन्थ कन्हैया सालको पढायै सोई ग्रन्थ कन्हैयासालके पासते श्रीगुसांईजीने पढे सो श्रीआचार्यजी महाप्रभूनकी कृपा ते सब स्फुर्द रूपभयै सो वे कन्हैयासाल क्षत्री श्रीआचार्यजी महाप्रभूनके ऐसे परमकृपापात्र भगवदीय है ताते इनकी वार्ता कहांतांई लिखिये ॥ प्रसंग ॥ १ ॥ वैष्णव ॥ ७७ ॥

अथ नरहरदासगोडिया तिनकी वार्ता ।

सो एक दिन श्रीआचार्यजी महाप्रभूननें नरहरदासके घर श्रीमदनमोहनजी पाटवैठारेहुते सो श्री-

मदनमोहनजीकी सेवा नरहरदासनें नीकी भांतिसों कीनी पाछें शरीर जब परचौ तब सेवा न होय आई तब नरहरदासनें श्रीठाकुरजी श्रीगुसांईजीके घर-पधराये सो श्रीगुसांईजी श्रीरघुनाथजीके पधरायै सो श्रीगोकुलचंद्रमाजीके पास जुदे बैठते हैं न्यारे सिंघासन ऊपर विराजते सो श्रीगुसांईजी नरहर दासके ऊपर बहुत प्रसन्न भयै वे ऐसे भगवदीय है और नरहरदासनें अपने मनमें विचारीजो श्रीठाकुरजी कबहू न सुख पावेंगे श्रीगुसांईजीके घर सुखपावेंगे सो वे नरहरदास श्रीगुसांईजीके ऐसे परम कृपापात्र भगवदीय है सो ताते इनकी वार्ता कहांतांई लिखिये ॥ प्रसंग ॥ १ ॥ वैष्णव ॥ ७८ ॥

अथ बादरायणदास तिनकी वार्ता ।

सो बादरायणदास और उनकी स्त्री मोरबीमें रहते सो बादरायणदासको पहिलोनाम बादा हुतौ सो एक समय आछे भट्ट द्वारका श्रीरणछोडजीके दर्शनको जातहुते सो मोरबीमें रात्रिको वसे सो बादरायणदासनें उनको राखे तब बादरायणदासनें उन पास नाम पायौ पाछे आछे भट्टकेपास श्रीभागवत श्रवण कीयौ तब श्रीभागवत सम्पूर्ण करिकें

बादरायणदासते विदाहोयकें पाछें भट्ट द्वारिका श्रीरणछोडजीके दरशनको गये तब कितनेक दिन पाछें श्रीआचार्यजी महाप्रभू आप द्वारिका श्रीरणछोडजीके दरशनको पधारे हुते तब मोरबीमें उतरे सो बादरायणदास और उनकी स्त्री दोऊ जने-नने श्रीआचार्यजी महाप्रभूनके पास फेरिके नाम पायौ पाछें समर्पण करवायौ पाछे श्रीआचार्यजी महाप्रभू मोरबीमें दिन द्वै रहै तापाछें श्रीआचार्यजी महाप्रभू आप श्रीरणछोडजीके दर्शनको पधारे तब बादरायणदास और उनकी स्त्री श्रीआचार्यजी महाप्रभूनके संग गये तब दोऊ स्त्री पुरुष श्रीआचार्यजी महाप्रभूनकी सेवामें रहै सो उन दोऊनने ऐसी सेवा कीनी जो श्रीआचार्यजी महाप्रभू उनके ऊपर बहुत प्रसन्न भये तब याको नाम पहले बादा हुतौ सो श्रीआचार्यजी महाप्रभूनने याको नाम बादरायणदास धर्यौ ता पाछें श्रीआचार्यजी महाप्रभू द्वारिकासों चले तब ये दोऊ जने श्रीआचार्यजी महाप्रभूनके साथ गये सो मोरबीलों साथ आये पाछें श्रीआचार्यजी महाप्रभूनते आज्ञा मांगकें मोरबीमें रहै पाछें श्रीआचार्यजी महाप्रभू आप श्रीगोकुल पधारे वे बादरायणदास श्रीआचार्यजी

महाप्रभूनके ऐसे कृपापात्र भगवदीयहै ताते इनकी
वार्ता कहांताई लिखिये॥प्रसंग ॥ १॥ वैष्णव॥७९॥

सहूपांडेमानिकचंदपांडे इनकी स्त्री तथा
नरौबेटी आन्यौरमें रहते ति० वा० ।

सो जब श्रीआचार्यजी महाप्रभू पृथ्वीपरिक्रमा
करत झारखंडमें पधारे तब श्रीनाथजीने श्रीआचा-
र्यजी महाप्रभूनसों कह्यौ जो तुम मेरी सेवाको
चलावौ ब्रजमें श्रीगोवर्द्धन पर्वत है तहां हम तीन
दमन है (देवदमन, नागदमन, इन्द्रदमन,) तिनके
मध्यमें हम देवदमन हैं सो देवदमन मेरो नाम है
सहूपांडेको बडौभाई मानकचंदपांडे है तहां हम
प्रगट भये हैं तब श्रीआचार्यजी महाप्रभू परिक्रमा
झारखंडमें राखिकें ब्रजको पाउधारे सो सेवक हूं
पांचसात साथ है दामोदरदास हरसानी कृष्णदास-
मेघन रामदासजी माधोदास प्रभृत इत्यादिक श्री-
आचार्यजी महाप्रभूनके सेवक सब आन्यौरमें
आये सो मध्याह्न समय श्रीआचार्यजी महाप्रभू
आप सहूपांडेके घर पावधारे सो एक बडौ चौतरा
सहूपांडेके घरके द्वारें हुतौ ताके ऊपर श्रीआचा-
र्यजी महाप्रभू विराजे तब सहूपांडेने श्रीआचार्यजी

महाप्रभूनसों कह्यौ जो स्वामी कछू खाऊगे तब श्रीआचार्यजी महाप्रभूननें कह्यौ जो हम तौ कछू न खायंगे तब कृष्णदास मेघनने कह्यौ जो येतौ अपने सेवकके हाथको लेत है बिना सेवक तो ये काहूके हाथको लेत नाहीं इतनेमें श्रीगोवर्द्धन पर्व-तते श्रीनाथजी पुकारे जो नरौ मेरौ दूध लाउ तब नरोने कह्यौ जो महाराज आज तौ हमारे पाउन आये हैं ताते दूध नाहीं तब श्रीनाथजीने कही जो तेरे पाउने आये हैं सो तो भली भई हम कहा करें परि मेरौ दूध तौ लाउ तब नरो बोली जो वारीलाल लाई तब नरौ कटोरा भरि ले गई श्रीनाथजीको प्यायौ तब श्रीआचार्यजी महाप्रभूननें दामोदर-दाससौ पूछौ जो दमलातें कछू सुन्यौ तब श्रीआ-चार्यजी महाप्रभूनसों दामोदरदासनें कह्यौ जो महाराज यह शब्द और झारखंडको शब्द एक मिलत है सो एसौ जान्यौ परत है जो यहांई प्रगटे हैं सवारे चलेंगे तब इतनेमें नरो दूध प्यायके आई तब श्रीआचार्यजी महाप्रभूननें नरोसौ पूछौ जो कहां गई हुती और कहा ले गई हुती तब नरो बोली जो राज देवदमनको दूध प्याय आयी हों तब नरोपे माँग्यौ जो यामें दूध है तब नरोने कह्यौ जो रंचक

हैं तब श्रीआचार्यजी महाप्रभूनें कह्यौ जो यामेंते बच्च्यौ है सो हमको दें तब नरौ बोली जो महाराज घरमें बहुत दूध है तब सहूपांडेने श्रीआचार्यजी महाप्रभूनसों बीनती कीनी जो महाराज हमहारे आपजीते अब हमको नाम दीजिये तब श्रीआचार्यजी महाप्रभूनके मानिकचन्द तथा सहूपांडे तथा इनकी स्त्री तथा नरो ये सब सेवक भये उनके ऊपर आपने हाथ फेरौ और नाम दीयौ ता पाछें वह दूध लीयौ पाछें उनकेहू घरकौ दूध दही अंगीकार कर्यौ सो वे भले भगवदीय हैं तब श्रीआचार्यजी महाप्रभूनने सहूपांडेसों पूछ्यौ जो कहौ यहां ऊपर देवदमन प्रगट भये हैं सो कोन भांतिसो प्रगट भये है तिनको प्रागट्य तुम हमसों कहौ सो श्रीआचार्यजी तो साक्षात् ईश्वर हैं आपही करत हैं और आपही पूछत हैं सो काहेते जो आप जीवके ऊपर कृपा करिवेके लीये तब सहूपांडेने श्रीआचार्यजी महाप्रभूनसों कह्यौ जो महाराज एक हमारे गांमकौ ग्वाल हुतौ सो सब गांमकी गायनकौ चरावतौ सो सब प्रकार सहूपांडेने श्रीआचार्यजी महाप्रभूनके आगे कह्यौ सो सब श्रीआचार्यजी महाप्रभूनने सुन्यौ सो श्रीआचार्यजी महाप्रभू तौ आप

पूरण पुरुषोत्तम हैं आपही करत हैं सो वे सहूपांडे तथा मानिकचंद पांडे और सब श्रीआचार्यजी महाप्रभूनके ऐसे परम कृपापात्र भगवदीय हैं जिनके पासते श्रीआचार्यजी महाप्रभू तथा श्रीनाथजी जो चाहिये जो सो मांगिलेते और आप जिनके घर पधारते ॥ प्रसंग ॥ १ ॥

और एक दिन श्रीनाथजी इनके घर दूध पीवे-को सोनेको कटोरा ले आये तब श्रीनाथजीने नरोसो कह्यो जो दूधलाउ तब नरोतौ वा कटोरा में दूध डारत जाय और श्रीनाथजी आप आरोगत जाय सो दूध पीके श्रीनाथजी आप तौ पधारे और कटोरा वहांही भूलि आये तब सवारे भये पाछें मंगलआरतीके समय भीतरियानें देखो तौ मंदिरमें कटोरा नाहीं तब इतनेमें नरौ कटोरा ले आई और कह्यो जो यह कटोरा लेउ रात्रिको लरिका भूलि आयौ है तब सबजने बहुत प्रसन्न भये वह नरौ ऐसी भगवदीय है ॥ प्रसंग ॥ २ ॥

और एक समय श्रीआचार्यजी महाप्रभूनसों श्रीनाथजीने कह्यो जो मोकों गाय मंगाय देउ तब श्रीआचार्यजी महाप्रभूनने दामोदरदास हरसानी सों कहा जो श्रीनाथजीने गायनके लिये आज्ञा

दीनी है सो श्रीआचार्यजी महाप्रभूनने अपने हस्तको छल्ला सुवर्णको दीनी और दामोदरदास हरसानीसों कह्यो याके दामनकी गाय ले आवो तब दामोदरदासने वह छल्लासहूपांडेको दीनी और कह्यो जो याको बेचिकें याके दामनकी गाय ले देउ श्रीआचार्यजी महाप्रभूनने गाय मँगाई है तब सहूपांडेने कह्यो जो श्रीआचार्यजी महाप्रभू आप गायनको कहा करेगें तब दामोदरदासने कहा जो श्रीनाथजीने श्रीआचार्यजी महाप्रभूनसों गाय मँगाई है ताके लिये उनने कही है तब सहूपांडेनेकही जो मेरे यहांगायहै सोकोनकीहै वहतो श्रीआचार्यजी महाप्रभूनकी है जोचाहियै सोलीजियै तब दामोदरदासनेकही जोश्रीआचार्यजी महाप्रभूनकी ऐसी हीआज्ञा है ताते याको बेचिके गाय ले देउ तब सहूपांडेने वह छल्ला बेचिके ताकी गाय दौ ले दीनी सो दोऊगाय श्रीआचार्यजी महाप्रभूनने श्रीनाथजीको सपारि पाछें दस गाय सहूपांडेने श्रीनाथजीकी भेटकीनी पाछें सब वैष्णवनको खबर भई जो श्रीनाथजीने गायनके लिये श्रीआचार्यजी महाप्रभूनसों आज्ञाकरी है सो वैष्णवनने गाय पठाई काहूनेदोय काहूने चारि काहूनेदश पठाई ऐसेकरत दोयसेके

आसरे गायभेलीभई सोश्रीनाथजीको गाय बहुत प्रिय हैं तबते श्रीनाथजीको नाम गोपाल श्रीआचार्यजी महाप्रभूनने धन्यो है तब श्रीगुसांईजीने गोपालनामते गोपालपुर गांव बसायौ ताहीते सुरदासजीने श्रीआचार्यजी महाप्रभूनके प्रगटगोपाल नामकीये है प्रथम गाय सुरगायो सोवे सहूपांडे तथा नरौ सबकोउ श्रीआचार्यजी महाप्रभूनके ऐसे कृपापात्र भगवदीय है सो इनकी वार्ताको पार नाहीं ताते इनकी वार्ता अब कहां ताई लिखिये ॥ प्रसंग ॥ ३ ॥ वैष्णव ॥ ८० ॥

अथ नरहरदास संन्यासी तिनकी वार्ता ।

सोएक वेनाकोठारीहुतौ ताने प्रथम नरहरदास संन्यासीकेपास नामपायौ हुतौ सोएकसमय श्रीआचार्यजी महाप्रभून तबद्वारिका पधारेहुते तब नरहरदास संन्यासी और वेनाकोठारी श्रीआचार्यजी महाप्रभूनके साथहुते सो द्वारिकागये तहां श्रीआचार्यजी महाप्रभू आप नरहरदास संन्यासीकेउपर बहुत प्रसन्न भयै तब नरहरदास संन्यासीने बीनतीकीनी जो महाराज मेरे ऊपर कृपाकरियै तौमें प्रार्थना करतहों तब श्रीआचार्यजी महाप्रभू तनिकीभाषाये जागृति जइ पावैं कहैं जो कहा

प्रार्थना करत है तब नरहरदास संन्यासीनें कह्यौ जो महाराज वेना कोठारीको शरणलीजिये तब श्री आचार्यजी महाप्रभूननें कृपाकरिकें नामदीयौ समर्पणकरवायौ पाछें वे नरहरदास संन्यासीके ऊपर प्रसन्न बहुत भये सो वे नरहरदास संन्यासी श्रीआचार्यजी महाप्रभूनके ऐसे कृपापात्र भगवदीय हैं ताते इनकी वार्ता कहांताई लिखिये ॥ वै० ८१ ॥

अथ गोपालदास जटाधारी श्रीनाथजीकी खवासी करत हुते तिनकी वार्ता ।

सो श्रीनाथजी उनसों सानुभाव हुते और गरमीके दिनमें श्रीनाथजीको भोग आवतौ तब गोपालदास आप नेत्र मूंदके पंखाकरते तब रात्रिको श्रीनाथजी जगमौहनमें पोढते तहां गोपालदास ठाडे होयकें आंखमूंदिके पंखाकरते चारपहरठाडेरहते परिदेह आलस कछू बाधा न करतौ रात्रिकेविषै श्रीठाकुरजीके श्रीस्वामीजीके वचन सुनतौ तब आप कहते जो गोपालदास आंखखोलदेउ तेरौ परदाके सो तब गोपालदास कहते जो महाराज मोको श्रीआचार्यजी महाप्रभूनकी आज्ञा नाहीं तातेमें क्यों कर

खोलूं तब कबहूं श्रीनाथजी अपने श्रीहस्तसों गो-
पालदासके मुखमें मेलते ऐसी कृपा करते तब ऐसे
करत कितनेक दिन बीते तब एक दिन गोपालदा-
सनें बीनती करिकें कही जो महाराज मोकों पृथ्वी
परिक्रमा करिवेकी आज्ञा दीजिये मेरो मनोरथ
पृथ्वीपरिक्रमा करिवेको है तब श्रीआचार्यजी महा-
प्रभूननें कहौ जो अवश्य करिये पाछें गोपालदास
आज्ञा मांगिकें पृथ्वीपरिक्रमाको गये तब और
वैष्णवननें कह्यौ जो महाराज ऐसे कृपापात्रको ऐसी
मन क्यों कर होय तब श्रीआचार्यजी महाप्रभूननें
कह्यौ जो यह गयो तो है परि जाय सकैगौ नाही
मजल दोय चारि जायगौ तब याको बिरह होयगौ
ता बिरहकरिकें याकी देह छूटेगी तब सब वैष्णव-
ननें श्रीआचार्यजी महाप्रभूनसों बीनती कीनी जो
महाराज इनकी देह या भांति क्यों पडे तब श्रीआ-
चार्यजी महाप्रभूननें कह्यौ जो महदअपराध इन
श्रीठाकुरजीसों बिगाडौ ताको नाम महदअपराध
कहिये इनसो एक महद अपराध पड्यो है तासों
इनकी यहगति भई तब सब वैष्णवननें पूछौ जो
महाराज इनकी देह या भांतिसो पडेतौ सही परि
महदअपराध काहेसों कहियुत है तब श्रीआचार्यजी

महाप्रभूननें कही जो यह गोपालदास पहिलें श्रीनाथजीके बागकी रखवारी करतौ सो एक श्रीठाकुरजीको सेवक ब्राह्मणको लरिका हुतौ सो रात्रिकों वा बागमेंते फूल चुरायके लेजातौ सो एक दिन गोपालदासनें वाको पकच्यो सो वह भाज्यो सो वह अपने मंदिरमें दुबक्यौ सो गोपालदासनें जायके वाके मुक्कीकी मारी सो बात अब श्रीठाकुरजीको वह बात सुधि आई जो याकों महदअपराध पच्यौ है ताते पृथ्वीपरिक्रमाकी इच्छा भईहै सो गोपालदास पांचचारि मजल गयौ पाछें विरह भयौ सो विरहकरिके गोपालदासनें देह छोडी तब यह बात श्रीआचार्यजी महाप्रभूननें सुनी तब अपने श्रीमुखते कहैं जोगोपालदासके परलोकमें तौ हानि नाहीं जो यह श्रीनाथजीके चरणन पास पहुंचौ ताते भगवदीयको सर्वथा बिगाड न करनो भगवदीयको बिगाड करेतौ याभांतिसों होय भगवदीयके बिगाडे ते गोपालदासकी यह गति भई वे गोपालदास श्रीआचार्यजी महाप्रभूनके ऐसे परम कृपापात्र भगवदीयहैं ताते इनकी वार्ता अब कांताई लिखिये ॥ प्रसंग ॥ १ ॥ वैष्णव ॥ ८२ ॥

अथ कृष्णदास ब्राह्मण तिनकी वार्ता ।

सो वह कृष्णदास वा गाममें रहते परि अकिंचन रहते सो एक समय वैष्णव दस पन्द्रह मिलकें श्रीआचार्यजी महाप्रभूनको दर्शनको अडेलकों जातहुते सो जा गांवमें कृष्णदास रहते ता गांवमें आये सो कृष्णदासके घर आये तब कृष्णदासतौ घर हुते नाहीं कछू कार्यार्थके लिये कोस तीन ऊपर गये हुते और कृष्णदासकी स्त्री घर हुती तब वा स्त्रीने उन वैष्णवनको साष्टांग दंडवत कीनी श्रीकृष्णस्मरण कहि बहुत आदर सनमान करिकें अपने घरमें बैठारे पाछें मनमें विचारें जो अब कहा करिये तब सुधिआई जोवह बनिया नित्य टोक्यो करतहै जो तू मोसों मिलि तू मांगेगी सो देउंगौ सो आज वासों सीधोसामग्री लाऊं ऐसे विचारिकें स्त्रीचली सो वा बनियाकी हाटपै गई तब वा बनियाने टोकी तब वा बनियासों स्त्रीनेकही जो मैं तोसों कालि मिलुंगी तू मोकों आज सौदा चाहियतहै सौ दै तब वा बनियाने कह्यौ जो तू मोसों कौल करेतो मैं मानूं तब वा स्त्रीने वासौ कौलकरि दीनों तब वा स्त्रीको सीधोसामग्री चाहियतहुतों सो दीनों तब लेकें घर आये तब घरआयके रसोई करि श्रीठाकुरजीकों

भोगसमर्थों समयानुसार भोगसराय अनोसरि करिके पाछे वैष्णवनको महाप्रसाद लिवायौ तब वैष्णवनने महाप्रसाद भलीभांतिसों लीनों पाछे कृष्णदास घर आयै तब वैष्णवनसों मिले दडवत करिकें भीतरगयै तब स्त्रीसो कह्यौ जो कहा खबरि है वैष्णवनकों महाप्रसाद लिवाईयै तब स्त्रीने कह्यौ जो प्रसादतौ लिवायौहै तब कृष्णदासने कह्यौ जो सीधोसामग्री कहाँते लाई कहा प्रकारकीयौ तब जो प्रकारकीयौहुतौ सो सब कह्यौ और कह्यौ जो यह बनिया मोसों नित्य टोकाकरतौ जो तू मोसो एक दिन मिलि तू कहेगी सो देउंगो तब आजवासों कोलकरार करिकें सीधोसामग्री लाइहों तब कृष्णदास वा स्त्रीके ऊपर बहुत प्रसन्नभयै पाछे स्त्रीपुरुष दोऊजनेनने सीरो महाप्रसादलीयौ पाछे कृष्णदास वैष्णवनकेपास आयबैठे सबरी रात्रि भगवद्रार्ता करतवीती जब सवारोभयौ तब सब वैष्णव विदा होयके चले तब कृष्णदास थोरीसी दूर पहुंचावन गयो पाछे आप घरआय स्नानकरि श्रीठाकुरजीकी सेवा करिकें यावृतकोगयै पाछे वा स्त्रीने रसोईकरि श्रीठाकुरजीको भोगसमर्थों भोगसराय अनोसरकरी महाप्रसाद टांकिधर्यौ तब कृष्णदास घरि सांझको

आये तब वही सीरो महाप्रसाद दोऊजनेनने
 लीयौ तब कृष्णदासने अपनी स्त्रीसो कही जो तुमने
 कालि वा बनियासों कौलकीयौहुतो सो वह बनिया
 पेडों देखत होयगौ ताते वाका कौलपूरौ करिये तौ
 भलौहै तब वह स्त्री उवटनोंकरि न्हायके स्त्रीजनके
 शृंगारहौतहैं सो सबकरिकें वह स्त्रीचली सो वरषाके
 दिन हुते सो मेहवरषगयौहुतौ सो मार्गमें कीच
 भईहुती ताके लिये कृष्णदासने अपनी स्त्रीसों कही
 जातू मेरे कांधेपै बैठले मैं पहुंचाय आऊ मार्गमें
 कीचि बहुतभईहै तेरेपाय कीचमें भरिजायंगे सो
 वह बनिया देखिकें तेरौ अनादर करेगौ तब वा
 स्त्रीको अपने कांधेपर चढायकें लेचले सो वा बनि-
 याकी हाटकेआगै उतारदीनी तब वा स्त्रीने वा बनि-
 याकों हैलापारकेंकहौ जो किवाड खोलि तब वा बनि-
 याने कीवाडखोलिदीने और वा स्त्रीको भीतरलीनी
 तब वह बनिया पायधोयवेकौ पानी ले आये और
 कह्यौ जो पायधोय तब स्त्रीने कह्यौ जो मेरेपाय
 कीचसो भरेनाहीं तब वा बनियाने कह्यौ जो मार्गमें
 तो कीचबहुतभईहै और तेरेपाय कोरेकेसेरहै तब वा
 स्त्रीनेकहौ जो तू पूछिके कहाकरेगौ तू तेरौ काम
 करि तब वा बनियाने कह्यौ जो यहतौ बातकही-

चाहिये तब वा स्त्रीने कह्यौ जो मेरो भरतार मोको कांधे ऊपर चढायक लायौहौ तब यह बात सुनिकें वा बनियाकौ बडो आश्चर्य भयौ और सब वृत्तान्त हो सो पूछौ जो यह कहा कारनहै सो सब मेरे आगे कहि तब वा स्त्रीने जो प्रकारभयौहौ सो सब कह्यौ सो वह सुनके बनिया अपने मनमें धृकारकरन लाग्यौ और कहौ जो धन्य जन्म तुमारौ जो जिनकौ ऐसो मन साच्यौहै और धृकारजन्ममेरोहै तब दोऊ हाथ जोरिकें दंडौत कीनी और कह्यौ जो मेरो अपराध क्षमा करियै और मेरे उपर कृपा राखियै मेरी तुम बहनहौ ऐसे कहि वा बनियाने बहुत दुखमान्यौ पाछें वा बनियानें स्त्रीको कपडा पहरायके वाके घर पहुंचायदीनी और कृष्णदाससों वा बनियाने बहुत वीनती कीनी जो तुम मेरौ अपराध क्षमा करौ यह मेरी बहन है और तुम मेरे पूज्यहौ तब कृष्णदासने कही जो तेरो कहा अपराध है तू संकोचमति कर फेरि वह बनिया कितनेकदिन पाछें श्रीआचार्यजी महाप्रभूनको सेवक भयौ नाम समरपण कीयौ तब वा बनियाको नाम श्रीआचार्यजी महाप्रभूनने ज्ञान चंद धर्यौ पाछें वह बनिया बडौ भगवदीयभयौ सो कृष्णदासके संगते भयौ ताते संगकरनोंतौ भग.

वदीयको करना जासों भगवद्भक्ती उत्पन्न होय पाछें वह बनिया सदा कृष्णदाससों नमत रहतौ उनकी स्त्रीसों बहन कहतौ सो ऐसो सम्बंध राखतौ सो वे कृष्णदास श्रीआचार्यजी महाप्रभूनके ऐसे कृपा-पात्र भगवदीय हैं ताते इनकी वार्ता कहांताई लि-खाये ॥ प्रसंग ॥ १ ॥ वैष्णव ॥ ८३ ॥

संतदास चौपडा श्रुती आगरेके ति ०।

सो वे संतदास पहिले बहुत संपतवान हुते व्यौ-पार बहुत हुतो लाखनको व्यौपार करते सो द्रव्य सब व्यौपारहीमें खोयो पाछें सेऊंके बजारमें कौडी बेचन लागै टका २४ की पूंजी हुती सो जबताई पैसा ढाई कमावते तबताई उहां बैठे रहते कोडीनकी ढेरी पैसानकी करिराखते सो गाहक पैसा धरकें कोडीनकी ढेरी लेजाते और संतदास आपपोथी बांचते मार्गमें काहूसों बोलते नाहीं भगवत् रसमें छिके रहते और जो कोऊ भगवत्भक्ति आवतौ तासों बडे भगवद्वाता करिके औरसों संभाषण न करते रसोईको टका एकलगावते और धेलाकी चवेनी आनि राखते सो रात्रिकों वैष्णव आयकें बैठते भगवद्वाता कीर्तन करते सो सब चवेनी महा प्रसाद बांटे देते सो वैष्णव लेके उठिते ऐस ढाई

पैसामें निर्वाह करते ऐसे करत कितनेक दिनबीते तब नारायणदास गौडदेसकेनें सुनी जो संतदासके द्रव्यको बहुतसंकोच है ताते नारायणदासनें संतदासको पत्रलिख्यौ और एक मौहरनकी थैलीपठाई सो हुंडी कासदलेकें आयौ तब संतदासको पत्रदीनों तब वह पत्र संतदासनें वांच्यौ और तामें हुंडी ही सो वांची तब हुंडी ही सो तौ श्रीगुसांईजीके पास पठाई और एकटका कासदकोदीनों और संतदासनें नारायणदासको पत्र लिख्यौ तामें लिख्यौ जो तुमनें हुंडी पठाईही सो तौ अडेल श्रीगुसांईजीको पठायदीनी और तुम्हारी प्रभूतामें हमारे एक दिनकी रसोईनभई तादिनकीकमाई कासदकोदीनी जब हुंडीपहुंची तब भंडारीनें श्रीगुसांईजीको बचाई सो एक सौ मौहरनकी है सो नारायणदासनें गौडदेसते संतदासको पठाई सो संतदासनें यहां पठाई है तब श्रीगुसांईजीने कही जो संतदासतौ श्रीआचार्यजी महाप्रभूनके बडेही कृपापात्र भगवदीय है ताते वैष्णवकोद्रव्य काहेको रखेंगे ॥ प्रसंग ॥ १ ॥

बहुर कितनेक दिनपाछें श्रीगुसांईजीनें श्रीगोकुल वास कीयौ तब संतदास उत्सवके दिन आगरते दरशनको आवते और श्रीगुसांईजी आप

आगरे पधारते तब संतदासके घर विना बुलाए पधारते आप श्रीगुसांईजी श्रीआचार्यजी महाप्रभुनके सेवकजानि ऐसी कृपा करते तब कितनेक दिन पाछें संतदासकी देहथकी तब श्रीगोकुलते चापाभाईको बुलायौ सो चापाभाई श्रीगुसांईजीकी आज्ञा मानिकें आगरे आये तब संतदासनें चापाभाईसों कह्यौ जो यह घर तुम्हारौ है जानो तो कोई एक दिन स्त्रीकों रहन दीजियौ और जानोतों गहने घर दीजियौ अथवा बेचकें दामले जाउ ऐसे कहिकें घरके पत्र खत चापाभाईको सोंप दीनों तब चापाभाई खत पत्र लेकें श्रीगोकुल आयै तब श्रीगुसांईजीसों सब समाचार कहै पाछें संतदास बहुत आसक्ति भये तब वैष्णव सब आयजुरे तब संतदाससों कह्यौ जो तुम कह्यौ तौ रेणुका स्थल अथवा मथुरा जहां कहों तहां लेचले तब संतदासनें कह्यौ जो मोकों कहां रेणुकास्थल कृतार्थ करेगो तब वैष्णवनने कह्यौ जो श्रीगोकुल लेजाय तब संतदासनें कह्यौ जो श्रीगोकुलजायके कहा राख झडाउंगौ ऐसे कहिकें आगरेहीमें देह छोडी पाछें वैष्णवनने कृत्य उहांही कीयौ पाछे यह बात वैष्णवननें श्रीगुसांईजीके आगे कही तब श्रीगुसांईजी अपने श्रीमु-

खते कहैं जो वे संतदास ऐसे भगवदीय है ताते
इनकी वार्ता कहांताई लिखिये ॥ प्र० ॥ २ ॥ वै ॥ ८४ ॥

अथ सुन्दरदास तिनकी वार्ता ।

सो सुन्दरदास श्रीजगन्नाथरायजीके दश कोस
परे एक गांवमें रहते तहां कृष्ण चैतन्यको सेवक
माधौदास सो उहां रहतौ सो सुंदरदासके और माधौ
दासके परस्पर स्नेह बहुत हुतौ सो सुंदरदास जब
श्रीआचार्यजी महाप्रभूनकी सराहना करतौ तब
माधौदास कहतौ जो मेरे जो कळू है सो सब कृष्ण
चैतन्यको है सो जहां एक समय श्रीआचार्यजी
महाप्रभू पाउधारै हुते तब सुंदरदासने अपने घर
पधरायै तब श्रीआचार्यजी महाप्रभूनने उहां रसोई
करिके श्रीठाकुरजीको भोगसमर्प्यो पाछे भोग
सरायो तब माधौदासने थार आवत देख्यो तापाछे
श्रीआचार्यजी महाप्रभू आपतौ भोजनकरिके पोढे
तब माधौदासने सुन्दरदासते कही जो तेरे गुरुके
हाथते श्रीठाकुरजी आरोगे नाहीं औरमें श्रीठाकु-
रजीको आरोगावत हों सो तो एकहू ग्रास रहत
नाहीं तब सुंदरदासने श्रीआचार्यजी महाप्रभूनसों
कही तब श्रीआचार्यजी महाप्रभूनने माधौ दासको
बुलायके पूछौ तब माधौदासने जो वृत्तान्त हुतौ
सो सब कह्यो जो काल हम तेरे घर आवेंगे सो

देखेंगे मेरे आगे श्रीठाकुरजी आरोगेंगे तब जानूंगो तब दूसरे दिन श्रीआचार्यजी महाप्रभू माधौदासके घर पधारे और कह्यौ जो अब थार श्रीठाकुरजीके आगे आन राखि तब माधौदास थार ले गयौ श्रीठाकुरजीके आगे भोग धन्यौ फिर बाहर आयौ तब श्रीआचार्यजी महाप्रभू मंदिरके द्वार ऊपर बैठे रहैं सो वहां एक प्रेत नित्य आयकें श्रीठाकुरजीके आगे खाय जातौ सो वह प्रेत बाहू दिन आयौ तब देखेतौ श्रीआचार्यजी महाप्रभू बिराजें है तब वह प्रेत खिस्यानो और कह्यौ जो राज अबहं भूखौ रहंगौ तब श्रीआचार्यजी महाप्रभू नने कह्यौ जो तेने अब ताई खायो सोतौ खायौ पारि अब न खान पावेगौ ताते अब इहांसों जा तब वह प्रेत फिर गयौ तब माधौदास भोग सरावन गयौ तब देखेतौ थार ज्योंका त्यों भरचौ है तब माधौदासने कह्यौ जो तुम्हारे आग मेरे श्रीठाकुरजी आरोगे नाहीं ऐसे सामान्य वचन बहुत बोले पारि श्रीआचार्यजी महाप्रभू आप चुप करि रहै कछु बोले नाहीं तब माधौदास रात्रिको सोयौ तब श्रीठाकुरजीके अनुचर आयै सो बहुत मारचो और खाटते औंधौ पटक मारचौ तब माधौदासने उनसों

कह्यौ जो तुम मोकों काहेको मारतहों तब जगन्ना-
 थरायजीने कह्यौ जोतू श्रीआचार्यजी महाप्रभूनसों
 ऐसौ सामान्य बचन क्यों बोल्यौ में तेरे इहां कब
 आरोगतहों जो तू भोग धरतौ सो तौ प्रेत खाय
 जातौ हौ आज श्रीआचार्यजी महाप्रभूभी और
 ऊपर बैठे हुते ताते न खाय सक्यौ तू उनसों क्यों
 बुरो बोल्यौ वेतौ मेरौ स्वरूप हैं तब माधौदासने
 उनसों कह्यौ जो में सवारें श्रीआचार्यजी महाप्रभू-
 नसों अपराध क्षमा करवाय आउंगौ मेंने ऐसे न
 जान्यौ तब माधौदास प्रातःकाल उठिकें श्रीआ-
 चार्यजी महाप्रभूनके पास आयौ और साष्टांग
 दंडवत कीनी और बीनती करकें कह्यौ जो महाराज
 मेरौ अपराध क्षमा करिये सो श्रीआचार्यजी महा-
 प्रभू आपतौ परमदयाल हैं तब प्रसन्न होयके कहैं
 जो तेरौ कहा अपराध है हम तेरे ऊपर बहुत प्रसन्न
 हैं तब माधौदासने बीनती कीनी जो महाराज
 मेरे घर पावधारौ तब श्रीआचार्यजी महाप्रभू मा-
 धौदासके घर पावधारे और प्रसन्न होयके माधौ-
 दासको नाम सुनायौ तापाछें माधौदासकों निवेदन
 करवायौ पाछें श्रीआचार्यजी महाप्रभूनने माधौ-
 दासके ठाकुरकों पंचामृतसे स्नान करवायौ तापाछें

श्रीठाकुरजीकों सिंगारकरिकें सिंहासन पाट बैठारे
 पाछें श्रीआचार्यजी महाप्रभूननें पाककरिकें भोग
 समर्प्यो तब समयानुसार भोग सराय अनोसरि
 करिकें पाछें श्रीआचार्यजी महाप्रभूननें माधौदा-
 ससों कह्यो जो तू वैष्णवनकों बुलायलावों तब माधौ-
 दासनें कह्यो जो महाराज पांच सात वैष्णव बु-
 लायलावों तब आचार्यजी महाप्रभूननें कह्यो जो
 पांच सातकी कहा है जितनें तेरे मनमें आवै तित-
 नेबुलाय लाउ तब माधौदासनें श्रीमहाप्रभूजीसों
 कह्यो जो महाराज प्रसादतौ थोरो है और वैष्णव
 बहुत आवेंगे तो कैसें होयगी तब श्रीआचार्यजी
 महाप्रभूननें कह्यो जो माधौदाससोंके जो अर तेरी
 अक्कल मारीगई है प्रसाद कबहू न घटे तेरे या
 गांवमें जितने वैष्णव होय तिन सबको बुलायलाउ
 पाछें जितने वैष्णव हैं तिन सबनको बुलायलायौ
 तब सबनकों महाप्रसाद लिवायौ तोहू वह थार
 भरचा रह्यौ तब माधौदाससों श्रीआचार्यजी महा-
 प्रभूननें कह्यो जो वैष्णवके विषे विश्वास चाहिये
 जो भगवत् प्रसाद सदा अटूट रहै या भांतिसों
 माधौदासकों श्रीमहाप्रभूजीनें अंगीकार करचौ सो
 सुंदरदासके संगते भयौ ताते संग करनो तो भगव-

दीयको करनों सो वे सुंदरदास श्रीआचार्यजी
महाप्रभूनके ऐसे कृपापात्र भगवदीय है ताते इनकी
वार्ता कहांताई लिखिये ॥ प्रसंग ॥ १ ॥ वैष्णव। ८५।
मावजीपटेल तथा इनकी स्त्री विरजो ति ०।

सो वे मावजी पटेल तथा इनकी स्त्री विरजो बरस
दिनमें दोय बेर श्रीगोकुल आवते श्रीनाथजीके
दर्शनको तथा श्रीगुसांईजीके दर्शनको आवते सो
श्रीगुसांईजी इनके ऊपर बहुत प्रसन्न रहते बहुत-
कृपाकरते पाछें उनको कृष्णभट्टको संगभर्यौ तब
विरजोने कृष्णभट्टसों कह्यौ जो तुम हमारे माथे सेवा-
पधारावौतौ भलौ है तब कृष्णभट्टने महाराज गुसां-
ईजीसों बीनती करिकें कह्यौ और उनक माथे सेवा
पधराई सो श्रीगुसांईजीने श्रीठाकुरजीको पाट बै-
ठार्यौ सो स्नेहपूर्वक सेवा करते सामग्री भली भां-
तिसों करते श्रीमहाप्रभूजीके सेवक दस कोस पर
रहते तिनको प्रसाद लिवावते ऐसे भली भांतिसों
सेवा करी कृष्णभट्टआदिदेकें करी ॥ प्रसंग ॥ १ ॥

और एक समय वैष्णव सब प्रसाद लेनको
उत्सवके दिन बैठे हुते तब विरजोने वैष्णवनको
अनसखडी महाप्रसाद परोर्यो तब विरजोने कृष्ण-
भट्टसों बीनती कीनी जो मोकों ऐसौ मनोरथ है जो

सब वैष्णवमंडली बैठी होय और में सखडीमहाप्रसाद सबनको लिवाऊं तब कृष्णभट्टनें कह्यौ जो यह मनोरथ है सो तो भक्तिभावसों होय परि यह द्रव्यसाध्य है तब विरजोने पूछ्यौ जो द्रव्यसाध्य सो कहा ताकौ अथ मोकों समझायके कहौ तब कृष्णभट्टन कह्यौ जो यह वैष्णवमंडली लेके श्रीगोकुल श्रीगुसांईजीके पास जैये पाछें श्रीगुसांईजी आज्ञा देय सो करियै जो श्रीगुसांईजी आज्ञा देय तौ सखडी महाप्रसाद लीयौ जाय ताते यह द्रव्य साध्य है जो मार्गमें सब खरच करियै और वैष्णवनकी आज्ञा लेनौ तब विरजोनें मावजी पटैलते कह्यौ जो मोकों यह मनोरथ है सो मनोरथ कियौ चाहिय तब मावजीपटैलने कह्यौ जो मेरे पास दो लक्षमुद्राहैं इनसों काम होयतौ भलेंई करियै तब कृष्णभट्टनें कह्यौ जा इनसों काम अवश्य होयगो आपन श्रीगुसांईजी पास चलें तब श्रीगुसांईजी आज्ञा देय सो करियै सो मावजीकी गांठमें द्रव्य बहुत हुतौ सो सब लेके उज्जेन आयै पाछें कृष्णभट्टनें वैष्णव सब इकठौरे करिकें श्रीगोकुल श्रीगुसांईजीके दरशनको आयै पाछें श्रीगोकुल आयके श्रीगुसांईजीके दर्शन कीये पाछें कृष्णभट्टनें श्रीगु-

साईंजीसों बीनती कीनी जो महाराज विरजोको
 ऐसो मनोरथ है जो सखड़ी महाप्रसाद मेरे हाथसों
 सब वैष्णवनकी मंडली बैठी होय तिनकों में परोसों
 तब श्रीगुसाईंजीनेकही जो यह मनोरथतौ पुरुषोत्तम
 क्षेत्र बिना न होय तब सब वैष्णवनकी मंडलीलेकें
 विरजो चली श्रीनाथरायजीकूं सो कितनेक दिनमें
 जाय पहुंची तब श्रीजगन्नाथजीके दर्शन कीये पाछें
 जो मनोरथ हुतौ सो सब नानाप्रकारकी सामग्री
 करवायकें श्रीजगन्नाथरायजीकों भोग समर्प्यो
 पाछें वह प्रसाद सखड़ी अन सखड़ी सब वैष्णव-
 नकों विरजोनें अपने हाथसों परोसिकें लिवायौ
 विरजोनें अपनों सब मनोरथ पूरन कीयौ पाछें वि-
 रजो उहां कछूकदिन रहिकें सब वैष्णवनसहित
 श्रीगोकुल आई तब श्रीगुसाईंजीको दर्शनकीयौ
 दंडवत कीनी तापाछें जो बातकरी सो सब श्रीगुसां-
 ईजीके आगेकही पाछें और जो द्रव्य बच्यौ सो सब
 गुसाईंजीकी भेंट कीनों तब श्रीगुसाईंजी विरजोको
 भाव देखिकें वाके ऊपर बहुत प्रसन्न भयै पाछें सब
 वैष्णवनको महाप्रसाद लिवायौ तब श्रीगुसाईंजीनें
 आप प्रसाद लीयौ तापाछें विरजो तथा सब वैष्णव
 श्रीगुसाईंजीके साथ श्रीनाथजीद्वार आये तब श्री-

नाथजीके दर्शन कीये तब बिरजो तथा श्रीगुसांईजी सब वैष्णवनसहित श्रीनाथजीते बिदा होयके अपने देशकौ गये वह बिरजो ऐसी भगवदीयही ॥ प्र० ॥ २ ॥

और बिरजौ वरस दिनमें दोय बेर श्रीगोकुल आवती तब एक गाढातौ गुडकौ भरलावती और एक गाढा घृतको भरलावती सो एक महीनालों रहती तामें पंद्रह दिनतौ श्रीगोकुल रहती और पंद्रहदिन श्रीनाथजी द्वार रहती या भांतिसौ बिरजौ रहती तब सामग्री करिकें भोगसमर्पि भोगसरायकें सब ढांकिधरे जब गायनके ग्वाल आवते तब महाप्रसाद दूध अंगीकार करते और खिरकमें लिलावती ओर आवती जब दोऊ पधरावनी करती सो वह बिरजौ ऐसी भगवदीयही सो पद्मरावलके संगते ताते संगकरनों तौ भगवदीयकौ करनों सो इनकी वार्ताको पार नाहीं ताते अब कहांताई लिखिये ॥ प्रसंग ॥ ३ ॥ वैष्णव ॥ ८६ ॥

गोपालदास नरोडामें रहते ति० वार्ता ।

सो श्रीआचार्यजी महाप्रभूनने उनकौ आज्ञा दीनी हुती जो तुम सबनकों नाम दीजिये ताते वे गोपालदास नामदेते सो एक समय श्रीआचार्यजी

नरोडामें पधारेहुते तब गोपालदासतौ घर न हुते गोपालदासके बेटा घर हुते गोपालदास कहूं या वृत्तिको गए हुते तब श्रीआचार्यजी महाप्रभूनने गोपालदासके बेटानसों पूछों जो गोपालदास कहां गये हैं तब गोपालदासके बेटानने कह्यौ जो कछु श्रीठाकुरजीके कामकों गयो है तब यह सुनिकें श्रीआचार्यजी महाप्रभूनको मन अप्रसन्न भयौ जो गोपालदासके बेटा ऐसे कैसे बोलत हैं तब श्रीआचार्यजी महाप्रभूनने कह्यौ जो यह कैसे वैष्णव है तब श्रीआचार्यजी महाप्रभूनने कह्यौ जो यहां रहनों उचित नाहीं हैं तब फिर अपने मनमें विचारे की गोपालदासको तौ आवन दीजिये वह कैसे बोलत हैं तब पाछें संध्यासमय गोपालदास आये तब गोपालदासनें संध्यासमय श्रीआचार्यजी महाप्रभूनको दर्शन कीयौ तब गोपालदाससों श्रीआचार्यजी महाप्रभूनने पूछौ जो गोपालदास तुम कहां गये हुते तब गोपालदासनें कही जो महाराज पेटलाग्यो है ताते यावृत्तिकों गयो हुतो तब यह सुनिकें गोपालदासके ऊपर बहुत प्रसन्न भये और आप श्रीमुखसों कहै जो यह वैष्णवको लक्षण है जो या वृत्तिमें श्रीठाकुरजीको नाम न लेय॥ प्रसंग॥ १॥

और एक समय गोपालदास श्रीनाथजीके दर्शनकों आय सो साथ एक सेवक हुतौ तहां ज्वर चढि आयो सो लंघन द्र चारि कीये तब रात्रिको गोपालदासको प्यास लागी सो वा सेवकके पास जल मांग्यौ सो सेवकतौ सोयौ हुतौ सेवकने तौ सुनी न हुती तब श्रीठाकुरजी जलपानकी झारी लेके आयै सो गोपालदासकों जल पिवायौ और वह झारी उहांही धरि आयै श्रीनाथजीको हृदय अति कोमल है ताते भक्तिकी आरती सहिनसकें ॥ प्रसंग ॥ २ ॥

और एक समय गोपालदासनें चौपराबिरह करिकें गायौ ॥ सोचोपरावेकी ॥ “सिखंडी श्याम घनसखी कंठ मनोहरहार ॥ धन्य दिन जेनों देखसुं नयनन नन्दकुमार ” ॥ १ ॥ ऐसे चौपरा बहुत कीये ॥ प्रसंग ॥ ३ ॥

और एक समय श्रीगुसांईजी आप नरोडामें पधारे तब बाहिर डेराकीये हुते पाछें जब गोपालदास उत्थापनके समय श्रीगुसांईजीके दर्शनकों आयै तब द्वै वैष्णवनने कह्यौ जो हमकों श्रीगुसांईजीके पासनाम दिवावौ तब गोपालदासने कह्यौ जो हम नाम देते हैं सो नाम श्रीगुसांईजी देते हैं ताते तुमकों घर चालिकें नाम देयंगे परि उन वैष्ण-

वनको मन श्रीगुसांईजी पास नाम पायवेकौ सो तीनवेर उन वैष्णवनने कह्यौ सो तीनोंवार गोपालदासने वैसेही कह्यौ जो तुमकों घर चलिकें नाम देयंगे सो यह बात श्रीगुसांईजीने अपने काननते सुनी पाछें उन वैष्णवनसों श्रीगुसांईजीने कही जो तुम कहा कहत हो तब उन वैष्णवनने कह्यौ जो महाराज हमकौ नाम दीजिये तब श्रीगुसांईजीने उनको नाम सुनायो उनको कृतार्थ करे पाछें गोपालदाससों श्रीगुसांईजी यों कहैं जो गोपालदास तुम्हारौ अंगीकार श्रीआचार्यजी महाप्रभूनने कीयो है सो तो दृढभयौ है परि जिनने तुम्हारे पास नाम पायो है सो तौ हमारे कबहूँ न होयंगे सो श्रीगुसांईजीने क्षोभ करिकें गोपालदाससों कह्यौ पाछें गोपालदासने जितनेनको नाम दीयौ हुता तिन सबनकों फिर सबनकों गुसांईजीके पास नाम दिवायौ तब वे सब कृतार्थ भय तिनसों श्रीगुसांईजी गंगोज्व कहते उन गोपालदासकों सामित्वआयौ ताते इन जीवनकों अकाजभयो ताते वे गोपालदास श्रीआचार्यजी महाप्रभूनके ऐसे परमकृपापात्र भगवदीय हैं सो इनकी वार्ता कहांताई लिखिये॥ प्रसंग॥४॥वैष्णव॥८७॥

सूरदासजी गऊघाटऊपर रहते ति० वा०

सो एक समय श्रीआचार्यजी महाप्रभू अडे-
लते ब्रजकों पावधारे सो कितनेक दिनमें गऊघाट
आये सो गऊघाट आगरे और मथुराके बीचोंबीच
है तहां श्रीआचार्यजी महाप्रभू पावधारे सो गऊ-
घाट ऊपर श्रीआचार्यजी महाप्रभू उतरे तहां
श्रीआचार्यजी महाप्रभू आप स्नानकरिकें संध्या-
वंदन करिकें पाक करनको बैठे और श्रीआचार्यजी
महाप्रभूनके सेवकनको समाज बहुत हुतौ और
सेवकहू अपने अपने श्रीठाकुरजीको रसोई करन
लागे सो गऊघाट ऊपर सूरदासजीको स्थल हुतौ
सो सूरदासजी स्वामी है आप सेवक करते सूर-
दासजी भगवदीय हैं गान बहुत आछौ करते ताते
बहुत लोग सूरदासजीके सेवक भये हुते सो श्रीआ-
चार्यजी महाप्रभू गऊघाट ऊपर उतरें सो सूरदा-
सजीके सेवक देखिके सूरदासजीसों जाय कहा जो
श्रीआचार्यजी महाप्रभू आप पधारे हैं जिनने दक्षि-
णमें दिग्विजयकीयो है तब पंडितनको जीते हैं
भक्तिमार्ग स्थापन कीयो है सो श्रीवल्लभाचाय यहां
पधारे हैं तब सूरदासजीने अपने सेवकसों कह्यौ जो
त जायके दूर बैठि जब आप भोजनकरिकें बिराजे

तब खबरि करियो हम श्रीआचार्यजी महाप्रभूनके दर्शनको जायंगे सो वह तनक दूर जाय बैठो तब श्रीआचार्यजी महाप्रभू आप पाककरत हुते सो पाक सिद्ध भयौ तब श्रीआचार्यजी महाप्रभूनने श्रीठाकुरजीको भोग समर्प्यो पाछे समयानुसार भोगसराय अनोसरिकरिके महाप्रसाद लेके श्रीआचार्यजी महाप्रभू गादीऊपर बिराजे तहां सब सेवकहू पहुँचिके श्रीआचार्यजी महाप्रभूनके आसपास आय बैठे तब वह मूरदासजीको सेवक आयो सो मूरदासजीसों कही जो श्रीआचार्यजी महाप्रभू बिराजे हैं तब मूरदासजी अपने स्थलते आयके श्रीआचार्यजी महाप्रभूनके दर्शनको आये तब श्रीआचार्यजी महाप्रभूनने कह्यौ जो मूरआवों बैठो तब मूरदासजी श्रीआचार्यजी महाप्रभूनको दर्शनकरिके आगे आय बैठे तब श्रीआचार्यजी महाप्रभूनने कही जो मूर कछू भगवद्‌यश वर्णन करौ तब मूरदासजीने कही जो आज्ञा सो मूरदासजीने श्रीआचार्यजी महाप्रभूनके आगे एक पद गायौ ॥ सो पद—

राग धनाश्री—हों हरि सब पतितनको नायक ॥
को करिसके बराबर मेरी इतने मानको लायक ॥ १ ॥

जो तुम अजामेलिसों कीनी जो पाती लिखपाऊं ॥
 होय विश्वास भलौ जिय अपने और पतित बुलाऊं
 ॥ २ ॥ सिमिटे जहां तहांते सब कोऊ आयजुरे
 इक ठौर ॥ अबके इतने आनि मिलाऊं बेर दूसरी
 और ॥ ३ ॥ होडाहोडी मनहुलास करिकरे पापभरि
 पेट ॥ सबहिन ले पायन तरिपरिहों यही हमारी
 भेंट ॥ ४ ॥ ऐसी कितनीक बनाऊं प्रानपति सुमरन
 है भयौ आडौ ॥ अबकी बेर निवार लेउ प्रभू सूर
 पतितकों ठाडौ ॥ ५ ॥ और पद गायौ—

राग धनाश्री—प्रभूमें सब पतितनकोटीकौ ॥ और
 पतित सब द्यौसचारिकें में ता जन्मतहीकौ ॥ १ ॥
 बधिक अजामिलि गनिका त्यारी और पूतनाही-
 कौ ॥ मोहि छांड़ि तुम और उधारै मिटै शूलकेमें
 जीका ॥ २ ॥ कोउ न समरथ सेव करनका खेचि
 कहतहों लीकौ ॥ मरियतलाज सूरपति तनमें कहत
 सबनमें नीकौ ॥ ३ ॥

ऐसौ पद श्रीआचार्यजी महाप्रभूनक आगे सूर-
 दासजीने गायौ सो सुनिकें श्रीआचार्यजी महाप्रभू-
 नने कहा जो सूरहैंकें ऐसो विधियात काहेको है
 कछू भगवल्लीला वर्णन करि तब सूरदासनें कह्यौ
 जो गढ़ागान होंतो समस्त नाहीं तब श्रीआचार्यजी

महाप्रभूननें कह्यौ जो जा स्नान करिआउ हम
तोकों समझावेंगे तब सूरदासजी स्नान करि आये
तब श्रीमहाप्रभूजीनें प्रथम सूरदासजीकों नाम सु-
नायौ पाछें समर्पण करवायौ और फिर दशमस्कं-
धकी अनुक्रमणिका कही सो ताते सब दोषदूर भये
ताते सूरदासजीको नवधाभक्ति सिद्ध भयी तब सूर-
दासजीनें भगवल्लीला वर्णन करी अनुक्रमणिकाते
संपूर्णलीला फुरी सो क्यों जानिये सो दशमस्कं-
धकी सुबोधिनीमें मंगलाचरणको प्रथम कारिका
कीये हैं सो यह श्लोक सूरदासजीनें कह्यौ॥सां श्लोक-

नमामि हृदये शेषे लीलाक्षराविधसायनम् ॥

लक्ष्मीसहस्रलीलाभिः सेव्यमानं कलानिधिम् ॥ १ ॥

और ताही समय श्रीमहाप्रभूनके सन्निधान पद
कीये ॥ सो पद-

राग बिलावल-“चकईरी चलि चरण सरोवर जहां
न प्रेम बियोग” यह पद सम्पूर्ण करिकें सूरदासजीने
गायौ सो यह पद दशमस्कंधके मंगलाचरणकी
कारिकाके अनुसार कीयौ सो यामें कह्यौ है जो तहां
श्रीसहस्रसहित नितक्रीडत “शोभित सूरदास या
भांति” पद कीये ताते जानी जो सूरदासकों सम्पूर्ण
सुबोधिनी स्फुरी सो श्रीआचार्यजी महाप्रभूनने

जान्यौ जो लीलाको अभ्यास भयौ पाछें मूरदास-
जीने नंद महोत्सव कीयौ सो श्रीआचार्यजी महा-
प्रभूनके आगे गायौ ॥

राग देवगन्धार—“ब्रज भयौ महरके पूत” ॥ जब
यह बात सुनी ॥ सो यह श्रीआचार्यजी महाप्रभू-
नके आगे गायौ सो सुनिके श्रीआचार्यजी महाप्रभू
बहुत प्रसन्न भये और अपने श्रीमुखते कहैं जो मूर-
दास मानों निकटही हुते पाछें मूरदासजीनें अपने
सेवक कीये हुते तिन सबनको नाम दिवायौ पाछें
मूरदासजीनें बहुत पद कीये पाछें श्रीआचार्यजी
महाप्रभूननें मूरदासजीकों पुरुषोत्तम सहस्रनाम
सुनायौ तब मूरदासजीको सम्पूरण भागवत स्फु-
र्तना भई पाछें जो पद कीये सो श्रीभागवत प्रथम
स्कंधते द्वादशस्कंधताई कीये तातें वे मूरदासजी
श्रीआचार्यजी महाप्रभूनके ऐसे परम कृपापात्र
भगवदीय हैं पाछें श्रीआचार्यजी महाप्रभू गऊघाट
ऊपर दिन दोय तीन बिराजे पाछें फेरि ब्रजको पाव
धारे तब मूरदासजीहू श्रीआचार्यजी महाप्रभूनके
साथ ब्रजकों आये ॥ प्रसंग ॥ १ ॥

अब जो श्रीआचार्यजी महाप्रभू ब्रजकों पधारे
सो प्रथम श्रीगोकुल पधारे तब श्रीआचार्यजी महा-

प्रभूनके साथ सूरदासजीहू आये तब श्रीआचार्यजी महाप्रभूनने अपने श्रीमुखसों कह्यौ जो सूरदास श्रीगोकुलकों दर्शन करौ सो सूरदासजीने श्रीगोकुलकों दंडवत करी सो दंडवतमात्र श्रीगोकुलकी बाललीला सूरदासजीके हृदयमें फुरी और सूरदासजीके हृदयमें प्रथम श्रीमहाप्रभूनने सकल लीला श्रीभागवतकी स्थापी हैं ताते दर्शन करतमात्र सूरदासजीकों श्रीगोकुलकी बाललीला स्फुर्दनाभई तब सूरदासजीने विचार्यौ मनमें जो श्रीगोकुलकी बाललीलाको वर्णन करिकैं श्रीआचार्यजी महाप्रभूनक आँखें सुनाइये जन्मलीलाको पद तौ प्रथम सुनायो है अब श्रीगोकुलकी बाललीलाको पद गायौ ॥ सो पद—

राग बिलावल-सो नितकरन पुनीतलियै ॥ घुटु-
रुवन चलत रेणु तनमेडत सुरत वेषकीये ॥ १ ॥
चारुकपोललोल लोचन छबि गोरोचनको तिलक-
दिये ॥ लारलटकन मानों मतमधुपगन माधुरी
मधुरपिये ॥ २ ॥ कठुलाकंठ बजत केहरि नख
राजत है सखी रुचिरहिये ॥ धन्य सूर एकौ पल यह
सुखकहाभयौजीये ॥ ३ ॥

यह पद सूरदासजीने गायौ सो सुनिके आप

बहुत प्रसन्न भये पाछें और हू पद गायौ तब श्रीमहाप्रभूजी अपने मनमें विचारे जो श्रीनाथजीके यहां और तो सब सेवाको मंडान भयौ और कीर्तनको मंडान नहीं कीयो है ताते अब मूरदासजीको दीजियै तब आप श्रीजीद्वारपधारे सो मूरदासजीको साथ लीयेही सो श्रीनाथजीद्वार जाय पहुँचे तब आप स्नानकरिकें मंदिरमें पधारे तब मूरदासजीसों कह्यौ जो मूरदास ऊपर आउ स्नान करिकें श्रीनाथजीको दर्शन करि तब मूरदासजी पर्वतऊपर जायकें श्रीनाथजीको दर्शन कीयौ तब आपने कह्यौ जो मूरदास कछु श्रीनाथजीको सुनावौ तब मूरदासजीने प्रथम विग्यतको पद गायौ॥ सो पद—

राग धनाश्री—“अबहों नाच्यौ बहुतगोपाल”॥ यह पद सम्पूर्ण करिकें श्रीनाथजीके आगें गायौ तब श्रीमहाप्रभूजीने कह्यौ जो अबतौ मूरदास तुममें कछु अविद्या रही नहीं तुम्हारी अविद्या तो प्रभूने दूर कीनी ताते कछु भगवद्यश वर्णन करो तब मूरदासजीने महात्म और लीला ऐसो जसकरिकें गाय सुनायौ ॥ सो पद—

रागगौरी—“कोन सुकृत इन व्रजवासिनकों ॥” यह पद सम्पूर्ण करिकें गायौ सो सुनिकें श्रीमहाप्रभूजी

बहुत प्रसन्न भये सो जैसो श्रीआचार्यजी महाप्रभू-
ननें मार्ग प्रकाश कीयौहौ ताके अनुसार सूरदास-
जीने पद कीये श्रीआचार्यजी महाप्रभूनके मार्गको
कहा स्वरूप है महात्म ज्ञानपूर्वक सुदृढस्नेह कीयौ
परमकाष्टा हैं और स्नेह आगे भगवानको महात्म
रहत नाहीं ताते भगवान वेर वेर महात्म्य जनावत हैं
नाम प्रकरनमें पूतना करि सकट तृनावर्त करि गर्गा-
चार्य करि यमुलार्जुन करि वैकुण्ठ दर्शन करि ऐसें
करिकें भगवानने बहुत महात्म जतायौ पारि इन ब्रज-
भक्तिनको स्नेह परम काष्टापन्न है ताते ताही समय
तौ महात्म्य रहै पाछें विस्मृत होजाय ॥ प्र० ॥२॥

और सूरदासजीनें सहस्रावधि पदकीये हैं ताको
सागर कहियै सो सब जगतमें प्रसिद्धि भये सो सू-
रदासजीके पद देशाधिपतिने सुने सो सुनिकें यह
विचारौ जो सूरदासजी काहू विधिसों मिले तो भलौ
सो भगवदिच्छाते सूरदासजी मिले सो सूरदासजी
सो कह्यौ देशाधिपतिने जो सूरदासजी में सुन्यो है
जो तुमने विसन पद बहु कीये हैं जो मोकों परमेश्व-
रनें राज्य दीयौ है सो सब गुनीजन मेरौ जस गावत
हैं ताते तुमहूं कछू गावौ तब सूरदासजीने देशाधि-
पतिके आगे कीर्तन गायौ ॥ सो पद—

राग बिलावल-“मनारे तू करि माधौसों प्रीति” ॥ यह पद देशाधिपतिके आगे संपूर्ण करिकें मूरदासजीनें गायौ सो यह पद कैसो है जो या पदको अहर्निश ध्यान रहेतौ भगवदनुग्रहकी सादा साति रहै और संसारते सदा वैराग्य रहै और कुसंगको सदा भय रहै और भगवदीयके संगकी सदा चाह रहै और श्रीठाकुरजीके चरणारविंद ऊपर सदा स्नेह रहै देशादिके ऊपर आसक्ति न होय ऐसो पद देशाधिपतिको सुनायौ सो सुनिकें देशाधिपति बहुत प्रसन्न भया और कह्यौ जो मूरदासजी मोंकों परमेश्वरने राजदीनों है सो सब गुनीजन मेरो जस गावत हैं ताते मेरो जस कछू गावौ तब मूरदासजीने यह पद गायौ ॥ सो पद-

राग केदारौ-“नाहिन रह्यौ मनमें ठौर” ॥ यह पद संपूर्ण करिकें मूरदासजीनें गायौ सो सुनिकें देशाधिपति अकबर बादशाह अपने मनमें विचार्यौ जो ये मेरो जस काहेको गावेंगे जो इनको कछू मेरी बातको लालच होय तौ गावै येतो परमेश्वरके जन हैं और मूरदासजीते या पदके समाप्तमें गायौ ॥ “होजो मूर ऐसैं दर्शको इमरत लोचनप्यास” ॥ यह गायौ हौ देशाधिपतिने पूछौ जो मूरदासजी

तुम्हारे लोचन तो देखियत नाहीं सो प्यासे कसें मरत हैं और बिन देखें तुम उपमाकों देत हो सो तुम कैसें देत हो तब मूरदासजी कछू बोले नाहीं तब फेरि देशाधिपति बोलौ जो इनके लोचन हैं सो तो परमेश्वरके पास हैं सो उहां देखत हैं सो वर्णन करत हैं तब देशाधिपतिने मूरदासजीके समाधानकी मनमें विचारी जो इनको कछू दीयौ चाहिये परि यह तौ भगवदीय है इनकों कछू काहू बातकी इच्छा नाहीं पाछें मूरदासजी देशाधिपतिसों विदा होयके श्रीनाथजीद्वार आये ॥ प्रसंग ॥ ३ ॥

एक समय मूरदासजी मागमें चले जाते हैं सो कोऊ चौपड खेलत हुते सो वा चौपड खेलमें ऐसे लीन है जो कोऊ आवते जातेकी सुधि नाहीं ऐसे खेलमें मग्न हैं सो देख मूरदासजीके संगके भगवदीय है तिनसों मूरदासजीनें कह्यौ जो देखौ वह प्राणीकैसौ अपनी जनमारो खोवत हैं भगवाननें तौ मनुष्य देह दीनी है सो तौ अपनी सेवा भजनेके लिये दीनी है सो येतौ या देहसों हाड कूटत हैं यामें यह लौकिकसिद्धि नाहीं सो काहेते जो या लोकमें तो अपजस और परलोकमें भगवानते बहिर्मुख ताते श्रीठाकुरजीने इनको मनुष्य देह

दीनी है तिनकों चौपड ऐसी खेलनी चाहियै सो
ता समय एकपद मूरदासजीने अपने संगकेनसों
कह्यौ ॥ सो पद—

राग केदारौ—मन तू समाझि सोच विचार ॥ भक्ति
बिन भगवान दुर्लभ कहतनिगम पुकार ॥ १ ॥ साध-
संगति डारि फाँसा फेरि रसनासारि ॥ दाव अबकें
पच्यौ पूरौ उतरि पहिली पार ॥ २ ॥ वाकसत्रे सुनि
अठारे पँचहीकों मारि ॥ दूरत ताजि तीनकौन चम-
कि चौक विचार ॥ ३ ॥ काम क्रोधजंजालभूल्यौ
ठग्यो ठगनी नारि ॥ मूरहरिकें पद भजन बिन
चल्यौ दोउ करझार ॥ ४ ॥

यह पद मूरदासजीने अपने संगके भगवदीय-
नसों कह्यौ सो या पदमें मूरदासजीने कहा कह्यौ
“मनतू समाझि सोच विचार” ये तीन्यो वस्तु चौ-
पडमें चाहिय सोइ तीनों वस्तु भगवानके भजनमें
चाहियै काहेते जो समाझि न होयतौ श्रवण कहा
करेगौ ताते पहिले तौ समाझ चाहियै और सोच
काहिय चिंतासों भगवानके प्राप्तकी चिंता न होय
तौ संसार ऊपर बैराग्यकैसे आवै ताते सोच कहियै
और विचार जा या जीवकों विचारहीं नाहीं तौ
संगदुसंगमें कहा करेगौ ताते विचार चाहियै सो ये

तीनों वस्तु होयतौ भगवदीय होय ताते ये तीनों वस्तु भगवदीयकों अवश्य चाहिये और चौपडमें हूं ये तीनों वस्तु चाहिये समझ कहै गिनवो न आवतो गोटकेसें चलै और सोच अगम जो मेरे यह दाव पडैतो यह गोटचलूं विचारजो बाहीमें तन-मन जो ये तीनों वस्तु होय तो चौपडखेली जाय सो वे सूरदासजी श्रीआचार्यजी महाप्रभूनके ऐसे परम कृपापात्र भगवदीय हैं ॥ प्रसंग ॥ ४ ॥

बहुर सूरदासजी श्रीनाथजीद्वार आयकें बहुत दिनताई श्रीनाथजीकी सेवा कीनी वचिरमें श्रीगोकुल श्रीनवनीतप्रियाजीके दर्शनकों आवते सो एक समय श्रीमूरदासजी श्रीगोकुल आये श्रीनवनीतप्रियाजीके दर्शन कीये और बाललीलाके पदबहुत सुनाये सो श्रीगुसांईजी सुनिकें बहुत प्रसन्न भये पाछे श्रीगुसांईजीनें एक पालना संस्कृतमें कीयौ सो पालना सूरदासजीकों सिखायौ सो पालना मूरदासजीनें श्रीनवनीतप्रियाजी झुलत हुते ता समय गायौ ॥ सो पद—

राग रामकली—“प्रेमपर्य्यके शयनं” यह पद सूरदास जीने सम्पूर्ण करिकें गाय सुनायौ श्रीनवनीतप्रियाजीकों पाछे या पदके भावके अनुसार बहुत पदकीये सो सुनिकें श्रीगुसांईजी बहुत प्रसन्न भये

पालनाके भाव अनुसार पद गायो ॥ सो पद-

राग बिलावल-बालविनोद आंगनमेंकी डोलनि ॥
मणिमयभूमिसुभगनंदालयबलिवलि गईतोतरी बो-
लनि ॥ १ ॥ कठुलाकंठरुचिरकेहरि नखब्रजमाल-
बहुलई अमोलनि ॥ वदनसरोज तिलक गोरोचन
लरलटिकन मधुगनिलोलनि ॥ २ ॥ लीन्यौकर
परसत आननपर कछू खाय कछू लग्यो कपोलनि ॥
कहैं जन सूर कहाँलों वरनों धन्य नंदजीवन जग
तोलनि ॥ ३ ॥

गोपाल दुरे हैं माखन खात ॥ देखि सखी सोभा
जो बढी अतिस्याम मनोहरि गति ॥ १ ॥ उठि अ-
वलोकि ओट ठाडी है जिह विधि नहीं लिखि लेत ॥
चक्रतनैन चहूं दिस चितवत और सबनकों देत ॥ २ ॥
सुंदर कर आनन समीप हरिराजत यह आकार ॥
जनुजल रुहतजि बेर विधिसों लाये मिलत उप-
हार ॥ ३ ॥ गिरिगिरि परत बदनते ऊपर द्वैदाधि
सुतके बिंदु ॥ मानहू सुधाकन खोरवत पियजिय-
दुंद ॥ ४ ॥ बालविनोद बिलोक सूरप्रभू बित भई
ब्रजकी नारि ॥ फुरतन बचन वरजिवेकों मनराही
विचार विचार ॥ ५ ॥

राग जैतश्री-कहाँ लगवरनो सुंदरताई ॥ खेलत कु-
मर कतिक आंगनमें नैन निरख सुखपाई ॥ १ ॥

कुल है लसत श्यामसुंदरके बहु विधिरंगविवनाई ॥
 मानउ नवधन ऊपर राजत मधुवा मनुष्य चढाई
 ॥ २ ॥ सेतपीत अरु असितलाल सणि लटकनि-
 भाल रुलाई ॥ मानहूं असुर देव गुरुसों मिलि भूमि-
 जसो समुदाई ॥ ३ ॥ अतिसुदेशमृदु चिहरहरत
 मनमौहन सुखवगराई ॥ मानहूं मंजुलकंज ऊपर
 वर अलि अवलि फिर आई ॥ ४ ॥ दूधदंत छवि
 कही न जात कछू अलि पल लप झलकाई ॥ किल-
 कत हंसत दुरति प्रगटत मानो विधुमें विपुलताई
 ॥ ५ ॥ खंडत बचन देत पूरन सुख अद्भुत यह उ-
 पमाई ॥ घुटुरुन चलत उठत प्रमुदितमन सूरदास
 बलिजाई ॥ ६ ॥

राग रामकली-देखौ सखी एक अद्भुत रूप ॥ एक
 अम्बुजमध्य देखियत बीस दधिसुतजूष ॥ १ ॥
 एक अवली दोय जलचर उभे अर्क अनूप ॥ पंच-
 वार चढिगहि देखियत कहौ कहा स्वरूप ॥ २ ॥
 सिसुगनमें भई सोभा कोऊकरौ विचार ॥ सूर श्री
 गोपालकी छवि राखो यह निरधार ॥ ३ ॥ ऐसे
 पद सूरदासजीनें गाये पाछें फेरि श्रीनाथजीद्वार
 आये ॥ प्रसंग ॥ ५ ॥

अब सूरदासजीनें श्रीनाथजीकी सेवा बहुत

कीनी बहुत दिन ताई ता उपरांत भगवदिच्छा जानी जो अब प्रभूनकी इच्छा बुलायवेकी है यह विचारिकें जो नित्य लीला फलात्मक रासलीला जो जहाँ करे हैं ऐसी जो परासोली तहाँ मूरदासजी आये श्रीनाथजीकी ध्वजाको दंडौत करिकें ध्वजाके साम्हें सन्मुख करिकें मूरदासजी सोये परि अंतःकरन यह जो श्रीआचर्यजी महाप्रभू दर्शन देयंगे अब यह देह तौ थकी ताते अब या देहसों श्रीनाथजीको दर्शन होयतौ जानिये परमभाग्य है श्रीगुसाईजीको नाम कृपासिंधु है भक्तनके मनोरथ पूरन कर्ता हैं ऐसे विचारके मूरदासजी श्रीगुसाईजीको चिंतवन करत हैं और श्रीगुसाईजीकेसे कृपासिंधु हैं जैसे मूरदासजी उहाँ स्मरण करत हैं तैसेही श्रीगुसाईजी इनको छिनहुं नहिं भूलत है श्रीनाथजीको सिंगार हो तौ ता समय मूरदासजी मणिकोठामें ठाडे २ कीर्तन करते सो ता दिन श्रीगुसाईजी श्रीनाथजीको सिंगार करत हुते और मूरदासजीको कीर्तन करत न देखो तब श्रीगुसाईजीने पूछौ मूरदासजी नाहीं देखियत सो काहेते तब काहू वैष्णवनने कह्यौ जो महाराज मूरदासजीतो आज परासोलीकी ओडी जात देखे हैं तब श्रीगुसाईजीने

जान्यौ जो भगवदिच्छाते अवसान समें हैं ताते
 मूरदासजी परासोली गय हैं तब श्रीगुसांईजीनें
 अपने सेवकनसों कह्यौ जो पुष्टमार्गकों जिहाज
 जात हैं जाकों कछू लेनों होय तौ लेउ और जो
 भगवदिच्छाते राजभोग आरती पाछें रहत हैं तो
 मेंहू आवतहों पाछें श्रीगुसांईजी वेर २ मूरदास-
 जीकी खबार मंगायौ कर जा आवै सोई कहैं जो
 महाराज मूरदासजीतो अचेत हैं कछू बोलत नाहीं
 ऐसे करत श्रीनाथजीके राजभोगको समय भयो
 सोराजभोग आरती करिकें श्रीगुसांईजी श्रीगिरि-
 राजते नाचे उतरे सो आप परासोली पधारे भीतार-
 या सेवक रामदासजी प्रभृत और कुंभनदासजी
 और श्रीगुसांईजीके सेवक गोविंदस्वामी चत्रभुज-
 दास प्रभृत और सब श्रीगुसांईजीके साथ आये सो
 आवतही मूरदासजीसों श्रीगुसांईजीनें पूछा जा मू-
 रदासजी कैसेहौ तब मूरदासजीनें श्रीगुसांईजीको
 दंडोत करिकें कह्यौ जो महाराज आये हौ महारा-
 जकी बाट देखत हुतौ यह कहिकें मूरदासजीने एक-
 पद गाया ॥ सा पद—

राग सारंग—देखो देखौ हरिजूका एक सुभाव ॥ अ-
 तिगंभीरउदारउदधिप्रभू जान सिरोमनराय॥ १॥

राईजितनी सेवाको फल मानत मेरुसमान॥समझि-
दास अपराध सिंधु सम बूंदनएकौ जानि ॥ २ ॥

बदन प्रसन्न कमल पद सन्मुख दीखतही है ऐसैं ॥

ऐसैं विमुखहू भये कृपाया मुखकी जब देखौ तब
तैसे ॥ ३ ॥ भक्त विरह करत मय करुणा डोलत पाछें
लागे॥सूरदास ऐसे प्रभूकों कत दीजै पीठ अभागै ४

यह पद सूरदासजीने कह्यौ सो सुनिक श्रीगु-
साईजी बहुत प्रसन्न भये और कह्यौ जो ऐसो दैन्य-
प्रभू अपने सेवकनको देहि या दैन्यके पात्र एही है
तब वा वेर श्रीगुसाईजी पास ठाडे हुते और चत्र
भुजदासहू ठाडेहुते तब चत्रभुजदासने कह्यौ जो
सूरदासजीने बहुत भगवत् जश वर्णन कीयौ परि
श्रीआचार्यजी महाप्रभूनकी जस वर्णन ना कीयौ
तब यह वचन सुनिकें सूरदासजी बोले जा मेंतो सब
श्रीआचार्यजी महाप्रभूनकोही जसवर्णन कीयो है
कछून्यारौ देखूं तौ न्यारौ करूं परि तेरे साथ कहत
हौ या भांति कहिकें सूरदासजीने एक पद कह्यो ॥
सो पद—

राग बिहागरौ—भरौ सो दृढ इन चरणनकेरौ ॥
श्रीवल्लभनखचंद्रछटाबिनु सब जगमांझि अंधेरौ ॥
॥ १ ॥ साधन और नहीं या कलिमें जासों होतनिबेरौ ॥

मूर कहा कहि दुविधिआधिरौ विनामोलकौचरो॥२

यह पद कह्यो पाछें मूरदासजीकों मूछाँ आई
तब श्रीगुसांईजी कहैं जो मूरदासजी चित्तकी वृत्ति
कहां है तब मूरदासजीनें एक पद और कह्यो ॥
सो पद—

राग बिहागरो—बलिवलिवलिहौ कुमर राधिका नंद-
सुवनजासों रतिमानी ॥ वे अति चतुर तुम चतुर
सिरोमन प्रीतिकरी कैसें होत है छानी ॥ १ ॥ वे
जुधरततन कनक पीतपट सो तो सब तेरी गति
ठानी ॥ ते पुनि श्यामसहेज वे शोभा अंबर मिस
अपने उरआनी ॥ २ ॥ पुलिकित अंग अबहीहैं
आयौ निराखि देखि निज देह सियानी॥मूरसुजान
सखीके बूझे प्रेम प्रकाश भयौ विहसानी ॥ ३ ॥

यह पद कह्यो इतनों करिकें मूरदासजीको चित्त
श्रीठाकुरजीको श्रीमुखतामें करुणारसकें भरे नेत्र
देखे तब श्रीगुसांईजीने पूछौ जो मूरदासजी नेत्रकी
वृत्ति कहां है तब मूरदासजीने एक पद और कह्यो ॥
सो पद—

राग बिहागरो—खंजन नैनरूपरसमाते ॥ अतिसे
चारु चपल अनियारे पल पिंजरा न समाते ॥ चलि
चलि जात निकट श्रवणनके उलटिपुलटिताठंकफं-

दाते ॥ मूरदासअंजल गुणअटके नातर अब उडि
जाते ॥ १ ॥

इतनों कहतही मूरदासजीने या शरीरको त्याग
कीयौ सो भगवल्लीलाम प्राप्तभये पाछें श्रीगुसांईजी
सब सेवकनसहित श्रीगोवर्द्धन आये ताते मूरदा-
सजी श्रीआचार्यजी महाप्रभूनके ऐसे परम कृपा-
पात्र भगवदीय हैं सो इनकी वार्ताको पार नाही ताते
इनकी वार्ता कहांताई लिखिये॥प्र०॥६॥वै०॥८८॥

परमानन्ददास कन्नौजिया ब्राह्मण ति०

सो परमानंददासजी परमभगवल्लीलामव्ययाती
श्रीठाकुरजीके परमसखा हैं सो जब श्रीआचार्यजी
महाप्रभू आप भूतलपर प्रगट भये तब श्रीगोवर्द्धन
नाथजीकी आज्ञाते दैवी जीवनके उद्धारार्थ और
तैसई श्रीआचार्यजी महाप्रभूनकों श्रीठाकुरजीकों
परकार सब प्रगट भयौ और आप श्रीगोवर्द्धन पर्व-
तमें प्रगट भयौ सो गोपालदासजी बल्लभाख्यानमें
गाये हैं जो अनेक जीव कृपा करे “ वादेशांतरपर-
वेश ” ताते परमानंददासजीकौ जन्म कन्नौजमें हैं
कन्नौजिया ब्राह्मणके घर भयौ सोवे परमानंददासजी

बहुत योग्यभये और कविभये भगवत्कृपाके पात्र-
 भये कीर्तन बहुत आछौ गावते ताते परमानंददास-
 जीके संगसमाज बहुत रहतो आप स्वामीकहावते
 आपसेवक करते सो भगवदिच्छाते एक समय पर-
 मानंददासजी कन्नोजते आप प्रयागकों आये सो
 प्रयागमें उतरे सो वहां कीर्तन बहुत आछें गावते
 ताते बहुत लोग कीर्तन सुनिवेकों आवते और अडे-
 लते कार्यार्थ लोग बहुत आवते सो इनके कीर्तन
 सुनिकें पार अडेलमें जाय कहते जो परमानंददा-
 सजी इहां प्रयागमें आये हैं सो कीर्तन बहुत आछें
 गावत हैं सो श्रीआचार्यजी महाप्रभूनके सेवक
 जल धरिया कपूरछत्री सो उनके रागउपर बहुत
 आसक्ति परि वे अवकाश नाहीं पावें जो परमानंद
 दासजीके कीर्तन सुनिवेकूं आवे सेवामें अवकाश
 नाहीं पावें जो प्रागजायसकें सो एक दिन एक
 वैष्णव प्रागते अडेलमें आयौ सो बाने कह्यौ जो
 आज एकादशी है सो परमानंददासजी आज जाग-
 रनकरेंगे सो यह सुनिकें वा जलधरियानें अपने
 मनमें विचारयो जो आज परमानंदजीके कीर्तन सु-
 निवेकों चलनों सो वे छत्री कपूर जलधरिया अपनी
 सेवासों पहुंचकें रात्रिकों अपने घर आये सो घर

आयकें अपने मनमें विचार कीयौ जो या वेर
 नावतौ मिलेगी नहीं ताते कहा कर्तव्य परि वे पे-
 रमें भले निपुन हुते सो मनमें विचारी जो पेरकें
 पारजैये पाछें अपने घरते चले सो श्रीयमुनाजीके
 तीरउपर आयठाडे भये तब पर्दनीपहरकें वस्त्र सब
 मांथेसों बांधिकें श्रीयमुनाजीमें पेरकें प्रयाग आये
 पाछें वस्त्र पहरकें जाठौर परमानंद स्वामी उतरे
 हुते तहां आयै सो इनको कछू मिलापतौ परमानं-
 दस्वामीसों हुतौ नहीं जहां और सब जने बैठे
 हुते तहां एऊजाय बैठे परि एउ श्रीआचार्यजी
 महाप्रभूनके सेवक हैं सो सब कोऊ जानत हुते
 ताते सबनने इनकों आदर करकें बैठायौ सो ये
 बैठे ता पाछें परमानंदस्वामीने कीर्तनको प्रारंभ
 कीयौ सो परमानंदस्वामीने विरहके पदगायै सो वि-
 रहके पद काहेको गाये सो प्रथम इनको स्वरूप
 कहि आये है कही जो यह लीला मध्यायाती श्रीठा-
 कुरजीके परमानंदस्वामी परमसखा हैं सो उहांसों
 बिछुरे और इहांतो अबही श्रीठाकुरजीकों दर्शन
 नहीं भयो और श्रीआचार्यजी महाप्रभूनको दर्शन
 अब होयगो श्रीआचार्यजी महाप्रभूनके मार्गको
 यह सिद्धांत है जो भगवदीयको संग होयतौ श्रीठा-

कुरजी कृपाकरें ताहीके लियै श्रीआचार्यजी महा-
प्रभूनने परमानंदस्वामीके ऊपर अनुग्रह करिकें
अपने कृपापात्र भगवदीयके अंतःकरणमें प्रेरना-
करिकें परमानंदस्वामी ये इहां पठायें सो ये श्री-
आचार्यजी महाप्रभूनके सेवक कैसे हैं जो जिनको
श्रीठाकुरजी एकक्षनहूं नाहीं छोड़त इनको संगही
रहत हैं काहेतें सूरदासजी गाए हैं " भक्तिविरह
करतकरुणामय डोलत पाछें २ " और जगन्नाथ-
जोसीकीहुवार्तामें लिख्यौ है जो जब रजपूतनें तर-
वार चलाई तब श्रीठाकुरजीनें हाथ पकड़्यौ ताते
श्रीआचार्यजी महाप्रभूनके सेवकनके सदा श्रीठा-
कुरजी निकटही रहत हैं ताते परमानंदस्वामीने
विरहके पद गाये सो पद—

राग बिहागरी—ब्रजके बिरही लोग विचारे ॥ बिन
गोपाल ठगसे ठाडे अति दुर्बल तनहारे ॥ १ ॥ मात
जसोदा पंथ निहारत निरखत सांझ सकारे ॥ जो
कोई कान्ह कान्ह कहि बोलत अंखियन बहुत प-
नारे ॥ २ ॥ यह मथुरा काजरकी रेखा जे निकसेते
कारे ॥ परमानन्द स्वामी बिनु ऐसे जैसे चंद्रा बिनु
तारे ॥ ३ ॥ और पद गायौ सो पद—

राग बिहागरी—सब गोकुल गोपाल उपासी ॥ जो

गाहक साधनके उधौ सो सब बचन ईस पुरकासी
॥ १ ॥ जद्यपि हरिहम तजी अनाथ करि अब छां-
डत क्यों रतिजासी॥ अपनी सीतलता तहां छोडत
जद्यपि विधुराह है ग्रासी॥ २ ॥ किंहु अपराध जोग
लिखि पठ्यौ प्रेम भजनते करत उदासी ॥ परमा-
नन्द अंसीको विरहन मांगें मुक्ति पुनरासी ॥ ३ ॥

राग कान्हरो-कौन रसिक है इन बातनको ॥ नंद
नंदन विन कासों कहियै सुनिरी सखी मेरे दुखिया
मनको ॥ १ ॥ कहावे यमुना पुलिन मनोहर कहा
वह चंद सरद रातिकौ ॥ कहावे मंद सुगंध अमल
रस कहावे षट् पद जल जातनको ॥ २ ॥ कहावे
सेज पौढिबो बनको फूल बिछोना मृदुपातनको ॥
कहावे दरस परस परमानंदकोमलतन कोमल
गातको ॥ ३ ॥

राग कान्हरो-माईको मिलवै नंदकिसोरे ॥ एक
वारको नैन दिखावें मेरे मनको चोरे ॥ १ ॥ जाग-
तजा मगन तनहीं खूंटत क्यों पाऊंगी भोरे॥ सुनरी
सखी अब कैसें जीजै सुन तमचर खगरोरे॥ २ ॥ जो
यह प्रीति सत्य अंतरगति जिन काहू बन होरे॥ पर-
मानंद प्रभू आन मिलेंगे सखी सीस जिन ढोरे॥ ३ ॥

इत्यादिकपद विरहके ऐसे परमानंद स्वामीने

सगरी राति गाये पाछिली घडी चारि रात्र रही तब
जो जो जागरनमें आये हुते सो सब अपने घरकों
गये तैसेई श्रीआचार्यजी महाप्रभूनके सेवक एक
जल धरिया कपूरहं परमानंद स्वामीसों जैसी कृष्ण
स्मरण कहिकें चले और परमानंद स्वामीके कीर्तन
सुनिकें बहुत प्रसन्न भये और परमानंद स्वामीसों
कह्यौ जो जैस हमने सुने हुते ताते अधिक देखे तुम
परम भगवद् अनुग्रह पूरण होये जल धरिया क्षत्री
कपूर श्रीमहाप्रभूके परम भगवदीय हैं ये जो चलि
आये सो परमानंद स्वामीके ऊपर अनुग्रह करि-
वेकों आये हैं नातर भगवदीय काहेकों काहूके घर
जाय और यह ऊपर काहे आये हैं जो श्रीआचा-
र्यजी महाप्रभूनके निकटही रहत हैं सो याको हेत
यह जो निकट रहत हैं तो इन जलधरिया क्षत्री
कपूरकी गोदमें बैठिकें श्रीनवनीत प्रियाजीनें पर-
मानंदस्वामीके पद सुने जो श्रीआचार्यजी महाप्र-
भूनके मार्गकी मर्यादा है जो श्रीआचार्यजी महा-
प्रभूनके अनुग्रह बिना श्रीठाकुरजी कृपा न करे
सो उन जलधरिया छत्री कपूर ऊपर श्रीआचा-
र्यजी महाप्रभूनको परम अनुग्रह है ताते श्रीनवनी-
तप्रियाजी इनकी गोदमें बैठिके परमानंदस्वामीके

पद काहेकों सुनने पडे सो ताकोहेत यह जो भगव-
 दीय परमानंदस्वामीके ऊपर श्रीनवनीतप्रियाजी
 अनुग्रहकरिवेकों आप पधारे हैं ताते सुनें सो श्री-
 आचार्यजी महाप्रभूनके सेवक जलघरिया क्षत्री
 परमानंदस्वामीसों जैसी कृष्ण करिके चले सो श्री-
 यमुनाजीके तार ऊपर आये सो वहां आयके वि-
 चार कीयौ जो नावकी बाट देखै तो अवार होयगी
 और सेवा छूटेगी और श्रीआचार्यजी महाप्रभूभी
 खीजेंगे ताते जैसे पैरके आये हुते तैसेही चले सो
 पैरके पार गये सो पार आवतही स्नान करिके अपनी
 सेवामें तत्पर भये पाछें वहां प्रागमें परमानंदस्वा-
 मीकी रात्रिके जागरनके श्रीमतिसों आंखिलगी
 निद्रा आई सो इतनेमें स्वप्न आयौ सो स्वप्नमें देखे
 जो जैसे रात्रिके जागरनमें श्रीआचार्यजी महाप्र-
 भूनके सेवक जलघरिया क्षत्री बैठे हैं और उनकी
 गोदमें श्रीनवनीतप्रियाजीके दर्शन भये और स्व-
 प्नमें श्रीनवनीतप्रियाजी परमानंदस्वामीसों कहें
 और परमानंदस्वामीकी निद्रा खुली सो वा श्रीमु-
 खको कोऊ सौंदर्य कोटिकंदर्पलावण्य परमानंद
 स्वामीने देख्यौ सो स्वप्नमें तो हृदयमें धरिलीयौ
 और मनमें चटपटी लगी सो यह दर्शन फेरि कब

होयगो तब यह मनमें विचार्यौ जो यह दर्शन
 उन श्रीआचार्यजी महाप्रभूके सेवक क्षत्री जलघ-
 रिया विना न होयगो ताते होयतो उनके पास जैये
 जो उनसों मिले तब कार्य सिद्धि होय ऐसो परमा-
 नंदस्वामीने अपने मनमें विचार कीयो सो ततकाल
 प्रागते अडेलकू चले सो श्रीयमुनाजीके तीर ऊपर
 आय ठाडे भये सो प्रातःकालको समय भयौ सो
 प्रथम नाव चला तापर बैठिकें पार उतरे तब आगे
 जायकें देखें तो श्रीआचार्यजी महाप्रभूजी स्नान
 संध्याबंदन करत हैं सो परमानंदस्वामीकों श्रीम-
 हाप्रभूजीको कैसो दर्शन भयौ साक्षात् पूरन पुरु-
 षोत्तम श्रीकृष्णचंद्रसो श्रीगुसाईजी वल्लभाष्टकमें
 लिख्यो है "सोवस्तुतःकृष्णएवच" ऐसो दर्शन भयौ
 जो श्रीआचार्यजी महाप्रभूनके सेवक जलघरिया
 क्षत्रीकपूरकी गोदमें श्रीठाकुरजी काहेको बैठे यह
 कारण जिनके माथ ऐसे प्रभू विराजत हैं पर पर-
 मानंदस्वामीके मनमें यह जो क्षत्री कपूर मिले तो
 आछी सो काहेते जो जिनके माथे ऐसे प्रभू और
 जिनके दर्शनते श्रीआचार्यजी महाप्रभूनकों दर्शन
 भयौ ता पाछें श्रीआचार्यजी महाप्रभूनने अपने
 श्रीमुखसों कह्यौ जो परमानंद कछू भगवदीय जस

वर्णन करि ॥ तब परमानंद स्वामीनें बिरहके पद
गाये ॥ सो पद—

राग सारंग—कोनवेरभई चलेरीगोपाले ॥ होंननसा-
रगईहोंन्योते वारवार बोलत ब्रजबोले ॥ १॥ तेरौत-
नको रूप कहां गयौ भामिन अरु मुखकमलमुखाय
रह्यौ ॥ सब सौभाग्य गयौ हरिके संग हृदयसों
कमल बिरहदह्यौ ॥ २॥ को बोलेकोनैनउघारे कोप्र-
तिउत्तरदेहि विकलमन ॥ जो सर्वस्वअक्रूर चुरायौ
परमानंदस्वामीजीवनधन ॥ ३ ॥

राग सारंग—जियकी साधन जियहीरहीरी ॥ बहुरि
गोपाल देखि नाहीं पाए विलपतकुअअहीरी ॥ १ ॥
एक दिनसोंजसमीप यह मारग वेचन जातदहीरी ॥
प्रीतके लिये दानमिस मोहन मेरी बाँहगहीरी ॥ २॥
बिन देखें घडी जातकलपसम बिरहाअनलदहीरी ॥
परमानंद स्वामी बिन दर्शन नैनननींदबहीरी ॥ ३॥

राग संगम—वह बात कमलदलनैननकी ॥ वारवार
सुधि आवत रजनी बहु दुरिदेनी सेनी सेनकी ॥ १॥
वह लीला वह रास सरदको गोरजरजनी आवनि ॥
अरुवहऊचीटेरमनोहर मिसकरिमोहसुनावनि ॥ २॥
वसन कुअमें रास खिलायो विथा गमाई मनकी ॥
परमानंदप्रभूसों क्योंजीवे जो पोखीमृदुवैनकी ॥ ३॥

या भांति परमानन्दस्वामीनें विरहके पद गाये सो सुनिके परमानन्दस्वामीसों कह्यौ जो कछू बाल-लीला वर्णन करि तब परमानन्दस्वामीनें कह्यौ जो महाराज मैं कछू समझत नाहीं तब श्रीमहाप्रभूननें कह्यौ जो स्नान करि आउ हम तोकों समझावेंगे तब परमानन्दस्वामीनें श्रीमहाप्रभूसों पूछो जो महाराज आपको सेवकविरक्त कहाँ है तब श्रीआचार्यजी महाप्रभूनने कह्यौ जो कछू टहलकरत होयगो तब परमानन्दस्वामी स्नानकों गये सो तब परमानन्दस्वामी आगे जायकें देखें तो यमुनाजलकी गागर लैकें वह कपूर छत्री आवत हैं तब निकट आये सो साम्हें मिले सो उनको देखकें परमानन्दस्वामी बहुत प्रसन्न भय और परमानन्दस्वामीनें उनको नमस्कार करी औ कह्यौ जो रात्रिको जागरनमें आप पधारे हुते सो श्रीठाकुरजीनें आपकी गोदमें बैठिके मेरे कीर्तन सुने सो आपकी कृपाते श्रीठाकुरजीने मोसों कह्यौ जो मैं श्रीआचार्यजी महाप्रभूनके सेवक जलघरियाक्षत्रीकी गोदमें बैठिकें तेरे कीर्तन सुने हैं और आपकी कृपाते मेरो भाग्य सिद्ध भयो है सो आवतही तुम्हारी कृपाते मोकों दर्शनभयौ इतनी बात सुनिके उन जलघरियाने कह्यौ जो ऐसे मति

कहौ जो श्रीआचार्यजी महाप्रभू सुनेंगे तो खीजेंगे सो सेवा छोड़के क्यों गये ताते यह बात मति कहौ तब इतनी सुनिके परमानंदस्वामीकों आश्चर्य भयो और कहौ जो एधन्य हैं जिन ऊपर श्रीठाकुरजीकों ऐसो अनुग्रह है और ये अपनों स्वरूप छिपावत हैं पाछें परमानंद स्वामीतौ स्नानको गये और जल-घरिया जलकी गागर लेके मंदिरमें गयौ पाछें परमानंदस्वामी श्रीयमुनाजीमें स्नान करिके तत्काल आप श्रीआचार्यजी महाप्रभूनके आगे आय ठाड़े भये तब श्रीआचार्यजी महाप्रभूनने कहौ जो परमानंदस्वामी आगे आउ बैठी तब परमानंदस्वामी आप आगे आय बैठे तब श्रीआचार्यजी महाप्रभूनने परमानंदस्वामीको नाम सुनायौ पाछें मंदिरमें पधारके श्रीनवनीतप्रियाजीके सन्निधान परमानंदस्वामीकों ब्रह्मसंबंध करवायौ पाछें अनुग्रह करिके परमानंदस्वामीकों अनुक्रमणिका सुनाई काहेते जो प्रथम परमानंदस्वामीसों श्रीआचार्यजी महाप्रभूनने अपने श्रीमुखसों कहौ जो भगवद्यश वर्णन करि सो परमानंदस्वामीनें बिरहको पद गायो तब श्रीआचार्यजी महाप्रभूनने कहौ जो परमानंदस्वामी बाललीला गाउ तब परमानंदस्वामीनें कहौ

जो राजमें कछू समझत नाहीं सो परमानन्दस्वामीने काहेते कह्यौ जो ऊपर कहि आये हैं जो ये श्रीठाकुरजीसो विछुरे हैं सो विछुरेके दुःखकी तौ स्फुर्ति रही और संयोग जो सुख भयौ ताको विस्मरण भयौ जो काहेते जो सबलीला विशिष्ट पूरणपुरुषोत्तमतौ श्रीआचार्यजी महाप्रभूनसों घर पधारे हैं सो परमानन्ददासको श्रीआचार्यजी महाप्रभूनने अनुक्रमणिका सुनाई तब सब लीलाकी स्फुर्ति भई और अनुक्रमणिका सुनाई ताको कारण कहा जो श्रीआचार्यजी महाप्रभूको नाम है "श्रीभागवत-पीयूषसमुद्रमथनक्षमः" सो श्रीभागवतको श्रीगुसांईजी अमृतको समुद्रकरिकें वर्णन किये हैं सो अनुक्रमणिकाद्वारा श्रीभागवतरूपी समुद्र श्रीआचार्यजी महाप्रभूनने परमानन्दस्वामीके हृदयमें धर्यौ तातेवाणीतो सब अष्टकाव्यकी समानहै और ये दोऊ परमानन्दस्वामी और सूरदासजी सागरभये सो याते जो श्रीभागवतरूपी अमृतसागरको स्वरूप इनके हृदयमें श्रीआचार्यजी महाप्रभूनने धर्यौ सो काहेते जो सबकोऊ सूरसागर और परमानन्दसागर कहते अब परमानन्ददाससो श्रीआचार्यजी महाप्रभू श्रीमुखसों कहै जो बाललीला वर्णन करि

सो परमानंदजीने तत्काल बाललीलाके पद करिकें
श्रीनवनीतप्रियाजीके सन्निधानगाये ॥ सो पद-

रागसांमरी-माईरीकमल नैनश्यामसुंदरझूलतहैंप-
लना ॥ बाललीलागावत सबगोकुलके ललना ॥ १ ॥
अरुणतरुणकमलनखमनिजसजोती ॥ कुंचितकच-
मकराकृत लटकतगजमोती ॥ २ ॥ अंगूठागहिकम-
लपानमेलतमुखमाहीं ॥ अपनोंप्रतिबिम्बदेखिपुनि-
पुनिमुसिकाहीं ॥ ३ ॥ जसुमतिके पुन्यपुअवारवार-
लाले ॥ परमानंदस्वामीगोपालसुतसनेहपाले ॥ ४ ॥

यह पदसुनिकें श्रीआचार्यजी महाप्रभू बहुत
प्रसन्नभये फेरि और पद गायौ ॥ सो पद-

राग बिलावल-जसोधातेरेभाग्यकीकही न जाय ॥
जोमूरतिब्रह्मादिकदुर्लभसो प्रघटे हैं आय ॥ १ ॥
शिवनारदसनकादिकमहामुनिमिलवेकरतउपाय ॥
तेनंदलाल धूरधूसरवपु रहत गोदलिपटाय ॥ २ ॥
रतनजडितपोढाय पालने वदन देख मुसिकाई ॥
झूलौमेरेलालबलिहारीपरमानंदजसगाई ॥ ३ ॥

राग बिलावल- “ मणिमय आंगन नन्दके खेलत
दोऊ भैया ” सो ऐसे बाललीलाके पद परमानंददा-
सने गाय सो सुनिकें श्रीआचार्यजी बहुत प्रसन्नभये
सो परमानंददासजी श्रीआचार्यजी महाप्रभूनके

पास है सो परमानंददासकों आपने कीर्तनकी सेवा दीनी सो परमानंददासजी श्रीनवनीतप्रियाजीको नित्य नये पद करिकें भांति भाँति के सुनावते तब अनोसर होतो तब परमानंददासजी श्रीआचार्यजी महाप्रभूनके आगें पद कीर्तन करे श्रीआचार्यजी महाप्रभू नित्य कथा कहते सो परमानंददासजी नित्य सुनते सो ताही प्रसंगके कीर्तन करिकें परमानंददासजी सुनावते सो एक दिन परमानंददाजीनें श्रीठाकुरजीके चरणाबिंदको महात्म सुन्यौ सो चरणाबिंदके महात्मको कीर्तन करि श्रीआचार्यजी महाप्रभूनको सुनायौ सुनिकें श्रीआचार्यजी महाप्रभू बहुत प्रसन्न भये ॥ सो पद—

राग कान्हरो—चरण कमल बंदौ जगदीश गोधनके संग धाए ॥ जे पदकमल धूरि लपटाने करि गहि गोपीनके उर लाए ॥ १ ॥

यह पद सम्पूर्ण करिके परमानंददासजीनें गायौ और श्रीआचार्यजी महाप्रभूनके स्वरूपको और प्रार्थनाको पद गायौ ॥ सो पद—

राग कान्हरो—“ यह मांगों गोपीजनवल्लभ ” ॥ यह परमानंदस्वामीने सम्पूर्ण करिकें गायौ सो सुनिकें श्रीआचार्यजी महाप्रभू अपने मनमें जाने

जो यह मिसकरके परमानंददासजी या पदकों सुनायके ब्रजके दर्शनकी प्रार्थना कीनी है ताते ब्रजकों अवश्य चलनों ॥ प्रसंग ॥ १ ॥

श्रीआचार्यजी महाप्रभू यह विचार करें जो ब्रजकों पधारवेकों उद्यमकीयो सो दामोदरदास हरिसानी कृष्णदास मेघन परमानंददासजी और यादवदास हलवाई तथा रसोईकी सामग्री संगलेके चले और सब वैष्णव संगले आप श्रीआचार्यजी महाप्रभू ब्रजको पधारे सो ब्रजको आवत परमानंददासको गाम कन्नौज आयो तब परमानंददासने श्रीआचार्यजी महाप्रभूनसों वीनती कीनी जो महाराज मेरे घर पधारिये आपके अनुग्रहते मेरो भाग्य सिधि भयो है अब मेरो घरहू पावन करिये तब श्रीआचार्यजी महाप्रभू आप अंतर्यामी कृपानिधान भक्तमनोरथपूरक आप कृपा करिके पधारें सो परमानंददासके घर आछी भांतिसों श्रीआचार्यजी महाप्रभूनने रसोई करि श्रीठाकुरजीकों भोग समर्प्यो पाछें भोग सरायके आप प्रसाद लीयों पाछें आप गादीतकियानके ऊपर विराजे तब परमानंददाससों कह्यो जो कछू भगवद्यशगावौ ॥ तब परमानंददासने मनमें विचारी जो या समय श्रीआचार्यजी

महाप्रभूनको मन तो ब्रजमें श्रीगोवर्द्धननाथजीके पास है ताते विरहके पद गाऊं सो विरहको पद ऐसो गायो जानें छिनहुं कल्प समान जाय ॥ सो पद—

राग सोरठ—हरि तेरी लीलाकी सुधि आवै ॥ कमल नैन मनमोहनी मूरत मनमन चित्र बनावै ॥ १ ॥ एक वार जाय मिलत माया करि सो कैसे विसरावै ॥ मुख मुसिक्यान वंक अविलोकन चाल मनोहर भावै ॥ २ ॥ कबहुक निवड तिमर आलिंगन कबहुकपिक सुरगावै ॥ कबहुक सभ्रम कासि २ कहि संगहीन उठि धावै ॥ ३ ॥ कबहुक नैन मूँदि अंतरगति मणिमालापहरावै ॥ परमानंदश्याम ध्यान करि ऐसे विरह गवावै ॥ ४ ॥

यह पद परमानंददासने गायौ सो सुनिकें श्री-आचार्यजी महाप्रभूनको मूछा आई सो जा लीलाको पद परमानंददासने गायौ ता लीलाविषै श्री-आचार्यजी महाप्रभू मान भये सो देहानुसंधान न रह्यौ सो तीन दिनलों श्रीआचार्यजी महाप्रभूनको मूछा रही सो सबरे सेवक दामोदरदास हरसानी प्रभृति श्रीआचार्यजी महाप्रभूनके दर्शन करे सो वैसेही बैठे रहे चतुर्थ दिनके प्रातःकाल श्रीआचार्यजी महाप्रभू सावधान भयै तब सब वैष्णव प्रसन्न

भये तब परमानंददासजी मनमें डरपै जो फेरि ऐसो
पद न गाऊ फेरि सूधे पद गाए ॥ सो पद—

राग बिभाग—माईरीहोंआनंदगुनगाऊं॥ गोकुलकी
चिंतामणिमाधौ जो मांगो सो पाऊं ॥ १ ॥ अबते
कमलनैन ब्रज आयै सकल संपदा बाढी॥नंदरायके
द्वारे देखौ अष्ट महासिद्धिठाढी ॥ २ ॥ फूले फले
सदा वृन्दावन कामधेनुदुहिदीजै ॥ मारगमेघइंद्रव-
रषामें कृष्ण कृपा मुख लीजै ॥ ३ ॥ कहत जसोधा
सखियनआगें हरि उत्तकर्षजनावै ॥ परमानंददास
कोठाकुर मुरली मनोहर भावै ॥ ४ ॥ और हू पद
गायौ ॥ सो पद—

राग गौरी—“विमलजस वृन्दावनके चंद्रको” ॥ यह
पद संपूर्ण करिके गायौ फेरि और गायौ—

राग सारंग—“चलिरी नंदगांव जायवसियै” ॥ यह
पद संपूर्ण करिके गायौ सो पदमें यह कह्यौ जो
चलरी नंदगांव जायवसियै सो श्रीमहाप्रभूजी सुनि-
के ब्रजकों पधारे सो प्रथम श्रीगोकुल पधारे सो
श्रीगोकुल आवतही श्रीआचार्यजी महाप्रभू श्रीय-
मुनाजीके तीर ऊपर छोंकरके नीचे बैठकमें तहां
श्रीआचार्यजी महाप्रभू विराजै और एक बैठक
श्रीद्वारिकानाथजीके मंदिरके पास है सो भीतरकी

बैठक है सो रात्रिके विश्राम तथा रसोईकी ठोरहै
उहां श्रीआचार्यजी महाप्रभूनको घर हुतौ जब
आप श्रीगोकुल पधारते तब उहांई उतरते सो यह
भीतरकी बैठक है पाछें सबवैष्णवनने श्रीयमुनाजी
स्नान कीयै और परमानंददासजीहू श्रीयमुनाजीको
जस वर्णन कीयै ॥ सो पद—

राग रामकली—श्रीयमुनाजीयहप्रसादहोंपाऊं॥ति-
हारेनिकटरहोंनिसवासर रामकृष्णगुनगाऊं ॥ १ ॥
मंजन बिमल पावनजलचिंताकुलखवहाऊं ॥ तिहा-
रीकृपाभानकीतनयाहरिपदप्रीतिबढाऊं ॥ २ ॥ बि-
नतीकरौयहीवरमाँगौ अधमसंगविसराऊं ॥ परमा-
नंददास फलदातामगनगोपाललडाऊं ॥ ३ ॥

राग रामकी—“ श्रीयमुनाजी दीनजान मोहिदीजै”
सो ऐसे पद संपूरणकरिकें श्रीयमुनाजीके परमानं-
ददासजीनें बहुत गाये श्रीआचार्यजीके आगें तीर
विषें गाये ता उपरांत श्रीमहाप्रभूजीनें परमानंददा-
सकों बाललीलाविशिष्ट श्रीगोकुलके दर्शन करवायै
सो परमानंददासको ऐसो दर्शन भयौ सो सब
ब्रजभक्त श्रीयमुनाजलकी गागरिभरि ले जात हैं
और श्रीठाकुरजी मार्गमें खेलते हैं और ब्रजभ-
क्तिनकों जलकी गागरि उठाय देत हैं और उनकी

कचुतोरै हैं या भांतिसों दर्शन भयै सो तेसोई पद
श्रीआचार्यजी महाप्रभूनके आगे गायौ ॥ सोपद--

राग विलावल--जमुनाजल घर भरिचली चंद्रावलि
नारी ॥ मारग खेलत मिलि घनश्याम मुरारी ॥ १ ॥
नैननसों नैनामिले मन रह्यो है लुभाई ॥ मोहनमू-
रत जियवसी पगधरो न जाई ॥ २ ॥ तबकी प्रीति
प्रगटभई यह पहली भेंट ॥ परमानंद ऐसी मिली
जैसी गुडमें चेंट ॥ ३ ॥

राग सारंग--लालनेकटेकोमेरीबैयां ॥ ओघटघाट-
चल्यौ नहीं जाई रपटतहों कालिन्दीमहियां ॥ १ ॥
यह पद संपूरणकरके ऐसे पद गाये तापाछें परमा-
नंददासनें बाललीलाके पद बहुत गायै और श्रीगो-
कुलकों स्वरूप जामें आवै ऐसो पदगायौ ॥ सो पद--

राग कान्हरो--गावतगोपीमधुव्रजवानी ॥ जाके भु-
वनवसतत्रिभुवनपति राजानंदयसौधारानी ॥ १ ॥
गावत वेदभारतीगावत गावतनारदादिमुनिज्ञानी ॥
गावत गुन गंधर्व काल शिव गोकुलनाथ महातम
जानी ॥ २ ॥ गावत चतुरानन जडुनाथक गावत
शेषसहस्र मुखरास ॥ मनक्रम वचन प्रीत यह अंबुज
अबगावत परमानंददास ॥ ३ ॥ यह पद परमानं-
ददासनें गायौ पाछें और पद गायौ ॥ सो पद--

राग कान्हारौ--जसुमति गृह आवत गोपीजन ॥
 वासरताप निवारन कारन वारंवार कमलमुख निर-
 खन ॥ १ ॥ चाहतप करि देहरी उलंघम किलक
 किलकहुलसत मनहीं मन ॥ लौन उतारि दोऊकरि-
 वारी फेरवार तन मन धन ॥ २ ॥ लेन उठाय चाप-
 तहीयौ भारि प्रेम दिवस लागै दृग दरकन ॥ चली
 लै पलनापोढावनको अरुकसायपोढे सुन्दरघन ॥ ३ ॥
 देत असीस सकल गोपीजन विरजीवोलोगगज-
 मुन ॥ परमानंददासको ठाकुर भक्त वत्सल भक्ति
 मन रंजन ॥ ४ ॥

राग हमीर--“ चितै चितै चितवारचौरी भाई ” ॥
 यह पद सम्पूरण करके गायौ सो ऐसे पद परमा-
 नंददासने बहुत गायै ता पाछें श्रीगोकुलनाथजीके
 दर्शन करिके परमानंददास श्रीगोकुल ऊपर बहुत
 आसक्ति भये सब ऐसे पद गायै जामें श्रीआचा-
 र्यजी महाप्रभूनकी प्रार्थनाकीनी जो मोकों श्रीगो-
 कुलमें आयके चरणारविंदके नीचें राखो नितप्रति
 प्रभूनके दर्शन करौ सर्व लीलाविशिष्ट पूरन पुरुषो-
 त्तम हैं और यह पद गायौ ॥ सो पद--

राग कान्हारौ--यह मांगौजसोदानंदन ॥ चरणकम-
 लमनमनमधुकर या छबिनैननपाऊं दशन ॥ १ ॥

चरणकमलकी सेवा दोऊतन राजत बिजैलताघननं-
दन ॥ वृषभानुनंदिनीमेरेउरवसुप्रानजीवनधन॥२॥
बृजवसिवोजमुना अचिवो श्रीवल्लभको दास यही
पन ॥ महाप्रसादपाऊं हरि गुनगाऊं परमानंददास
जीवनधन ॥ ३ ॥

राग कान्हरो-“जबलगिजमुनागायगोवर्द्धन तब-
लग गोकुलगांवगुसाई” ॥ यह पदसम्पूरण प्रार्थनाके
पद गाये तब कितनेक दिन श्रीआचार्यजी महाप्रभू
श्रीगोकुलमें बिराजे ता पाछें सब वैष्णवनकों संग
लेकें श्रीगोवर्द्धन नाथजीके दर्शनको पधारे ॥
प्रसंग ॥ २ ॥

अब श्रीआचार्यजी महाप्रभू स्नान करिकें पर्वत
ऊपर पधारे सो आवतही परमानंददासनें श्रीना-
थजीकों श्रीमुखदेखिकें वहाँके वहाँ रहै तब श्रीम-
हाप्रभूजीनें श्रीमुखसों कह्यौ जो परमानंददास
कछू भगवतलीला गावो तब परमानंददास अपने
मनमें विचारे जो कहा गाऊं तब ऐसे विचारौ जो
जामें प्रथम अवतारलीला पाछें चरणारविंदकी
बंदना पाछें भगवद्दर्शनको स्वरूप ता पाछें बाल
क्रीडा ता पाछें श्रीठाकुरजीको महात्म ऐसौ पद
परमानंददासनें गायौ सो पद-

राग कान्हारौ-मौहननंदरायकुमार ॥ प्रगटब्रह्मनि-
कुंज नायक भक्तहित अवतार ॥ १ ॥ प्रथमचरण
सरोजवन्दो श्यामघनगोपाल ॥ मकरकुंडलगंडमं-
डित चारुनैन विसाल ॥ २ ॥ बलिरामसहित विनो-
दलीला सेकरहेता दास परमानंदप्रभूहरिनिगमबो-
लत नेत ॥ ३ ॥ और आसक्तिको पद गायौ-

राग पूरबी-मेरौमाईमाधौसोंमनलाग्यौ ॥ मेरौनैन
औरकमलनैनकौ इकठौरौकरिमान्यौ ॥ १ ॥ लोक-
वेदकी कानितजीमें न्योतीअपनेआन्यौ ॥ एकगो-
विंदचरणके कारणवैरसवनसोंठान्यौ ॥ २ ॥ अबको
भिन्नहोयमेरीसजनीदूधमिल्यौजैसेपान्यौ ॥ पर-
मानंदमिली गिरधरसों है पहलीपहचान्यौ ॥ ३ ॥

ऐसे पद परमानंददासनें गाये ता पाछें श्रीआ-
चार्यजी महाप्रभू सेनआरतीकर श्रीनाथजीकौ
पोढायै तब अनोसरकरि आप नीचे पधारे तब पर-
मानंददासहू नीचे आय बैठे तब रामदासभीतरि-
यानें परमानंददासको महाप्रसाद दूध पठायौ सो
दूध परमानंददासजी लेवे लागे तब तातो लाग्यौ
तब परमानंददासजीनें सीरोकरिकें लीयौ तापाछें
रामदासनें पूछौ जो तुमका महाप्रसाद दूध पठा-
यौहौ सो आयौ तब परमानंददासने कही जो हां

आयौ परि दूध बहुत तातो हुतौ सो ऐसो दूध श्रीठा-
 कुरजी कैसें आरोगतहें ताते दूधतो सुहातो भलौ
 तब रामदासनें कह्यौ जो बहुत आछौ आप भगवदी-
 यहौ जैसे आज्ञाकरोगे तेसे करेंगे तब सकारें सब
 सेवक ध्यान करिकें श्रीगोवर्द्धननाथजीकी सेवामें
 तत्परभये तब श्रीआचार्यजी महाप्रभू स्नानकरिकें
 श्रीगिरिराज ऊपर पधारे तब श्रीगोवर्द्धननाथजी-
 कों जगायै तब वा समय परमानंददासजी जायकें
 श्रीठाकुरजीके जगायवेको पद गायौ ॥ सो पद—

रागविभास-जागोगोपाललाल मुखदेखौतेरौ ॥
 पाछें ग्रहकाजकरों नित्यनेममेरौ ॥ १ ॥ विगसत
 निसा अरुण दिसा उदित भयौ भानु ॥ गुंजत अंग-
 पंकजवन जागियै भगवान ॥ २ ॥ द्वारेठाडेबंदीज
 नकरतहैं पुकार ॥ वंसप्रसंगगावतहरिलीलासार ॥
 ॥ ३ ॥ परमानंदस्वामी दयालु जगतमंगलरूप ॥
 वेदपुराणपठतमहिमालीलाअनूप ॥ ४ ॥

यह पद परमानंददासने गायौ फिरि कलेऊको
 पदगायौ ॥ सो पद—

राग रामकली-पिछावारेहैगवालनटेर सुनायौ ॥
 कमल नैन प्यौरोकरतकलेऊकोटन सुखलों आयौ
 ॥ १ ॥ अरी मैया गैया एकवनव्यायरही हैं बछरा

उहांहींबसायौ ॥ मुरलीलईनलकुटियानलीनी अर
बरायकोउसखानबुलायौ ॥ २ ॥ चक्रतभईनंदजू-
की रानी सत्यआय किधोंअपनों पायौ ॥ फलों न-
अंगसमातरसबत्रिभुवनपति सिरछत्र जो छाया ॥
मिल बैठे संकेत सघनवन विविधि भांति कीयौ मन
भायौ ॥ परमानंद सयानी ग्वालनि उलटि अंग
गिरधर पिय प्यायौ ॥ ४ ॥

ऐसे पद परमानंददासनें गायौ ता पाछें श्रीगो-
वर्द्धननाथजीके मंगलाके दर्शन खुले तब परमानंद-
दासनें श्रीगोवर्द्धननाथजीसों पूछौ जो आप तातौ
दूध क्यों आरोगत है तब श्रीनाथजीनें कह्यौ जो
ये हमको समर्पतहै सो आरोगतहै ता पाछें परमा-
नंददासजी नित्यकीर्तनकरिकें सुनावते तब तासमय
एक राजा दर्शनकों आयों सो श्रीगोवर्द्धननाथ
जीके दर्शन करे तब फेरि आयकें रानीसोंकही जो
श्रीगोवर्द्धननाथजी ठाकुर बहुत सुंदरहैं ताते तूजा-
यकें दशन करिआउ तब रानीनें कही जो जैसे ह-
मारी रीतिहै सो होयतो दर्शन करें तब राजानें कही
जो श्रीगोवर्द्धननाथजीके दर्शनमें काहेको परदा है
तब रानीनें मानी नहीं तबराजाने श्रीआचार्यजी म-
हाप्रभूनसों वीनती कीनी जो महाराज मेंतो रानी-

सों बहुतकहतहों परि वह आवत-नाहीं ताते आप
 कृपाकारके दर्शन करवावौ तौ वहकरै तब श्रीआ-
 चार्यजी महाप्रभूनने कही जो यहां लेआवो जो प्रथ-
 म वाकों एकांतमें दर्शन करवावेंगे तापाछें और लोग-
 दर्शनकरेंगे तब राजा अपनी रानीकों लिवायके श्री-
 गोवर्द्धननाथजीके दर्शन करवाये सो सबलोग सर-
 किगये तब रानीदर्शन करिवेलागी तब इतनमें श्री-
 गोवर्द्धननाथजीने सिंहपौरके किवाडखोलदीये सो
 सब भीरदौरके रानीके ऊपरिपरी सो रानीके सब
 वस्त्र निकसपरे और बहुत लज्जितभई तब राजाने
 रानीसोंकही जो मेन तोसों पहिलेही कह्यौ हुतौ जो
 श्रीठाकुरजीके दर्शनम काहेको परदा है ये ब्रजके
 ठाकुर हैं इनने काहूको परदा राख्यौ नाहीं तब वा
 समय परमानंददासजीने ॥ पद गायौ-

राग देवगंधार-" कोनियह खेलवेकी वानि ॥ मद-
 नगोपाललालकाहूकी राखतनाहिनकानि " ॥ १ ॥
 यह एकतुकपरमानंददासजीने गाईहुती तब श्री-
 आचार्यजी महाप्रभूनने कह्यौ जो परमानंददास
 ऐसे कहौ जो भली यह खेलवेकी वानि ॥ तब पर-
 मानंददासजीने एसौही पद गायो ॥ सोपद-

राग देवगंधार-भलीयहखेलवेकीवानि ॥ मदनगो-

पाल लालकाहूकी नाहिनराखतकानि ॥ १ ॥ अप-
नेहाथले देतहै चनवर दूधदही घृतसानि ॥ जोवर-
जोतोआंखदिखावै परधनकोंदिनदान ॥ २ ॥ सुनिरी
जसोधा सुतके करतब पहल मांटमथानि ॥ फोरि-
डारिदधिडारिआजरमेंकोनसहै नितहानि ॥ ३ ॥
ठाडीदेखतनंदजूकीरानी मूंदि कमल मुखहानि ॥
परमानंददासजानत हैं बोलि बूझिधों आनि ॥ ४ ॥

यह पद परमानंददासने गायौ ता पाछें कितेक
पद गाये जो जो लीला श्रीठाकुरजीने करी सो ता
ता लीलाके पद परमानंददासने गायौ सो एक दिन
भगवदीय रामदासजी कुंभनदासजी सब वैष्णव
मिलिकें परमानंदजी जहां रहत हुते तहां आयै
सो भगवदीय आयै जानिकें परमानंददासजी बहुत
प्रसन्नभये जो आज मेरे घर भगवदीय आयै हैं सो
मेरो बडौ भाग्य है और आज मेरो भाग्य सिद्धि
भयौहै सो काहेते जो श्रीठाकुरजी भगवदीयके हृद-
यमें सदा सर्वदा विराजत हैं ताते भगवदीयकी कृपा
होय तौ श्रीठाकुरजी अनुग्रह करें जो ये सब भगव-
दीय मेरे घर पधारे हैं सो प्रथम भगवदीयकी न्यौछा-
वारिकरी चाहिये जो ऐसो तो कछू नाहीं जो न्यौछा-
वारि करा जब यह विचारकें परमानंददासने ऐसेही
पद कह्यौ ॥ सो पद--

राग हमीर--आये मेरे नंदनंदनके प्यारे ॥ माला-
तिलक मनोहर बानो त्रिभुवनके उजियारे ॥ १ ॥
प्रेम सहतवसत मन मोहन नेकहुटरतनटारे ॥ हृदय
कमलके मध्य विराजत श्रीव्रजराजदुलारे ॥ २ ॥
कहा जानोंकोनपुण्य प्रगट भयौ मेरे घर जो पधारे ॥
परमानंद प्रभुकरी न्योछावर वारवारहों वारे ॥ ३ ॥

यह पद भगवदीय भेटकरि अयने आयै भगवदी-
यनकों विदाकियै ता पाछें ऐसा रीतिसों परमानंद-
दासनें श्रीनाथजीकी भलीभांतिसो सेवाकीनी सो वे
परमानंददासजी श्रीआचार्यजी महाप्रभूनके ऐसे
कृपापात्र भगवदीय हैं सो इनकी वार्ता कहाँताई
लिखिये ॥ प्रसंग ॥ ३ ॥ वैष्णव ॥ ८९ ॥

अथ कुंभनदास गोरवा तिनकी वार्ता ।

सो वे कुंभनदासजी श्रीगोवर्द्धनपर्वतके पास
जमुनावतौ गांव है तामें रहते सो जमुनावतौ नाम
वागांवको काहेते हैं जो जमुनाजीको प्रवाह सार-
स्वतकल्पमें याके निकट हुतौ ताते जमुनावतौ नाम
वा गांवको है तामें कुंभनदासजी रहते और परा-
सोली चंदसरोवरके ऊपर उन कुंभनदासजीकी
धरती हुती सो वहां खेती करते सो कुंभनदासजी
श्रीगोवर्द्धननाथजीके परमसखा हुते और कृपापात्र

हुते सो अबही श्रीगोवर्द्धननाथजी प्रगट होयके श्रीमहाप्रभूजीको बुलावेंगे तब ये भगवदीय प्रसिद्ध होयंगे सो एक समय श्रीआचार्यजी महाप्रभू पृथिवीपरिक्रमा करत झारखंडमें पधारे सो झारखंडमें श्रीगोवर्द्धननाथजीनें आज्ञा दीनी जो हम गोवर्द्धनमें तीन दमन हैं ॥ नागदमन इन्द्रदमन देवदमन तिनके मध्यमें हम देवदमन हैं सो मेरो नाम है ताते तुम आयके हमको पधरावौ और हमारी सेवाको प्रकार प्रगट करौ तब श्रीआचार्यजी महाप्रभूनें पृथ्वीपरिक्रमा उहांही राखिकें वेग पधारे तब दामोदरदास हरसानी कृष्णदास मेघन गोविंददुबे जगन्नाथजोसी रामदास ये पांच वैष्णव संग हुते सो श्रीआचार्यजी महाप्रभू श्रीगोवर्द्धनकी तरहटी आयकें सहूपांडेके चौतरा ऊपर विराजे सो आगे श्रीगोवर्द्धननाथजीके प्रागट्यमें यह सहूपांडे भवानीनरो श्रीआचार्यजी महाप्रभूनें के सेवक भये हुते तिनकी श्रीआचार्यजी महाप्रभूनें श्रीगोवर्द्धननाथजीकी सेवा सोंपी और ब्रजवासी ब्रजमें श्रीआचार्यजी महाप्रभूनें के सेवक बहुत भये और कुंभनदासजी श्रीआचार्यजी महाप्रभूनें श्रीगो-

वर्द्धननाथजीको एक छोटीसी मंदिर सिद्धि कर-
वायो तामें श्रीनाथजीकों पधराये और रामदास
चोहानकों सेवाकी आज्ञा दीनी और सब ब्रजवासी
लोग दूध दही माखन लावते सो श्रीगोवर्द्धनना-
थजी आरोग्य हुते और रामदासकों जो भगवदि-
च्छातें जो आप प्राप्त होय सो भोग धरते और आप
प्रसाद लेते और जे ब्रजवासी लोग श्रीआचार्यजी
महाप्रभूनके सेवक भये हुते तिनकों श्रीआचार्यजी
महाप्रभूनने आज्ञा दीनी जो यह मेरो सर्वस्व है सो
तुम सब बातनसों यत्न राखियो और सेवामें तत्पर
रहियो और कुंभनदासकों और सब सेवकनकों
श्रीआचार्यजी महाप्रभूनने आज्ञा दीनी जो तुम
देवदमनके दर्शन किये विना महाप्रसाद मति
लीजियो तब या भांतिसों आज्ञा करिकें श्रीआचा-
र्यजी महाप्रभूनने पृथ्वीपरिक्रमा झारखंडमें राखी
हुती अब कुंभनदासजी नित्य श्रीआचार्यजी महा-
प्रभूनकी कृपाते श्रीगोवर्द्धननाथजीके दर्शनकों
आवते सो कुंभनदास कीर्तन बहुत नीके गावते जो
श्रीआचार्यजी महाप्रभूनने कुंभनदासजीकों नाम
सुनायो और ब्रह्म संबंध करवायो तब कुंभनदासजी
नित्य नये पद करिकें श्रीनाथजीको सुनावते और

श्रीनाथजी कुंभनदासजीके घर पधारते और बहुत
क्रीडा करते खेलत वार्ता करते और बहुत कृपा
कुंभनदासजीके ऊपर करते अब रामदासजी श्रीगो-
वर्द्धननाथजीकी सेवा करन लाग सो एक समय
मलेशको उपद्रव भया सो यहां मानिकचंदपांडे
सहूपांडे रामदासचौहान कुंभनदास सब मिलिक
विचार किंया जा यह मलेश आयौ ह सो यह धमका
द्रेषी है सो कहा कतव्य है तब सबने कहा जा यामें
कहा कर्तव्य कहा पूछनों अपनो विचारचौ कहा होत
है ताते श्रीनाथजीको पूछा जा महाराज कहा करें
तब श्रीनाथजाने आज्ञा दीनी जो हमका यहांते ले
चलों हम यहांते उठेंगे तब सबनने पूछो जो महा-
राज कहां पधाराग तब आपने श्रीमुखसों कह्यौ जो
टोडके घनेमें चलेंगे तब एक भसा मंगायौ तापर
श्रीगोवर्द्धननाथजीको बैठाये तब एक ओरते तौ
रामदास पकरें रहै और एक ओरते कुंभनदास
पकरे रहै और सब सेवक संग चल जात हैं तहां
घनेमें कांटे बहुत हुतें सो उहां कांटेनमें बैठे सो वस्त्र
सबनक फटिगये और सरीरमें कांटे लगे दुःख
बहुत पाया सो घनेमें एक तालाव हुतौ तहां रूख-
नको एक चौक है तहां बडरूख नीचे श्रीनाथजी

बिराजे सो कछूक सामग्री संग्रह हुती सो रामदा-
सने भोगधरि जलको करुआ भरिके आगे धरिके
सब वैष्णव बेठे तब श्रीगोवर्द्धननाथजीने कुंभनदा-
ससों कह्यौ जो कुंभनदासजी कछू गावौ तब कुंभ-
नदासजीतौ मनमें कुठरहे हुते तब एक पद नयो
करिके गायो ॥ सो पद—

राग सारंग-भावत है तोय टोडको घनौ ॥ कांटे
लगे गोखरू बूटे फट्यौ जात यह तनौ ॥ १ ॥ सिंहों
कहा लोकटीकोडर यह कहा वानकबन्यौ ॥ कुंभ-
नदासप्रभू तुम गोवर्द्धनधर वह कोन रांडढेडनीको
जन्यौ ॥

यह पद कुंभनदासने गायौ सो सुनिके श्रीना-
थजी मुसिव्यायके चुप करि रहे इतनेमें श्रीगोव-
र्द्धनते समाचार आये जो वह मल्लेक्षकी फोज आई
हुती सो पाछी फिरगई तब श्रीगोवर्द्धननाथजी
पर्वत ऊपर मंदिरमें पधारे ॥ प्रसंग ॥ १ ॥

अब श्रीनाथजी पर्वत ऊपर मंदिरमें पधारे सो
ब्रजके लोगनकों बहुत हर्ष भयौ सो धन्य देवदमन
जो ऐसो उपद्रव आयो हुतौ सो इनके प्रतापते सब
मिटि गयौ तब कुंभनदासजी प्रसन्न होयके पद गाये
सो पद श्रीगोवर्द्धननाथजीको सुनाये ॥

राग श्रीचर्चरी—“ जयति जयति हरिदास सर्वध-
रनें ” ॥ यह पद सम्पूरण करिकें गायौ पाछें और
पद गाय ॥ सो पद—

राग सारंग—“ कृष्णतनंतरयातीर ” यह पद सम्पू-
रण करिकें कुंभनदासने गायौ पाछें नित्य ऐसे पद
कुंभनदासजी देवदमनको सुनावते तब कुंभनदास-
जीके पद सब जगतमें प्रसिद्ध भये सो सब लोग
इनके पद गावते तब इनको पद काहू कलामतने
सीख्यौ सो फतेपुर सीकरीमें देशाधिपतिके आगे
कुंभनदासजीको पद कीयो भयौ पद वा कलामतने
गायौ सो सुनके देशाधिपतिको चित्त वा पदमें
गडगयौ और माथौ धुनौ जो ऐसेहू महापुरुष व्है
गयै हैं जिनकों ऐसे दर्शन परमेश्वरके होत हैं तब
वा कलामतने कह्यौ जो अजी साहब अबहू हैं सो
सुनिकें देशाधिपति बहुत प्रसन्न भयौ और वा कला-
मतसों कह्यौ जो वे कहाँ हैं तब वा कलामतने कही
जो श्रीगोवर्द्धनके पास जमुनावतौ गाँवहैं तहाँ वे
रहत हैं तब देशाधिपतिने कही जो यहाँ बुलावौ हम
उनसों मिलेंगे तब देशाधिपतिने मनुष्य और अस-
वारी कुंभनदासके बुलायवेकों भेजे तब कुंभनदासजी
तो घरहुते परासोलीमें बैठे हुते सो मनुष्यनने उहाँ

बतायदीये तब कुंभनदासजी घरती हुते नाहीं पात-
 साहने यादकीये हो तब कुंभनदासने कही जो
 भैय्या में कछू देशाधिपतिको चाकरतौ नाहीं मेरो
 देशाधिपतिसों कहा काम है तब देशाधिपतिके
 मनुष्यनने कही जो बाबा हमतौ काम कछू समझत
 नाहीं परिहमको देशाधिपतिको हुकम है जो कुंभ-
 नदासकोले आवौ ताते यह पालकी है यह घोडाहै
 जापर चाहौ तापर बैठिके चलियै हमतो आये हैं
 सो आपको ले जायंगे तब कुंभनदासने मनमें विचा-
 रकीयौ जो विनाजाये तौ निर्वाहनहोयगो सो कुंभ-
 नदासजी तत्काल उहांते पनहिं पहिरके चले तब
 कुंभनदासजीकों जो लेवेको आये हुते तिनने कही
 जो बाबासवारीमें बैठिये तब कुंभनदासने कह्यौ
 जो भैय्या में तौ कबहू बैठ्यौ नाहीं पाछें ऐसैही चले
 सो फतहपुर सीकरी आय पहुंचे सो देशाधिपतिके
 डेराहुते तहां गये तब मनुष्यनने देशाधिपतिसों
 कह्यौ जो कुंभनदासजी आये हैं तब देशाधिपतिनें
 कुंभनदाससों कही जो कुंभनदासजी आवो बैठो सो
 आय बैठे सो वह स्थल कैसोहै जामें जडावकी रा-
 वटी तामें मोतीनकीझालरी लगीहै ऐसो स्थलहै
 तामें बैठे तब मनमें बहुत दुःखलाग्यौ और कह्यौ

जो यासो तौ हमारे ब्रजके हींसनके रूख आछे हैं
 सो जिनमें श्रीगोवर्द्धननाथजी खेलतहैं तब इतनेमें
 देशाधिपति बोल्यौ जो कुंभनदासजी तुमने विसन
 पद बहुतकीयेहैं सोमेने तुमको बुलायो है ताते तुम
 कछू विसनपद गावो तबकुंभनदासजी तौ मनमें
 कुठेहुतें जो विचारें कहागाऊं मेरीवाणीकेभक्ता तौ
 श्रीगोवर्द्धनधरहैं और कछू गाये विना मेरोकाम
 चलैगौ नहीं ताते ऐसो गाऊं जो कबहूँ मेरो नाम
 न लैय कहैतें जो याकेसंगते मेरे प्रभूछूटेहैं ताते
 कछू कठौर बचनकहूँ जो बुरोमानेगौ तौ कहा क-
 रेगौ तब यह मनमें आई " जो जाको मनमौहनसं-
 गकरे एकोके सबसे नहीं सिरने जो जगवैरपरे "
 यह विचारिके तासमय कुंभनदासजीने एक नयौ
 पदकरिकें गायौ ॥ सो पद—

राग सारंग-भक्तनकोकहासीकरीकाम ॥ आवत
 जात पन्हैयाटूटीविसरगयोहरिनाम ॥ १ ॥ जाको
 मुखदेखे दुखलागै ताकोकरनपरीपरनाम ॥ कुंभन-
 दासलालगिरधर विन यह सब झूठौ धाम ॥ २ ॥

यह पद गायौ सोदेशाधिपति अपने मनमें बहु-
 तकुट्यौ और कह्यौ जो इनको काहूबातकोलालच
 होयतो मेरो जसगावैं इनकोतो अपने परमेश्वरसों

सांचोसनेहहै इतनों कहिकें देशाधिपतिनें कुंभनदा-
सकों सीखदीनी तब कुंभनदासजी उहांतेचले सो
मार्गमें आवत अतिक्लेश जो कब हों प्रभूनकों श्री-
मुखदेखों सो ऐसो विचारके कुंभनदासजी आवतहैं
ता समय पद गायौ ॥ सो पद—

राग धनाश्री—कबहूदेखहों इन नैननु ॥ सुंदरश्याम
मनोहरमूरत अंग अंगसुखदेननु ॥ १ ॥ वृन्दावन बि-
हारदिनदिनप्रतिगोपवृन्दसंगलैननु ॥ हंसिहंसि हरि-
खपतौवनपावन बांटिबांटिपयफेननु ॥ २ ॥ कुंभनदा-
सकितेदिनबीते कियेरेणुसुखसेननु ॥ अब गिरिधर-
बिन निसऔरवासर मननरहतक्योंचेननु ॥ ३ ॥

यह पद मार्गमें गावत आये सो आयकें श्रीगो-
वर्द्धननाथजीके दर्शनकिये और दोय दिनलो दर्शन
नभये सो कुंभनदासजीकों दोयजुगकी बराबर
बीते सो श्रीमुखदेखतेही सब दुःख विसरगयौ तब
एकपदगायौ ॥ सोपद—

राग धनाश्री—नैनभरिदेखौनंदकुमार ॥ तादिनतेसब
भूलिगयौहों बिसरचौपनपरवार ॥ १ ॥ बिनदेखे-
होंविकल भयोहों अंगअंगसबहारि ॥ तातेसुधिहै
सावरीमूरतकी लोचनभरिभरिवार ॥ २ ॥ रूपरा-
सपैमितनहीं मानोंकेसेमिसेलोकन्हार्इ ॥ कुंभनदा-
सप्रभ गोवर्द्धनधरमिलियेबहररीमाई ॥ ३ ॥

राग धनाश्री-हिलगनिकठिनहैयामनकी ॥ जाके
लियै देखिमेरीसजनी लाजगईसबतनकी ॥ १ ॥
धर्मजाउ अरुलोगहंसोसब अरुगावोकुलगारी ॥
सोकयोंरहेताहिविनदेखे जो जाको हितकारी ॥ २ ॥
रसलुब्धकनिमखनछांडत ज्योंआधीनमृगगानों ॥
कुंभदाससनेहपरम श्रीगोवर्द्धनधरजानौ ॥ ३ ॥

ऐसेपद बहुत कुंभनदासजीनें गाये सो सुनिके
श्रीनाथजी बहुत प्रसन्नभये और कह्यो “ यह
मोविन रहत नाहीं ” ॥ प्रसंग ॥ २ ॥

और एकसमय राजामानसिंह सबठौरते दिग्वि-
जयकरिकें अपने देसकूं चले तब मनमेंविचारे जोब-
हुतदिनमें आये हैं ताते मथुरावृन्दावन होयकेंच-
लों सो यह विचारकें आगरते चले सो मथुराआये
तब विश्रांत स्नान करिकें श्रीकेसोरायजीके दर्शन
करिकें वृन्दावनचले सो उष्णकालके दिनहुते तब
वृन्दावनके सब महंतननेजानी जो आजयहां राजा-
मानसिंह दर्शनको आवेगो सो यहजानिके श्रीठा-
कुरजीकों आछे २ जरीकेवागे बहुत आभरणपहराये
पिछवाई चंदोवा सब जरीनके बांधें इतनेमें राजा
मानसिंह दर्शनकोंआयौ सौभीतरि मंदिरके आयकें
श्रीठाकुरजीके दर्शनकीयै सो उष्णकालके दिन हुते

सो बहुत गरमी पडे सो तासमय राजा मानसिंह
 पै ठाडौ न रह्यौ गयौ सो ऐसे दर्शन चार पांचजगह
 खडे हुते सोतहांसबठौर दर्शनकरि सब ठोरते
 बिदाहोयके अपनेडेरामें आये सो डेराआयके मन-
 मेंविचारेजो अबहीकूंचकरें सो वहांसो असवारहो-
 यके चले सो तीसरेपहर गोवर्द्धन गांवआये सो
 मानसीगंगाऊपर डेराकीयै सो तहां श्रीहरदेव-
 जीके दर्शन कियै सो वहां वृन्दावनके महंतनने
 बडेठाठबनायेहैं तेसौई यहांठाठ बनायराख्यौ हुतौ
 सो राजामानसिंहतहांते दर्शनकरिकेचले तब काहू-
 नेकही जो महाराज यहां श्रीगोवर्द्धननाथजी बहुत
 सुंदरठाकुरहैं तहां आपदर्शनकोंचलो तबरजा मान-
 सिंहने कह्यौ जो यहां तो अवश्य चलनो ये ठाकुर
 सब ब्रजके राजाहैं ताते इनके दर्शनतो अवश्यकरने
 तब तहांते चले सो गोपालपुरगांव आये तब आय-
 केपूछी जो दर्शनको कहासमय है तब काहूने कही
 जो उत्थापनके दर्शनतोहोयचुकेहैं अब भोगके दर्श-
 न होयंगें तब यह सुनिकें राजामानसिंह श्रीगोवर्द्ध-
 ननाथजीके दर्शनकों गिरराजऊपर आये सो उष्ण-
 कालकेदिन मार्गके श्रमित दूरकेचले आयैसो गर-
 मीमें राजा बहुत व्याकुलभयौहुतौ इतनेमें भोगके

दर्शन खुले सो राजामानसिंहको मणिकोठामें लेमयै
 तिनदिननमें श्रीनाथजीकी सेवा वैभवसों होतहुती
 बडौ मंदिरसिद्धि भयोहुतौ श्रीगोवर्द्धननाथजीके
 आगे गुलाबजलको शृंगार भयोहुतौ निजमंदिर
 मणिकोठा तिवारी सब जलमय होय रहेहुते सोतास-
 मय राजामानसिंह दर्शन को गयेहुते सो श्रीगोवर्द्ध-
 ननाथजीके दर्शन करिकें साष्टांगदंडवत कीनी और
 गरमीमें राजा व्याकुल भयोहुतौ सो सीतलताई भई
 बडौ चैन भयो और श्रीगोवर्द्धननाथजीको श्रीमुख-
 देखके राजा बहुत प्रसन्न भयो और कह्यौ जो सा-
 क्षात् पूरणब्रह्म श्रीकृष्ण वृन्दावनचन्द्र श्रीगोवर्द्धन-
 नाथजी हैं आगे श्रीभागवतमें सुन्यौ हुतौ सो आज
 देखे आजकोदिन है सो धन्य है और आज मेरौ
 बडौ भाग्य है और मनमें कह्यौ जो यह भोगको
 समय है सोतौ प्रभूनकी राजधानीको समय है सोवे
 प्रभू विराज है आगे तालमृदंगबाजत हैं कीर्तन हो-
 तहै सो कुंभनदासजी ठाडे २ मणिकोठामें दर्शन
 करत हैं और कीर्तन गावतहैं सो राजा मानसिंहको
 मन वा पदमें गडगयोहुतौ तेसौई कोटिकंदर्पलाव-
 ण्यस्व रूप और तेसौई कीर्तनकुंभनदासजी करत
 हुते ॥ सो पद—

राग नट-रूपदेख नेना पल लागै नाहीं ॥ गोवर्द्धन
नके अंग अंगप्रतिनिरखिनेनमनरहततही ॥ १ ॥
कहा कहौकछू कहत न आवै चितचोरचोमांगवै
दहीं ॥ कुंभनदास प्रभूके मिलनकी सुंदर बात सखि
यनसों कही ॥ २ ॥

राग धनाश्री-आवतमोहनमनजुहरचौहौ ॥ होंग्र-
हअपनेसचुसोंवैठी निरखिवदनअस्वराविसरचौहौ
॥ १ ॥ रूपनिधानरसिकनंदनंदननिरखिवदनधीर-
जनधरचौहौ ॥ कुंभनदासप्रभू गोवर्द्धनधरअंगअं-
गप्रेम पियूष भरचौहौ ॥ २ ॥

ऐसे पद कुंभनदासजी गावत है इतनेमें राज
भोगके दर्शनहोय चुके तब राजा मानसिंह दंडौत
करिकें अपने डेरामें गयौ तब कुंभनदासजी संध्या
आरतीके दर्शन करिकें अपनी सेवासों पहुंचकें
अपने घरकों गये तब राजामानसिंह अपने डेरामें
जायकें अपने पासके मनुष्य हुते तिनमें श्रीगोव-
र्द्धननाथजीके सिंगारका वार्ता करन लागे और
कह्यौजो यह श्रीगोवर्द्धननाथजीके आगे कौन गा-
वत हुतो इनने ऐसे विसन पद गायेहैं जो कछू क-
हिवेमें नाहीं आवत तब काहूनेकही जो महाराज
एक ब्रजवासीहै कुंभनदास नामहै सो आपने

सुनेही होयंगे देशाधिपतिसों मिले हुते सो है तब
 राजामानसिंहने कही जो हमहू इनसों मिलेतौ
 आछौ तब राजामानसिंह सवारै उठे सो श्राग-
 रिराजकी परिक्रमाको निकसे जो परासोली आयै
 सो परासोलीमें कुंभनदासजी न्हायकें बैठे इतनेमें
 श्रीगोवर्द्धननाथजी पधारै श्रीमुखसों कहै जो कुंभ-
 नदासजी हों तो एक बात कहूंगो तब इतनेमें राजा
 मानसिंह आयौ सो कुंभनदासजीको प्रणाम करि-
 कें बैठौ और श्रीनाथजीतौ उहांते दूरजाय ठाडे
 भये सो श्रीनाथजीतौ एक कुंभनदासजीको देखेहै
 और इनकों भतीजीकों देखेहै तब कुंभनदासजीकी
 दृष्टी तौ श्रीनाथजीके संगहीगई सो श्रीनाथजी
 बैठेहैं तहां कुंभनदासजी देखवो करे तब भतीजी
 बोली जोबावा राजाबैठेहैं तब कुंभनदासजीने कही
 जोमें कहाकरूं जो बैठेहैं तो जाबात कहतहुते सो
 तो भाजिगये सो अब कहेंगे तब दूरते श्रीनाथजी
 कहैं जो कुंभनदास में बातकहूंगो तब कुंभनदासजी
 प्रसन्नभयै और भतीजीसों कह्यौ जो अमुकी आ-
 रसी लाउ तिलककरो तब भतीजीने कही जोबावा
 आरसीतौ पडियापीगई तब राजानै कुंभनदासजी-
 की भतीजीसों जो अरीछोरी पडिया कहा पीगई

तब वह कठौठीमें पानी लायके कुंभनदासजीके आगे धर्यौ तब कुंभनदासजी वामें देखिके तिलक करन लागै इतनेमें राजा मानसिंहने अपनी सोने की आरसी कुंभनदासजीके आगे धरी और कह्यौ जो बावायामें देखिके तिलक करिये तब कुंभनदासजी बोले जो अरे भैया याको हों कहा करुंगो हमारे तौ यहां छानिके घरहैं ताते कोऊ याके पाछें हमारो जीव लेयगो ताते हमें तौ यह नाहिं चाहियत है तब राजा मानसिंहने इनके आगे सोनेकी थैलीधरी तब कुंभनदासने कह्यौ जो भैया हमको धनतौ चाहियै नाही हमारे तौ यह खेती है ताको धन आवत है सो खातहैं तब राजा मानसिंहने कह्यौ जो भलौ आपको गामहै ताको लिखौहै करि देउ तब कुंभनदासने कह्यौ जो भैया होतों ब्राह्मण नाहीं जो तेंरो उदक लेउ तब फेरि राजा मानसिंहने कह्यौ जो बावा कछू तो आज्ञा करौ तब कुंभनदासने कह्यौ जो हमारौ कह्यौ कराग तब राजा मानसिंहने हाथ जोर कह्यौ जो महाराज आप कहौगे सो करुंगो तब कुंभनदासने कह्यौ जो फेरि मेरे पास तुम मत आईयौ तब राजा मानसिंहने कह्यौ जो महाराज धन्य है यह मायाके भक्ततौ सगरी

पृथ्वीमें फिरौ सो बहुत देखे परिभगवद्भक्ततौ एक
एही देखे यह कहिकें राजा मानसिंह कुंभनदासकों
दंडौत करिकें डाठ चलयौ तब फेरि आयकें कुंभ-
नदाससों श्रीनाथजीनें वह बात कही और बहुत
प्रसन्न भयौ तब फेरि कुंभनदासजी श्रीगिरराजऊपर
आयकें श्रीनाथजीकी सेवामें तत्पर भयै॥ प्रसंग॥ ३

और एक समय कुंभनदासजीकों मिलिवेकों
बृन्दावनके महंत हरिवंश भूत आयै सो यह जानिकें
आयै सो महापुरुष है इनसों श्रीठाकुरजी बोलत हैं
बाते करत हैं और काव्य इनकी सुनी सो कीर्तन
बहुत सुन्दर कीयै ताते ऐसे पद श्रीठाकुरजीके सा
क्षात्कार विना न होय यह जानिकें कुंभनदाससों
मिलवै आयै सो कुंभनदाससों मिलिकें बहुत प्रसन्न
भये और कह्यौ जो कुंभनदासजी तुमने विसन पद
बहुत कीयै सो हमनें आयकें सुनेहैं और आपको
पद श्रीस्वामिनीजीको नाहीं सुन्यौ ताते आप कोइ
स्वामिनीजीको पद सुनावौ तब कुंभनदासजीनें
श्रीस्वामिनीजीको पद करिकें गायौ ॥ सो पद—

राग रामकली ॥ ताल चरचरी—कुमरिराधिकाकेतुव
सकल सौभाग्यकीवावदनपरकोटिसचंद्रवारौं॥ खं-
जनकुरंगसतकोटिजं घन ऊपर सिंहसतकोटि उपर

न्योंछावर उतारौ मत्तसतकोटि चालिपर कुंभसत-
कोटि इन कुचनपरिवारि डारों ॥ १ ॥ कीर दशकोटि
दशननपरिकहिनवारौ पंककंदूरवहकसतकोटि अ-
धरन ऊपर वारि रुचिर गर्भटारौ ॥ नागसतकोटिवै-
नीऊपरकपोतसतकोटिकरिजुगलपर वारनेनाहिन-
कोऊलोकउपमाजुधारौ ॥ २ ॥ दासकुंभन स्वा-
मिनी सुनख सिखअति अद्भुत सुठान कहालगि
समारौ ॥ लाल गिरधरकहत मोहितौ हिलौ जीवह
रूप छिनछिन निहारौ ॥ ३ ॥

यह पद कुंभनदासनें गायौ सो सुनिके महंत
बहुतही रीझे और कहैं ॥ जो हमनें श्रीस्वामिनीजीके
पद बहुत किये हैं परिवहां उपमादीनीही और वारि
फेरिडारी ताते कुंभनदासजी आप बडे महापुरुष
हों आपकी सराहना कहां ताई करियै वा महंतनें
कुंभनदासकी बडी बडाई करी बहुत रीझे ता पाछें
वे महंत आदि सब कुंभनदासजीसों विदा होयकें
अपने घरगये ॥ प्रसंग ॥ ४ ॥

और एक समय श्रीगुसांईजी श्रीगोकुलमें अपने
घरते श्रीनवनीतप्रियाजीसों आज्ञा मांगिकें विदे-
साथ द्वारिकाकों पधारे सो श्रीगुसांईजी नाथजी-
द्वारि पधारे सो श्रीनाथजीकों सेवासिगार किये

ता पाछें आपभोजनकरिकें गादीऊपर विराजे तब सब सेवक दर्शनकों आये तब बात चलतमें कुंभन-
 दासकी बातचली तबकाहू वैष्णवने कह्यौ जो महा-
 राज कुंभनदासजीकों द्रव्यको बहुत संकोच है सात
 बेटाहूहैं और उपजततौ एक खेतीकी है ताको धन
 आवत है तासों निरवाहकरत हैं सो यह बात श्रीगु-
 सांईजीने अपन मनमें राखी ता पाछें उत्थापनके-
 समय कुंभनदासजी दर्शनको आये तब श्रीगुसां-
 ईजी अपने श्रीमुखसों कहें जो कुंभनदास हम श्री-
 द्वारिका रणछोडजीके दर्शनको पधारेंगे और वि-
 देसहू होयगो वैष्णवने बहुतकरिकें लिख्यौहैं ताते
 जो तुम संगचलोतौ विदेसमें भगवदीयको ग्रहका-
 लबाधा न होय तब भगवदीयको काल व्यतीतहो
 जाय कछू जान्यौ न परै और में सुन्यौहौ जो कछू
 तुम्हारे द्रव्यको संकोच है सो उहां सिद्धि होयगौ
 ताते सर्वथा तुमको चलयौ चाहिये तब कुंभनदास-
 जीने कही जो आज्ञा इतनेमें दर्शनको समय भयौ
 सो श्रीगुसांईजी आप स्नान करिकें श्रीनाथजीके
 मंदिरमें पधारे श्रीनाथजीकी सेवासों पहुंचिके श्रीना-
 थजीको पौठायकें बैठकमें पधारे और कुंभनदास
 जीको सीखदीनी जो कुंभनदासजी तुम सेवासों पहुंच-

चिकें वेग आईयौ हम कालि आरती करिकें अप-
छराकुंड ऊपर जाय रहेंगे तब कुंभनदासजी श्रीगु-
साईजीकों दंडौत करिकें अपने घरकों आये सवारें
सेवासों पहुंचकें श्रीनाथजीके दर्शन करिकें अपछ-
राकुंड ऊपर आयै और श्रीगुसाईजी श्रीनाथजीसों
सीखमांगिकें आप नीचे आयै पाछें आप भोजन-
कीयै और सब सेवकनकों महाप्रसाद लिवायौ ता
पाछें समयें ताहीकों महूर्तहुतौ सो श्रीगुसाई आप
पर्वत नीचे आयै सोई अपछराकुंड ऊपर आयै सो
तहां अपछराकुंड ऊपर डेरा करे हुते सब सेवक
अगाऊ सो ठाडे हुते सो श्रीगुसाईजी डेरा पधारिकें
पोठे इतनेमें सब सेवक सामान लेकें वेऊ आयै सो
कुंभनदास उहां बैठिकें विचारत हुते कहिये जो
कहिबेकी होय प्राननाथ बिछुरनकी विरियां जानत
नाहिं न कोऊ यह विचार करत उत्थापनको समय
भयौ तब आप गुसाईजी आप भीतर डेरामें जागे
और कुंभनदासजीकूं दर्शनकी सुधि आई सो वहां
पुंछरीकी ओर कोनेमें जायकें बैठि कीर्तन गावत
है और आखिनमेंते जलको प्रवाह बहतहौ सो
कुंभनदासने एकपद गायौ ॥ सो पद—

राग सारंग-केते हैं जगरो बिन दख॥तरुण किशो-

रसिक नंदनंदन कछूक उठति मुखरेखें ॥ १ ॥ वह
वह शोभा वह कांति बदनकी कोटिकचंदविसेखें ॥
चितवन वह हास्य मनोहर वह नटवर वपुभेषें ॥ २ ॥
श्याम सुंदर संग मिलि खेलनकी आवत जिये
अपेखें ॥ कुंभनदास लालगिरधर विन जीवन जन्म
अलेखें ॥ ३ ॥

यह पद कुंभनदासनें गायौ सो श्रीगुसाईंजी
आप डेराके भीतरसुनों सो कुंभनदासजीकों कलेश
श्रीगुसाईंजीसों सह्यौ न गयौ सो श्रीगुसाईंजी आप
डराक बाहर पधारें और श्रीमुखते कह्यौ जो कुंभन-
दास अब तुम बेगिजाउ तुम्हारा बिदेसहोय चुक्यौ
और जो तुम्हारी अवस्थाहै ऐसा उनकी अवस्था
है सो कैसें जानिये जो श्रीअक्काजीनें गज्जनधाव-
नकों पानलेवेकों पठायौ सो गज्जनकोंतों भगवद आ-
सक्ति देखें विना एकक्षणहू न रह्यौ जाय सो गज्जन-
धावन पानलेवेकों बाहिर गये सो थोरीसी दूर गये
और ज्वरचढि आयौ सो मूरछा खायकें गिरे और
श्रीअक्काजीने श्रीनवनीतप्रियाजीकों भोग समप्यौ
तब श्रीनवनीतप्रियाजीनें गज्जनधावनको बोलन
सुन्यौ तब श्रीनवनीतप्रियाजीनें अपन श्रीमुखसों
कह्यौ जो मेरो गज्जनधावन कहां है तब श्रीअक्का-

जीनें कह्यौ जो वहतौ पानलेवेकों गयो है तब श्री-
नवनीतप्रियाजीनें कह्यौ जो मेरौ गज्जनधावन आ-
वेगौ तब आरौगूंगौ सो श्रीहस्त खेंचकें बैठरहे तब
बेगिगज्जनधावनकों बुलायौ तब गज्जनधावननें
कही जा बाबा आरोगौ तब श्रीनवनीतप्रियाजी
आरोगे हैं यह श्रीआचार्यजी महाप्रभूकी मर्यादा
है जो जितनों सेवकको स्वामी ऊपर स्नेह होय
और भगवद्गीतामें भगवान कहें हैं ॥

श्लोक-ये यथामां प्रपद्यंते स्तांस्तथैवमजाम्यहं॥
यह आधौ श्लोककह्यौ ताते श्रीमुखसों कहें जो इहां
तुम्हारी विवस्था और उनकी विवस्था है सो ऐसी
कुंभनदासकों और श्रीनाथजीकों विरहहुतो ताते
श्रीगुसाईजीनें कुंभनदासकों सीख दीनी तब कुंभ-
नदासनें श्रीनाथजीके दर्शन कीये तब कुंभनदा-
सने एकपद गायौ ॥ सो पद-

राग सारंग-जो ये चौंपमिलनकी हायें ॥ तौ क्यों-
रहै ताहि विन देखें लाखकरौ जिनकोय॥ जो ये विरह
परस्परव्यापै जो कछूजीवनवनै॥ लौकलाजकुलकी
मर्यादा एकौ चितनगनै ॥ कुंभनदास प्रभूजायतन
लागी और न कछू सुहाया गिरधरलाल तौहि विन
देखे/लिनलिन/कलप विहाय ॥

सो यहपद कुंभनदासने श्रीनाथजीके सन्निधान गायौ सो सुनिकें श्रीनाथजी बहुत प्रसन्न भये सो कुंभनदास श्रीनाथजीकों देखकें प्रसन्न भये॥प्र०॥५

और एक समय कुंभनदासजी श्रीगुसांईजीके पास बैठेहुते तब कुंभनदासने श्रीगुसांईजीसों कह्यौ जो महाराज बेटा डैठ है और हैंतो साथ तब श्रीगुसांईजीने कह्यौ जो कुंभनदास डैठकौकारन कहा तब फेरि कुंभनदासजी कहैं जो महाराज आखौबेटा तौ चन्नभुजदास है और आधौ बेटा कृष्णदास हैं सो श्रीनाथजीकी गायनकी सेवा करत है तासों आधौ है कुंभनदासजी कृष्णदाससों आधौ क्योंकहैं ताको हेत यह जो श्रीआचार्यजी महाप्रभूनने पुष्टिमार्ग प्रगटकीयो है सो पुष्टिमार्गकहा है जो ब्रजभक्तनको हैंत यहमार्ग प्रगट कीयो है सो भगवदीय गाये हैं“ जो सेवा रीतिप्रति ब्रजजगकी जनहितजगप्रगटई” सो ब्रजभक्तनकी कहारीति है जो श्रीठाकुरजीके सन्निधानतौ सेवाकरै और श्रीठाकुरजी वनमें पधारे तब गुणगानकरैं जो ये वस्तु होयतौ आखौ और इनमेंते एक होयतौ आधौ ताते चन्नभुजदास सेवा और गुणगान है ताते आखौ और कृष्णदासमें एक सेवा है सो आधौ तब श्रीगुसांईजी श्रीमुखते

कहैं जो भगवदीय है तेई बेटा है और बहुत भयेतौ
 कौन कामके यह चत्र भुजदासकी वार्तामें लिखे
 हैं ॥ प्रसंग ॥ ६ ॥ वैष्णव ॥ ९० ॥

अथ कृष्णदासकी वार्ता ।

सो वे कृष्णदास श्रीनाथजीकी गायनकेगवालहुते
 श्रीगुसाईजीने इनको गायनकी सेवादीनी हुती सो
 कृष्णदास श्रीनाथजीकी गायनकी सेवाकरते सवारे
 खिरकसेवासों पहुंचकें फेर गायन चरायवेको जाते
 सोसगरेदिन कृष्णदासगायनकीसेवाकरते सोएक-
 दिन गायचरायकें पूछरीकेपोर कृष्णदासगायनके
 संग आवतहुते सो सगरी गायतौ खिरकमेंआई
 औरगायबडीहुती ताकों औन बहुतभारी हुतौ सो
 वहगाय बहुत हरवे २ चलती सो वा गायकों आवत
 अंधियारौपरिगयौ सो तहांपर्वतकेनीचे अंधियारेमें
 एक नाहर निकस्यौ सो गायपै दोरचौ तब कृष्णदा-
 सकहैं जो अरे अधर्मी यहश्रीनाथजीकी गाय हैं तू
 भूखौहोयतौ मेरे ऊपर आऊ तब इतनेमें गायतौ
 भाजिखिरकमें गई और नाहरनें कृष्णदासको अप-
 राध कियौ और ऊपर कहि आये हैं जा गायसब
 खिरकमें आई तब श्रीनाथजी आपगायदुहिवेकों
 सो जो गाय गायनाल तदतहैं और वह बडीगाय

खिरकमें आई सो वह गायकों श्रीदुहिबेकों बैठे और कृष्णदास बछराथामें हैं और वह गाय बछराकों चाटतहै सो ऐसे दर्शन कुंभनदासजीकों भये ता पाछें गोदुहन करिकें श्रीनाथजी गिरिराजऊपर मंदिरमें पधारे तब श्रीगुसांईजीनें भोग समप्यौ और कुंभनदासजी खिरकमेंसे आयै सो दंडौती सिलापास ठाडे भये इतनेमें समाचार आयै जो कृष्णदासकों नाहरनेमारचौ सो सुनिकें कुंभनदास मूर्च्छा खायके गिरे सो ऐसे गिरे जो देहानुसंधान भूल गयै तब कुंभनदासजीकों सब कोऊ बुलावे परि बोले नाहीं तब यह समाचार काहूनें श्रीगुसांईजीसों कहै जो महाराज कृष्णदासको नाहरनें मारचौ और गायकों कृष्णदासनें बचाई सो कृष्णदास उहांही परेहैं तब श्रीगुसांईजी कहै जो गाय कबहुं न छोडि आवै अंत समय गाय संकल्प करतहैं ताको गाय उत्तम लोकको ले जात हैं और कृष्णदासनें तौ श्रीनाथजीकी गाय बचाई हैं ताते कृष्णदासकों गाय कैसें छोडि आवैगी और श्रीगुसांईजीने कहीौ जो कुंभनदासजी कहां है तब काहू वैष्णवनें कही जो महाराज कुंभनदासजीकों कलेश बहुत बाधा कीयौ है जो कुंभनदासजी ऊपर आ-

वत हुते सो कुंभनदासजीके आगे काहूने कृष्णदा-
 सके समाचार कहें सो सुनतही कुंभनदासजी मूर्छा
 खायकें गिरे सो लोग बहुतही बुलावत हैं परि
 आवत नाही तब श्रीगुसांईजीने अपने श्रीमुखसों
 कह्यो जो फेरि कुंभनदासजीकी खबर लावो जो
 कुंभनदासजीकी देह कैसे है सो वे आयकें कुंभ-
 नदासजीको पुकारें तब ये समाचार श्रीगुसां-
 ईजीसों कहें जो महाराज कुंभनदासजीतौ कछू
 समझत नाही तब श्रीगुसांईजी तौ सेनभोगके दर्शन
 करिकें श्रीनाथजीको पोठायकें आप नीचे पधारे
 सो देखकें मागकें साम्हें कुंभनदासजी परे हैं और
 लोग चारचौ ओर ठाडे हैं सो कहतहैं जो कुंभनदा-
 सजी कैसे भगवदीय हैं परि पुत्रको सोक बहुत बुरो
 होतहै या पीरासों कोई बच्च्यो नाही काहेते जो अ-
 पनी आत्माहै तब यह बात लोगनकी सुनिके श्री-
 गुसांईजी मनमें विचारे जो यहांतौ कारण कछू
 और है और लोगनकोतौ कछू और भाखत है ताते
 भगवदीयको स्वरूप करिवेके लिये श्रीगुसांईजी
 अपने श्रीमुखसों कही जो कुंभनदासजी सवारे तुम
 बेगी आइयो तुमको श्रीगोवर्द्धननाथजीके दर्शन
 करावेंगे तुम मनमें खेद मति करौ इतनों श्रीगुसां-
 ईजी श्रीमुखसों कहें तब कुंभनदासजी उठ ठाडे

भये और प्रसन्न भये तब श्रीगुसांईजीकों दंडौत
करिकें कुंभनदासको जो कार्य करनों हौ सो सब
कीयौ पाछें सवारे कुंभनदासजी दर्शनकों आयै
श्रीनाथजीकों सिंगार करिके श्रीगुसांईजीसों कह्यौ
जो प्रथम कुंभनदासजीकों दर्शन कराय देउ सो
कुंभनदासजी वैष्णवनके ऊपर यहकार कीयौ जो
सूतकीको कौन मंदिरमें जानदेतौ सो कुंभनदास-
जीके अनुग्रहते सब कोउ दर्शन करते हैं सो कुंभ-
नदासजी नित्य एक बेर दर्शन करिकें परासोलीमें
जायबैठते सो वहां बैठे २ विरहके पद गावते सो पद-

राग धनाश्री-तुम्हारे मिलन विन दुखित गुपाल ॥
अति आतुरब्रजसुंदरप्यारे विरहीबेहाल ॥ १ ॥ सीत-
लचंदतपत भयोदाहत किरणकमलजनुजाल ॥ चंद-
नकुसुमसुहाय धनसारलगतवदीज्वाल ॥ २ ॥ कुंभ-
नदासप्रभूत्वधनतुमविन कनकलतामानोंसूषीजी-
वमाकाल ॥ अधरामृत वंशीसीचिलेउतुमगिरगोव-
र्द्धनलाल ॥ ३ ॥

राग धनाश्री-अब दिनरात्रि पहारसेभये ॥ तब ते
निघटतनाहिनिजबते हरिमधुपुरीगयै ॥ यह जानियै
विधाता जुगसमकीने जामनयै ॥ जागत जागविहा-
तनके ऐसैं प्रीतठयै ॥ ब्रजवासीअतिपरमदीनभये

व्याकुलसोचल्यै ॥ उन प्राणदुखित जलरुहगनदा-
रुणहेमपयै ॥ कुंभनदासबिछुरतनंदनंदनबहुतसंता-
पकरे ॥ अब गिरधरविनरहतनिरंतरनौतननरिछ्यै ॥

राग केदारो-औरनकों समीपबिछुरनों आयौ मेरी
हिंसा ॥ अबकोजसोवेसुखअपने आलमिकोंचाह-
तरिसा ॥ नाजानों यह विधाताकी गति मेरे आंक-
लिखे ऐसौकोनरिसा ॥ कुंभनदासप्रभूगिरधरकहत
निसदिनरहज्योंचातकघन त्रिसा ॥

ऐसे पद गाय २ कुंभनदासजीनें सूतते पद किये
पाछें शुद्ध होयकें कुंभनदासजी भगवत्सेवामें आयै
ऐसी जिनकों दर्शनकी आरति सो वे कुंभनदासजी
श्रीआचार्यजी महाप्रभूनके ऐसे परम कृपापात्र
भगवदीय हैं ताते इनकी वार्ताको पार नहीं ताते
इनकी वार्ता कहांताई लिखिये प्र० ॥१॥ वै० ॥११॥

अथ कृष्णदास अधिकारी ति० वार्ता ।

सो वे कृष्णदास शूद्र एक वेरद्वारिका गये हुते
सो श्रीरणछोरजीके दर्शन करिकें तहांते चले सो
आपन मीरांबाईके गांव आयौ सो वे कृष्णदास
मीरांबाईके घर गये तहां हरिवंशव्यास आदि दे
विशेषसह वैष्णव हुते सो काहूकों आये, आठ दिन
काहूको आये दशदिन काहूको आये पंद्रहदिनभये
हुते तिनकी विदा न भई हुती और कृष्णदासनें तौ

आवतही कही जो हूंतोचलंगौ तब मीरांबाईने कही
जो बैठो तब कितनेकमहौर श्रीनाथजीको देनलागी
सो कृष्णदासने नलीनी और कह्यौ जो तू श्रीआ-
चार्यजी महाप्रभूनकी सेवकनाहींहोत ताते तेरी भेंट
हम हाथते छूवेंगे नाहीं सो ऐसे कहिकें कृष्णदास
उहांते उठिचले सो जब आगे आयेतब एक वैष्ण-
वनें कह्यौ जो तुमने श्रीनाथजीकीभेंट नाहीं लीनी
तब कृष्णदासने कह्यौ जो भेंटकी कहां है पारि मीरां-
बाईके यहां जितने सेवक बैठे हुते तिन सबनकी
नाक नीचे करिकें भेंटफेरी है इतने इकठोरे कहां
मिलते यह हूं जानेंगे जो एकवेर शूद्र श्रीआचार्यजी
महाप्रभूनको सेवक आयौ हुतो ताने भेंटन लीनी
तो तिनके गुरूकी कहावात होयगी ॥ प्रसंग ॥ १॥

और प्रथम सेवा श्रीनाथजीकी बंगाली करते सो
श्रीआचार्यजी महाप्रभूनने मुकुटकाछनी हीराके
आभरन भराय देने हैं सो नित्य करते सो भेंट
आवती सो खरच होती कछू संग्रह न राखते सब
खरच होय जातौ और बंगाली सेवा करते पाछें
श्रीआचार्यजी महाप्रभूनने कृष्णदासको आज्ञा-
दीनी जो तुम श्रीगोवर्द्धनरहौ सेवा टहलकरौ तब
कृष्णदास अधिकारीभये अधिकारकरन लागै पाछें

एक दिन मथुराको चलनलागै सो अडींगलों पहुंचे
 तब पेंडेमें अवधूतदास मिले महापुरुष हुते ब्रजमें
 फिर्न्यौ करते सो कृष्णदासको मिले तब अवधूत-
 दासनें कह्यौ जो कृष्णदास तुम कहां चले तब कृष्ण-
 दासनें कही जो मथुराजातहाँ कछू काम है तब
 अवधूतदासनें पूछ्यौ जो श्रीनाथजीकी सेवा कोन
 करत है तब कृष्णदासने कही जो बंगाली करत है
 तब अवधूतदासनें कही जो श्रीनाथजीको अपनौ
 वैभवबढावनो है ताते तुम बंगालीनको दूर क्यों
 नाहीं करत सो अवधूतदाससों श्रीनाथजीने कहा जो
 मोको बंगाली बहुत दुःख देत हैं सो तब बंगाली श्री-
 नाथजीको भोग धरते सो उनकी चुटियामें छोटीसो
 स्वरूप हुतौ देवीको सो साम्हें बैठावते जब भोगसरा-
 वते वादेवीको अपनी चुटियामें धरलेते ऐसे सदा-
 करते सो बात अवधूतदासको श्रीनाथजीने जनाई
 ताते अवधूतदासने कृष्णदाससों कह्यौ जो तुम
 बंगालीनको दूर करौ तब कृष्णदासने कही जो श्रीगु-
 साईजीकी आज्ञाविनाकेसे काटें तब अवधूतदासनें
 कह्यौ जो तुम अडेलमें जायकें श्रीगुसाईजीकी
 आज्ञाले आवौ जैसे बने तैसे इन बंगालीनको काटौ
 तब कृष्णदास अडींगते फिरे सो श्रीगोवर्द्धन आये

तब बंगालीनसों कहा जो हूंतौ श्रीगुसांईजीके पास
 अडेल जातहों तुम श्रीनाथजीकी सेवा सावधानीसों
 करियो और सब सब कहते तिनसों कृष्णदासनें
 कह्यौ जो हूंतौ श्रीगुसांईजीके पास कलू काम है
 सो अडेलकों जातहों तुम सावधान रहियो ता पाछ
 श्रीनाथजीसों बिदा होयके अडेलकों चले सो
 दिन १५ में श्रीगुसांईजीके पास आय पहुंचे सो
 आयके श्रीगुसांईकों दडाते कीये तब श्रीगुसा-
 ईजीनें पूछौ जो कृष्णदास तुम क्यों आयै तब
 कृष्णदासनें कह्यौ जो श्रीनाथजीकों अपनों वैभव
 बढावनों है और बंगालीनने बहुत माथौ उठायौ
 है जो भेट आवत है सो लेजात हैं सो सब अपने
 गुरुनको देत हैं तब श्रीगुसांईजी कहैं जो श्री-
 आचार्यजी महाप्रभू असुरव्यामोहलीला दिखाई
 ता पाछें श्रीगोपीनाथजी पूरबको परदेशकीयौ सो-
 एकलक्षकी भेटभई पाछें अडेल आयै तब श्रीगो-
 पीनाथजीनें कही जो यह पहलो परदेश है ताते यामें
 आयौ सो सब श्रीनाथजीको है श्रीनाथजीकों विनि-
 योग कियौ चाहिये ता पाछें श्रीगोपीनाथजी दिन-
 दशबारह रहकें पाछें श्रीनाथजीद्वार पधारे सो जाय
 पहुंच तब श्रीगोपीनाथजीनें दर्शन कीयौ पाछें

जो लाये हुते सो सब भेट कियौ आभूखन सब जडा-
 वके समराये थार कटोरा डबरा चमचा तष्टी प्रभृ-
 त सब सोनारूपाके कियै सब करिके श्रीनाथजी-
 सों बिदा होयके श्रीगोपीनाथजी अडेल आयै ता-
 पाछें बंगाली वरस एकके भीतर सब लगयै अपने
 गुरुके यहां जायके दीयौ यह बात श्रीगुसांईजीनें
 कृष्णदाससों कही और कह्यौ जो बंगालीननें माथौ
 उठायौ परिवे श्रीआर्चजी महाप्रभूनके राखे हैं सो-
 कैसे निकलेंगे तब कृष्णदासनें श्रीगुसांईजीसों कह्यौ
 जो महाराज श्रीनाथजीकी आज्ञा है जो बंगाली-
 नकों निकासौ ताते आप या बातमें कछू मतिबोलौ
 मोकों आप आज्ञा करौतौ अपनों आप करलेउंगौ
 जैसे बंगाली निकसेंगे तैसे काडुंगौ तब श्रीगुसांई-
 जीनें कह्यौ जो अवश्य तब कृष्णदासनें कह्यौ जो
 महाराज दौयपत्र लिखयै एकराजाटोडरमल्लके ना-
 मका एकबीरबलके नामकौ तब श्रीगुसांईजीनें दौय
 पत्रलिखदीने राजा टोडरमल्लकौ और बीरबलकों
 लिखौ जो कृष्णदासकों श्रीनाथजी द्वार भेजे हैं
 जो तुमसों कृष्णदास कहै सो करि देउंगे सो पत्र
 लेके श्रीनाथजीद्वारको चलें सो आगरे आयै तहां
 टोडरमल्ल राजा बीरबलसों मिले पत्र श्रीगुसांईजीके

हुते सो दीये सो उन पत्र बांचिकें कृष्णदाससों
 कह्यौ जो तुम कहौ तैसें करें तब कृष्णदासने कह्यौ
 जो अबतो मैं मथुरा जातहौ बंगालीनकों काढिवेकों
 ता पाछें कृष्णदास राजा टोडरमल्लसों बिदा होयकें
 श्रीनाथजीद्वारको चले सो मथुरा आयै तब मार्गमें
 अवधूतदास मिले तब कृष्णदाससों अवधूतदासने
 कही जो कृष्णदासजी ढील कहा करि राखी है बं-
 गालीनकों काढौ श्रीनाथजीकी ऐसी इच्छाहै श्री-
 नाथजीकों अपनों वैभव फैलावनों है तब कृष्णदा-
 सने कह्यौ जो श्रीगुसांईजीकी आज्ञा लेके आयौ
 हौं अब जायकें बंगालीनकों काढत हौं इतनों क-
 हिकें कृष्णदास चले सो श्रीनाथजीद्वार आयै सो
 वे बंगाली सब रुद्रकुंड ऊपर रहते सो उहां उनकी
 झोंपरी हुती सो कृष्णदासने जराय दीनी तब सोर
 भयौ तब बंगाली सेवा छोडकें पर्वतके नीचे आयै
 तब कृष्णदासने पर्वत ऊपर अपने मनुष्य पठाथ
 दीये तब बंगाली देखेंतौ कृष्णदासने झोंपरीमें आग
 लगाय दीनी है तब सब बंगाली कृष्णदाससों लरन
 लागै तब कृष्णदासने द्वै २ चार ४ लाठी सबनके
 दीनी तब वे बंगाली तहांते भाजे सो मथुरा आयै
 तब रूपसनातनके पास आयकें सब बात कही

तब इतनेमें कृष्णदासहू आय ठाडे भयै तब रूप-
 सनातनने कृष्णदासके ऊपर खीजके कह्यौ जो
 क्योंरे शूद्र तू कोन जो इन ब्राह्मणनकों मारे तब
 कृष्णदासने कही जो हूं शूद्रहों परि तुमहू तौ
 अग्निहोत्री नाहीं तुमहूतो कायस्थ हौ तब सनात-
 नने कह्यौ जो यह बात पात्साह सुनेगौ तौ तू कहा
 जबाब देयगौ तब कृष्णदासने कह्यौ जो होंतो नीके
 जबाब देउंगौ परि तुमको जुबाब देतमें दुःख हो-
 यगौ और तुमकों जबाब आवेगौ जो तुम कायस्थ
 होयके इन ब्राह्मणनसों दंडौत करावत हौ तब
 रूपसनातन तौ चुप है रहै और बंगालीनसों कह्यौ
 जो तुम जानौ ये जानों तब बंगाली मथुराके हाकिम
 पास गयै तब कृष्णदास जाय ठाडे भयै तब हाकि-
 मने कह्यौ जो भयौ सोतौ भयौ परि अब इनकों
 राखौ तब कृष्णदासने कहा जो अब तौ इनकों
 न राखेगें येतौ हमारे चाकर हुते सो हमने इनकों
 सेवा सोंपी हुती सो ये सेवाछोडके क्यों आयै जो
 इनकी झोंपरी जरगई हुती तौ हम नई छवाय देते
 ताते अब हमतौ न राखेगें ताऊपर तुम कहतहौ जो
 हम श्रीगुसाईंजीकों लिखेगें वेकहेंगे तैसे करेंगे तुम
 श्रीगुसाईंजीकों लिखौ पाछें कृष्णदास श्रीनाथजी-

द्वार आये और बंगाली सब अपने श्रीकुंड आये तब कृष्णदासने श्रीगुसाईजीको पत्र लिखो तामें बंगाली काढे सो सब समाचार बिस्तार करिके लिखे और लिख्यो जो अब पधारियेतो भलौ है सो पत्र श्रीगुसाईजीके पास अडेल आयो तापाछे श्रीगुसाईजी अडेलते चले सो श्रीनाथजीद्वार आयै तब वे बंगाली सब आयै तब श्रीगुसाईजीसों कह्यो जो हमको श्रीआचार्यजी महाप्रभू-नने सेवामें राखेहुते सो कृष्णदासने हमको काढे तब श्रीगुसाईजीने कह्यो जो तुम सेवा छोडके क्योंगये दोष तुम्हारोहै ताते अबतो सेवामें न रा-खेंगे तब वा बंगाली बहुत बिनती करनलागे जो म-हाराज अब हम खायंगे कहा तब श्रीगुसाईजीने इनको श्रीनाथजीके बदले श्रीमदनमोहनजीकी सेवादीनी और कह्यो जो इनकी सेवा तुमकरियो जो आवै सो खाईयो तब वे बंगाली श्रीमदनमोह-नजीकी सेवा करन लागै ताते उन बंगालीनने श्री-गोवर्द्धन रहिवौ छोडदीयो ता पाछे श्रीनाथजीकी सेवामें गुजराती ब्राह्मण भीतरिया राखे श्रीनाथ-जीको अपनों वैभवबढावनों हौ सो सब भीतरिया-नको नेग और सबसेवकनको नेग जोजाभांति श्री-

नाथजीने कह्यौ ताभांति श्रीगुसांईजीने बांधौ तबते श्रीनाथजीकी सेवा प्रनालिकाते होनलागी और कृष्णदास अधिकार करनलागे प्रसंग ॥ २ ॥

बहिर श्रीनाथजीने कृष्णदासकों आज्ञादीनि जो श्याममतिको लेकें ताल पखावज लेकें तू परासोलीमें आइयौ कुसोश्यामकुमर आछौ मृदंग बजावते सो श्रीनाथजीकी सैन आरती उपरांत अनोसर भयौ तब कृष्णदास श्यामकुमरके घर गये तब कृष्णदासने श्यामकुमरसों कही श्रीनाथजीने आज्ञा करी है सो मृदंगलेके परासोली चलौ तब श्यामकुमरने कह्यौ जो मोहूकों श्रीनाथजीने आज्ञाकरीहै ताते चलियै तब श्यामकुमर मृदंगलेकें आयौ तब कृष्णदास और श्यामकुमर येदोऊजने परासोलीसों देखेतौ श्रीनाथजी स्वामिनीजी सहित बिराजे हैं तब श्रीनाथजीने श्यामकुमरसों कह्यौ जो तूतौ मृदंग बजाय और कृष्णदाससों कह्यौ जो तू कीर्तन करि और श्रीनाथजी और श्रीस्वामिनीजी नृत्यकीयौ तहां कृष्ण दासने पदगाथौ ॥ सो पद-

राग केदारौ-श्रीवृषभानुनन्दनी नाचतगिरधरसंग
लागडाटउरपतिरपराससंगराखौ ॥ झपतालमिल्यौ
रागकेदारौ सप्तसुरनअवधरतानरंगराख्यौ ॥ पाई-

सुखसिद्धि भरतकामविविधि रिद्धि अभिनवदल स-
तमुहागहुलास रंगराख्यौ ॥ वानता सतजूथ संग-
लिये निरखत क्यों सधसचंद बलिहारी कृष्णदास-
सुधररंगराखौ ॥

यह पद कृष्णदासने गायौ श्यामकुमरने मृदं-
गबजायौ श्रीनाथजी और स्वामिनीजी नृत्य-
कीयौ ताते श्रीमहाप्रभूजीकी कानिते श्रीनाथजी
कृष्णदासके ऊपर ऐसी कृपा करतहुते ॥ प्रसंग ॥ ३ ॥

और कृष्णदासन बहुत पदकीयै तब एक समय
सूरदासजीने कृष्णदाससों पूछा जो तुम पदकरत
हौ तामें मेरी छाया है तब कृष्णदासने सूरदास-
जीसों कह्यौ जो अबक ऐसी पदकरू जा जाम तु-
म्हारी छाया न आवे तब कृष्णदास एकांतमें बैठिके
एकाग्रचित्तकरिके नयौपद करनलागे जो जामें तीन
तुकको कीयौ आर चौथीतुक बन नाहीं तब घडी
दोयलो विचारे जो आगे तुक चलत नाहीं तो भल्लौ
फेरी प्रसादलेके विचारेंगे सो जापत्रमें लिखत हुते
सो पत्र तथाद्रातिलेखनी उहां इधरके प्रसाद लेवेको
उठे जब कृष्णदास प्रसाद लेवेको बैठे तब श्रीनाथ-
जीने आप तीन तुक वा पत्रमें अपने श्रीहस्तसों लि-
खिदीये कृष्णदासने आधौ पद कियौ हुतौ ताको

आप श्रीनाथजी पूरौकरिकें आपतौ पधारे तौ पाछे
 कृष्णदास प्रसाद लेकें आये तब देखौ तौ श्रीनाथजी
 पूरौपदकरिकें श्रीहस्तसों लिखि गये हैं सो देखकें
 कृष्णदास बहुत प्रसन्नभयो और कहे जो सूरदा-
 सजी आवेंतौ पदसुनावै तब उत्थापनके समय सूर-
 दासजी दर्शनकों आयै तब कृष्णदासने कह्यौ जो
 सूरदासजी नयौपद एकमेनें कीयो है तामें तुम्हारी
 छाया नाहीं धरी तब सूरदासजीने कह्यौ जो कहौ
 सुनों तौ जानों तब पद कह्यौ सो पद—

राग गौरी--आवतवनेंकान्हगोपबालकसंगनेंचुकी-
 खुर रेणु छुरतु अलकावली ॥ भौहैंमनमथचापवक्र-
 लोचनवान सीससोभितमत्तमयूरचंद्रावली ॥ उदित
 उडुराजसुंदर सिरोमणि वदन निरखि फूलीनव-
 लजुवतीकुमुदावली ॥ अफूणसकुचअधरबिंबफल-
 हसातकहत कछुकप्रकटित होत कुंददसनावली ॥
 श्रवणकुंडलभालतिलकवेसारिनाक कंठकौस्तुभम-
 णिसुभगत्रिवलावली ॥ रत्नहाटकखचित पुरसियदि-
 कनिपाति बीच राजत सुभपुलकमुक्तावली ॥

अथ श्रीनाथजीकृत--वलयककणबाजूबंद आजानु-
 भुज मुद्रिकाकरदलविराजत नखावला ॥ कणतर-
 मुरलिकामोहित अखिलविश्वगोपिकाजनमसिग्रस-
 थितप्रेमावली ॥ कटि क्षुद्रघंटिकाजटितहीरामयी

नाभिअम्बुजवलितभृगरोमावली ॥ धाय कबहुक-
चलतभक्तहितजानिपियगंडमण्डल रुचिरश्रमजल-
कणावली ॥ पीतकोसयपरिधानें सुंदर अंग चरण-
नुपुरवाद्यगीतसबदावसी ॥ हृदयकृष्णदासगिरवर
धरणलालकीचरणनखचन्द्रिकाहरति तिमिरावली ॥

यह पद कृष्णदासनें सूरदासजीके आगे कही
सो सूरदासजी तीन तुक ताई तौ बोले नहीं और
तीनतुकके आगे कहन लागे तब सूरदासजीने कृष्ण-
दाससों कही जो कृष्णदास मेरे तुमसों बाद है और
प्रभूनसों बाद नहीं में प्रभूनकी वानी पहिचानतहीं
तब कृष्णदास चुपकर रहे ताते कृष्णदास ऐसे भग-
वदीय हैं ॥ प्रसंग ॥ ४ ॥

और एकसमय श्रीनाथजीके भंडारमें कछू साम-
ग्रीचाहियतहुती सो कृष्णदास गाडालेके आग-
रेको आये सो आगरेके बजारमें एकवेश्या नृत्य-
करत हुती ख्यालटप्पा गावतहुती और भीरहुती
सब लोग तमासो देखतहुते सो कृष्णदास बाजा-
रमें तमासेमें जाय ठाडे भये तबभीर सरकगई
तब वह वेश्या कृष्णदासके आगे नृत्य करन लागी
सो वह वेश्या बहुत सुंदर और गावै बहुत आछौ
नृत्य तेसोईकरे सो कृष्णदास वा वेश्याके ऊपर-
रीझे और मनमें कहें जो यहतौ श्रीनाथजीके लाय-

कहै ता पाछें वा वेश्याकों दशमुद्रातौ उहांही दीये
 और कही जोरात्रिकों समाज सहित आइयौ ता-
 पाछें कृष्णदास उहां हवेलीमें उतरे सो सामग्री चहि-
 यत हुती सो सब लेकें गाढा लदाय सिद्धि करवायौ
 तापाछें रात्रि पहर गइ तब वेश्या समाज सहित आई
 तापाछें नृत्य भयौ गान भयौ वापै कृष्णदास बहुत-
 रीझें सो रुपैया सत एक दिये तब वा वेश्यासों कह्यौ
 जो तेरौ गान हू आछौ और नृत्य हू आछौ परिह-
 मारो सेठ है सो तेरे ख्याल टप्पा ऊपर रीझें गो नहीं
 ताते हों कहीं सो गाइयौ तापाछें कृष्णदास नें एक
 पूरबीरागमें पद करिकें सिखायौ तापाछें दूसरे दिन
 वा वेश्याकों साथ लेके चले सो आगरेते आयै पाछें
 तीसरे दिन श्रीनाथजी द्वार आयै सामग्री सब भंडा-
 रमें धराई तापाछें जब उत्थापनको समय भयौ तब
 कीर्तनिया काहूकों बागे न दीयै तब वा वेश्याकों
 समाज सहित लगयै श्रीगुसांईजी मंदिरमें ठाढ़े
 श्रीनाथजीकों मूंढा करत है और मणिकोठामें वेश्या
 नृत्य करन लागी और यह पद गायौ ॥ सो पद-

राग पूरबी-मोमन गिरधर छविपर अटक्यौ ॥
 ललित त्रभंगी अंगन परिचलि गयौ तहां ईठटक्यौ ॥ १ ॥
 सजल श्यामवन चरण नीलह्वै फिरचित अनितन भ-

टक्यौ ॥ कृष्णदास कियौ प्राणन्यौछावरि यह तन
जगसिरपटक्यौ ॥ २ ॥

यह पद वा वेश्यानें गायौ सो जब गावत २
पिछलीतुक आई जो "कृष्णदास कियौ प्राणन्यौछा-
वर यह तन जग सिरपटक्यौ " इतनों कहत मात्र
वा वेश्याके प्राण ततकालनिकसिगयै और दिव्य
स्वरूप धारिके श्रीनाथजीकी लीलामें प्राप्त भई और
वा वेश्याके समाजी हुते सो मरन लागे जो हमारी
तौ यातें जीविकाहुती अब हम कहा खायंगे तब
कृष्णदासनें कह्यौ जो तुम क्यों रोवतहौ चलौ नीचे
खायवेको देखुं तब उन समाजीनकों नीचे लायके
कृष्णदासनें सहस्र रुपया दे बिदा कियै कृष्ण दासने
अपने मनते समर्पी ताते श्रीनाथजीनें वा वेश्याकों
अंगीकार करी ताते श्रीआचार्यजी महाप्रभूनकी
कानितें सेवककी समर्पी वस्तुयाभांतिसों अंगीकार
करत हैं ॥ प्रसंग ॥ ५ ॥

और कृष्णदासको गंगाबाईसों बहुत स्नेहहुतो
सो श्रीगुसांईजीकों न सुहावतौ सो एकदिन श्रीगु-
सांईजी श्रीनाथजीकों भोगसमर्पितहुते सो सामग्री
ऊपर गंगाबाईकी दृष्टीपरी ताते श्रीनाथजी आरोगे
नाहीं परिभोगतौ समर्प्यौ ता पाछें समय भयौ तब
भोग सरायो तब आरती करि अनोसरि करिकें

श्रीगुसांईजी आप नीचे पधारे तब सेवक आदि भीतरिया सबने प्रसाद लीयौ तब श्रीगुसांईजी आप तौ भोजन करिके पोढ़े तब श्रीनाथजीने भीतरियाकों लातमारिके जगायौ और वासूं कहैं जो हंतौ भूखो हूं तब वा भीतरियाने कह्यौ जो महाराज श्रीगुसां-ईजीने भोग समप्यौं हौ और तुम भूखे क्यों रहै तब श्रीनाथजीने कही जो राजभोगमें तो गंगाबाईकी दृष्टी परीहुती ताते राजभोग आरोग्यौ नहीं तब वह भीतरिया उठि श्रीगुसांईजीके पास आयौ सो श्रीगुसांईजी भोजन करिके पोढ़े हुते तब भीतरियाने आयके श्रीगुसांईजीके चरण दावै तब श्रीगुसां-ईजी चौंकि उठे तब देखेंतौ श्रीनाथजीको भीतरि-याहै तब वा भीतरियासों पूछौ जो यहां इतनीबेर कहां आयौ हौ तब वा भीतरियाने कह्यौ जो महा-राज आज श्रीनाथजी भूखे हैं मौकों लात मारिके जगायौ और कह्यौ जो आजतौमें भूखौ हौ तब मेने श्रीनाथजीसों कह्यौ जो महाराज भोगतौ श्रीगुसां-ईजीने समप्यौं हौ तुम भूखे क्यों रहै तब श्रीनाथ-जीने कही जो सामग्रीपर तो गंगाबाईकी दृष्टि परी तातेमें नहीं आरोग्यौ तब श्रीगुसांईजी सुनतही ततकाल स्नान करिके पर्वतऊपर पधारे सो वह भीत रियाह स्नान करिके श्रीगुसांईजीके साथही आयौ

तब श्रीगुसांईजीके वा भीतरियासों कही जो भात और बडीकरो जो तत्काल सिद्ध होय आवै तब भात और बडीकरीसो तत्काल सिद्ध भयो तब श्रीनाथजी को भोग समप्यो पाछे भीतरिया रसोईकरिके स्नान करिके पर्वतऊपर आयै तब श्रीगुसांईजीकी आज्ञा भई जो राजभोगकी सामग्री तो भई सिद्धि ता पाछे राजभोग सेनभोग इकठौरो समप्यो ता पाछे समय भयो तब भोगसराय सेन आरती करी तब श्रीनाथजीको पोढायै भोगसरयो हो सो प्रसाद एक डवरामें उहांई रहगयो तब रामदास भीतरियानें कही जो पहले भोग समप्यो हुतौ सो उहांही रह गयो तब श्रीगुसांईजी डवरामेंते ठलायके लेतउतरे पाछे सब सेवकनको वह बडी भातको महाप्रसाद रंचक २ बांटी दीनो ता पाछे श्रीगुसांईजी आपहू आरोगे सो वह बडी भातको प्रसाद अतिअद्भुतिभयो अतिअलौकिक स्वादभयो सो श्रीगुसांईजी आपसरायो तब कृष्णदास ठाडे हुते तब कृष्णदासने कही जो महाराज आपही करनहारे आपही आरोगनहारे तो क्यों न उत्तम होय तब श्रीगुसांईजीने हंसके कही जो यह तुम्हारेही कीये भोगत हैं ॥ प्रसंग ॥ ६ ॥

अब जो यह बात श्रीगुसांईजीने कही जो यह तुम्हारेही कीये फल भोगत हैं सो यह बात सुनके

कृष्णदासने श्रीगुसांईजीसों बिगाडी तब श्रीगुसां-
 ईजीसों कृष्णदासने कही जो तुम पर्वतऊपर मति
 चढो तब श्रीगुसांईजी आप तौ तहांते फिरे सो
 परासोलीमें आय रहै तब मनमें विचारौ जो कृष्ण-
 दास कहामने करेगौ परि श्रीनाथजीकी इच्छा
 ऐसीहै सो श्रीनाथजीकी इच्छा जानिकें कछू बोले
 नाहीं सो आप परासोलीमें रहैं सो परासोलीमें ध्व-
 जाके साम्हें बैठिकें विज्ञप्ति कियौ और श्रीगुसांईजी
 तीनदिनतौ श्रीगोवर्द्धनरहते और तीनदिन श्रीगो-
 कुलरहते तब ते परासोली आय रहै तब श्रीगुसां-
 ईजी श्रीनाथजीके मंदिरकी खिरकी परासोलीकी
 ओर पडती ताके साम्हेंबैठिते तब श्रीनाथजी आप
 खिरकीमें आय दर्शन देते तब यह जानिकें कृष्ण-
 दासने परासोलीकी ओरकी खिरकी बनवाय दीनी
 तब ते श्रीगुसांईजी गोकुलते जब परासोली आवते
 तब रामदासजी सबसेवक आदिदे श्रीनाथजीके
 राजभोग आरती करिकें अनोसरिकरिकें श्रीगुसां-
 ईजीके दर्शनको परासोली आवते सो आयकें चर-
 णोदक लेय पाछें प्रसादलेते सो कृष्णदासकों सुहा-
 वतौ नाहीं और सबसेवक श्रीगुसांईजीके दर्शन
 विना महाप्रसाद कैसे लेय पारि सेवकनसों कृष्ण-
 दासकी चले नाहीं और श्रीगुसांईजी एक पत्र

लिखकें रामदास भीतरियाकों देते और कहते जो श्रीनाथजीको दे दीजौ सो पत्र श्रीनाथजीको देते श्रीनाथजी विज्ञप्त उत्तर लिखिकें रामदासकों देते सो रामदास श्रीगुसांईजीकों देते तब श्रीगुसांईजी वा पत्रकों वांचिकें पानीमें पीजाते या भांतिसों छै महीना बीते परि श्रीगुसांईजीने श्रीनाथजीकों अधिकारी वैष्णव जानिकें और श्रीआचार्यजी महा-प्रभूनकों सेवक जानि कछू न कह्यौ परि श्रीनाथजीके बिरहको स्नेह बहुत करते या भांति छै महीना भयै तब एक दिन राजा बीरबल आय निकसे तब ता दिन तौ श्रीगुसांईजी परासोलीहुते श्रीगिरधरजी घर हुते तब राजा बीरबलने श्रीगुसांईजीको खबर कराई तब पोरियानने कही जो श्रीगुसांईजीतो परासोली है श्रीगिरधरजी घरहैं तब राजा श्रीगिरधरजीके दर्शनकों आयै तब बीरबलसों श्रीगिरधरजीने कही जो कृष्णदास अधिकारी काकाजीको श्रीनाथजीके दर्शन नहीं करन देत सो काकाजीकों खेद बहुत होतहै काकाजी परासोलीमें जाय दर्शन करतहैं तब बीरबलने श्रीगिरधरजीसों कह्यौ जो अबहूँ जायके कृष्णदासकों कातूंगौ यों कहिकें राजा बीरबल श्रीगिरधरजीसों बिदा होयकें मथुरा आयै और श्रीगुसांईजी परासोलीते श्रीगोकुल

आये और बीरबलने पांचसो मनुष्य भेजे और
 कह्यो कृष्णदासको पकरि लावो सो वे मनुष्य श्री-
 गोवर्द्धन आयके कृष्णदासको पकरि लाये सो वे
 बीरबलने कृष्णदासको बंदीखानेमें दीनों तब श्री-
 गिरधरजीसों कहवाय पठाई जो कृष्णदासको बं-
 दीखानेमें दीनो है तब श्रीगिरधरजीने श्रीगुसां-
 ईजीसों कही जो कृष्णदासको बंदीखानेमें दीनेहैं
 तब श्रीगुसांईजीने कह्यो जो हाय हाय श्रीआचा-
 र्यजी महाप्रभूनके सेवकनको ऐसो कष्ट तब श्री-
 गुसांईजीने श्रीगिरधरजीसों कह्यो जो तुमने कह्यो
 होयगौ तब श्रीगिरधरजीने कह्यो जो हमने तो
 बीरबलसों सहजही कह्यो हुतौ जो काकाजीको
 दर्शन नाहीं करन देते सो काकाजीको बहुत खेद
 होत है तब श्रीगुसांईजीने कह्यो जो भोजन जब
 करुंगौ तब कृष्णदास आवेगौ तब श्रीगिरधरजी
 ततकाल घोडा मंगाय असवार होयके मथुराको
 आये तब बीरबलसों कह्यो जो काकाजी भोजन
 नाहीं करत ताते कृष्णदासको छोड देउ तब राजा
 बीरबलने कृष्णदास श्रीगिरधरजीके हवाले कर
 दियो तब श्रीगिरधरजी ततकाल संगले श्रीगोकुल
 आये तब श्रीगुसांईजीने सुनी जो श्रीगिरधरजी
 कृष्णदासको साथ लेके आवत हैं सो श्रीगुसांईजी

ठकुरानी घाटऊपर पहुँचे और वा ओरते कृष्णदास
आये सो श्रीगुसांईजीकों दर्शन कियौ और दंडौत
करी और एक नयौ पद करिके गायौ ॥ सो पद—

राग केदारौ—श्रीबिडलजूके चरणकीवलि ॥ हमसे
पतितउधारनकारन परमकृपालआये आपनचलि ॥
उज्जलअरुणदयारंगरंजित दशनखचंद्रविहरत मन
निरदलि ॥ सुभगकरसुखकरशोभन पावनभक्तिमु-
दितललितकर अंजलि ॥ अतिसेमरदुलिसुगंधसु-
शीतल परतत्रिविधितापडारतमल ॥ भजिकृष्णदास
वार एक सुधिकरि तेरौ कहाकरेगौ रिपुकल ॥

यह पद श्रीगुसांईजीके आगे गायौ पाछें श्री-
गुसांईजी कृष्णदासकों अपने घर ल आये पाछें
कृष्णदाससों श्रीगुसांईजीने कहाँ जो उठौ भोज-
नकरौ तब कृष्णदासने कहाँ जो महाराज आप-
भोजन करिये पाछेंमें झूठन लेउंगौ तब श्रीगुसां-
ईजी भोजनको बैठे तब कृष्णदासने एक पद और
गायौ सा पद—

राग कान्हारौ—ताहीकोंसिरनाइये जो श्रीवल्लभसुत-
पद रजरतिहोय ॥ कीजैकहा आनऊँचेपदतिनसों-
कहासगाई मोय ॥ सार सार विचारमतौकरिश्रुतिव-
चनगोधनलियोनिचोय ॥ तहांनवनीतप्रगटपुरुषो-
त्तमसहजई गोरसलियो ॥ विलीय जाके मनमें उग्र

भरम है श्रीविठ्ठल श्रीगिरधरदोय ॥ ताको संग-
विषमविषहूते भूलिहूचातुरकरहैजिनकोय ॥ जिन
प्रतापदेखिअपने चख असमसारजोभिदेन तोहि ॥
कृष्णदासतेसुरते असुर भये असुरते सुर भये
चरणनछोह ॥ ४ ॥

यह पद सुनिकें श्रीगुसांईजी बहुत प्रसन्न भये
पाछें श्रीगुसांईजी भोजन करिकें पधारे तब कृष्ण-
दाससों कह्यौ जो अब जाउ भोजन करौ तब कृष्ण-
दास भीतर गयेतब श्रीगिरधरजीनें श्रीगुसांईजीकी
झूठनकी पातर कृष्णदासके आगे धरी तब कृष्ण-
दासनें महाप्रसाद लिनोपाछें बीडा दोयदीयैरात्रिकों
कृष्णदासबहांई सोयरहै तापाछें पिछली रात्रि बडी
दोय रही तब श्रीगुसांईजी उठे देह कृतकरिकें स्नान
कियौ श्रीनवनीत प्रियाजीके मंगलाके दर्शन करिकें
बाहिर पधारे तब श्रीनाथजी द्वार पधारवेकी तैया-
रीकीये तब घोडा दोय मंगायै एक घोडा ऊपर
श्रीगुसांईजी असवार भये एक घोडा ऊपर कृष्ण-
दास असवारकीयौ और श्रीगोकुलते चले सों श्री-
नाथजीद्वार दिनपहर सवा एकचढे जाय पहुंचे सों
यहां श्रीनाथजीको राज भोग आयौ हुतौ सों श्री-
गुसांईजी ततकाल स्नान करिकें ऊपर पधारे और
श्रीगुसांईजी विज्ञापत्र परासोलीते लिखते सों रा-
मदास भीतारियाके हाथ पठावते ताको प्रतिउत्तर

श्रीनाथजी पत्रमें लिखिके श्रीगुसांईजीको पठावते सो श्रीगुसांईजी जलमें घोरपीजाते सो पिछले दिनको पत्र श्रीनाथजीके हस्ताक्षरको सो श्रीगुसांईजी राख हुते सो पत्र साथही ले आये हुते पाछे श्रीनाथजीको राजभोग आयौ हुतौ सो समय भयौ तब श्रीगुसांईजी भोगसरायवेको पधारे तब श्रीगुसांईजीको देखके श्रीनाथजी बहुत प्रसन्न भये और पूछौ जो नीकेहौ तब श्रीगुसांईजी कहें जो तुमको देखे सोई दिननीके हैं पाछे परस्पर दोऊ जने मुसिक्याये पाछे श्रीगुसांईजी राजभोग सरायौ पाछे वह पत्र हुतौ सो झापीमें धर्यौ पाछे राजभोगके दर्शन खुले तब कृष्णदासने कीये पाछे श्रीगुसांईजी राजभोग आरती करि अनोसारी करि नाचि पधारे पाछे रसोई करि भोग समर्पित भोजन करि श्रीगुसांईजी पोढे सो उत्थापनते घडी दोय पहले उठे पाछे उत्थापनको समय भयौ तब स्नान करि ऊपर पधारे सो संखनाद करवायौ श्रीनाथजीके उत्थापन भयै पाछे सेन आरती उपरांत दर्शन करिके कृष्णदासको श्रीनाथजीके सन्निधान बुलायौ और कहौ जो कृष्णदास तुम अधिकार करौ और श्रीनाथजीकी सेवा नीकी भांतिसों करियौ तब कृष्णदासने श्रीनाथजीके सन्निधान एक पद गायौ ॥ सो पद—

राग कान्हरो—परमकृपालश्रीवल्लभनंदन करत कृ-
पानिजहाथ दे माथै॥ जे जनशरण आयै अनुसरही-
गहिसौंपति श्रीगोवर्द्धननाथै ॥ परमउदारचतुर-
चिंतामणिराखत भव धरातै साथै ॥ भजिकृष्णदास
काज सब २ सरहीं जो जानै श्रीविठ्ठलनाथै ॥ २ ॥

यह पद गायौ और वीनती कीनी जो महाराज
मेरौ अपराध क्षमा करौ तब श्रीगुसांईजीने कह्यौ
तुमारौ अपराध श्रीनाथजी क्षमा करेंगे पाछे कृष्ण-
दासको विदा कीयो पाछे श्रीनाथजीको पोढायकें
श्रीगुसांईजी नीचे उतरै श्रीगुसांईजी परम दयाल
कृष्णदासको सत कछूमनमें आनौ श्रीआचार्यजीके
सेवक जानि अनुग्रह कीयौ पाछे श्रीगुसांईजी
दिन दोय रहै पाछे श्रीगोकुल पधारे फिर कृष्णदास
श्रीगुसांईजीकी आज्ञाते अधिकार करन लागै ॥
प्रसंग ॥ ७ ॥

सो बहुती वरसलो भली भांतिसौ अधिकार
कियौ पाछे वैष्णवने कृष्णदाससौं कही जो मोकों
एक कूआ बनवावनों है और मोकों अपने देशकों
जानों है ताते द्रव्य तुमकों दे जातहों सो तुमबन-
वाय दीजो तब कृष्णदासने कही जो आछौ तब
वह वैष्णव तीनसौ रुपैया देकें अपने देशको गयौ
तब कृष्णदासने उन रुपैयानमेंते एकसौ रुपैया
एक कूलहरामें धरिकें आमकें वृक्षके नीचे गाड

दीये कह्यौ जो दोयसे रुपैया लाचुकेंगे तब इनको काटेंगे सो आछौ मुहूर्त देखिके रुद्रकुंड ऊपर कूआ खुदायौ तब कितनेक दिनमें वह कूआ मोहताई बनके तयार भयौ और दोयसे रुपैया लगै मठोठा-बाकी रह्यौ तब उत्थापनके दर्शन करिके कृष्णदास कूआ देखनको गये सो हाथमें आसाहुतौ सो आसाटेकके कूआके ऊपर ठाड़े भये सो वह आसा सरक्यौ तब कृष्णदास कूआमें जाय परे तब तो मनुष्य दोय कूआमें उतरे सो बहुतेरो दूढ़े परिकृष्णदासको शरीरहून पायौ तब सब मनुष्य उहांते फिर आयै सो ता समय श्रीगुसांईजी श्रीनाथजीको सेन भोग धारिके मंजूषविराजैहुते और रामदास श्रीगुसांईजीके पास बैठे हुते तासमय काहूने आयके कह्यौ जो महाराज कृष्णदासने कूआ बनबायौहौ सो कृष्णदास देखन गयै हुते सो आसाटेकिके कूआके मोहडे ऊपर ठाड़े हुते सो आसासरक्यौ सो कूआमें गिरपरे और मनुष्य दोय कृष्णदासको दूढ़ेको उतरे सो बहुतेरौ दूढ़े परिशरीरहून पायौ कहा जानियै कहाभयौ तब रामदासजी कहै॥ जो "अधो गच्छंतितामसाः" ॥

तब श्रीगुसांईजी कहै जो रामदास ऐसे नकहि अब जो कृष्णदासकूआमें गिरेसो शरीरन मिल्यौ ताको कारन कहा सो ताको कारन यह जो कृष्ण-

दासमें कोई अलौकिक जीवहुतौ सो तो श्रीनाथजीकी सेवामें प्राप्त भयौ और कृष्णदासने यासरीरसों श्रीगुसांईजीकी अवीज्ञा करी है जो यह शरीर अलौकिक जीव भुगतनों हौ सो कूआमें गिरतमात्र कृष्णदासको शरीरलौकिक सद्य होयकें पूछरीकी ओर एककृष्ण है पीपरको तहां प्रेत होयकें रह्यौ भोग भुगतनको ताते कृष्णदासको शरीरकूं आमें न मिल्यौ श्रीगुसांईजीकी अवीज्ञाते कृष्णदासकी यह गति भई जो प्रेत होयकें पूछरीकी ओर पीपरके वृक्षऊपर बैठे रहत हैं ॥ प्रसंग ॥ ८ ॥

और एक समय श्रीनाथजीकी भैंसि खोयगई हुती सो गोपीनाथ ग्वाल और चार पांच ग्वाल पूछरीकी ओर दूठवेकों गये हुते सो गोपीनाथ देखें तौ पूछरीकी ओर श्रीनाथजी खेलत हैं और एक पीपरऊपर कृष्णदास प्रेतहैके बैठे हैं तब कृष्णदासने गोपीनाथ ग्वालसों कही जो अरे भैया मेरी बीनती श्रीगुसांईजीसों करियो और कहियो जो कृष्णदासने कह्यौ है जो हों तुम्हारौ अपराधीहौ ताते मेरी यह अवस्था है हूं श्रीनाथजीके पास हूंतौ मेरी गति होत नाही ताते मेरौ अपराध क्षमा करौ तो मेरी गति होय और बागमें एक आमके वृक्षके नीचे कूलहरामें एकसौ रुपैया गडे हैं सो काढिकें

वा कूआको मठोठा बाकी रह्यो है सो बनवाओ तो मेरी गति होय सो गोपीनाथग्वालने यह बात श्रीगुसांईजीके आगे कही जो महाराज कृष्णदास अधिकारीने यह वीनती करी है तब श्रीगुसांईजीने आमके नीचेते रुपैया लायके मठोठा कूआको बनवायौ तब कृष्णदासकी गति भइ कृष्णदासको प्रेत-जोनमें श्रीनाथजी दर्शन देते ताको कारन यह जो श्रीनाथजीके सन्निधान श्रीगुसांईजीने कृष्णदाससों कह्यो जो कृष्णदास तुम अधिकार करो श्रीनाथजीकी सेवा नीकी भांतिसों करियो तब कृष्णदासने कह्यो जो महाराज मेरो अपराध क्षमा करौ तब श्रीगुसांईजीने कह्यो जो तुम्हारो अपराध श्रीनाथजी क्षमा करेंगे सो श्रीनाथजीकी कृपाते श्रीनाथजीने अपराध क्षमा करचौ सो प्रेत जोनमें दर्शन देते परि स्पर्श न कीयौ जो स्पर्श होयतो उद्धार होय सो उद्धार तौ श्रीगुसांईजीके हाथ है कृष्णदास श्रीनाथजीसों कहते जो महाराज तुम मोको दर्शन देत हौं मोसों बोलतहौं और में प्रेतहौं ताते मेरो उद्धार क्यों नहीं करत तब श्रीनाथजीने कह्यो जोहूं तोको दर्शन देतहौं बोलत हौं सोतौ श्रीगुसांईजीके वचनके लिये नहीं तो प्रेतजोनमें दर्शन नहीं देतौ और बोलतोहू नहीं और उद्धारतौ श्रीगुसांई-

जकिं हाथ है तेने श्रीगुसांईजीको अपराध कीयौ है ताते श्रीगुसांईजी उद्धार करेंगे तब होयगो ता पाछें श्रीगुसांईजी आप परम कृपाल कृष्णदासके उपर दया आई जो अबतौ बहुत दिन भये हैं ताते अब उद्धार होयतौ भलौ तब श्रीगुसांईजी ध्रुवघाट ऊपर आयकें कृष्णदासको करम करवाय उद्धार कीयौ तब कृष्णदासको उद्धार भयौ और लीलामें प्राप्ति भयौ और श्रीगुसांईजी कहैं जो कृष्णदासने तीन बात अच्छी करी एकतौ अधिकार कीयौ सो ऐसो कियौ जो फेरि ऐसो न करौ दूसरे कीर्तन किये सो अद्भुत किये और तीसरे श्रीआचार्यजी महाप्रभूनके सेवक होयकें सेवाहू ऐसी करी जो कोऊ न करेगौ ताते वे कृष्णदास श्रीआचार्यजी महाप्रभूनके ऐसे परम कृपापात्र भगवदीय हैं ताते इनकी वार्ताको पार नाहीं ताने इनकी वार्ता कहांताई लिखिये ॥ प्रसंग ॥ ९ ॥ वैष्णव ॥ ९२ ॥

इति श्रीआचार्यजी महाप्रभूनके सेवक परम कृपापात्र
चौरासी मुख्य वैष्णवनकी वार्ता सम्पूर्ण ॥

पुस्तक मिलनेका ठिकाना—

गंगाविष्णु श्रीकृष्णदास,
“ लक्ष्मीवेङ्कश्वर ” स्टीम प्रेस,
कल्याण—मुंबई.

खेमराज श्रीकृष्णदास,
“ श्रीवेङ्कश्वर ” स्टीम प्रेस,
मुंबई—खेतवाडी.